

大复集

何景明

文硕阁

wenshuoge.com

目录

关于我们	4
提要	6
序	7
卷一	10
卷二	17
卷三	21
卷四	26
卷五	29
卷六	36
卷七	42
卷八	50
卷九	59
卷十	67
卷十一	75
卷十二	82
卷十三	90
卷十四	98
卷十五	106
卷十六	117
卷十七	128
卷十八	139
卷十九	150
卷二十	161
卷二十一	172
卷二十二	183
卷二十三	194
卷二十四	200
卷二十五	209
卷二十六	218
卷二十七	226
卷二十八	234
卷二十九	246
卷三十	254
卷三十一	262
卷三十二	268
卷三十三	275

卷三十四		280
卷三十五		286
卷三十六		292
卷三十七		301
卷三十八		306
何先生傳		313

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等謹案大復集三十八卷明何景明撰景明字仲默信陽人弘治壬戌進士官至陝西提學副使事跡具明史文苑傳是集凡賦三卷詩二十六卷文九卷傳誌行狀之屬附錄於末正嘉之間景明與李夢陽俱倡為復古之學天下翕然從之文體一變然二人天分各殊取徑稍異所尚亦復有不同故集中與夢陽論詩諸書反覆詰難斷斷然兩不相下自薛蕙有俊逸終憐何大復粗豪不解李空同之句論者往往左何而右李平心而論摹擬蹊徑二人之所短畧同至夢陽雄邁之氣與景明諧雅之音亦各有所長正不妨離之雙美也景明於七言古體深崇四傑轉韻之格見所作明月篇叙中王士禎論詩絕句有曰接跡風人明月篇何郎妙悟本從天王楊盧駱當時體莫逐刀圭誤後賢乃頗不以景明為然其實七言肇自漢氏率乏長篇魏文帝燕歌行始自為音節鮑照行路難始別成變調繼而作者實不多逢至永明以還蟬聯換韻宛轉抑揚規模始就故初唐以至長慶多從其格即杜甫諸歌行魚龍百變不可端倪而洗兵馬高都護驄馬行等篇亦不廢此一體士禎所論以防浮艷塗飾之弊則可必以景明之論足誤後人則不免於懲羹而吹壺也乾隆四十三年三月恭校上

總纂官【臣】紀昀【臣】陸錫熊【臣】孫士毅

總校官【臣】陸費墀

序

大復集序

古今論曰文以代變非也要之存乎人焉耳矣唐虞三代禮樂敷教詩書弘訓義旨溫雅文質彬彬體之則德植達之則政修寔斯文之會極也漢魏而下較諸古昔殊矣厥辭繁厥道寡厥致辯厥旨近日趨于變然爾若所謂代變也及考夫董賈揚馬李杜韓柳諸賢各運機衡以追往訓當世文軌靡得而拘今綜八子視之殆自致羽翮凌駕文囿者矣非存乎其人何哉吾友大復何子蚤歲能文下筆輒數千言不休十有六齡即舉于鄉至京師學士大夫慕其神藻無不降重造謁以求識面及登第與北郡李獻吉為文社交稽述往古式昭遠模攢棄積俗肇開賢蘊一時修辭之士翕然宗之稱曰李何云今詳其文侵謨匹雅欲騷儷選遐追周漢俛視六朝溫醇典雅丰容色澤靡不備舉標而彰之將並日月朗於太虛豈非高邁獨立出世離類不為時拘者耶古稱雄視百代斯文信矣浚川子往與孟望之論大復乃問世精氣所鍾造化靈秘之久一旦勃勃附化何所不神耶故生而即文即知事即賢即老成即有古人風節非神解之故乃爾能之耶夫人墳籍孰不探道旨孰不詮文辭孰不脩風調孰不循德履孰不習終格於不類者天畀之解未神爾正德末余督學四川大復督學關中一日走書曰孔孟藐矣學漸支離塗岐矣後生汶汶以塞邇得論說數十欲與君約境上之會期越月之講然竟不果來今集亦不見有此論豈終未成耶抑遺之耶悲哉悲哉其未之究竟者若此天實為之矣漁石唐子曰以何子之才而得壽考廓而大之綸而不息殆濇乎河漢而無涯也嗟嗟豈不信然哉大復集辭賦三卷四言古詩一卷樂府二卷使集二卷家集五卷京集七卷秦集一卷內篇一卷外篇四卷通二十六卷別論若干卷刻在潞州斯集棗行久矣尚未託有序列其甥王君朝良泣謂余曰公吾舅氏之知己也茲言非公其誰嗟乎造化奪大復去矣斯文出於元精應與元氣並存雖造化亦不得而奪之古謂華質長潛而靈跡不滅者其以是夫其以是夫

嘉靖十六年六月初伏日儀封王廷相子衡撰

大復集序

何子仲默生而敏悟童子時即執簡賦詩邈焉寡儔長益肆力焉探冥抉奇增華漱潤輒晉魏而上之惜乎三十九而卒乃已焉矣康子德涵張子時濟皆何子之友也何子既沒張子收其逸稿訪康子于潞西之野而共揚摧之凡得若干首洋洋纚纚一唱三嘆而有遺音焉時關中執事君子咸興嘉樂之懷乃檄而傳之得非以古昔有詩之教邪夫詞不雅與雅而闕于行者皆弗得傳即傳弗遠何子詞則雅矣其行履復嶮然而有令名則傳之也固宜嗚呼以何子之才而得壽考廓而大之綸而不息殆濇乎河漢而無涯矣也天顧陋而夭之而俾弗竟其緒乎予聞天之大化理以經之數以緯之以理御數則履其常數角而勝焉變斯出矣是故牛之行羸然而疾也田之仁隕然而夭也誠格于數即古之大賢猶俛而從之何子其若之何抑諸斷鵠之劍照乘之珠天下之至寶也假于塗之人則主人匍匐往索之而不俟越宿焉是故李賀夜夢神人請賦白玉樓覺即屬續殆又一道已乎何子斷鵠之劍照乘之珠也則天恒靳其光

矣而能不收之邪是亦不可不謂之數也

嘉靖三年三月既望蘭谿唐龍撰

大復集序

明興百六十年其文遐哉盛矣然作者接轍于域中其敦致古昔逖稱先王人人能矣而義意繁猥溢于往訓摹倣標敝遠於事實予猶以為過云弘治時上興化重文士大夫翕然從之文視昔盛焉是時仲默為中書舍人而予以次第為翰林修撰一時能文之士凡予所交與者不可勝計予顧獨以仲默為難能仲默時方弱冠也予每見仲默之作嘆曰嗟乎文其在茲乎夫敘述以明事要之在實論辨以稽理要之在明文辭以達是二者要之在近厥指意凡仲默之作三者備焉故予欣慕歎息於一時交遊中獨以仲默為難非私之也武宗皇帝之三年予以憂罷修撰歸十有三年仲默以提學來關中數能以公事過予出其所論著凡數萬言皆當實不修可以上薄屈宋董賈有相如子長之風顧世無知之者獨曰何子有詩人之遺意厥覲淺矣仲默豈獨工於詩者故仲默名徧天下然實無知仲默者此也漢魏以降訖于開成世代既移音節斯異修辭之士能無惡厥趨斯已優矣復能引而上之不沉于流俗由載籍所覩若仲默者豈非鮮哉十六年秋仲默既卒又三年予次第其文為若干卷首賦次詩次文皆隨體區裁因製列卷題曰何仲默集錄存家笥以待後來讀其文思考其世可以知予言所指矣仲默才高而意宏德純而識遠榮辱毀譽一無所動於中予別有傳記茲不載方予定次仲默集時值張子時濟過予所見與予甚同因更與定之如此集云

嘉靖三年二月甲子武功友生康海序

何大復集序

敬皇帝朝化休而融昌異時諸先生業文章顯甚重矣學士大夫固欣然稱說耳相慕也而獨北地李子以非心所好謝去之亡何而又有信陽何子者何子雖稍晚出其材質敏秀瑰麗各以長相當然而李子得何子為益雄也鄙人之言何知仁義嚮利則德是二君子挾草莽倡微言非有父兄師友之素而奪天下已嚮之利而自為德於乎難哉去其始可一甲子詩而亡舉大歷下者文亡舉東京下者即誰力也然二君子之徒不能長緣其師所繇得毛舉論難之語以好為勝而它工易者惡津筏者往往左袒何子而齷李子則又似非何子意也夫百羽集於詞林而二子雄飛或撇捩逆羊角而橫舉或順颺而肆翔其九萬里同也李源風何源雅風故長變以明志耳夫覩其沈深莽宕激叩鼓壯喑鳴懽悽忽正而奇正若嶽厲奇若海則李子哉是固少孫要之其緣情即象觸物比類靡所不遂璧坐璣馳文霞淪漪緒颺搖曳春華徐發驟而如淺復而彌深疑無能險何子而上者何子為文刻工左史韓非劉向家言大抵於詩鴈行云而關中康氏喬氏其鄉人樊孟氏則盛惜何子志業屈於年未竟世之談說經綸抵掌事勛者其敖何子以不及如耶令何子不死而稱為名公卿已耳所以削滌卑瑣振頹習扶昌運開中興者何物也功於經綸孰多於是何子之甥袁燦來謂王生若為何子敘其遺言王生曰何子彬彬大家也易言之有親則可久李得助而久何子之功李子偉矣夫二子之功天下則

偉矣夫

嘉靖戊午後學吳郡王世貞撰

卷一

渡瀘賦【以下使集】

晨瞻崇邱鬱乎相表局以水峽隱以大洲沙莽寒日江深夕流蓋將濟於瀘水榜人告予以理舟沿洪波以直度迎迴飈於上游顧中原而緬邈久西域以滯留感逆旅之長勤懷古人而增憂想夫漢炎既燼蜀都始家區土未闢土馬不加深入五溪橫制三巴冒險通塞柔邇來遐收羌髳以帶甲率庸廬而習戈撻吳權之堅銳摧魏懿之精華今其斷岸遺津寂寥水涯苦霧縈石悲風振沙音塵淪絕古今長嗟歎餘風兮莫覲幸故址兮重過西望開創之基形勢蒼蒼襟夔府而控荆門峙巫峽而流瞿塘簡書零落陣圖縱橫煙磧下月陰岸積霜風雲慘而猶憤魚鳥畏而將翔功雖殞而譽遠身既沒而國亡南瞻祠廟巍兮恂宏松柏蔭戶丹青閼宮垣冒林蔓堦卷寒蓬亦徒嘻吁父老涕淚英雄而已嗚呼當其長嘯之後三顧之餘氣感雲龍恩同水魚念季葉之否運思中興之遠謨偉雄並乎三分耻偏安乎一隅何遂違其懿志竟弗騁其長驅吾哀斯人遭時不淑宜三代以翱翔胡羣奸而馳逐矧功業兮難成且年歲兮易促嗟哉天道高不可摩得志者寡失意恒多苟道之不行雖孔孟其如何泛泛吾舟載揚其波艤彼清潯陟彼中阿無人可邀聊獨行歌歌曰朔風起兮瀘水寒扣楫中流兮懷昔賢遇匪其時兮良獨艱嗟嗟遇匪其時兮良獨艱

畫鶴賦

何匠氏之殊絕超丹青之矩度寫仙禽以逼真陋凡鳥而不顧想意像而經營運精思以馳騫假孤致于墨華得高標於毫素麗藻質以明煙揮風翎而刷霧倚粉壁而駢頸引青林之雙步豈偶爾而髣髴真天然之神趣偉茲羽之獨靈考僊經之遺篇鍾浮曠以化胎善導引而延年志清迴而內真儀皎潔而外宣音獨唳以聞野翼一飛而翀天見樊繄而耻嬰仰海嶠而思騫朝翱翔于玉林夕飲啄乎丹泉振玄圃之中抹閬邱之巔止必擇地動不妄遷協雲簫而清嘯隨蜺駕以遙旋厭倉鷗之喈喈溜白鷺之娟娟豈能言之鸚鵡非好殺之鷹鷂拂練光而凝想挹繪采而生憐松團碧蓋苔斷紫錢徘徊竹下俛仰梅邊翮窮秋而益勁心寒歲而彌堅謝逋仙於西湖展少保之青田乃若琴樽寡和山林無主翠巘絕鄰華表誰語路杳杳以失雲庭栖栖而宿雨露淒淒以霑堦霜肅肅而入戶抗圓吭以長吟整脩毛而獨舞意衍衍而欲伸態昂昂而猶武續遺哀于絕絃悲弔影于廢廡懷萬里之長風眺三湘之極浦憶煙水而葺巢甘鴈鷺以爲伍憩夜渚而葦寒食秋塘而蓼苦孰圖畫之見珍惟網羅而受侮及夫上都富舍畫彩盈庭錦燦爛兮金谷花窈窕兮朱亭刻犀象兮繡柱閑孔雀兮翠屏徒流丹而映綠俱含意而論形彼靈質之殊操羞文章以自呈無俗狀以駭衆亦飛去而冥冥恨良工之弗值羌誰識其高情撫斯圖以睇視久延佇以徜徉欣物品之有遇見嗜尚之匪荒既獲貯於廣篋遂薦觀於華堂儼縞衣而不驚騰玉羽而將翔恍映雪而偃蹇若順風而飄揚集賓客以舉目顧軒楹而有光疑照景于金閣訝棲霞于玉房吁嗟鳥類比之君子遇則霄漢失則荆杞棄捐胡憂登庸胡喜非恃寵而乘軒亦何心于傾市依日月於蓬壺隔塵沙於弱水聞玉笛之我招繞珠樹而相倚感主人之蓄養常反顧於千里凜風義之莫渝重披圖而自矢

進舟賦【并序】

予使於滇行將萬里所越皆重山複嶺以輿以馬顛頓馳跋而不任其勞至永寧乃謀舟以歸庶代陸走之勤時霜降石出江狹水迅機發矢激其勢不得少留甚懼之有老篙師進舟意頗閒自招于前一人柁于後柁者左右緩急不敢自任視諸老篙師老篙師者額之指之目之而左而右而緩而急無不應者其舟之欹正疾徐皆與水勢宜不爲岸妨不與石鬪予甚安焉問曰爾之為舟將有道乎老篙師執篙進曰有敢請言之夫待用者器也器不良則不稱用用之者吾之手足耳目口也少怠即不能用手足耳目口役于心者也心不專則手足耳目口不爲用招與柁吾之器也左右緩急欹正疾徐吾之用也故吾先良吾器以利吾用手足耳目口不敢少怠心不敢少他然後從容乎安流蕩激于奔湧洄洑之中而無虞也然吾又能察水性與勢故夫深匯潭淵淺渦暗灘隱石者吾遠而認之能得于十數里之外是以預為之備而不至損吾舟他水工常惡遲取速截長邀短故有敗者吾惟順其水道而無所枉雖遲而得免敗焉吾之道如此已矣予謂舟御類藝也人之于世顧藝之不若哉因序其言為賦以自勵

惟孟冬之既朔兮霜凜凜而下威水汨汨以歛壑兮草木蕭索而變衰念固陰之初升兮撫歲華之漸微倦行邁之靡靡兮 舟師于水湄操吾楫以徑濟兮石凌競而參差流漂激而不馴兮勢百折而靡隨響訇磕而蕩潏兮若弦控而矢馳彼垂堂固有戒兮心悸布而內疑何舟師之有神兮善審勢而明機視柁者以發蹤兮引吾招以先之量左右以中繩兮察緩急之所宜疾徐欹正各有矩兮曾不失之于毫釐赴迅波以示捷兮制狂瀾之既危始委折若有避兮亦橫衝而弗辭既因順以安常兮復扼險而呈奇值澎湃而稍待兮入洄洑而靡遲預崖石而逶迤兮利水性而莫違夫執藝固道之所寓兮予安知其所持曰吾心以為之宰兮實操運之權衡衆體苟不勤兮又安用之足勝才良而器利兮乃任使之可能志專靜而臨之兮誠易心之是乘震撼擊撞固多端兮心應之而遂平寧拙遲而不巧速兮非枉道而兼程推是術而處之兮雖夷險而同情嗟世俗之止措兮胡茲技之不侔進惘惘而獲咎兮退煢煢而見尤過之則犯忌而招戾兮不及者誠可羞蹈履之不少檢兮或語默而嬰憂左右前後無方兮昧上下之所由慙必至于觸藩兮智或流于刻舟入汗漫而莫極兮泛沛濺而罔留泥軌度而局促兮放準墨而外求惚蒼黃而莫辨兮動齟齬而莫投孰佩弦以自剛兮焉佩韋以自柔繫余之未進兮匪取教于一方夫細大之不可捐兮感曲藝而不忘矧岐路之異態兮平地固有呂梁觀要津之沓駁兮涉宦海之汪洋懲往途而省究兮吾庶以慎吾杭

述歸賦【并序 以下家集】

僕聞之殊途者不可以同觀異趣者不可以強翕故嗜竽者不媚之以瑟好圓者不進之以矩何則殊途而異趣也故賈子投荆南仲舒屏江都屈原遊澤畔三子者非容之不能謀有不合有不可以容者矣故射者不爲人易其彀琴者不爲人改其操故師可易而法不可易也是以物有不以貴易賤富易貧榮易辱者矣故茂草不負垣美穀不生輒懼所托者非也是故求樂其心者不求華其身求顯于後者不求耀於今故夫子周流刪述墳典筆削魯史左氏著國語馬遷抽史記荀卿董子之流皆有論譔大抵困屈窮阨發憤述作茲數聖賢者寧徒耀于當世哉僕少執寡昧竊有慕于古人之義弱冠即仕出入班行者已越六歲頗有齟齬之嘆焉正德

戊辰皇上御極之三年詔許罷歸鄉里得侍親膳既荷洪宥殊協夙情於是始欲究著作之原博覽歷之勝竊附一家之傳庶艾不稱之戒僕嘗以漢之文人工于文而昧于道故其言雜而不可據疵而不可訓宋之大儒知乎道而嗇乎文故長于循轍守訓而不能比事聯類開其未發故僕嘗病漢之文其道駁宋之文其道拘反復求斯尚未有得要之鄙意則欲博大義不守章句而於古人之文務得其宏偉之觀超曠之趣至其矩法則閉戶造車出門合轍不煩登途比試矣然又欲倣子長好遊之意抗志浮雲徹迹九有以博其大觀以成其文章斯亦不墜古人之餘烈哉於是叙出處之槩援聖賢之風揄始終之志作述歸賦豈敢自附于前哲用以勗之於將來矣辭曰

有申氏之遺封兮吾顯祖乃肇家泊大人之有立兮遂振落而揚華爰伯昆之繼美兮惟末身以降予【叶】寔獲夢之曰吉兮日舍寅而筮嘉予既承此幼美兮懼服志之不遐登隴阪之陂陀兮泛涇渭之洪波【叶】極崤函之重塞兮由惇物與太華覽鄴鄙之餘風兮泝涑沮之遺歌【叶】究城隧之湮沒兮哀二世之禍罹【叶】雖孺齒以隨侍兮虞年歲之日加飭華驥以西返兮恐脩路之蹉跎【叶】忽天門之廣開兮值日月之盛明【音芒】願自飭以進君兮得近君之末行鬱文昌之中興兮聳圖闕之印印揭華盖于正殿兮翼玉闔之與金廂塊層臺之隆起兮麗複道之委長儼宮觀之榮瞻兮接脩翼而翱翔奉鸞車之清塵兮竊黼帷之下光服恪勤于朝夕兮冀予衷之必揚倏天地之易位兮星辰錯而無綱聿迅飈之亟至兮會浮雲之徂征【叶】憂雪霰之交增兮履中庭之凜霜紛衆莽之凋毀兮耻孤栢之獨芳豈予情之耿介兮實悲夫蕙華之搖傷顧洵忧之莫彰兮敢幸澤而干榮【叶】仰皇度之寬綽兮得屏放于故鄉歲戊辰予南驚兮臨大路而高車眺玄宮之閭曠兮倚脩城之曲隅汨潢潦之濡轍兮白日暝而忽逾塵曖曖以蔽空兮風發發而揚衢視僕御之零涕兮驂悲俛而不驅遵涿野之通行兮經蚩尤之故墟陟燕昭之崇臺兮訊樂毅之所居覽冀州之圯址兮式有虞氏之故都出晉野以于邁兮行谷亘以倭迂下滹河之隈洲兮接邯鄲之脩途企魯連之風烈兮雖異世其弗渝懲奢麗之覆亡兮憫豪盛之靡餘朝予濟乎洪河兮夕彌駕于淮潞逝逍遙于故域兮耽極樂于桑梓治丘墓之穢草兮考先祖之德裔侍顏色于閨闈兮服左右于居起分崖谷以畢處兮辭纓綬而不縻啟衡門而葺茅兮循蘭徑之委委藝嘉菊之百畝兮采芳若于中沚伊予既秉茲之超寂兮恐邁吾之盛年檢古人之遺美兮心竊倣而不敢愆樹六藝之旌節兮散百家之遺編殫仁義之遐風兮畧眇少之陋觀下何探之不幽兮上何求之不玄乘二儀而列三光兮揜九區與八埏揚素筆之芬烈兮脩薄辭以爲篇綴大賢之緒論兮紹斯文之末傳曷章句之足守兮發矩矱之自然汲時日以迅厲兮惡名稱之不延昔夫子之喪位兮乃周流而轍環望龜山之蔽翳兮去魯國而盤旋臨河水之洋洋兮托哀操于鳴絃疾予心之迫隘兮願輕舉而遠旃羌筮日以造遊兮嚴吾驂之翼翼飭桂衡之超駕兮攀采旄以前飾乘白螭于上襄兮曲文蜨于兩服張孔雀之翠蓋兮諧鸞音于下輻施結璜之委珮兮謹垂鞶之儀式涉洛水之靈波兮恐宓妃之不得使文魚以媒之兮怨約言之我食抗予力于江南兮秣吾馬于漢側豫遊女之不信兮解予袂以明德順湘流而下沿兮望九疑而夕發從二妃以並翔兮忌神人之相越離江夏以東邁兮覓吳越之所在弔夫差之故宮兮尋伍胥之濤瀨痛麋鹿之成言兮惋鴟夷之被害極禹穴之幽冥兮窮會稽之勝槩慕太伯之清聖兮欽季札之耿介勗予馳以流汎兮安崇卑之不臨北旱海之爛灼兮西太素之積陰冰沍結以承輿兮霜霰零而接岑南陸屆以暑徂兮或綬蛇之陵浸取嵎夷以極行兮盼東海之漫淫恍天地之冥晦兮

懼陵谷之隳沈速反轍以旋服兮息予邱之茂林終養恬以頤年兮厭予心之所謀世淆濁而莫察兮脩短錯而不倫芻桂芝以秣蹇兮吝糠糲以飼人參罷牛而被以文服兮良馬棄而不陳賤馨烈而不御兮反逐臭于海濱予憂夫鳳凰之不鳴兮豈云係夫麒麟彼蘭草之國香兮斂空谷以自珍聊委順以祈齡兮吾又安尤夫人亂曰南有嘉木有鳥居【去聲】之朝破其巢夕則去之代愈下兮詩書道微曷曰予不還歸即彼昭昭去彼汶汶今則靡榮後有問兮

蹇賦【并序】

兄子士之上大梁也予戒之曰至則求大梁李子書及還李子乃書所著鈍賦焉曰何子其和予篇夫鈍者委時之弗利無如之何欲以藏用而自完蓋獲予志焉讀其辭傷懷慷慨悲之遂抽其緒餘因別爲蹇賦繼之書付士使並藏觀覽焉賦曰

悲世塗之迫阨兮互險坦而多岐蹇予步之躑躅兮屢前却而狐疑衆趨蹕而便捷兮又車輪而馬習羌量力而退守吾拙兮固將遜彼之超軼物有堅而不化兮性有蠢而難移循故躅而弗舍兮衆覩其躑躅而笑之予豈無騏驥之玉駟兮意猶預而不敢進臨脩路而逴迴兮恐叢棘之未盡昔予膏車而北驚兮顧九折而返御豈吾志之未遐兮蓋懼夫途遠而日暮世周迎而徑造兮高健羨而卑德謂康莊爲迂兮謂蹊爲直予豈不知僂捷之逢合兮與奔競之先至爰卻走以求完兮固宜盤桓而弗利閔疾行之冒險兮孰貪進而靡害彼彭韓豈不皆王兮卒囚執而殖醢木以材而菑及兮馬以力而取敗予羨夫二疏之鑒止兮齊縣輿而脫駕彼非不知炎炎者之爲榮兮固恐阨危而逢禍重曰世淆雜而溷揉兮棄騏驥而不驂蘭芷芎藭不植于路兮蒿艾蔽而成林予縱有龍駒與紫燕兮孰能執策爲余先容呂尚棘津之屠叟兮文王載之車後甯戚賤牧兮桓公乃勃焉舉于牛口彼二子之鞠戚兮故世人之所訾徵古人之軌迹兮聊淵潛厲吾初志蟻趨曲趨兮匡士所惡旋辟中墨兮又羣情之所妬予亦知圓行而方閣兮勉弗能改此度也驥伏櫪而奮身兮願一顧而求試服罷驢與羸駟兮又驥之所耻退斂策而改輻兮脩矩矱以自飭驅騏驥與狐狸並逐兮信不如其巧速寧參罷服羸全以自終兮豈能與韓盧逐兔而鬪行步之工

東門賦

步出東門四顧何有敝塚培纍連畛接畝有一男子饑卧塚首傍有婦人悲挽其手兩人相語似是夫婦夫言告婦今日何處于此告別各自分去前有大家可爲爾主徑往投之亦自得所我不自存實難活汝婦言謂夫出言何絕念我與君少小結髮何言中路棄捐決別畢身奉君不得有越夫聞婦言此言誠難三日無食腸如朽菅仰首鼓喙思得一餐大命旦夕何爲遷延即死從義弗如兩完婦謂夫言爾胡弗詳死葬同溝生處兩鄉飽爲污人餓爲義殤縱令生別不如死將夫愠視妻言乃執古死生亦大爾何良苦死爲王侯不如生爲奴虜朱棺而葬不如生處蓬戶生尚有期死即長腐潛寐黃泉美諡何補夫婦辯說踟躕良久婦起執夫悲啼掩口夫揖辭婦拭淚西走十聲呼之不一回首

寡婦賦【并序】

予痛吾兄宦業未竟抱志中逝而孤嫂懷保遺孩煢煢在疚且訓其長雅志自厲庶以不殄兄之義問矣痛而更以喜作寡婦賦以道其志焉

嗟伊人之伶俜兮訴明昏以自伸言我被遺質之薄軀兮竊幼訓之專真遭盛年之昌運兮尚君子之末陳侍巾帶之雅惠兮期畢齒而委身奉周旋以踰紀兮羌中道以失天【叶】緬日月之恒逝兮佩生平之末光衾綢卷以獨處兮潛幽宮以自防弛膏鉛之盛飾兮脫桂褱之文章陳單幃以自蔽兮蓀荃莖以爲香紛履綦之委弛兮琴瑟偃而不張脩夜漫以靡旦兮灼寒膏而不明【叶】像生存之極娛兮心絀結而不釋忽頽思而就枕兮悅若君之我即承邂逅于寤寐兮托精魂于遙夕風飄飄以吹幃兮起覽視其何適淚交頤以橫下兮魂震蕩而無抗循周除以舒志兮下蘭室與蕙房望明星以撫楹兮微月鑒而綴廊秋氣凜以慄切兮悲回風與降霜痛蕙草之不敷兮撫梧桐之凋傷感孤獸之離偶兮耻單翼之無行遂躑躅以反室兮心怛惋而若喪眺邱墳之嶢嶢兮陟山椒而慘惻極隴隧之脩延兮翳宿莽之蔓域徙荒亭以即之兮眇神靈之莫得攀下泉之不逮兮隱哀號而拊臆徵受命之不祥兮艾愆尤于往軌抱遺孤之煢煢兮指皎日以爲矢蹈未亡之微齡兮敢遺君之盛美苟明忱之罔虧兮豈速殞之可悔重曰幼蒙慈育秉志良兮服事潔脩充君房兮從子遨遊涉江湘兮改轍東國逾河梁兮思妃文鵠永翱翔兮何意中達失其行兮嗟維我儀安可忘兮潛身閨內不下堂兮女史陳圖慕共姜兮恪謹一志舉令名【叶】兮閨中之媛永爲像【平聲】兮

織女賦【并序】

予嘗觀謝朓王勃七夕賦皆組詞繪句務極妍蒨其意不過侈二星靈光之會合述一時遊燕之盛靡於比諷之義或缺也予病值七夕之夜感織女之事托意命辭作爲茲賦以附風人之旨而事之荒怪固不必有徵也夫何天媛之淑嫿兮鎮獨處而寡儔絳組綺以自飾兮誠靈質之嗜脩長夜徂以漫漫兮秉機杼而懷憂倚北斗以延佇兮視天漢之潢流雖予衷之弗渝兮羌獨慕夫好仇諒天路之豈遐兮顧欲渡而無舟迺秋序之甫交兮氣淒淚而慄慄桂枝芳兮垂華白榆曜兮寒色啟貞卜于茲夕兮玄龜告予以吉食遡靈波以迅度兮宛東路而徂行鳳凰翼以翳車兮命烏鵲以築梁先朱鳥以通媒兮導應龍以啟征錯璇璣之轆轤兮施縹緗之雜章步列星之文履兮纚素霞以爲裳被翠羽之翩反兮雌蜺燭兮函光申雅觀于河濱兮敷愀之衷腸舒幼眇以綰結兮燕淫衍而相羊湛懽樂而窮極兮虞見妬于朝陽歛神采之易翕兮忽頒駕而懷傷超兮西邁兌兮故處慚報章之罔答兮遺玉玦于漢浦睇往途以連遭兮神悵紆而不去發帷盖之委蛇兮旃央央而與與輪結軫而轆軻兮衣攬袂以躊躇順飄風以右翔兮秋颯颯而零雨天寥迴以揚雲兮跂予望夫河渚卷綃匹之繽紛兮斂容輝于雲閨傳羅襪與綈襦兮居煢煢而少依慮前矢之未謹兮恐來期之後時掇天葩之萋敷兮襲芳蕤以自持承二曜之景爛兮飾五緯以脩辭脩辭兮何爲願布兮真心流波兮眇綿致予兮遐音目超送兮增鬱聊託之兮漢南【叶】亂曰宛彼佳人阻銀潢兮豈無同仇誰與航兮翹首天路寡脩梁兮憂心嫵妍厓七襄兮資質靚好蒙素裳兮九秋茲夕懼未央兮別促邁希安可長兮予思怨嬪實與併兮局殿寥寥晝淒清兮君不爲御徒熒熒兮瞻望深宮懷廣庭兮單棲守誓感斯靈兮

憂旱賦

惟徂暑之屆茲兮氣蒸蘊而蟲蟲二儀曠以弗交兮陽驕亢而陰蒙下泉液之不流兮上濡澤之莫降【叶】雲師逝而安徵兮怨雨伯之無功山塏塏以頽顏兮野蕭條而無色痛嘉穀之不實兮耻槁莠之蒙域攬翳翳之無卉兮樹榛榛之脩棘田畯至而靡喜兮農望畛而太息苦箕斂之無方兮矧予畝之不食肆負耜而襁幼兮或轉徙而亡匿嗟民生之何尤兮憊邁茲之匪辰鴻鴈嗷嗷以安戾兮獸惘惘而焉奔豹虎出而縱橫兮狐狸媒而求親詫丹蛇之十圍兮恐文蜮之射人躋赤坂之崢嶸兮蹈炎海之瀾淪既淫瘴之蔽天兮忽終風之揚塵氣鬱軫而罔釋兮何彼茁之能伸念窮鰥之在下兮恒日夜而望惠倬雲漢之昭回兮羌虹霓之晝晦朝出日之杲杲兮夕明星之嘒嘒暴產婦以徇市兮固阨難之無罪驅妖覲以干神兮又知愚婦之不可賴昔殷禱于桑野兮霖一夕而滂沛犧小民以省災兮齊亦以身而請代豈斯職之弛修兮俾天害之弗悔噫嘻天之恤民兮豈惟是而終遺顧神理之泯泯兮庶昭謚以享之啟沾溉之靈澤兮蘇百物而復蕤忱大命之近只兮聊以厭生民之所期亂曰高天亢兮陽鬱蒸草枯落兮禾不成禾不成兮食以匱人憔悴兮何爲生南有名山兮下靈場龜蛇萃兮蛟龍翔坎擊鼓兮舞成行薦明禋兮輸欵誠沈美璧兮不愛牲降甘澍兮敷永寧

壽母賦

春仲之望爲母壽節與父偕享時諸子舉觴諸婦進履諸孫羅舞及女姪諸婿咸在少子景明前跪稱賦曰美吾母之降辰兮惟歲月之協良當白日之鼎盛兮值昭灼之春陽華鄂鄂以含幹兮草萋萋以交莖【叶】獸駢駢于原隰兮鳥雍雍而載翔秉明粦于中室兮徵豐膳于下房薦五絲之文履兮舉九醞之芬觴矧翁甫之齊年兮亦欣欣而樂康仰令則于家人兮夙孝著於宗祊固聖善之慈惠兮爰日臻于嘉祥賦畢又稱歌曰惟南山兮日遐母壽考兮休嘉秉春陽兮茂草列靈莖兮丹葩中有萱兮芾芾言樹之兮堂背春榮滋兮秋華永忘憂兮千歲於是衆咸稱壽乃命諸子婦孫女姪諸婿飲食無不醉飽歡喜

結腸賦【并序】

結腸賦者悼李夫人而作者也夫人者空同先生妻而左氏女也夫人生而秉靈死而見異空同子慟焉於是叙歌自懷賦結腸之篇而屬余撰賦以寫永悼顧辭旨菲鈍無以廣情肆事繼彼雅音也賦曰

夫何靈淑之純修兮性命奄其不留觀結腸之圖詩兮詫斯異之所由嘻其鬼乎出牲俎兮盤旋金鏑中織若毬兮若綖若經兩耳旁貫兮珥虹弁星上攀下綏兮底肖井形儼垂輦之絺繡兮文理緻而靡紊像生平之纂紉兮固靈巧之冥運究懽怨之興感兮求變化于死生神有所必格兮理有所難明物有隱而始彰兮事或假而真呈誦麻枲之微詞兮知甄女之託志吟決絕于溝水兮故錢刀之爲刺或有望戍夫之不返兮悵離匹之乖隔淚隕血而崩城兮身立枯而化石此皆冤憤積而內鬱兮精誠干而莫撓歷往記以放今兮蓋異夫靈之所遭靈結髮從良人兮又當恩愛之盛日雖中道殂先逝兮穀焉既以同室情何抑之不伸兮心何藏之不自

眇荒忽之神恠兮固夫子之疑惑曰幼承訓以服志兮託弱胤于名閥職君子之衿帶兮登薄軀于幃闥君矯節而抗行兮屢違時而擯捐走畏途之坎坷兮常奉侍以周旋涉江路而來歸兮肇辛勤造夫家室乃纖質之糾痾兮忽委身之不畢撫愛子而永訣兮提孺孫之嬉幼哀夫子之壯齡兮予弗睹其時之所究生娛樂而死悲兮恩義篤而怨深體璇璣之回文兮詎忘予雜珮之玉音心峻坂之九折兮腹車輪之百轉引長恨之端緒兮冀曾思之少展彼充房之芳芬兮君固察其椒櫨予未始一揚其蛾眉兮又何羣嫖之能嫉陋班扇之懷炎熱兮匪淒風之綌絺誠予衷有可徵兮奚恆眩而疑之愍貞婦之迅思兮實明詩而習禮魄已離而飄沉兮靈紆軫而在此氣氤氲以拂苑兮情詰曲其孰明宛連環之不可解兮邈七襄之報章悼君子之伶俜兮何中路亡此佳耦惠盖有不年兮哲固有早殃天霜露之憊冽兮回風搖而隕蕙顧國香之珍葉兮反敷修不若彼之衆卉漠玄冥之晝局兮痛玉顏之日翳弔窺鏡之隻翼兮聆絕絃之寡唳映奔星與流月兮激樞風之餘哀幙熒熒之燈燭兮若彷彿其覓來塵寒閨之素機兮攬繽紛之製委組帳之懸螭兮惻獨旦而不忍視亂曰萬物輻輳統一氣兮精感形變散不可紀兮帝女溺海號精衛兮血影射石旱塚崇兮木有連理草交莖兮烈魂潔魄孚女貞兮析微察異實此之類兮附物著靈見胷臆兮輻輳糾纏裂五內兮飄響隙絕光迹邁兮古媛慧則蒙葛諷兮締心紬志程闔茸兮

卷二

石磯賦

孫世其從何子游奉端溪之硯進中山之穎求爲石磯賦何子賦之曰華容有山山之下有磯焉曰石磯山其山脩亘偉韓萃鬱嵒嶽捫宿共嶽卑阜扁岑濱于漢沱界于江潭【叶】奠以洞庭之野芑以雲夢之林白鼎峙乎其陽黃湖匯乎其陰龍峯迤其北鳳山麗其南於是石磯子遴材摧茅治榛艾菅以構于山之間其制敦朴崇約抑華貶飾蓀栢既踐蘭橈有翼烝雜薰以實堂樹脩植以蔽域陳典列圖分藝考則揚純儒之素言究聖哲之玄德暇日以臨于石磯之上以觀乎楚之鉅澤緬湘靈之鼓瑟聞黃帝之張樂泝屈賈之廉風訊曹吳之遺畧維行迹之委翳宛雄都之不作乃有玄洲先生儼然來造進席有稱曰予玄洲鄙人也肅子之義竊願得承下風以望見子之威儀石磯子迓之曰業未敢通于交際之末辱先生徑臨敬聞金玉之音玄洲先生曰吾聞被其名者徵其實處其地者視其圖石磯蒙好于子久矣卒未聞臨洲一歎投竿少娛固子志不在魚而人將無訾以虛居乎且子方構于茲厲志陳篇留心作述吾聞緝學將以俟達也慎藏將以待出也石磯去子有日矣比吾居于玄洲朝緝暮繩餌芳鱸嘉射魴捕鰓罾鱮留魴其爲樂也不既有多石磯子曰先生何觀之眇也吾於此未嘗不釣也吾之釣異于先生之聞也幹之以義不撓不攀其直維堅是爲吾竿縣之以知維深汲玄不糾不纏是爲吾緝主之以仁味甘臭醇自飫其真芳馨可親吾餌孰倫於是以詩書爲藪澤道德爲淵泉天地爲網罟人物爲鮪鯉處則養有餘出則用無殫彼執笥繫竹操繩逝梁較獲易捕乃潢汚之陋漁水濱之役夫也視於吾靡有稱焉而先生尚之乎且吾聞昭士猷遠志夫嗜脩身長而道不立齒邁而業不周無以延譽舉名遺光承休者皆君子之羞也故緝學者不爲達達之道以具慎藏者不爲出出之道以備先生以是訾予不亦戾乎且太上忘名混混泯泯孰爲其僞孰爲其真咫尺或疎千里或親吾之好于石磯者不可以去就出處論也於是玄洲先生爽然曰子之言是也予今乃始知釣矣喜而歌曰人之知矣謂我大矣或觀其面不見爾背或觀其潦不見其海或觀其庭不見爾門速予邁哉旋易予綸石磯子使復之而和曰磯之水白石瑤瑤知子之來遺子以鯉魚磯之山白石皓皓知子之來遺子以芳草水中有舟山中有道母焉有善子不我告

古塚賦【并序】

城人掘土發得大塚壙兆規度頗極宏偉枯骨之外了無餘藏銘誌湮滅年代莫考予爲感焉作賦哀之噫哉茲兆之復遐兮啟構廣以復紆歷人代而幾何兮又安知孰所居冥宮既已開掖門又已除故域繚為城兮脩隧踐以為衢檢神器之靡存兮視靈衣而無餘噫哉遐兮藐以芒翬化逝兮銷亡朽骸殘兮紛縱橫被服素塵兮掩玄霜蔓草糾纏兮穢蘚生千秋萬歲兮孰爾藏槩生平之極娛兮奄大塊之飄塵駟馬不復御玉羞安復陳彼充房之姣麗兮緬幽冥而孰親桂蘭閣委丘谷兮又安施夫黼帳與綺茵舞袖纒縱以何見兮鳴瑟寂而無聞哀懸車之莫察兮怨修夜之不晨悅榮聲其遼闊兮痛素骨之翳綠榛嗟有生之必化兮胡彼庸之長勤戚役役以趨世兮等飛蠅之與聚蚊日月忽其不處兮矧焦顏以斃神匪往者之可鑒兮

又安知夫富貴之如浮雲

秋思賦

歷四氣之迭運兮惟秋氣之悲傷野燎聞以無煙兮嗟何草之不黃升崖谷之岑 兮望川陸之委長痛桂枝之朝瘁兮惋寒蓬之暮征感奔獸之索羣兮哀孤棲之無行晨鴈唳以過庭兮蟋蟀鳴而在房懼固陰之漸升兮冀德澤于孤陽委餘照于山岡兮浮雲翳而不明浩霖雨之泥途兮淒風舉而飄揚白露下以憊切兮又申之以烈烈之嚴霜怨林華之不敷兮攬宿莽而徜徉撫秋菊之嘉樹兮願比德于寒英

水車賦

曰有機器用以剡水方輪圓樞運之則起矯若從逆順若易撓恩及畦畛量兼斗筲過顙類激襄陵乃害竭彼澤陂以盈溝澮智則多勞利則有遺雖愈建瓴豈勝漏卮巧不逾拙靜斯御動永言臨渠愧彼抱甕

明山草堂賦【以下京集】

猗斯堂之偉構奠章華之名區明山萃其巖巖下俯曠而馮虛攬七澤之斥莫貫九江之縈紆伊主人兮碩輔躋司農之要衢緬山扃以遐矚嗟信美而弗居于是委綬投圭輕舉長鯨興懷秋風謝榮朝露悟止足之幾達辱殆之故詎吾駕之可迴幸山靈之莫予杜顧堂址之尚存循蘭徑而已漸除有奧草丘有蔓蕝被薜荔于衡門繚辛夷于重簷悵塵營之見勒俾芳歲之屢淹鳥戢翼以林棲魚適性以淵潛撫幽關以偃仰聊樂予之所恬矢壑巘以畢志與軒冕而長辭彼戚戚之富貴從世後于何時聊考槃以詠歌分寡處而不疑歌曰漢之南兮湘之曲山有楓兮江有竹構蓀楣兮葺荷屋息茂樹兮臨崇阿肆游衍兮皇有他嗟哉駟馬兮憂患孔多

白菊賦【并序】

甲子九月十四日馮侍御宴集出白菊詠賞屬予賦之盖以奉賓主之歡洽耳豈有望於榮觀哉辭曰

繫季秋之將望予恤夫序次之易代既無暇于遊覽亦索處而寡類接芳鄰之招引誠欽志于雅誨厖主人之投轄肅羣俊而弭蓋廼陳秋卉以侑觴冀逸興之可貸咸式燕以延賞異過時而尚憂喜幽玩以怡情追佳節之莫待豈無得于物觀寔有感于斯會猥受簡以紓思庶形狀之具載爾其葳紫莖而上擢庶奇茲以孤植葉萋萋其微藹萼栗栗以寒色申纖縞以自貞羞組綵之外飾承危朶而不傾挺柔枝而益力香冉冉而不繁艷娟娟而稍抑態屢覲而愈妍意凝想而彌極始嚴整而莫褻終溫郁而可即華不露而已章思欲語而復默神超有而入無豈彷彿之遽得迺若閒館重深高幕虛涼簷蕭蕭以下月庭藹藹而降霜燦燦灼以映夕紛委綴而明廊素娥兮聯裙青女兮駢妝縹輕鬢以雲鬢皎靚質而雪光驂連蜷兮鸞鶴服陸離兮珮

璫信雕容之可赧嗤效顰之不量于是賓倚徙而久竚若耿耿其懷傷釭滅影兮續膏夜就深兮移牀馳留嘆于永謝結華思于餘芳允思美之所遇亦既隱而復揚乃歲律之甫遷慨金氣之何速鳥棲棲而斂翮飈颯以驚木悅窮莽于廣隰班紛薄于脩陸衆已謝于場野獨宛轉于寒谷甘苦心于螻蟻等末翰于樸 雖曠絕以自持胡偃蹇而下伏夕淹雨而泣素朝披煙而委綠羌守操以堅冰徒有容之若玉倘衣袖之是將亦絃琴而可錄吾觀夫懷達人之隱德抱烈女之幽衷詎嬰情于豐華奚移志于始終桃早秀而先萎槿晨敷而暮空苟清白之爲尚曷芊菲之足崇嗟予之不淑兮撫年運而興悲覩茲植之所由懼脩名之失時彼斯人之同志吾何俗之不隨迺子子以矯激羨草木之所爲偉夫君之超越幸方圓之有持矧諸公之奮奇俱發蹤之可師顧會合之不偶常寡歡而多離指孤芳而締好創遊燕以爲嬉誠後期之不忘或有徵于微辭

後白菊賦【并序】

菊有白色者超越他品予嘗賦之矣丙寅之秋京師桃李皆花予庭是種生意淒然久而不敷至十月始盛開色益鮮麗予感焉作賦以繼前聲

大運荒乎何停陰陽奄以代謝究動植之所由嗟何物之弗化時維孟冬金虎兮屏舍白帝兮徂駕氣厲厲兮始嚴景習習兮將下值抱痾以閒居循周除而蕩思庭葉委以陳翳堦蘚穢而不治覽庶草之先蕭撫茲根之獨遲彼桃李之非令亦競榮而呈姿 丹華以鬱鬱冒綠林而萋萋胡衆人之好侈班紛慕其芳菲朝絲吹兮填闔夕車馬兮成蹊咎玄樞之舛訛諒人事之尤違矧天道之無遠或省予而弗知繄予植之雖晚實鄙志之所欣賤羣穠之溷濁耻雜敷之糾紛俱並進以取妍表孤花以見珍寧他卉之我先甘避迹而弗羣乃其蘊金氣以內凝標皜質而外暎蔓不踰垣繁不披徑葉塗塗其自沃枝矯矯而獨勁宛含意其孰語若鍾情而未定女幽房而專情士窮巷而寡行服縞組以修容佩珩璫以昭令寄岑寂以怡心襲馨香以飾性無良朋以修好憾邪灼之干正又如下國之擯臣離宮之斥嬪心怵怵以慄慄懷耿耿而苦辛緬中宵以前席念昔日之下陳慨微欸之莫宣若有怨而弗伸分孤蹇以終畢羌孰予兮幸親結柔條而三嗅重延佇而欽心寂聞館以容與散塵營以滌襟鑒微月之曖曖步列星之森森天窈窕以條革疾風起而夕陰念沍寒之已逼慘獨悲夫衆林苟操性之殊軌豈華色之遽沉內恟恨以懷顧悅屏營以咨嗟覩日月之滅毀恐霜雪之增加抱孤英以自明悵情親之我遐慮寒香之終匱俾予身之蹉跎負大塊以馮生豈惟是乎獨嘉物何盛而弗衰亦何枯而弗華夫芝焚而栢薪皆菸顏而殞葩伊桃李之既零亦奚異乎泥沙委常運以流轉復胡戚而胡夸誠予衷之不爽彼夸戚兮如何亂曰有美一人揚清芬兮縞袖合沓回素雲兮被服文徽皓續紛兮令儀澹澹歛玉手兮傾城獨立世不有兮時無蹇脩誰則覩兮谷逶迤兮雪霰來兮衆芳萎兮嗟伊人兮秉志不迴兮

荷花賦

曲池兮清波綠葉兮丹華叢生兮若屯並蒂兮連葩爾其耀靈株之扶綏兮搏輕荷而低昂呈紅顏以流 兮麗繁星之煒煌枝婀娜以承蕤兮媚清漣而揚芳委微吹以披靡兮紛若纖羽

之回翔倏煙霏而霧滃兮態隱約而凝妝蔽華月於鮮雲兮晃朝日之照虹梁乃若遠兮益清
近兮愈妍接皐蘭以被縵暎堤楊而聯娟垂清房以綴珠結翠萍而連錢美曼如靜女翩躚若
飛仙恣意態之橫出匪擬像之可殫於是乃有姣姬連袂或三或五貌傾名都香出洛浦祛徽
桂御輕紗操木蘭揭蘅莎赴中流而競掇竦迅體而揚波於是稱曰綠波揚兮清風會歌宛轉
兮聲流喝花爲房兮翳荷蓋弗樂胡爲兮歲云邁又稱曰製綠芰兮爲衣把瓊枝兮餐玉蕤夜
已央兮風露微明河繁宿兮橫參差心中樂兮樂忘歸

別思賦

君何爲兮遵修途以長徂俾予懷之弗怡愜愜而罔憇顧左右而若遺莽川陸之迴薄迴城
闕之逶迤山翳翳而景入林蒼蒼而鳥稀拂清霜而採松迎夕露而折葵托消忱于微贈諒予
志之可追皎秋日以矢心指寒歲以爲期俟行塵之我延臨晨風而褰衣

後別思賦【并序】

伯川將之河西予既爲別思賦矣及王舍人文熙館爲別予以事不得往益爲之怏然乃紆鄙
懷爲後別思賦懷諸彥之雅趣欸行客以終宵慨離違之多端接晤語而逍遙時乃御閒館即
別院天冽冽而疾飈月霏霏而微霰開重簾之華燈飛逸翰於清讌締久要而莫渝顧暫睽而
益眷瞻芳塵之未遐仰光惠而引領忬予神而奮馳悵予駕之弗騁覽歲事之遲暮延軒楹之
夕景葉歷歷以辭秋霜淒淒而凝冷顧征鴻之稍滅戀行雲之佇影送夫君以申佩寄一感于
茲遊悼霖澤之久愆恐江河之不流矧庶役之未蠲固凋弊之所由懲舊途之仆軌濟巨川而
思舟操吾道而罔屈何令名之不脩傾風譽于咫尺日結睇于河洲

待曙樓賦

覽敞顯之危構孰崇基而筮營佩嘉名以繹義顧朗景以抒情信哲子之所宅相地靈而兆成
乃其首東明背西昧面陽負陰啟震藏兌拂蒼龍以飛題朝青帝而標位棟梁岌業榱桷表延
蜃抱疊屋鳥翼層軒島嶼出沒以蹙沓江海匯濊而迴旋雖形勝之輻輳匪游衍而荒適列圖
史以考玩殫玄思於今昔庶獲道於朝聞恒警志而夕惕於是子夜既逾寅曉將發攬衾裯以
起坐褰帷裳以佇察鑒在戶之明星徂奔闔之余月賓暘谷以馳想候濛汜而思結爾乃義馭
乍臨火輪在東陽鳥出鏹天鷄應鍾光銷織霧氣流文虹忽赤勃以湧海稍爛盈而吞江照楊
柳于迴檻影扶桑于通牕曠蕩黯湛霽開浩渺銀濤崔嵬金波焜燿雲霞收霏而五色川嶠呈
態而百巧魚龍躍而滉漾鳬鴈翔而高矯忻萬象之昭晰張羣方之幽黝於是撫連楹躡巍級
納曲薨之輕暎散重檐之清旭謝季冬之永夜迎孟夏之脩日繼宵慮於晝爲健天行而晷畢
定二儀之崇卑審四時之往還求不息之窳窳悟有生之肇端動靜幾而互根晦爽代而循環
聖有汲古賢虞失今回守三月禹勤寸陰跡罔迷于綺麗心恒創於麥淫業階微以富有德有
常而日新晞白曜于首旦感鳴雷於發春

卷三

澧有蘭辭

澧有蘭兮獨榮滋被覆沙汀兮含葳蕤擥芳兮采綠臨江兮暮思靈均兮弗覩心愴惻兮目眇
眇蹇獨立兮寡類嗟懷忠兮守艱理楫兮蕩舟空山兮水潺湲

九詠

紫貝宮兮瑤堂結蕙幄兮蓀牀班文豹兮兩階龍宛宛兮翼梁設俎兮陳玉桂樽兮湛綠清灑
掃兮愉穆望靈車兮冀髣髴靈之來兮開九京欽百神兮紛往迎忽升堂兮降席爛霏霏兮滿
盈被靈服兮委委華英英兮容裔弁列星兮嵯峨纓曲虹兮猗靡座既奠兮安歌衆倡作兮音
繁和紅顏臻兮交代舞傳芬芭兮揚織羅拊鳴鼓兮循玉瑟樂齊會兮衍淫佚歛眇眇兮覩以
密靈之娛兮不終日靈之車兮倚桂旗駕玉駟兮驂文螭御飄風兮乘輕霞返層霄兮超九達
來不語兮去無爲目睽睽兮令予思予遊兮北渚往媵兮帝女水衝波兮潺湲木蕭蕭兮葉下
折蘭蕤兮將若華杳冥冥兮空望予予朝兮北遊夕邁駕兮冀州覽文昌兮朝東皇水霰凜兮
不可留朔飈振兮玄雲黝顧窮原兮增百憂肆改轍兮西逝遵少皞兮故域素陰肅兮裂肌灑
凝凝兮罔極積霜周兮如陸靈之處兮安測晞溫暾兮扶桑訊靈居兮陽阿六鰲兮戴山沖天
兮高駝蔽日兮濤來下徒翹首兮柰汝何訪靈遊兮南麓悵赤華兮不燭有獸兮黑斷有虺兮
綬腹瞰朱海兮炎霧濁胡軒駟兮不我復嗟四方之與上下吾又安知其所尋疑神鑑之莫邇
豈予心之靡忱羞蕙肴以罔薦蓄潔粢而孰欽睇孔鸞之翠蓋像蒼虬之玉音下土幽暗而嶮
巇兮需光澤之照臨

雨頌

歲戊辰五月不雨至六月土脉龜坼井汲不給禾則半偃民實憂作動而轉徙者擾不可禁矣
是月己亥雨庚寅復雨人於是乃有秋望稍定逋志予既爲憂旱賦矣茲則喜而有頌焉曰后
皇惠鮮終悔其傷天覆之彌雨之洋洋有其電有震其雷何何震載濟其施甫田之坼陰
液膏之爰高爰亢腴之饒之灌灌黃流周原廣隰膏之陰之土絡斯釋卉則烝矣樹則升矣彼
禾之苗勃其興矣從橫其委維秀驕驕維實彙彙有獸般般亦斑其皮鳥集于林載澤其儀相
彼物矣既鞠既靡自我天作乃奮而起嘉穀之有萬福是來猗予民哉侯不綏哉

甘露頌

皇嗣元載仲月維冬茂彼林木甘露以降溫風來臻柔惠周渥湛湛灇灇既塗既潄如葩斯敷
如實斯搏精華內融純白有爛寔維和鍾昭我皇穀彬彬庶徵厥來多福昊天棐忱冥冥罔常
於皇克德受此嘉祥

告咎文

露雲暗藹彌玄穹兮皇鸞儻回鴟厲狝兮鬱氣湔渙迅颺颯兮澤渥頑滯不下降兮七曜弗列五緯汨兮北斗亂精貫日月兮白彗出地芒四發兮陰陽離職互驕越兮奔震霆霽轢長林兮鳥慄獸亡鯨鰲崙兮雨雪千里雹交侵兮川陸不分水溺淫兮嗚呼后皇兮憇不我哀蒞下土兮播害菑我蠹兮寡辜昧茲咎兮曷來升九閭以陳詞兮仰憑翼而訊之予使列缺以啟途兮擾白螭以服輓乘玄冥以亟行兮乃覲帝于太微既予忱以踧進兮告弗祥于帝側含萬物以化光兮胡格和于九域敷乾始之美利兮運不息之元德飭望舒以馳範兮戒羲和以正御禁雨工之濫施兮屏雷師之妄驚俾星弗易次兮天弗改度外紫宮兮內鉤陳申耀魄兮理鴻鈞御羣靈兮秉萬神分列耀兮朝北辰又使北斗以振紀兮命輔星以佐之定二儀之元本兮操七政之樞機中四方以臨制兮均五行而建四時視九達之蕩蕩兮履三階之平平駕天廡之玄駟兮啟璇璣與玉衡樹蚩尤以爲旗兮檻彗星以爲旌驅虹電以前導兮叱攬搶使先征太白隱隱以晝斂兮熒惑退而守明上下既奠位兮日月攸行麒麟遊于四野兮虺蛇潛以屏藏鴟鵂鵂不敢鳴兮鳳凰昭其文章孽誕弭息兮永畀綏康終予言以告旋兮俯茫茫以容與天黜黜以沕寥兮雲冉冉而忽雨予爇赤華以昭地兮令燭龍以耀宇回軒車以長辭兮風颯颯而愁予

七述【并序】

枚乘作七發曹子建作七啟張景陽作七命皆遞爲擬襲予病居客有述遊觀之盛以啟予者凡七事乃作七述

胎簪子爲舍人病弗能朝謁脫籍納組買車以還還而謝姻戚杜慶弔却除塗戶塊焉以居客有冠危冠服濶領綦履佩玦造門辭曰竊聞子病謝客客願有以見也胎簪子謝弗見者三客曰竊聞子病謝客客有說于子願有以見也於是胎簪子乃敷文純之席布瑤華之几啟扉以入下榻以俟客望見曰子何病之深也吾相子之病非有窒于腸胃結于腠理瘀于血氣而痼于骨髓者也若有伏憂綿綿纏纏糾纏于心惟思所起子何病之深也夫腸胃血氣之病可以湯浣醴灑腠理骨髓之病可以鑱石灸熨皆宜獨攝靜息不可勤擾而子之病病于憂也獨則愈生靜則愈積絲分縷起將不可止非有効于湯浣醴灑鑱石灸熨也顧乃堅戶謝客歛聰寂視吾見子之病日甚也吾聞目不蔽則神暢耳不塞則志廣體不局則氣伸吾將述遊觀之盛以語子使子目快于視以暢其神耳快于聽以廣其志體快于動以伸其氣而子病去矣胎簪子曰辱客枉造請試言之敬服聽

客曰神都天府之國四通五達之關繚以濬塹袤以周原乃有玄居造天崇基冠山周櫺連樓曲屋層軒升高入奧莫知其端飛薨接題交疏迴欄上通中雷下旋井幹俯觀次鱗仰接飛翰盤紆焉綸網焉翼翼焉班班焉邈不知其所攀也而又環以百里之危垣延以千步之脩廊炫以瑱壁丹楹植以釳砌雕牆錯以綸綺雜施玄黃揭層虛而照八埏迷五緯而眩三光中有玄室煜朱陽兮夏屋寥寥含淒霜兮阿閣崔巍雕沉香兮懷題逶迤刻沙棠兮輕杉為柅文杏梁兮鳳鸞隱起蛟龍驤兮乃御飛櫺升廣堂兮若是者可謂宮室之盛者也吾與子往遊可乎胎

簪子曰吾聞瓊宮瑤臺夏以焚臨春結綺陳以亡彼萬乘之主猶不可也而吾處草野編蓬戶以爲安者奚事此遊也

客曰乃有上都貴人戚里公子迎晨而出及暮乃止入饌八珍出布千駟車馬雜沓絡如流水爾其襲白縠服文裘陋黑貂而不御輕狐白之莫儔燦三英以外飾誠五紵之可羞躡飛雲之履被明霞之紬水蠶瑩膚藻龍耀眸綴以錦帶懸以吳鉤斷犀剗象斬蛟割虬轆轤流光芙蓉照秋文玉銜英不足比步光懸螭莫爲酬於是驂騰駕憑華輶施通幘秉脩矛搯葳蕤之飛蓋張連蜷之翠旂蔽羽旄於日表布絲帳於道周馬則驊騮赤驥紫燕青驪漉漉師師駢駢騤騤踴躍騰驤礪硯權奇雲駿霧鬣電駭煙馳控以寶鉸纏以金羈銀鞍燿爚繡輶生輝乃出黃金擲白璧家多匿亡門有食客意氣傾人風聲下敵雖秦楚之豪束手而莫抗而燕趙之英不敢比肩而與匹也若是者可謂服食輿馬之盛者也吾與子往遊可乎胎簪子曰彼皆崇權貴任豪俠危上以弱下厚積而過享者也吾布衣藜藿之士奚事此遊也客曰三五冶容二八曼姬容華眇好豔多姿兩輔善笑承重頤膩頸豐肉宜細肌長眉連娟曲中規擗腰擢步隨風移左右盼睐目波施窈窕善戲體迅飛爾乃結脩鬣之差戾襲芳澤之烈薰珥明月之步搖服素霓之繽紛垂羅掩縠攢簪合茵明滅纖霧綽約繁雲於是進舞席御歌宮奏大呂扣黃鍾隤鼓搖虞按瑟撾鏞笙竽共逐金石和同衆音繁會殷於層空既而停衆樂拂雲和出嫋舞流纖歌歌曰長裙單衫曳鳴璫吳娃雙歌出洞房不惜緩步升君堂華燈錯兮夜未央於是醉酣雜坐弛帶舒纓投贈詩賦顛倒疊疊衆客出座蘭膏不明美人侍傍逸態橫生乃歌曰蘭膏滅兮夜已深絳霄微兮白河沉鳴琯促柱兮感君心知音識節兮君幸臨夫聲伎之妙宜無出此子將從遊其間乎胎簪子曰吾聞五音令人耳聾五色令人目瞽非予所願遊也

客曰平原廣野彌望千里馬可陳列車得駢軌於是遴徒發乘盛張旗幟淬刃礪鋒弦弓鏃矢興卒駿奔獵師起喜乃其布網周山列罟彌澤蹂塵障天舉燎燔薄絕流楮崖剔林搜壑逸材之獸健舉之翼莫不縱橫躡藉揮突放逸聞弦自墮罹羅立殛灑毛委羽駭膽慄魄孰能抗巧何以肆力哉由是張罟則盡獲繳矢則疊加仰貫雙鳬俯連五獬魚不遺筌兔蔑虛置爾乃仆麒麟下孔鸞冒翡翠躡玃豸掩雲鴻繫文驪折錦脅鍛繡翰玄熊綠罷青兕黑犂鹿麝麋豹麇羊狻猊渫血赭輪積如堆埼然後臨清池玩流水墜絲竿繫文鯉披鱗所髣溶溶裔裔犒徒會侶畢景斯已是較獵之盛也子將從遊乎胎簪子曰吾聞騁田獵令人志荒非所願遊也客曰天皇之庭廣莫之墟有山焉其山卑五嶽小三嶠巖巖崦嵫峴岵崎穹卷百折漶淥焉會流泉澍集凝湧焉潺湲淙淙於是靈巖福谷異寧丹壁儲精孕神涵澤流液吐氣出雲吸月納日積陰清冥灩灩凝凝峭峰植橫施黛青僂縹若霧煙之流藹芙渠之締生中則產玉石鉛碧丹沙流黃橘林叩節雕梓斑篁粉梧櫟梗槿檣豫章挺出勁生俊茂豐長撮掇菲緒婀娜亶翔其水則洪泛沸汨蕩潏湍洄周搏逆凜潛延排來連混陀隧沛踰埼埳疾流馳卒崩雪礚雷渤若洞庭灌如江淮復有清瀾瑩沉下鏡萬有緣以白沙覆以青蘘乃有沉鰱浮鴈龜穴龜藏上下蛟蛇往來鴛鴦鵠鷓鷯羅行此山川之盛也吾與子遊焉胎簪子曰予夙志奇勝欲足極禹跡然而病未能遊也

客曰乃有棄情遺世餐氣服道忽逍遙以輕舉望玉京而徑造啟黃庭之玄言登丹鑰之祕誥爾其彤章翠蓋翳華芝左驂雙龍右兩螭羽裳翩翻垂白蜺金支玉節紛葳蕤青鳥先途朱鳳

隨齊擊文鼉吹雲篴赤華爍爍白日移貝宮參差開九閨辛夷爲梁桂爲楣寶幡綴角羽帳垂椒蘭奮逸霧出幃夜宿姹女棲靈妃被服翠苔拾青蘿出騰八極驂兩儀上下日月驅風雷千秋萬歲安有期於是彌駕層顛飛舄絕嶠白雲含輝皓雪奪耀仰攀桂樹載歌以嘯俯瞰濁世奚異蟲鳥歌曰桂樹兮交加綠滋兮丹葩仰攀兮嘯歌俯人世兮奈爾何是則神仙方外之盛也吾與子遊焉胎簪子曰疾迫隘慕遠遊吾所願也然荒芒而不可徵未暇爲也

客曰有應世之大人秉持仁義服被禮樂其德溫溫與與其象熙熙噩噩量出海宇志棲寥廓懷先世之憂抱終身之樂不結駟而貴不萬鍾而豐不戈甲而威不動級而功布絮所不能賤糟糠所不能窮非戮辱之可詘非斗斛之可容於是陳詩書以爲囿發圖史以爲廬樹節讓爲旌旄饌道德爲膏腴入皇義超虞唐揜五霸彰三王塞者通潛者揚隱者發晦者光轆轤風雲經緯陰陽繪若黼黻朗如琳琅出則施聲教欵遐荒臻盛美流休祥處則韞匱深藏韜曜含光視葛天爲並世招箕穎而同行是則何如胎簪子灑然陽氣見于面病若脫而瘳者於是延客上坐設帳具饌曰果有是人吾將從遊

伯川詞【并序】

伯川者周太伯之所遺也水部錢君家于川上世敦讓節至水部益脩文義有紹芳烈將俟宦成歸于伯川之上命予作辭歌以樂志

錫山之下兮伯之河水鱗鱗兮石峩峩子之室兮水阿結綠蘅兮葺荷白蘋兮青莎何以繚之兮素沙子朝出遊兮暮來歌子不樂兮復如何若有人兮河之湄施蕙帶兮服芰衣循洲陲兮下水裔目眇眇兮獨懷思若華兮蘭蕤折之兮遺誰霜露兮夕下恐芳菲兮我萎歲暮兮無聊佳人兮來歸川之上兮太伯所居我迎伯兮河之隅羞蕙肴兮薦文魚伯之來兮駕栢輿芬菲霏兮爛襲予我思伯兮世靡渝

霍山辭【并序】

司農公致爲臣而去或曰司農公致爲臣必不豫懷忠獲疑脩正被斥此屈子所以憂離感憤而賈生所以悼毀也或曰否不然枉直善惡厥道不同君子要之善且直而已不論夫合不合也故忠臣不責信于君正士不責親於人司農公致爲臣胡爲弗豫間曰汝南何景明往造公視其體腴然其度于于然不異平居也徐察其色黝然顧若有伏憂者於是景明述或人之言告之公曰夫臣者以誠奉職以道愛君不克其職則耻不得其道則止今予思克厥職而道不得以罪遣足矣然疇昔之夕予靡靡寐起游思纚纚有揆皇度或省而反予者胡爲豫胡爲弗豫或人知予哉景明循階將退公曰行止進退命也豫不豫人也人如命何予晉產也晉之鄙有山焉曰霍山霍山者晉鄙之鎮也其下沃渠衍拓可田而食豐樹□櫛可蔭而息而剉窪躋阿可以構而處也吾逝矣安知人間有豫不豫也景明乃爲霍山之辭歌以壽公辭曰巖巖霍山之隆穹兮奠彼晉埜左屬太行蒲阪委蛇兮襄陵 嵬而在下雲之興兮霈霈望佳人兮容與嫋嫋兮秋風芳卉兮已摧虎豹兮咆哮猿嘯兮又哀山中兮寂寥佳人兮胡不來桂樹生兮何檀檀霜霰下兮夕以寒叢薄兮蒙密瀼穴兮潺湲鳥萃兮翼翼獸伏兮般般鳴隼不可以共

厲兮佳人歸來兮延年

榮養堂歌

翼翼茲構兮實顯敞蘭栴櫨兮弗卑以抗周墉廣除兮廊四嚮母氏爰居兮安居服養菊徑兮蕙圃有 其萱兮羅生於下洛京逶迤兮嵩邱幽阻湯湯伊瀍兮泛泛陽渚朝升矚兮暮斯止母不樂兮母何以紛酒觴兮吹歌羞豐膳兮有加被霞襦兮簪瓊華母氏樂兮樂且遐

滕王閣歌

朱薨兮參差綺構兮崔嵬俯眺兮層城仰登兮高臺登高臺兮以臨江渚水浩浩兮在下忽雨兮西山有滄兮南浦畫舸兮迷津繁吹兮萬戶出千里兮名衢山川麗兮洪都置酒歌兮張燕會儼車服兮盛文儒俗恬兮政暇君胡爲兮弗遨以娛君遨娛兮閣中撫迴檻兮披崇墉携賓客兮舉目弔帝子兮夕江江何有兮有蘭交加攬紅蕤兮擷瑤華泛長空兮秋水送孤鴻兮落霞逝從君兮靡由眇愁予兮奈何

卷四

皇告

皇告頌開詔也歲乙丑中夏皇帝告萬國朕祇命上帝乃御至極其與民更始改元曰正德爾萬方欽哉其宣播無匿

八月至貴其日載暘龍旂既翔龍幄既張大小肅肅乃於郊迎既召有衆播告在庭皇皇恤命罔不是將嗟我貴庶荼苦孰蠲既加斧斨屢罹凶年眷茲皇仁如天如春如草斯植莫不敷宣

蠢蠢苗民浩浩炎邊是俾是承亦共戴天黑齒髮椎執弩被氈載歌且謠皇帝萬年

皇告三章一章章十句二章章八句

澥之水

羅生之辭予歸澥江也予作澥之水三章

澥之水可以方可以舟子之歸矣可以斯游

澥之水可以河可以海子之歸矣可以斯邁

澥水有岸白石有爛斯邁斯遊樂也永嘆

澥之水三章二章章五句一章四句

中林之棘

中林之棘送崔子也

中林之棘維桃與李阪田之特生也曷以民之無儔曷其有已

王事皇皇駕言徂行念子出宿我居煢煢我心之邁與子同征

行野蹶蹶行國邁邁無草不茂無穀不潰民之瘁矣心憂用喟

彼魚之戢在彼河梁彼兔之置在彼河側豈不是思進退維亟

同賈知貪同食知甘予諒予懷如口弗爽予之有懷子豈不諒

火之方殷不戒胥燔水之方割不戒胥溺火之方殷乃仇撲滅水之方割棄其舟楫

有滄斯雨有霰斯雪如履堅冰乃尚思熱衆方媚矣莫敢獨說如處大厦俟其顛覆

謂人弗言言成禍矣謂人弗職職成過矣孰無朋友倡誰和矣

子曰弗仕子有父母予曰弗仕兄弟誅予天子則不罪朋友弗取

中林之棘九章七章章六句二章章八句

原有楚

原有楚贈韓子也

原有楚隰有苦子車駟牡駕言徂矣見子之父

原有柎隰有蓼子車駟駟駕言遊矣見子之母

原有桑隰有唐子車駟黃駕言行矣見子之兄

子涉渭矣渭水洌洌我思見子安得北流

子涉渭矣渭水沛沛我思見子安得北逝

原有楚五章三章章五句二章章四句

淮水

淮水送張子也

淮水湯湯伐鼓鏜鏜之子南行征夫不遑

有翩者燕集於堂巢我日不謁而旬不朝征夫況瘁誰使告一爾勞

誰經營四方誰高門翱翔誰粲粲衣裳誰饑渴載行辰月弗震乾月維電視天之威伊胡云虐
弗問則退問言誰對

敬我友矣式相求矣詢於道周維教言是由母瑱言是謀母戲言是流

桓桓之羆兔罹于羅如彼弋鳥維恐不加無執猫狸而舍彼虎豺

我視人之疚如裁我躬勿曰行弗動勿曰言弗用勿曰我寡憚彼有衆

矢詩弗頌維云諷矣伊誰之送孝友張仲

淮水八章三章章四句五章章六句

秋風

秋風諷也

秋風厲厲中園有卉不植松與檜柰彼蕭艾

秋風飄飄中園有條不植松與檜柰彼艾蕭

秋風二章章四句

卷五

興隆祀丁曲

稱朱竿揚朱絃鳴鐘朗鼓各在懸月建酉日次丁牲全體成告于庭【一解】久哉斯道淪以失天啓神聖我祖出戎衣一着四海一遐土之人炳文質【二解】昔者子欲居九夷百世之下乃享于茲猗與斯道垂憲靡遺【三解】浩浩皇皇八荒九州罔或靡知罔或靡由曷知曷由我祖之休【四解】

羅女曲

羅女年十五自矜好顏色山葉雜山花插髻當首飾蠻方立門戶男女多生涯昨聞城中市女出男在家上市買黃絲染緝作花布裙短衫袖長不惜雙腳露夜行山中道何處吹蘆笙我歌連臂曲曲罷動郎情動郎情與郎匹生女復長男三年始同室

落葉哀蟬曲

落葉哀蟬曲者漢武帝之所作也李夫人早夭帝思之不已為作此曲也

寂寥兮寒閨空帷兮晝低若有人兮感羅衣覓恍惚兮往復來涼風飄飆兮吹玉階秋葉颯兮鳴蟬哀有鳥嗟嗟永離乖雙棲比翼兮何時諧

剡溪歌

溪之水兮幽幽誰與子兮同舟舟行暮入山陰道月濛濛兮雪皜皜千載重尋戴逵宅溪堂無人夜歸早乘興而來興盡休君不見王子猷

悼遠辭【并序】

侍御顧君祖存元先生生哲弗祿死夭弗葬侍御君追念後先言嘅淚下景明君同年友也哀其意作悼遠辭曰

矯矯龍蛇兮沒於泥沙嗟苦先生兮獨罹此嗟連彼修路兮驥驟不力美璞弗器兮良田不食嗟苦先生兮獨罹此極

倚柱操【并序】

倚柱操者魯漆室女之所作也漆室女倚柱悲吟鄰人問曰欲嫁耶女曰吾憂國傷心故悲而

嘯豈欲嫁哉遂自經而死予哀其志援琴而托其聲焉

兔則有置兮鳥則有羅國無人兮將奈何心之憂兮豈曰予未有室家嗟嗟室家非我營兮我生曷榮兮

戰城南

戰城南戰不息朝戰城南暮哭城北積尸纍纍肉腐鳥不食放馬澤中雪沒馬腓沙寒草枯不得馬肥北風夜吹敵兵四圍我欲上馬馬瘦不馳我欲射箭弓硬不開但語城中親汝出收我骸戰城南君莫悲猛虎嚙人翔於山垂欲食虎肉不避虎威男兒立功橫行四垂生當封公侯死當白骨歸

巫山高

巫山高極青冥間翠綰參差十二鬟神女仙裙佩纓動行雲飛入荆王夢含情流盼輕烟中玉床瑤枕薦君宮紫羅白縠垂香風恍惚覓散莫與同微霜銷落高邱樹哀猿孤吟鳥雙去荒淫淪滅竟何為暮雨冥冥歸古祠

芳樹

芳樹離離朱華而綠滋華滋雖云好秋風暮來吹秋風不足卹華滋亦有時嗟汝枝上鳥汝去將安歸美人何方至貽我江上華秀彩奪人目胡為在天涯天涯雖榮好不如常在家

關山月

關山月夜照青海頭白骨征人怨紅顏少婦愁少婦含嚔望月來月明流影洞房開歲暮機中縑素出夜寒燈下剪刀催年年搗衣明月秋明月還隨隴水流閨裏空教看破鏡沙場不見大刀頭

琳池歌

琳池歌者漢昭帝之所作也

木蘭為幟文梓為船青荷為蓋衣紅蓮宮娃側坐揮繁絃淒風嫋嫋飄素秋飛花委葉承波流霜露夜下不可留

招商歌

招商歌者靈帝之所作也

高館閨兮曲池通乘舟夜逐荷葉東持荷作蓋不障風持荷作衣難為縫金瑄玉鳧響秋空歌
婉聲長待夜終

公無渡河

公無渡河河濁不見日汝今欲往何時出公無渡河河廣浩無涯往而不返化為泥與沙夸父
渴走成鄧林至今邱塚猶岑崙河中蛟龍見人喜縱有舟楫誰救爾噫嗟嗟公無渡河渡河而
亡不如陸死噫嗟嗟公無渡河

明妃引

明妃絕色世無鄰粉黛那數三千人咫尺宮門接前殿君王只向圖中見當時自恃如花容美
醜誰知由畫工單于日近漢日遠萬里風沙覓不返琵琶馬上再三彈翠袖朝啼關塞寒皓齒
明眸葬沙漠千秋遺曲猶悲酸燕支暮雲白浩浩羌人吹笛雪飛早山前孤塚高峯幾歲歲春
風長青草古來抱節本難遇況復蛾眉人所妬君不見長門宮不用黃金買詞賦縱有朱顏君
不顧

短歌行

冉冉秋序肅肅霜露蓄我旨酒召我親故鳥歡同林水歡同源矧我同鄉胡能弗敦耀靈西藏
明燈在室更長夜良可以繼日園有藝菊庭有樹蘭秋芳是悅春榮曷觀高陵可升海水可測
出門異路安知南北生年幾何去者日多子不我樂聽我短歌

銅雀妓

墓田望不極松柏夕離離存生有懽怨亡沒詎同思井幹日已摧總帳寧復施衰榮互相謝身
後徒爾為

苦寒行三首

天地黯閉塞冰霜皓崔巍寂寥高城側鬱律見古臺烈風夜中起飛雪千里來鳥羽沉不施獸
口噤不開虎豹斂穴窟蛟龍俱凍埋六龍銜白日寒苦光不迴

二

石裂南山下水結中河流莽莽北郭外死骨聚如邱貧士被毛褐寡婦無完綢寧知貴公子絲
竹宴朱樓方辭白羽扇更御青羔裘

三

天風日夕厲海水不揚波飛雪被千里層冰白峩峩嗟汝窮閭人無衣當奈何錦裘長安兒白馬鳴玉珂象弧插彫韞射獸西山阿

塘上行

蒲生寒塘流日與浮萍儔風波搖其根飄轉似客遊客遊在萬里日夕望故州鶻鴟鳴歲暮蟋蟀知凜秋暑退厭絺綌寒至思重裘佳人不與處圓魄忽四周房櫳淒鳴玉紈素誰為收白雲如車蓋冉冉東北浮安得雲中鴈尺帛寄離愁

放歌行

天命諒靡易富貴安足陳自昔慕豪勝重義還輕身整轡逾鞏洛驅車入咸秦立觀青雲上馳步要路津射策報明主投書干大臣身為五侯客家與七貴鄰杯酒縱經過冠蓋羅逡巡顧盼生光彩吹噓借陽春各矜意氣好自比骨肉親時事多變異交道亦湮淪要盟等金石棄擲同灰塵赤心不足恃白頭更如新歸來嗜藜藿偃仰隨松筠始知葵藿甘不若蘭桂辛願從白屋士請謝玉堂賓

鴈門太守行

壘壘高山莽莽代谷城邊風起沙漠漠城內惟聞奏羌樂太守下車買牛息戈陶民禮義朝絃暮歌北歷黃沙磧南遊白草原五馬何秩秩朱英導文軒嗟哉太守亦孔武時時較獵西山下

梁甫吟

君不見泰山高高梁甫在其半古來封壇禪地無宮館崖崩壁坼鐵鎖斷秦碑漢碣何人看自從生人開九州九十六帝行權謀虎豹啖食龍蛇憂朝翻暮覆作雲雨立談坐笑生戈矛鬼神來往仙不死塵埃萬變扶桑流君不見田疆論功爭二桃齊門三丘埋野蒿又不見魯連辭賞輕千金却秦救趙何雄豪眼前無人辨曲直身後聲名更何益拂袖空憐蹈海心護車枉負排山力梁生五噫歌莫哀東絕梁甫觀蓬萊千年雲開錦繡壁五色日抱金銀臺瀛洲方丈列仙占文成五利何能驗徐生入島竟不回博士儒生盡坑塹我吟梁甫君振衣世路崎嶇多是非琅玕芝草海岱曲釣竿拄杖從今歸

採蓮曲三首

青荷晝舒白露晞朱光照耀含素蕤綠房翠蓋偃參差紅妝皓腕暎漣漪齊聲一氣歌艷辭桂舟蘭楫紛屢移佳人羅帶宜風吹

岸上有柳隰中有荷舟中女兒勝吳娥為君先唱綠水歌起攬長帶垂織羅鴛鴦雙棲翡翠過
下渚日暮多風波葉密花稀愁奈何

三

急歌太短緩歌長清風夕回素雲翔雙鳧飛起向橫塘荷花不言空斷腸明月宛轉流西方月
中白露沾衣裳紅顏青鬢安能常萬歲為樂莫相忘

獨漉篇

獨漉獨漉驅車折軸不畏折軸但畏車覆芄芄者猶生彼中衢雖有蘭蕙當門則鉏同行竊金
相顧道左我實不知彼則畏我食荼知苦食梅知酸狐裘之敝可以禦寒有虎斑斑伏于林下
我欲射虎愧無勁弩肅彼北風渡彼中流豈不懷憂與子同舟

白紵歌七首

齊紈越羅霜雪輝吳刀并剪為君裁鳴璫垂珮行相催且步雲館升月臺珠纓列座瓊筵開秦
箏慷慨趙瑟哀含淒歛嘆【一作笑】君莫猜

二

鳳樓十二連繡衢雕楹刻桷耀城隅朱檠絳蠟艷紅蕖金盤玉羞奉君需美人隔坐曳華裾主
稱萬年為歡娛上客翠盖停蜘蛛

三

千金買笑萬金買歌明珠白璧豈足多長眉窈窕揚秀蛾輕身起舞垂織羅悲絃急管鳴相和
三星低戶月沉波銀箭金壺奈夜何

四

吳娥白紵為舞衣鏤花綴葉紛葳蕤青春爛熳白日輝輕帶一舉長袖施皎如流霞隨風飛游
龍宛轉翔鵠迴傾城絕代人共希

五

手中色絲舊所治青紅碧綠當自知衆中不語心向誰感君厚恩私念之東流之水不西馳泰
山在前不可移紅顏白首奚足辭

六

北里撾鐘東鄰撾鼓吳歆越吟邯鄲舞恩義如山金如土遺簪墮珥不復數窮冬夜長樂未闌
流風迴雪滿楹前不惜皎潔為君妍

七

白玉鎖闥黃金堂蘭煙蕙火薰象床雕屏羅列組帷張繁膏列炬舒華光橫簫挾琴步曲房朱
唇素齒發浩倡願為比翼雲間翔

苦熱行二首

火雲崢嶸連赤阪白日苦長不得晚庭前井乾生赭煙炎埃晝起高塞天侯家陰洞帶流水紗
幃白晝淒風起美人冰盤薦朱李道上行人多渴死

二

晝眠苦多蠅夜眠苦多蚊炎霞熱霧蒸網緼四體拘促何由伸仙人桂宮接蘭苑下望青松踏
幽巘我欲從之諒非遠塵世何堪遂仰偃

鳴鴈行

鳴鴈鳴斯其音嘹嘹江路遠遙念汝離漂鳴鴈于飛肅肅其羽遵彼脩渚實惟汝所洞庭增波
沙朔多風何寧往來無卹爾躬飛斯鳴斯求蒲與稗無俾霰雪及爾遊邁高山有石高木有枝
我思我朋嗟哉可遺

行路難四首

牀有織綺篋有織素請君視綺還視素憐新不如莫棄故罇中有酒盤有餐聽我為歌行路難
衆中歡樂多志氣豈知他人不得意白日有時不照地安得保君常不棄

二

天河熒熒西北轉織女牽牛不相見由來天上亦別離何怪人間有悲怨世情磷薄 衰賤駕
車騎馬有人羨少年不得君愛惜紅顏勝人亦何益

三

高樹鳥不集常有東西南北風君子衆所畏好 不合常相攻拔劍欲有適前有虎兕後虺蜮

抵節徒歌行路吟高飛未有橫天翼

四

我發行路歌諸君請勿譁嚴冬霜雪雖可畏三春草木自榮華人生富貴各有時不勞辛苦更
咨嗟百年冉冉寧復多白日速如東流波眼中世事只如此生前不樂將奈何

棗下何纂纂

種棗北牆下棗熟委路衢行人競取食居者守空株憶昔棗初赤傾路且停車棗當今日盡誰
能少踟躕天命誠不易榮落互相渝功勲本積累傾奪在須臾聆我棗下言貧賤可久娛

卷六

樂府雜調四十一首

俠客行

朝入主人門暮入主人門思殺主仇謝主恩主人張鐙夜開宴千金為壽百金饒秋堂露下月
出高起視廐中有駿馬匣中有寶刀拔刀躍馬門前路投主黃金去不顧

河水曲

河水何濺濺暮采河邊蘭君隨河水去我獨立河干

車遥遥二首

馬立車遥遥望望車塵滅但聞上車語不得下車別

二

寒鷄喔喔知夜半鄰翁舂梁婦炊飯僕夫聞鷄趨車起欲明未明行十里火輪飛出扶桑霞羲
和騎龍鞭日車君看日亦無閒時我車安得常在家

隴頭流水歌三疊送劉遠夫行

我欲望長安隴阪高蔽天隴阪高可陟隴水鳴濺濺

二

盤盤上隴車斑斑下坂馬我非虎與兕使我行曠野

三

長安有高樓不見隴西州可憐隴頭水日夜東北流

下陵曲

上陵風以雨下陵月星露不見西陵宮但見松柏樹朝行西山曲暮至長安道長安車馬多風
吹陵上草

直路行

直路難行直言難受邪徑捷足莠言悅口直言如矢聞者畏憚如射曲巷鮮不折幹直路坦坦不可避難大夫史魚死以尸諫汲黯抗言不冠不見輪扁之言桓公是悟焦不避烹秦皇霽怒猛虎在前不為我言虺蛇在後不為我告二世自閔遭害于宮號君怒御枕塊道中不忍其憚寧忍其亂苟畏爾耻必視爾死如藥弗潰其疾必遂如矢不直不能貫革小人惡直君子是持神之聽之終獲其釐

海山謠

斷鰲立浪海水裂蜃魚食日日五色海中靈氣變莫測白晝須臾風雨黑彭祖夭巫咸滅龍伯死精衛絕山亦可搖水可塞

秋江詞

煙渺渺碧波遠白露晞翠莎晚泛綠漪蒹葭淺浦風吹帽寒髮短美人立【一作泣】江中流暮雨帆檣江上舟夕陽簾櫳江上樓舟中採蓮紅藕香樓前踏翠芳草愁芳草愁西風起芙蓉花落秋水魚初肥酒正美江白如練月如洗醉下煙波千萬里

瑤瑟怨

美人竹間亭虛簾空月華相思湘江曲淚竹生斑花花開為誰好花落不復掃出戶見春風低頭怨芳草坐彈五十絃起視江月殘愁絃不堪聽手澁金鴈寒一彈正淒切再彈轉嗚咽三彈撥幽腸聲亂水絃急西風吹芙蓉一夜落舊紅豈知瑤瑟音能消青鏡容

黃頭郎

黃頭郎爾母侮殿上天子憐府中丞相怒爾雖有銅山運去銅如土黃頭郎爾母侮

黃鵠歌

請君勿誼譁奉君黃鵠歌黃鵠一飛去翱翔天之涯我欲致此鳥雲中無網羅安得生羽翼從彼凌丹霞山川遼以邈不歸當柰何

烏夜啼

啞啞烏啼宮井霜殘月半落明星光城頭吹笛已復罷宮中擊鼓殊未央

竹枝詞

十二峯頭秋草荒冷煙寒月過瞿塘青楓江上孤舟客不聽猿聲亦斷腸

采葛篇

野風吹葛葛逾好綰霧縈煙青嫋嫋谿迴水白雲石蒼石根引蔓百尺長越婦腰鎌赤雙足褰裳行歌入中谷朝日未出霧露寒花繁葉密採掇難年年績絲作絺綌奉以服君君莫斲君知衣葛好不知採葛苦白日畏逢蛇月黑畏逢虎君不見吳王宮中細腰女日向歌筵着白苧

霹靂引

石湫黝黝黑雲夕蛟龍夜起隨霹靂盤空殷地出絕壁驟雨飄風怒相擊空中將將下矢石千戈萬馬俱辟易飛鳥墮地委如積古檜長松盡遭劈吁嗟乎阿香深山巨海胡弗往短蜮脩虺兼魍魎

刺促篇

刺促刺促井燎不續雖有場苗室則靡粟羅雀務獲不言其多見彼淵鱗或言其苛跣夫逐鹿坐者食肉苟一需百百爾莫足譬彼乘車弗率坦野驅馳不已或敗爾馬河有伏罟蛟龍去之相彼有明孰逢其災前有鼓樂後有寇盜方言方笑不敢以告執鼠不力或傷其手彼虎彼兕矧不以走有蓬其樹其腹之枵豈不休息維顛在朝

處州別駕行

處之地山水迴處州別駕賢且才別駕來郵吏馳騎連連鼓鼙城門大開別駕來別駕來御駟馬雙麾在前高盖娜娜入有列戟出有負弩吁嗟別駕賢且才江之水去悠悠兩帆揚別駕舟處人來迎申人留嗟別駕安以適彼安以去我

種瓠詞

種瓠東園內瓠葉從風翻綠蒂飄長帶素花密以繁雖無百尺根枝蔓自纏綿雨露冒時澤陽暉被朝暄竊比女蘿草附身托高垣綠畛齊結實豈貴充盤飧願為連理杯長以奉君歡

雙燕篇

雙燕何翩翩飛去仍徊翔依依止畫閨繾綣鳴東廂昔來屆陽節今去易寒涼祗恐秋風高海路多煙霜雙飛入君戶雙栖在君梁被蒙君仁惠彈射不相防養雛毛羽成送雛還故鄉雖無黃雀報歲願巢君堂

去婦詞

嫋嫋竹竿釣魴及鯉魴鯉可食竹竿何以子有錦衣莫忘布襦子有旨酒莫忘糟糠賤妾嫁君
所期偕老紅顏難長倏已白首白首雖可出不念紅顏日

種麻篇

種麻冀滿丘種葵冀滿園孤生易憔悴獨立多憂患當行思故旅當食思故歡先機失所豫臨
事徒嗟嘆升蕭艾乃至鉏桂致傷蘭物理有相附疇能識其端斷金俟同志抱玉難自宣交結
良匪易君當圖未然

月食篇

仲夏月食月半缺仲冬月食食之既皇皇下民亦孔之悸其魄有物薄之彼盈而微實度
之宜今此下民孰使告爾災嗟嗟亦悸孔哀有烈其風自伊天阻雲旗載揚矇瞽奏鼓率彼下
土訴于帝所訴于帝所光復于天光復于天其明罔愆照臨爾下民

國士行

漆身為厲吞炭為啞更名入宮廁變形伏橋下雖不褫讐魄猶得斬讐衣生有國士名死為壯
士哀

誰謂河廣行

誰謂河廣濁不見泰山孟水之清可別螻與妍清濁苟異小大安足言君子知之衆人皆茫然

下宮行

下宮兵來圍朔妻置兒袴中兒不啼一索不得當再索孤兒那可活嗟杵臼爾為朔客我為友
立孤誠難死何有嗟程嬰女當徐死孤當事爾彊為難我為易千金詐賣趙氏子真孤乃存杵
臼死復趙社嬰刎頭報死者

易水行

寒風夕吹易水波漸離擊筑荆卿歌白衣灑淚當祖路日落登車去不顧秦王殿上開地圖舞
陽色沮那敢呼手持匕首摘銅柱事已不成空罵倨噫嗟嗟燕丹寡謀當滅身光也自刎何足
云惜哉枉殺樊將軍

君子有所思行【一字起十字止】

猗君子有所思居高無民不如守卑衣錦負薪入市見嗤神龍在涪淖反為魚鱉譏鳳凰不得

地翻身避群鷄騏驎雖能千里逐鼠堂上不如狸丈夫秉性天所定流俗是非何足移水中馬
與陸地之魚曷謂失所置能久須寧為地上特生之野草不能為茂樹負巖牆而居

燕啣泥

君不見燕啣泥為巢哺雛常苦饑雛有羽翼各自去安能久在梁上飛丈夫出處亦如此貧賤
富貴皆人為燕啣泥不慮哺雛勞但慮衆雛飛不高

養蠶詞

桑葉青蠶始生桑葉莫莫蠶白滿箔今年女兒道蠶早晝夜照蠶恐蠶老浮萍生葉麥落花風
簷綵絲鬪鳴車君不見簇上蠶乾死老蠶成蛾又生子

嗟哉行

老烏能啄牛能觸嗟哉世人互傾覆自徹其藩盜入屋同病者憐同憂者嘆梟子奪鳳衆雞不
安何得同類反相殘彼梁可逝羿可避禍福由人豈天意君不見虎雖有瓜鴻有翅

雙鴈篇【并序】

錢水部世恩在宦失偶日夕哀吟其友何景明為作雙鴈篇寄之

雙鴈雲中來雍雍揚鳴音念子中路散一飛與一沉冥冥江湖道思歸苦不早昔為並棲禽今
為特飛鳥飄沙戀故浦別流思故河奈何同溝水翻作異派波鳥悲多苦音客悲多苦言絃爾
孤桐琴操我雙鴈篇

莫羅燕

羅雀莫羅燕燕飛在高殿殿高且深誰得見主人垂幕高殿中燕來徘徊不敢通楊花落燕出
啄童子張羅逐黃雀黃雀入羅燕入幕

牧犢行

黃牛遇虎南山下夜見白石心中怕牧童牧犢畏虎欺挽弓邏之不敢離削竹為簇蒿為箭射
虎恨不穿虎皮嗟汝虎爾勿欺我犢我犢有日頭生角

城畧陽

扶風令城畧陽賊來畧陽令走藏扶風令為登城喚抽刀誓衆衆不散三日抗城一日戰戰不

利兮生縛見見賊罵賊危不變畧陽城人盡為鬼畧陽令生扶風死守臣上奏驚天子君不見
扶風令死封公卿嗟爾畧陽之令胡為生

潘節婦

二十君辭房六十妾在堂紅顏為婦白首孀昔日抱女今已亡風火炎煙黑鄰里相救失顏色
未亡之人安所從義不避火天返風噫嗟嗟妾雖有身君無子身未化石心不死

高城行

高城巖巖山百堵白日樹旗夜懸鼓將軍戒嚴太守武城下賊來城上穀弩樓軍轉石城人負
土噫嗟嗟城完家可全城破家為擄傳與城中人但保城莫閉戶

南山篇【并序】

宏器為思親卷予為作詩文及今八年矣宏器得貢將入京復以此冊求予詩遂為是篇

朝采南山白石盤盤風來吹葛葛葉幡幡豈無枝蔓念我本根翹翹栗薪靡考誰熱緝緝葛絲
考則靡服簞簞澗魚在罾麗麗昔用為殮今用為祭上陵折松下坂折柳遙遊子勿以行久
月不恒處日則有酉瞻彼日月思我父母

轅下駒

轅下駒鳴聲一何悲豈無萬里志跼蹐安能施詰曲羊腸坂纍纍太行谷車輪不行白日沒仰
思玉山意超忽君不見八駿日行萬里馳煙掠景誰能拘吁嗟乎轅下駒

卷七

武陵【以下使集】

武陵一何長遼遠不可測高林多悲風慘澹日無色黃熊啼我前白狐跳我側蛟螭蟠深淵下見奔雲黑沙蒸水亦毒我僕饑且踣辭家忽踰秋適此萬里國土風日以殊川域邈無極伏波有遺響吟餘轉悽惻何因托橫吹一寫千載憶

桃川宮四首

神宮矗飛觀結構俯層邱上翳萬年樹下暎千尺流仙蹤久已沒百代傳其由荒塗橫白雲寥寥安可求

二

谿谷多青氛朝暮不可知雞鳴洞中樹輕噉散華池白石流丹液靈葩耀朱蕤誰能學丹術遂使塵網離

三

石洞無遺構空巖長松桂入深忽已陰升高稍知霽山光晚多姿谷響秋轉厲緬懷避秦者一往成永逝

四

溪中何所有磊磊多白石紫參生其陽青松植其北遠林商氣清絕巘夕光白何當發雲奏招我吹簫客

自武陵至沅陵道中雜詩十首

承明播宸渙西適蠻夷州艱哉武陵山古道何悠悠狹谷不容幘水中無行舟仰探虎豹窟俯瞰蛟龍湫徘徊遲吾馬中心懷懍懍憂脩程尚延亘我行何時休

二

群山何逶迤環峙如百城其上干青霄其下浮雲征出沒千萬態倏忽殊陰晴撫茲豁心目頗慰羈旅情

三

亭午入大谷烈陽經中天樹木多鬱蒸石坼起焦煙掘地飲我馬數尺不得泉僕夫告飢渴揮汗墮馬前安得萬間厦坐使清風延

四

暮投界亭驛候吏迎我前息徒茂林側飲馬山下泉落日四巖陰餘映高樹顛坐久吏人散濁酤聊自延

五

驅馬山上行山高何巍巍修阪接飛翼百步仍九迴俛視煙靄中衆山鬱何壘茫然望四海萬物亦已衰昔我別京國朱華猶未希歲節忽復易何時當旋歸

六

大壑百餘尺流水浩湯湯我行路中斷欲渡無橋梁誰為理舟楫石亂不可航改轍上危棧登茲千仞岡臨深古有戒側足以徬徨

七

叢薄被烟臯徑路紆且微秋風振喬柯綠葉漸以稀日入羣動息林深衆響歸君看棲枝鳥大小必相依

八

山深多樹木百里人民稀時有四五家茅茨隔山陂沙田不可耕何以禦歲饑門前數畝園祇收蓬與藜平明出汲澗薄暮始得炊童稚那敢出但畏逢虎羆草黃納晚禾桑綠催官絲嗟爾遠方人辛苦誰具知

九

山勢行轉促連峯相貫輪窈然林莽中乃復得坦途青壁結煙靄縹緲凌虛無層阿秀嘉禾下覆清水渠夙志好幽僻覽茲耳目娛公車雖少延顧盼忽已踰安得鼓清瑟日坐山之隅

十

谷轉岡漸平策駕循陂陀遙望辰陽城枕山帶長河飛甍若鱗次居人亦何多按節駐江館登

眺崇山阿南衢聞夜絃北里揚朝歌誰云接異域文物殊中華

懷化驛芭蕉

芴芴芭蕉葉植此園中央繁綠布重幄層陰蓋高堂孟夏日初赫蕭森蔽炎光衆賓御華館四座借虛涼四序互更謝南陸回朱陽窮秋多風雨寒冬多雪霜危叢旦夕茂綠葉日夜黃本無松栢固安用誇其長徘徊視草莽零落同一傷

花崖梧桐

桐生何猗猗其葉何油油白雲蔭崇阿朝日照高邱感此雨露滋愧彼蔓草儔鳳凰久不至琴瑟誰可求吾將緼繁絃庶以宣我憂

清平令

清平縣之令不識何為者庭前長野桑庭後長山櫟猛虎上我城青狔啼我舍昨日出城去騎馬到部下部民道遮之持刀殺其馬入門顧妻子所居無完瓦秋風吹樹木白日落原野永夜空城中哀哀淚如瀉

平越

清晨發平越霧暗山益密僕夫各相戒路遠恐迷失薄午游氣清參差衆峯出雞鳴谿谷中始見崖上日雲葉分杳冥高原被華實秋風起叢林興感乃非一悠悠遠行邁歷險難具述

新添

朝登七盤陂復下九折坂長風飄落日杳杳前山晚征夫行取薪夜入礪中飯仰視飛鳥還載觀浮雲卷還顧望鄉邑日與親愛遠公家尚有程安能速言返

平埧城南村三首

朝出城南村策馬入荆杞村中八九家煙火自成里兒童候晨光稍稍荆扉啓四鄰務收穫時復披草語昵昵何所云但言好禾黍

二

秋陰結林霏細雨洒茅室牧放止近郊牛羊不相失廣園散花林平疇藹風日長幼不出門咸知戀儔匹喧喧車馬中徒為慕高秩懸輿當何時可使志願畢

三

沉沉古陂水日暮寒更綠隔陂見居人蘿蔓纏草屋摘禾留客飯採薪發秋木童稚持竹竿雨中放雞鶩區區化外國猶得覩淳樸

普定

鼓絕掩山城空堂思超忽孤燈明夕帷悄悄涼風發落葉何飄蕭飛螢互明沒客窗臨古寺坐待微鐘歇

城南婦行

城南有寡婦見客泣數行自言良家女少小藏閨房青春嬌素手白日照紅妝父母偏見憐嫁我不出鄉前年彌魯亂腥穢入我堂弟兄各戰死親戚俱陣亡嗟哉華艷質忍恥罹兇強憂愁雲髮變辛苦朱顏傷昨聞故夫在息消通兩方百金贖我身三年歸舊疆歸來門巷異人少蓬蒿長轉盼夫亦死兒女空在傍薄田無耕犢寒臘無完裳人生固有命妾獨遭此殃況復官軍至燒焚廬井荒主將貪賄賂百死不一償朝廷自有法出師亦有名妾身何足道無乃乖天常

平蠻二首

滇南八月中綠林何萋萋居人亦相輳數里聞鳴雞路轉無詰曲山行少攀躋回瞻貴陽道咫尺蹊壑迷

二

夜宿平蠻館風悲氣始淒月光皎東壁白露寒蜚啼憑高視中原但覺衆星低長路心益壯浩歌天之西

涪萬

孟冬氣始肅葉落北風涼寒水斂溝壑餘輝照橋梁方舟下涪萬所歷非一疆崇朝越千里川塗渺蒼蒼浮雲帶城邑壯麗逶且長況多古人迹覽之心慨慷登遊豈不美滯淫非我鄉

泊雲陽江頭玩月

扁舟泊沙岸皓月出翠嶺開窗鑒清輝照我孤燭冷高林散疎光遠渚接餘景縱橫銀漢迴三五玉繩耿弦望幾更易客行尚殊境佳期邈山嶽端坐令人省

涿鹿道中【以下家集】

高城鬱莽蒼永路多荆棘日氣夕以陰遊氛浩無極城邊古時邱宿草蔓于域樹木何蕭蕭狐狸鳴其側訪古思軒轅嶽壑何由陟伊昔奮龍戰明明庶邦式神馭飄鼎湖烏號緬玄德遺踪邁荒野盛烈存茲國誰云戡亂功不俟干戈力風雲變俄頃明晦古難測薄暮窮林中怒焉長太息

渡白溝

春行傷旅思單車悵蹉跎晨眺黃金臺夕渡白溝河求賢不可見血戰竟如何落日古原下悲風入浩歌

叢臺

邯鄲多俠士趙地產名娼日夕高臺上歡宴殊未央黃金飾舞榭白璧綴歌梁安見千年後空令春草長

五平五仄體

秋原何蕭蕭耳目去雜茸枯荷猶穿塘苦瓠尚抱隴寒風吹空林落日照古冢徘徊觀陳蹤露下髮忽竦

迎霜降

烈風揚雲旗鼓角悲廣路庭前玉樹枝昨夜微霜度幽人躡葛屨出戶履寒素胡當戒堅冰及此歲將暮

冬雨率然有二十韻

北風吹零雨冬熱雪不作二儀黯澹交百川莽迴薄沙霾翳白晝遠望何由豁六龍墮青冥萬象淪玄朔羲和扶日行紆轡竟焉托神媧補天裂鍊石恐遺落雨伯誰為誅雲師爾何惡前者十月交震雷轟城郭岸條俱含柔園卉亂吐萼農家忍朝飢歲暮食籬雀豈無數畝禾狼籍委秋雹徵求皮肉盡枯骨待剝妻孥在眼前四季不得樂胡因見陽春所慮轉溝壑閒居值泥淖展矚翻蕭索雖無長者轍自閉寒士閣長陰下脩麓暝色起孤岳喧啾後栖鴉悵望暮歸鶴世途紛轉蓬生計倚叢藿永懷昔人駕冥心付寥廓

發京邑四首

弱冠遊皇邑抽翰預時髦出入承明地四海皆同袍浮歲奄七徂徇名虛所遭夙痼糾纖質褊性憚形勞駕言返初服行矣遂林臯轉蓬戀本根羈鳥思故巢自顧無脩翼安能久遊遨

二

驅車出郊門杖策遵古行返顧望城闕引領內懷傷崇京槩霄漢逶迤一何長雙觀臨馳道羣宮儼相當迅飈激櫺牖游雲起縱橫漢道值全盛纓綬爛輝光側觀青雲士鳴珮倏來翔梁生何慷慨遼遼悲未央

三

親交遠集送歛策西山陰前瞻太行道却顧上苑林青陽藹廢墟春氣感鳴禽所遇豈殊故即事自成今【一作所遇豈殊時即日成古今】平時等榮樂一旦異浮沉昔者同袍友邈若辰與參山海去靡極年運日相尋倉卒杯酒間寧不傷離襟【一作惻惻傷離心】

四

行邁越長甸歷歷懷苦辛輻嶽陟邱隴髣髴望郊闔墟里接鷄犬井邑無閒人暄陽入廣陌膺膺周原新百城豈不美風土非我鄰遙遙盼鄉域言念故所親代越各有性所願還其真胡為去桑梓鬱鬱冒風塵

渡河

夙征肇延津明晨臨大河洪源下積石砥柱屹嵯峨渺渺梁宋區汗漫縱經過自非陵與岸於安障其波揚帆赴中流四顧莽無涯崇雲徂廣澤迅風夕吹沙積陰不可測魚龍偃相加前無千尺梁一葦胡足誇人生寡恒居奚異波上槎豈無舟楫志漂泊當柰何

許下

伊昔炎漢季西京方遘患宮室燒燔盡乘輿播草間刼遷留茲域荆棘滿頽垣橫流一以濫大厦寧復完豺虎互馳噬鴟鵂厲飛翻日月屢薄食風雲變無端嗟哉衆君子杖策起周旋荀公誠偉士弘思濟其艱陳琳自南至王粲亦西還從戎藉雄辯騰步有榮觀良蹇豈同御鳳鸞不共餐功名安足為明義乃高賢

還至別業四首

雞鳴高樹杪狗吠墟里間家人望車徒遠客造門端入門問所親上堂叙悲歡行人暮飢渴【一作苦飢】秉燭具盤餐明月照西戶三星爛中天出門踐野草白露倏已溥十年苦行役茲夕方來旋寧知非夢寐忽忽心未安

二

詰晨親友至筐楫携所需各言平生歡念子久離居綢繆語未畢展席臨前除園榮亦已抽况有盤中魚人情倦懷土富貴豈常於無為泥形迹所願恒相俱

三

依依入鄉閭慘惻歷故疆行邁踰幾時所見忽以更成人匪故識耆齒日凋喪平生所同歡轉盼殊存亡羈覓邈遐域旅柩歸中堂人命不相待奄忽如朝霜撫事感今昔喟然熱衷腸

四

弭駕及春暮比屋事耕耘時物展遐矚契我遺俗情故林茂以密敝廬亦將成芳蘭冒紫葳園柳尚垂榮澤葵蔓廢井瓜田依故城策杖衡門下仰偃遂平生所願在怡親餘者奚足營世情惡衰歇天道逌虧盈駟馬豈不貴翻覆坐相傾

七夕二首

逝節忽不處佳夕復我臨神飈汎光蕙渥露沾華林緬彼牛女會茲端竟難諶形影慙相望胡由接徽音飄飄翠龍駕髣髴青瑤簪長河坐移轉素波歛西沉靈彩歛以晦游雲起層陰同歡戀膠漆異處悲辰參翹思慕遠匹感此涕流衿

二

舉俗慕良旦好尚各有趨高樓曝紈綺貧女無繒襦移時曜靈沒素月復已舒羣居侈歡宴長坐獨愁吁愁吁亦何為同禍與我殊春徂秋未返膏沐誰為娛仰視河漢女相違復來俱要知比翼乖各阻天一隅乖離有重觀毋使寸心渝

水曲納涼

乘月玩清夜漱流滌煩痼竹栢夾脩水微風揚澤荷苔陰皓露溽素鱗躍于波柔條紛斂結勁葉亦隕柯優游蕩情志俯仰丘中阿雖無朋儕和興言自成歌娛樂當及時千秋豈復多

雜詩二首

西陸移脩晷素節多寒陰端居屏營慮淒氣慘人心浮飈委時卉零露傷青林仰見孤雌翔玄鳥無遺音蟋蟀何愁苦終夜長哀吟感物興慨嘆憂思孰能任

二

馳輝在西山返景流東隅羣欣被光灼何能待須臾重陰肅萬物樹木日夜踈叢蕙【一作蘭

】植幽闔含榮耀前除佳人渺雲端何由致區區常恐霜霰至委棄不我需

卷八

六子詩【并序】

六子者皆當世名士也予以不類得承契納輔志勵益者多矣病歸值秋寤嘆中夜有懷良友別思纏綿作六子詩

王檢討九思

王君青雲姿志豈屑邱壑名家出杜鄴少日遊宛洛奮身匹文鵠戢羽巢鸞閣興文燭雕龍揮翰凌玄鶴雅志在四海隨時偃經畧馳情繼謝朓日宴吟紅藥

康脩撰海

矯矯龍頭士騰躍在明時群遊慕豪放棲志固有期赤驥鳴煙霄不受黃金羈揮毫御清讌浩思隨風飛鐙前激高倡顧盼孰與希究古摘遺編頗好班馬辭良史久無稱斯文當在茲

何編脩塘

中州產名俊河內天下士平生飽藜藿學道歷壯齒至樸歛華蔚徽文陋雕綺守淵安可窺馳辯詎能止洞悟超先機微言析玄理曲高難為和行獨寡知己古轍多蓁蕪非君誰予起

李戶部夢陽

李子振大雅超駕百世前著書薄子雲作賦追屈原新章益偉麗一一鸞鳳騫華星錯秋空燭火難為然摛文固無匹投義罕比肩抗志冀陳力危言獲罪愆握瑜不得售寶棄誰為憐仲舒貶膠西賈生亦南遷古來有遺憤非君獨哀嘆

邊太常貢

世士多戚促器識寡蕭散太常何瑰瑋坦然破崖岸祥烟拂瑤壇瑞日轉華觀出入諧鸞鸞頡頏在霄漢芳詞灑清風藻思興文瀾陽春誠獨步清廟獨【一作徒】三嘆金奏響不虧玉樹開逾燦閑居檢遺編啓篋得爾【一作玠】玩

王職方尚綱

職方吾益友契誼鮮與同少齡負奇氣萬里飄雲鴻手中握靈芝高操厲孤桐讀書邁左思識字過揚雄為辭多所述結藻揚華風寸心素相許撫志慙微躬

十三夜對月

閒居愛明月良節復與俱金魄麗秋闌皓彩揚雲衢澄空歛霜煙清飈蕩中區徘徊廣庭內改席臨方除顧景怵衷慮興心念居諸天道遞消長戒之在須臾懷謙可久安盛滿豈恒居孰云質靡盈所貴光不渝

十四夜同清溪子對月

林塘枉佳客待月欣舉觴今夕勝昨夕已見生東方離離絳霄側冉冉素雲揚踰時灝氣澈縣耀天中央仰視渺難即忽覓【一作覺】在我傍清池含微波左右迴流光月行固當望人會何能常與子各鄉域邂逅臨此堂良時不屢值明月安可忘醉歌答永夕和我窈窕章

十五夜高鐵溪同沈清溪趙雪舟馬百愚過敝居對月

端居撫盛節眷茲金素中上客弭飛蓋惠然慰幽衷圓景舒東隅忽復周層空重輪爛五色繽紛結文虹流輝接瑤席絳氣鬱以葱衆賓侈佳翫聯篇挹華風情好在明月安問膳靡豐弦望有恒度明陰變無窮人生非比翼豈得常相同所願御此觴聊以娛夜終

十六夜月

日夕城煙歛列宿出復多開軒望明月展席流素波圓輝雖少虧猶能遍天涯單居【一作翫】不為樂念遠徒咨嗟美人越崇京高樓結綺霞浮雲暮長征何由覩光華迅飈萬里至霜霧日以加坐憂桂枝歇委落同泥沙清輝苟相照豈慮天路何【一作遐】

十七夜月二首

夕望月已減雲飈蕩其側月減不足憂盈虛本相值胡為蔽氛霾坐使清光匿踟躕久延待慘景鬱無色燈前理鳴絃瑤徽為誰拭思我平生友道遠不可即素書委篋笥安得雲中翼滄海多波濤長陰浩難測何當廣餘輝一照萬里域

二

更深月復明揚秀青雲端浮飈倏以寂長川靜波瀾徘徊廣除下白露棲崇蘭仰見城西樓迴光照文軒樓中織綺女延頸獨哀嘆哀嘆未終已素河橫西山逝魄不長望玉貌寧久妍君母吝光惠使我芳歲闌

擣衣

涼飈吹閨闥夕露淒錦衾言念無衣客歲暮芳寒侵皓腕約長袖雅步飾鳴金寒機裂霜素繁

杵叩清砧哀音緣雲發斷響隨風沉顧影惜流月仰盼悲橫參路長魂屢徂夜久力不任君子
萬里身賤妾萬里心燈前擇妙匹運思一何深裁以金剪刀縫以素絲鍼願為合歡帶得傍君
衣襟

悼往

行雲不歸山逝水難重迴與子一為別流光倏如推形神往無存夢想弗克諧孤冢日荒穢幽
泉翳窮埃重局一以閉千秋寧復開時至展遐忱傾醑澆黃茱還思平生居歲久生夕苔寒風
吹空閨彷彿鳴玉哀人生重恩義況茲比翼乖何能眷新歡棄擲故所懷

贈望之五首

遙遙京洛客承命發華輶朝辭冀州野夕泛黃河流雙旛翔汝側駟馬登故邱故邱鬱以長岡
隴茂松楸車徒耀城郭親戚迎道周丈夫事四方州閭寧久留王程在須臾顧念但懷愁前有
盈觴酒為我且綢繆

二

清晨送遠人弭駕北城隈北城一何脩前臨古時臺俯仰故鄉域一如平生懷季冬嚴風發積
雪皓皚皚念子徂遠路鬱結不能開中林寒卉寂樹木何摧頽安得春華敷採掇以相貽

三

驅車策良駟北上遵太行升高睇崇京宮觀鬱【一作遙】相望前瞻碣石湍俯見東海疆壯
觀局宇內高志何激昂孤鴻暮【一作務】南翥奮翅起隨陽黃鵠遊四海胡為悲【一作戀
】故鄉何能有羽翼從子俱翱翔

四

昔子當北徂值予復南旋相違踰幾時世事倏推遷訪舊半存亡誰能不摧顏浮雲歲暮征餘
曜銜西山居人念川塗行子戀鄉關平生雙龍劍乖別何時還志士重明德窮達奚足歎願君
勗令名相期在盛年

五

人生寓大塊聚散如飈塵昔為同稠好今為異鄉人孤獸鳴索偶翔鳥求其群戀故各有慕何
況骨肉親子當被華紱結束事明君我當守蓬室聊甘賤與貧去住各努力良覲會有因

除夜二首

今夕復何夕偃仰茲歲周懸膏耀室隅中饋進芳饈雖無車馬客親戚自相酌遊魚安深淵翔鳥止故邱所歡在桑梓餘者何復求逝節不重至來者難預謀長跪奉此爵延年樂千秋

二

閒居知時節習靜觀卷舒日月無恒處念往寡歡娛歲徂浮雲陰積雪皓中衢豫章產江濱孤蕙敷山隅芳烈雖靡虧遐遠寧見需所願勗明德庶以酌居諸

豔曲八首

御溝連上苑大道接平沙紫陌三千騎青樓十萬家城中楊柳樹風起暮飛花

二

日出洛城裏歌鍾起四鄰朝遊桃李蹊暮踏車馬塵遊絲冒白日冉冉愁陽春

三

秦氏字羅敷馮家名子都妝成臨勸酒曲罷坐當鑪白馬金吾子青絲提玉壺

四

明姿稱二八生長紫羅帷對客舞垂手邀人看畫眉今朝仲春日照影臨芳池

五

粲粲東城子盈盈南陌姝自矜夫婿貴翻笑使君愚日暮採桑去空迴五馬車

六

翩翩五陵兒藉綺冠華簪常懷雙寶劍詎惜千黃金馳馬章臺下紅塵不可尋

七

蘭燈列滿座繁炬灼朱光富貴傾南國佳人出北方畫堂翡翠帳夜夜鬱金香

八

高臺【一作樓】臨萬戶朱構耀城隈共藉鴛鴦綺雙持鸚鵡杯春風樓下度一夜百花開

擬古詩十八首

冉冉歲逾邁念君長別離別離在萬里道遠行不歸鵲鵲慕儔匹鸞鳥東西飛思展雙羽翼奮起凌天涯向風長哀吟欲舉中徘徊川途浩無軌霜【一作雨】雪愴以悲願因駐馳景得覲君光儀

二

婉孌城東姝懷春一何早朝遊採桑陌暮止垂楊道自矜全盛時復恃顏色好玉貌隨年化安得不枯槁昔為園中英今為路傍草路傍多車馬採掇難自保

三

名都有高樓上入青雲端脩城延曲隅阿閣交重欄佳人理清曲當戶橫朱絃揚音綵【一作丹】霞裏令顏誰不觀賓客會四座絲竹哀且繁日中車馬至薄暮皆言還聽曲各言好知音良獨難誰為同心人並起乘雙鸞

四

壘壘北邙山松柏何脩脩松柏有時摧人命安可留胡為華屋客暮沒歸山邱洛中多豪貴藹藹皆王侯高臺臨九衢上有百尺樓宅第儼相望軒車絡如流存亡不預保富貴安所求不如邀我友乘馬被輕裘遨遊百年內永以忘戚憂

五

藹藹東園內綠林萋以繁車馬自成徑桃李終無言昔日東陵侯種瓜青門前既貴亦反賤變化更無端俗夫寡恒態志士多苦顏豈不策高路高路遠且艱良無萬里風孤翼誰當援

六

朝日照中庭杲杲春載陽東風吹綠草蝴蝶雙飛揚歲華坐婉婉白露慙以傷予美不在茲所懷浩難忘豈無芳桂枝含香誰為明

七

淒淒仲秋日百卉腓以殘涼風入階樹零露摧庭蘭明月皎東壁昆蟲鳴草間孤鴻暮安適哀音揚雲端言眷平生友振翮起【一作蕩】孤騫遺我若逝波望子如高山托忱在終始蓄久諒逾宣寸心不可移磐石誰謂堅

八

鬱鬱山上松高枝布天涯上有女蘿草纏綿誓不移葛生蒙於楚浮萍寄清池貴賤雖殊途附託各有宜伊昔侍君子朝夕奉恩私馳心在皓首何意中睽離窮年守房室常恐踰良時思君如日月所冀光不遺

九

汎汎東流河嫋嫋河上柳春風暮飄搖花飛不相守柔條欲攀贈何堪入君手惟有南山桐可以遺我友

十

圓如天上月光輝尚當缺與君非一身安能不乖別關山日悠悠舉步難可越君如雙車輪妾心如車轍相隨萬里去繞繞何時絕

十一

清晨秣騶馬整駕遵路衢遲徊覽故物惛惻心以紆昔時千室邑今為百年墟郭郭蔽粉檟狐兔翔城隅人生寓大塊飄泊寡恒居諒無金石壽終與草木俱一身不自恤安用顧其餘營營慕富貴辛苦誠為愚

十二

長安多豪俠白馬一何驕金鞍競絡繹寶劍相招邀招邀狹斜道青樓鬱嵒崑樓中妖豔女輕綺揚飄颻皓齒激清倡逸響干層霄浮雲散城邑白日隨驚飈熒熒桃李顏華早仍先凋結交苟弗宜誰謂能久要

十三

人生百年內胡為形所役登高覽九原但見松與栢徘徊故里閭念我平生戚斗酒相存問度阡復逾陌上堂展殷勤華燈永今夕何必傾庶飮濁醑聊與適朱顏難可常鬚髮會當白徧觀四海人誰為不死客良時弗為歡衰暮嘆何益死者長不作生者長不息日月更相送萬古安所極素絲有蒼黃岐路多南北在家常相問出門安可測落木歸本根飛鳥戢羽翼客遊在萬里終當還故域

十四

朝宴高堂上賓友相追遊厨人進豐膳妙妓揚清謳處世無百齡為樂苦不周多財為患害駟

馬招愆尤安如王子喬高舉凌九州

十五

歲暮寒風至蟋蟀夜鳴悲高樓有思婦嘆息不自怡良人行未返孤妾守空閨衾裯卷不【一作下】寢羅帷誰為施君如東流水妾如西馳暉形勢不相及彼此何由諧結髮重自念携手期同歸秋華殞故林尚復揚光輝顧茲各努力毋忘榮盛時

十六

迢迢孟冬夜悲風鳴北林嚴霜被野草宛轉時欲沉佳人久隔越曠若辰與參方舟不利涉欲往江湖深客從南方至遺我綠綺琴願因雲中翼寄子瑤華音膠漆不為固金石安足諶明義苟不虧歿齒當一心

十七

青鳥來北方徘徊朝南翔美人傳書至開緘爛生光貽我機中錦宛轉成文章上織比目魚下織雙鴛鴦物厚意不薄感激獨【一作心】徬徨裁為衾與裯置在黃金 君子不為御三歲聞馨香一心奉光惠常恐君遺忘

十八

繁霜降秋夜膏火寒無光淒風舉帷幄素月流中房客行在殊境【一作君子事行役】獨處誰與將仰視天上星羅列皆成行牛女獨何辜煢煢守河梁嗟無凌風翼欲去不得翔引領長太息涕泗徒沾裳

魯連

仲連初歷國排難能解紛飛書下燕將立談却秦軍不受萬戶侯長揖千乘君始稱天下士終為海上民

張良

子房號人傑像貌非魁偉報韓志已成翊漢功亦美出奇掉三寸決勝在千里一遇黃石公還從赤松子

望郭西諸峯有懷昔隱兼發鄙志

游龍戢淵鱗翔鷺振雲翮潛姿媚幽深遐羽忌拘迫頃來稅塵銜秉性嗜探歷連山秀我里幸

茲睠昕夕橫天巖巒疊映日蒼翠積涉波緬洄沿攀岑若咫尺流日施遠垌寫悰冀孤石嘉遯
懷伊人俯仰慨今昔霞構象丹厓烟蘿裊青壁【秦本作丹崖象霞構青蘿隱烟壁】傾耳谷
中音希蹤雲外迹興性【一作往】感彌深即景無與適豈徒藉虛觀終然契冥寂

遊西山二首

晨登山上樓暮望河上道飄風塞埃塵積雨浩行潦山人苦相留此道何擾擾虎狼夾路啼鴻
鵠逝不早石泉聊足飲糲飯亦可飽矧乃平生親綢繆敘中抱行遊白雲林倘遇瑤華草携手
托相贈歲寒永為好

二

勝地不可多良遊豈在屢茲山秀靈域曠望契心許峇嶺碧巖際縹緲青蓮宇鳴泉瀉丹壁白
沙亘迴渚眺心佇冥寂況有塵外侶吾當與爾曹翩翩接高舉

立春日作二首

藹藹春候至天氣和且清端居撫流化允愜靜者情浮陽起叢壑流烟散孤城岸條發潛潁園
卉含初榮寫襟曠明霽覽物紆游行目悅雙飛雉耳感孤鳴鷺形運自相代神理誰為名往規
與時逝來慮隨年并心存漢陰灌躬敦南陽耕疏還念知止莊論持達生自非秉昭曠能不嬰
世營

二

鳥鳴知天曙水泮知天和寒崖變吹律陽渚發鳴葭溫風戒旦至淑氣應時加申矚暨昏旦馳
情赴幽遐連峯睇初景木杪眺孤霞陰雪被高岑暄波瀉平沙辨候氣有異觸物理無涯撫已
寡朋與懷侶獨長嗟徒攀春岸條未採中林華情愜賞不遺心曠迹自賒允矣敦夙遊不愧在
澗歌

田園雜詩二首

習宦非我長官久計轉拙遭斥還田廬獲與初念協樹藝良有期農事固堪悅飄飄綠原風皛
皛明川月披襟恣吾適既夏不知熱回思行役日寒暑靡得輟疎懶古雖鄙任性亦可適膏疇
矧豐蔚積潦復淒冽白日皎在茲停雲靜如結為謝二三子努力慰衰劣

二

去官今七暑漸與農務親隨宜諳土性言話群野人時或遡微風行歌響空榛先民邈何扳慨
焉傷我神慨傷適誰知所有三二賓文論日往來炯炯高義申炎雨回衆壑涼飈起脩畛兀然

林木下日入忘歸輪玄蟬夕益聒去鳥一何頻野行畏多露無使侵衣巾

卷九

水營墅治田圃種樹

樵隱安於山農隱樂耕畔由來事不同各以性所玩倚扉憇南岡【一作園】負杖行春岸時
澤冒原隰遠水增波瀾方塘菰蒲暎迴渚鳬鷺亂插柳冀息陰列竹冀成竿緣坡引行條依墉
植頽幹築堤屏芴穢激流代携灌踈慵外經濟卑賤鮮憂患諒懷原生恥庶悟孔父嘆汲古綴
遺言欣焉秉柔翰

與賈郡博宿夜話

世故相糾纏人生劇如繫予方值憂艱子亦念淹滯邂逅胡不頻茲歲忽將逝蒼蒼季冬夕悄
悄昆蛭閉積雪委沙曲迴風薄林際繁星爛高寒明月皓初霽聞雞起中夜捫虱談當世蕭條
時事危寂寞古人計天地悲瘡痍江湖愧經濟懷哉式微詩泫然出雙涕

除夕述哀四首

世事相倚伏日月更代謝百年能幾時一歲祇今夜逝者豈復迴有生無不化慘惻孤燈前悲
啼數行下

二

別離今幾何墓樹亦已青徒褰素帷泣奈此玄室扃古城積陰雪虛牖臨寒星歲暮興慨念愁
立空屏營

三

去年值今夕庭闈奉顏色今年值今夕空奠几筵側蒼苔翳幽隧翠柏開靈域顧望西山陰風
雲為悽惻

四

憂人不能寐起踐中夜霜城笳絕仍響室燈慘不光所親半重泉有姊各一鄉附書與鴻鵠歲
晚路更長

贈別孟望之四首

束髮事交結白首以為期以茲女蘿質託彼青松枝重聚故鄉園殷勤慰我私忽復遠行邁况

值秋風時我有一罇酒送君瀨水涯酒酣思無極臨岐理桐絲誰知清商苦一彈一生悲

二

迢迢望夏口肅肅戒僕夫金飈吹明星行李已屆途親戚各相送萬里在斯須喈喈中林鳥日出相鳴呼人生各有役安能長相娛

三

仲秋物色慘遊子生離顏朝辭義陽陌夕宿武勝關遙望武昌路漢水何潺湲願為比翼鳥逸翮杳難攀願言終令德努力濟時艱同心苟不虧豈在離并間

四

公子事遠遊離別無復云丈夫萬里志焉能戀故羣我有千金劍經天決浮雲龍光久未試姑以持贈君願言終永佩勿令埋塵氛

遊西山二首

清晨命予駕飄飄遠遊邁願言歷嶇嶽況此春華在林條紛可結石秀行當采道逢諧俗士謂予爾何隘人命未可期河清詎能待縱羽思山林潛鱗慕江海富貴人所欲吾志不可改

二

鬱鬱西山岑遙遙山上阪俯觀清澗流仰覩白雲返處世亦何促誰能遂仰偃夷齊歸首陽黃綺在商巘此道久不復斯人苦難挽振衣謝塵塗吾駕日已遠

元日言志

北杓建寅月東谷發首旦氣轉青陽暎日暎丹霞爛羣物欣向榮萬象倏改觀自予脫朝簪及茲謝塵幹世事鑒倚伏節候感迴換岩耕慕長往淵綸恣永玩俯羨潛波鱗仰慙薄霄翰欽此無悶言忘彼高飛嘆勉懷日新志庶以慰朝盱

觀春雪

騰空布柔雲蕩日溢繁吹素雪千里來飄揚九衢內積陰改玄節新陽獻青歲永辭寒卉寂甘並春華媚繽紛散廣陌晶耀敞塵界既隨游霞集復與流飈會臨牖翫靡足陟檻望逾邁參差百葢接岑層臺對佳人御櫺軒上客倚飛蓋旖旎結華纓離縱飄素帶郢中有希倡陽阿豈恒態君胡慕高卧沉冥獨無類

仲春雨霽出遊郊麓覽物叙懷興言自歌四首

旬陰豁初霽臨眺城西洲泱泱松上溜潺潺石間流積霖晦平陸春雲彌崇丘眷彼農人談寫我終歲憂

二

崔巍南山郭宛彼沙上道荷篠赴脩垆采萍涉流潦懷賢顧已後適已每不早緬茲山中人含念鬱中抱

三

幽人久見招解薛侯中林山行岩光暝水息霞氣陰隨行委流止寓物觀浮沉達人貴忘我奚用存知音

四

舉目怡清和周覽究昏晝衆壑積庭階攢峯羅戶牖攀林摘叢穎越巘采孤秀日暮天際雲忽與飄風邁

贈梁宗烈二首

珊瑚產南海翡翠生炎洲豐林多異幹石璞皆良璆瑰材植遐域萬寶聚巖幽豈無千金賈亦有萬斛舟此物匪為易惜哉不見收玉英匿龍淵黃金沉濁流輝瑩久已閤未蒙知己求徒歸匠者愆用負和氏羞謹子握中璧時哉毋闇投

二

飄風頃刻至征雲萬里游與子非風雲欲邁良無由川塗限山海音問邈中州升高望廣域極眺滄溟流浮烟隱榛樹白日蔽岑丘飛鴻不我顧逝鵠不我留寧無輕舟志浩渺安可求桂樹茂炎隴芝草翻靈洲獨處慕朋侶攀贈誰為酌倘荷衷眷言慰此平生憂

贈王文熙四首【以下京集】

空堂夕燈明離思漫浩浩泠泠朱絲絃聽我別鶴出門難久留各言慎所好江湖迴且深鴻鴈幾時到

二

行子夜中起月沒星尚爛天明出城去薄暮長河岸草際人獨歸烟中鳥初散解纜忽以遙川
光夕凌亂

三

光風轉柳枝宛宛路之傍濛濛苑中花朝日耀其英停車欲有贈攀條折春芳春芳亦消歇但
使故意長

四

息馬中林樹烟靄何氛氲遲遲仲春日叢薄華且芬上有單飛翼哀鳴振層雲冉冉征途客踟
躕不忍聞嗟哉彼何物日夜求其羣

憚功甫悼亡二首

捐棄不待年幽魂渺仙嶠庭下孤鳴鸞懸鏡耻自照帳冷凝素塵窗虛耿熠燿平生白頭吟空
然發悲調

二

芙蓉望秋零幽蘭歇芳早不作雙頭花翻為斷腸草戚戚懷所思悠悠感衷抱睠茲白髮心窮
年以相保

悼亡三首

冬夜一何長展轉難及晨念彼重泉下杳杳隔千春中閨月皎皎紈素委流塵馳光安可追往
者無復陳悽悽向隅泣無乃女子仁丈夫自有志忍哭虞傷神沉思結中抱恨恨不能申

二

鳴雞報早朝出戶履晨霜仰視東方星三五不成行念子當此時燈前理衣裳恍然失所在零
淚空滂滂

三

皎皎機中絹拂拭明如雪裁為雙中衣羅帶紛綰結親持向我前與我言結髮豈足佩下體聊
以奉娛悅執此百年心嘆息一朝絕人故物自留欲視不忍發藏之篋笥中餘香日以歇

挽葉進士

矯矯松柏枝在彼丘中阿上盤青雲端蒼翠鬱嵯峨惜哉千尺幹嚴霜摧其柯本為大廈用不
竟當如何

贈李獻吉三首

西方有佳士於世寡所諧橫風整脩翰倏忽超九達天門限重關屢扣闥者辭濟濟列仙子冠
裳競追隨青雲蔽閭闔仰視何逶迤皎日匿西陸馳光難遽回世無魯陽子坐惜朱顏衰

二

東風吹我衣白日何杲杲整駕出郭門脩塗浩橫潦登山采幽蘭日暮不盈抱采之欲何為遺
我平生好豈無艷陽花言子好香草丈夫有本性安得不自保寸心苟弗移可以鑒穹昊

三

烈女守閨室憂日懷寸陰橫琴寫妙曲繁商激陽林悠悠行路子誰為識其音人生處世間貴
在相知心所以采薇士甘餓西山岑

答獻吉二首

鬱鬱雙鳳闕翩翩飛雲間我皇乘六龍平明開九關下有敢死士批鱗犯其顏白日運蒼昊薄
暮浮雲還一朝啓光耀忠誠良可宣

二

吾君古堯舜垂袞蓬萊宮止輦受羣善小大必有容緬懷燕鄒子悲號訴蒼穹彼蒼亦何神五
月飛霜風至誠變金石何懼不感通

遊魯山城南舍二首

猗彼方外客逍遙城南墅初夏苗始盛荷笠事田圃地僻寡鄰舍彌旬絕車馬紅葵生井上青
榆蔭堂下前岡後有岑原澤何撫撫清風林下酌狼籍列樽俎翻思在朝市役役徒勞苦

二

溪行日亭午暑氣稍見侵脫巾坐芳草前有嘉樹林白雲澹清景綠葉垂繁陰喜無鳴蟬聒幸
有好鳥吟久厭區中緣撫茲意彌深浩歌答良友聊用開吾襟

中秋十七夜留康德涵飲二首

飄風會浮雲白曜奄西藏羈人惜短晷眷此秋夜長長夜無與晤所懷浩難忘君子枉光駕
婉情未央披軒待流月展轉錯華觴臨觴慘不御對景久徬徨鬱霧曖庭陰黯黯如降霜
流波委頽魄茲歲漸以更消長互相謝盛滿安可常曷哉君子心謙謙道彌光

二

客心悲夕陰相顧增煩憂麾杯浩歌起欲去不可留屏營獨撫膺仰觀熠燿流倏焉四宇豁
衆星爛以稠游氣降大谷浮飈扇清秋昊天舒華魄銜耀西南樓朱門歇笙竽綺陌車馬休
嗟爾晨明月燭燭安所求

詠懷十首

北陸無淹晷歲邁陰已長攝衣起中夜凜凜悲嚴霜明月麗高隅繁宿縱以橫徘徊仰天漢
惋彼參與商形影永乖隔萬里徒相望

二

烈炎灼崑岡乃辨金石堅金石有恒性銷鑠詎能遷薪樗莫傷桂刈蕭母及蘭薰猶不同器清
渚本殊源君覩高翔翼卑棲非所安

三

英英園中槿朱榮媚朝陽朝陽倏西隕朗月借其光馳輝難久耀華隕不再揚番番白馬郎
皎皎青樓娼容好豈足恃相要在衷腸

四

積薪以待燔畜裘以御冬為物貴及時餘者安足庸金張藉地勢衛霍承華封馮生守窮巷
白首不見容賤者日逌遭貴者日以崇邈彼天上京玉宮闈九重高高不可測欲往將何從

五

知鳥去惡木螻蟻戀腐莖復隍啓危滿為山忌將成泛觀瀛海內巨細各有情哲夫炳身後
昧者營其生千金買一壺為豫當及早江湖多風濤舟楫不可保

六

寂寂沅湘流長江上有楓青蕙綠廣隰綠蘅被洲中揚舲泝煙沚遙瞻二妃宮二妃何婉孌
攀馨振微風解珮遺下女將以明我衷光采不易合精誠渺難通浮雲蔽江臯白日忽已晚還顧

蒼梧原何時翠華返

七

飛鴻遵故渚長鳴有餘哀北地多悲風霜雪日以催靈烏集君舍君反見疑猜忠信苟不顯殺身亦何為始知山梁雉欲下仍徘徊

八

長安有綺樓文窗結朱疏俯視千萬薨遙臨十二衢樓中彈瑟女容采耀城隅豈無吉士誘失身良為愚迴風入總帳倏忽白日徂玉顏易銷鑠不久當何如

九

白露晞朝日苔榮委清秋長風吹野草飛藿不自謀猥彼衆多子安知良士憂覆水置平地一散永不收鼂錯憂漢室翻為六國仇禍機苟不測談笑生戈矛留侯信人傑逝從赤松遊

十

白玉本自白蒼蠅亂其真讒言解膠漆況匪平生親烈士死道傍貪夫登要津自古皆有然茲恨何當申蓬丘眇煙霧貝宮鬱嶙峋列仙如可期吾將躡清塵

東臯

藹藹東臯村中有幽人宅茅堂入空林草徑無來客林中桂樹英容采耀月夕寒香有時匱秋來望攀折

贈邊子四首

自予辭京邑念子守南服歲序阻歡覲川塗積遐矚北驚方自茲東轡偶相值聯鑣始宋中解纜及河曲

二

同車越梁晉覽歷多古疆紆遲衛流汭轉盼淇水陽感來意不淺道故言已長辛勤眷途語愴惻悲別章

三

戎馬暗中原嗟此遠行子遙遙赴城闕戚戚望桑梓路阻難可通河清詎能俟俛仰君父間出處良在此

四

歡聚理無恒悲離情有傷況茲征途間詎能久相將浮雲興歲暮素雪翳晨光揮手自茲別後期應毋忘

卷十

贈望之四首

嫋嫋孤生楊迢迢河水汭平生骨肉親婉孌相諧悅思心起懽燕何況當乖別浮萍寄清流聚散有懽悒與子同枝葉胡為忍離濶愧匪根與株莫能相固結德人重行義志士輕訣絕慎子萬里軀慰我長饑渴

二

良時不克俱悠悠子行邁行邁之何方乃在萬里外汎舟涉江湘道遠阻湍瀨我心思桂林倚立增歎嘅河清豈無期柰此日月逝所願芳未歇及茲采荃蕙

三

瓜生施於葛枝蔓自纏糾念我同胞人是子結髮友少小鍾慈育各言常相守出門有羽翼忽爾離隔久戚戚去兄弟思我父與母種瓜莫種棘種棘恐傷手恩愛苟不虧離隔復何有

四

絕裾不為忍叱馭寧顧危念子奉明君結義良在茲雖懷垂堂戒委質我所知白日豈不察浮雲蔽於斯孤葵慕太陽傾心量不移勿謂長棄捐終當有返期

送王宗哲少卿

肅肅出郊干行行涉河甸子身被王命駟馬輝雲電覽岳停華陰觀都指秦殿思子衛泉流渭滻一以緬平生共肝膽何云異鄉縣况我離骨肉子也常眷戀憶我連枝樹感子同洲鴈子行四方志努力思見面

出城贈韓子

晨車去遙遙將子城之隅城隅何所有有荷復有蒲念當與子別思心立踟躕他人豈無友非子誰為娛折荷勿涉水涉水濡子車安得瓊瑤華採掇為子需

過呂仲木宅同呂道夫馬君卿

夏訪呂子居乃在北城陰門臨古墻渠上有高樹林展席流南薰開軒睇北岑况諸同心友聽此和鳴禽佳人出素帙高詞播名琛亮哉清廟瑟淒其白頭吟一彈意不足三歎有餘音因之

覽玄古寥寥傷我心

鳴蟬

菀菀庭中柳蟬鳴在高柯上有西飛燕下有東流河美人堂上坐忘却門前道舉頭見鳴蟬低頭惜芳草

冬至

北杓指玄朔南景留嚴冬中衢返羲馭淑氣扇黃鍾微陽懼不力固陰密且重至尊愴時令端拱象欽恭閉關遏行旅執玉羅敷庸天乃群物祖日為衆陽宗眇茲一線晷邈彼九淵龍泰登自此肇復來豈無從聖人謹元始君子履攸終

贈田子三首

蓬途眷行旅綢繆永茲夕之子遡大江方舟自此適藹藹皇邑遊鳴鑣並京陌同袍四五人君為遠行客婉孌一室內安知形影隔人生重貞固豈必金與石念彼膠漆友喟然感今昔

二

蒼蒼季冬夕積雪委中衢三星出東戶纖月揚西隅主人樂行觴衆賓且停車何況平生友夙昔共歡娛慘惻高堂上為子重踟躕山川緬以邈岐路在須臾出門慎自愛慰我恒相於

三

鳳鸞去南國徘徊翔紫庭毛羽紛葳蕤霜雪日以零一鳴已曠世奮翅排清冥崔巍南山下修竹何亭亭文采忽遐遠佇立望爾形依依北堂隅儔侶念伶俜相聚不須臾一散如晨星我欲從爾去但愧無脩翎

七夕劉子緯宅次君卿韻

良時屆今夕懽覲諧茲方流飈委芳卉清池激微涼仰觀牛女星熒熒河漢傍纖月揚西隅浮【一作游】雲起中央合離一以愴明晦古難量繫子場下駒慰我長思望

斷絕詞

孔雀慕儔侶回翔恐相失羅雉為雄雌反覆不成匹白沙搏清水誰能作膠漆本非骨肉親心志安得一牽纏無已時斷絕有終畢

玉岡黔國地種竹

玉岡一精舍五華東南首崔嵬瞰城郭曠緬開林阜球琳美梁域篠蕩卑揚畝崢嶸將軍第瀟灑文儒囿霜凝戟門寒日上鈴閣晝褰帷散琴書緩帶接賓友風林清夏簟雲石靜秋牖參差萬琅玕照耀雙 玖連城價自高傾國貌俱醜繆倚慚蒹葭先凋謝蒲柳上公勲不忘君子名詎朽蠻夷欽鎮靜風俗化溫厚比德亮無瑕抱節良可久珪璋寡琬琰瑚璉重典守至寶天所慳珍產地非偶閭閻神仙宅瑤水蛟龍藪安知王母觴復為周王壽獻從萬里餘種已千年後靈秀萃於茲積累固所有樂只邦家光斯韻播人口

贈君采效何遜作四首

霜空鴈絕響風庭葉罷飛念爾別離日淒然芳歲微城隅明星晝曉闌殘月輝不見携手好宵行誰與歸

二

平生寡所諧與子中邂逅讌語殊未厭絃柱促離奏日斷川上雲念攢天邊岫河山邈以綿佇立阻懽觀

三

居人日縛束遊子逝飄飄山栖憐霧夕水泛悅霞朝違俗勢靡合遺名跡自超愧隨衣冠侶振珮青雲霄

四

歲晏客來歸車馬一何亂新粧下機笑白髮倚門看未俟春林敷且玩冬花燦閑居有徽音倘付雲中翰

酬贈王德徵

北方有一士雲冠瑤華簪抗身服高義奮翅翔天林一鳴遠見斥棄置南海潯飛黃本冀產顧盼無千金絕景邁流電豈與泥沙沉邂逅頃三接一言荷知深投贈古錦篇宛聆哀玉音大雅久寥寂斯文竟誰諶皎皎空谷駒生芻勞我心

江畚行

樹穀江上田三年免饑餓富貴苟非道千駟祗一唾匹夫不奪志曠土鮮無過蛾眉召讒妬西子蒙詬浣鑠金懼衆口懷璧誠賈禍蛇龍盤泥沙鯤運海水簸子今還山中食穀且高卧

詠衣

淒淒絺綌風慘慘葛履霜無衣嘆幽奏同袍感秦章物微申有贈德音亮難忘新縑託故素溫
燠念寒涼體裁合情志拂拭生輝光雖云異黃裏願言同褰裳

古怨詩五章

隕葉辭舊枝飄塵就岐路遲徊決絕意言念平生故泥泥行間泥零零蔓草露豈不畏沾污為
子無晨暮

二

抗義一何明結志誓不解對面有背棄何言萬里外陟疆朝采葑陟畛暮采菲所重在德音容
色安足恃

三

白玉雖光輝瑕疵在其內徒看色笑親詎識肝膽異勢奪恩愛移交離讒毀至棄捐豈我傷卑
薄乖情義

四

寸心抱貞固投一安有它詎知所同歡散聚忽朝霞昔為山上石今為浪中沙孰云無轉移漂
蕩令心嗟

五

清晨臨御溝御溝東西流垂楊夾廣路躑躅行紫騮揮鞭不顧返斗酒誰能留慨焉中道情覆
水倘可收

情詩

出門景將夕入門露已瀼徘徊雙戶間燦爛三星上玉顏艷明魄一別阻弦望詎能輕訣絕徒
令重惆悵

詠裘

羔裘故人物持贈何殷勤儉表素絲質光迴錦繡文豹祛未稱美狐白安足云意比綈袍戀恩
同縑絮溫

飲酒

平生多意氣四海盛交遊
列筵亘長夜談辯雄名流
杯酒一言合遽將肝膽投入門
顧兒女忸怩但懷羞
齒年逮今茲世故多所由興言念親戚
骨肉嬰我憂寒宵寡歡悰濁酤聊自謀
明燈耀室內盤蔬代庖羞豈必朋與賓
妻子前勸酬語笑率真性無嫌亦何尤
人生貴止足吾志卑公侯數觴已復醉
頽然萬情休寄言馳騖子從今任去留

送劉御史按淮揚諸郡

臺臣今按地聖祖舊開疆
白雲萬里來千載還帝鄉
伊昔草昧初血戰塵茫茫一馬渡天塹
六龍飛淮揚堯階起三尺禹跡遺八荒
江海控形勢邦家存紀綱遐哉百年餘
世變隳其常城社穴狐鼠當途走豺狼
君埋都亭輪再覩司隸章述職屬茲歲
巡狩代我王泛舟淮泗急褰幕風日涼
鷹隼在寥濶一擊乘秋霜

遊洪法寺塔園土山

塔園鬱森萃土山莽迴互迹陳慨往躅
心賞諧秋晤時惟冬氣交零木爽登顧
裊裊拾層級盤盤折脩步憑危眺倒景
俯檻驚流霧空王湧廟衛貴者留墟墓
三門上岌嶮玉柱撐雲露白日寶光垂
風晝金響度徒興雍門哀未暇首丘慮
珠藏北邙毀石罅南山錮恒焉傷逝心
川汜激東驚

贈時亮

戴子有仙癖時荷金門遇辟穀遊人間
嗜酒尚玄素白日指五岳笑我不能去
爾未生羽翼何時向烟霧

贈子言

張生神駿骨一蹶在衢路雖有萬里才
未蒙千金顧腰佩白玉環手擲金聲賦
堂堂烈士身勿為名所誤

冬夜

膏火含朱光玉鐏泛清醴閒房密以靜
雪流窗戶裏良友不我適室阻悵伊邇
異人非我儔聊酌娛妻子

十二月朔日大駕觀牲

玄雲翳廣陌素靄霏層城萬乘屯蘭甸
六轡儼天行輕飈轉芝盖重霄揚翠旌
劍佩合鏘

鏘龍鳳鳴犧人脫衡福膳宰翼房楹牛羊上廩貯鹿豕大庖盈馨香流秬鬯肥腍奏牲牲宮闕
回帝覽鉦鼓感皇情至敬肇茲達大禮須時成

簡君采

夕會星已羅晝接景將落見面不須與何以展契濶側耳金玉章音響時間作假寐晤清顏傾
光豈虛託枉驂悵雲轡命席耻塵爵徘徊翳雲日佇立眺城郭駢居淹晨暮庶俾私心豁

送崔氏四首

行車在門端送賓集城隅轅驥難久停振策中路衢盤盤大行谷往念高堂居還顧望西山層
阜蔽皇都回飈赴 響飄雲奔長徂昔予背鄉域睠言返田廬驅車赴燕薊茲歲淹七踰何因
附羽翼翹首南翔鳬

二

疇昔衣冠士同遊若雲爛懼燕未及終存亡在轉盼亡者長沉埋存者各飄散俯仰天地間念
之一惋嘆出門送我友言返故鄉縣登高望古疆河衛浩以漫山川白日冥匹馬鳴相亂愴惻
懷征途令我腸中斷

三

結髮與君友附驥思一鳴君子揚休景邁世垂榮名伊予守屯蹇學宦寡所成握瑜俟知己知
己誰為明良時展嬾婉之子復遠行衝飈起閭闔浮雲翳太清層城羅宮殿躍馬振綏纓長嘯
歌五噫投策出漢京慨念古人士去之一何輕終焉從子逝富貴非我營

四

飄飄山上葛纍纍田中瓠苟非同根蒂纏綿安得固人情易反復結交有新故嗟哉夙昔好乖
棄在中路明珠倘無因按劍不我顧深言匪由衷白首為所誤亮君勗恒德永副平生慕

寄贈王子衡四章

昔餞邁伊始今懷緬猶故城愁屢淹薄舟遊一洄溯弭節指顏景搖車首東路倉皇抗手別邈
絕賞心晤

二

賞心睠景光川汜渺徂征竄身窮海上卧痾天邊城傾欹島岸坼蹙沓波樓驚飄音承來訊頗

叙棲泊情

三

棲泊倦淮堧量移遂山郭沈迷謝簿領褰開盡巖粵雲翔葉縣鳧風唳華亭鶴果諧宣城興復枉臨海作

四

臨海疊靈巘洞壑丹霞林名勝紀圖牒仙聖秘幽深俗營迂微尚曠懷俟同心倘迫凌風步滅響升雲岑

集吳子寺館

首夏憇祗園遊息解冠簪窗楹抗疏敞殿宇閼深沉綠竹帶陰渠丹霞綴陽林既枉高人躅亦協靜者心琴書散煩慮鐘磬發幽音清言忘朝晷玄思超古今

夏夜薛子宅

飄風激疎牖飛雨散高庭白雲蔭華月青天垂列星褰裳望西苑園樹發青熒陰館辟炎埃峻檻臨巖亭泠泠朱夏井肅肅玄夜扃披霧聆霏談逍遙暢神形遊心娛竹素此樂誠可經

贈君采

蕭散綜琴書疲疾謝回亂清雲汎闌暑【一作蘭渚】白水激文瀾於心懷我友翩翩振詞翰比室諧言晤撫景悅流翫孔公讚龍蠓莊生明吹萬理感由神詣情賞非虛嘆鄙哉辨雌霓安知覩河漢願投忘形契去適無窮岸

高橋【以下秦集】

飛梁何裊裊裊裊飛澗中窈窕入青靄蜿蜒垂白虹俯壑聆迅湍攀崖挹迴風闌干既重複結構亦玲瓏穿石鑿坤艮架閣憑虛空羽填烏鵲岸力坼鼉鼉宮設險固天造扶神豈人工聖代文軌一絕域賓王同梯航無外至筐筐倏然通懷哉絕棧智逝矣當關雄欽誠慕在德其亡守無窮

姜子嶺至三岔

出嶺上雲霓入谿下烟嵐高高不可極杳杳詎能探朱崖秀夏木石壁映寒潭千林覽葱舊百丈窺澄崩奔谷響赴隱曜川光含登陟力不辭險阻情已諳潛淵羨垂綸越巘思停驂振策

岷峨西揚帆江漢南臨深匪忘懼履坦但懷慙

青石崖棧

側行青石棧誰能久延竚斷板連曳雲噴泉灑飛雨迅流西回激峻坂東折屢隕岸互傾欹危
梁裊撐拄飲猿駭游鱗立馬接翔羽慎爾千金軀永念垂堂語

寄粹夫四首

伊昔京室娛安知岐路戚君就河內棲予從關西役同源異流止撫事乖心跡終爾返輪鞅音
塵慰岑寂

二

肥遯世久欽苦節晚逾峻懸蘿邈莫攀翠壁迴千仞冥心道與超晦迹名反近將遂諧龍蠖混
然保貞順

三

昔聞孫登嘯千載識其音岵嶺百門上髣髴三湖陰鴻舉已寥廓鸞響猶空林曠哉既往古契
此徵于今

四

阮公雖曠達于道未真見石髓不可餐赤文詎能辨服理昧情性眩物矜神誕儻君示中行遙
垂大人撰

送劉筆峯暨從子黃巖赴省應試

年少劉家郎綠鬢顏色鮮大者氣孤卓小者骨奇權珊瑚碧玉樹照耀森我前相看如二阮俱
為竹林賢向人長揖別白馬垂雙鞭朝出長安門夕至晉水邊晉水生秋風桂葉吹香綿迢迢
月中樓夜冷蟾兔眠二子獨先登舉頭叩遙天衣裳結綵霧金粟枝聯翩衆人望高躅飄如雲
中仙丈夫生有才即使功業傳君看竹下人落魄空自憐春風杏園花擬待雙車還

卷十一

乞巧行【以下使集】

鵲橋崔巍河宛轉織女牽牛夜相見岳陽女兒迎七夕乞巧樓高高百尺華燈明月光窈窕結綵蟠花綺羅繞富家女兒恃嬌小年年乞巧不得巧貧家女巧世所稀只為他人縫嫁衣須與露濕金剪刀雙星漸沒河漸高人間天上兩迢迢步襪仙裙空寂寥君不見古來巧拙何足語歲歲樓前競兒女

古松行

岳州地多古松樹千株萬株植官路故老猶能記歲年行人不解知朝暮臨江西來烟霧起夾谷連山一百里黛色寒通七澤雲秋聲夜捲三江水郡城之北江水東鄂王祠廟丹青空英雄為謨本宏遠古木至今多烈風忠魂義魄杳何在故物依然見遺愛繁枝百世人不剪直氣千尋我當拜六年前過蒲圻城古松陰中三日行空山倒掛雷雨黑盛夏常貯炎風清郵亭傳舍總蕭瑟鬱抱煩襟亦飄逸迴巖峭壁奔洪濤老蔓長藤翻白日只今復向巴邱道野草漸多松漸少仄徑孤根半蝕苔夕陽幾樹空垂蔦昔時所見合抱材斷枝落葉隨蒿萊過客山中想清籟行徒道上愁黃埃輦山輿嶺萬千重半作豪家樓上棟古人之力今人勞大厦明堂不得用年年官吏催斧斤故老雖怒那敢嗔傍枝出地子成樹野婦山樵摧作薪驛前數幹聊可數我忽見之再三撫霜皮露甲如虬蟠霧鬣烟鬢學龍舞陰森氣象凜猶昔翠色長標不可侮荒林曠野識者稀終為誰家起廊廡回首鄂廟秋山阿廟前之樹無高柯鬼神訶護亦徒爾英靈不返將如何達人且勿怨搖落志士胡為傷輾軻君看世事盡如此拔劍聽我松前歌

津市打魚歌

大船峩峩繫江岸鮎魴鱖收百萬小船取速不取多往來拋網如擲梭野人無船住水滸織竹為梁數如罟夜來水長沒沙背津市家家有魚賣江邊酒樓燕估客割髻砍鱸不論百楚姬玉手揮霜刀雪花錯落金盤高鄰家思婦清晨起買得蘭江一雙鯉篋篋紅尾三尺長操刀具案不忍傷呼童放鯉激波去寄我素書向郎處

偏橋行

城頭日出一丈五偏橋長官來擊鼓山南野苗聚如雨饑向民家食生牯三尺竹箭七尺弩朝出射人夜射虎砦中無房亦無堵男解蠻歌女解舞千人萬人為一戶殺血祈神暗乞蠱沙蒸水毒草根苦上山下山那敢 蠱爾苗民爾毋侮虞庭兩階列干羽

省中公讌

今日何日公讌會紫薇垣下填車蓋摠戎太監爭邀呼御史中丞立相待坐花饌玉綺席陳愧我何能居上賓勸酬盡是文武士列坐俱為藩臬臣廣堂潭潭長百武堂前撾鍾復撾鼓擊石彈絲逐橫吹清歌緩節隨輕舞酒闌起酌明燭前橫金鳴玉聲珊珊交衢夾道燈火亂仰看月出樓臺間諸公豪俊世希有協恭同寅重邊守幸時四方不用兵簿書之暇得飲酒只今天子布洪仁九州四海俱同春清風想見唐虞出玉座欣瞻日月新諸公於此復何慮矢志盟心思致身

盤江行

四山壁立色如赭盤江橫流絕壁下驚濤赴壑奔萬牛峻坂懸空容一馬危叢古樹何陰森尋常行客誰敢臨猺婦清晨出深洞虎羣白晝行空林沉潭之西多巨石短棹輕舟安可適日光射壁蠻烟黃雨氣蒸江瘴波赤土人行泣向我云此地前年曾敗軍守臣祇知需貨利將士欲苟圖功勲英雄謨策自有術竄婦奸男何足論營中鼓角連雲起陣前臨山後臨水烹龍釀酒日酣樂傳箭遺弓尚驚喜戰馬俱為山下塵征夫盡向江中死遂令狐豕成其雄屠邊下砦轉相攻千家萬家雞犬盡十城五城烟火空夕陽愁向盤江道黃蒿離離白骨槁魂入秋空結怨雲血染春原長冤草只今殊域來歸王高墩短塹俱已荒牧童驅羊上塋塚田父牽牛耕戰場惟有行人行嘆息聞說盤江淚沾臆

大石關行

青山千仞城百尺雲中峩峩列萬石關門控險鐵不如萬人可望不可踰蠻兵一朝殺關吏驅馬入關履平地山頭矛戟多於草弩箭射甲如射縞當關祇用一夫力胡為萬卒猶難保君不見山上城堞毀樓傾四壁立青狸蒼兕朝對啼白蒿黃雲暮愁入

栖鳳亭【為黔國賦】

將軍園中何所蓄十尺亭子四面竹亭中一榻千卷書將軍晝遊夜還宿元勲甲第高入雲奇珍異玩窮海陸將軍雅性不苟嗜只愛亭邊萬竿綠舊家風節傳累世見此勝如見喬木根株盤據幾十年出地皆成老龍骨舊幹扶疎已作林新梢復見高於屋新梢舊幹森相向百丈空雲寒突兀先公開圃一何勤引水分畦費營築石間斷雨移紫瓊沙上耕烟長青玉至今遺愛思萊公萬古看詩想淇澳將軍能武兼能文展卷一日數行讀只今世守清白操春風如溫霜如肅閒時高卧園之中此君亭亭對幽獨月軒夜坐呈夏簟風榭涼憑除暑服空冥縹緲聞笙竽戶牖清虛映籤軸昆池歌動黃鵠高洞庭笛橫白雲哭瑤瑟一鼓瀟湘亭水綃再寫簫簫谷憶昨路經嶺徼來佳植全稀多樸遯山深苦竹啼鷓鴣地僻枯篁宿麋鹿何期得到將軍園一洗胸中十年俗清晨邀我促席看半日捲簾猶不足我聞竹生玉河湄開花結食鳳凰啄將軍文采真鳳凰凡樹安能動高目願將音響入簫韶奏我亭中棲鳳曲

黃陵廟

黃陵峽中灘水多黃陵廟下難經過
峩峩巨舸牽百丈櫓折檣摧不得上江風蕭颭笳鼓哀廟門遙向楓林開
往來落帆泊江口俎牲呪神醺神酒南船下峽疾如箭岸草汀花看不見
巉巖亂石撐如麻雲間濁浪迷三巴千里舟中坐超忽回首天西斷心骨

關索嶺

噫嘻吁嶮巖何天設之危艱下有奔雷歎雪之飛壑上有懸崖石棧百折而造天
嶽崑兮巉巖回復兮盤盤行人雁陳而魚貫計分寸兮躋攀飛鳥兮折翼猴猿兮無援苟失足殞岩而落箐兮曾不足以充虎蛇之餐朝不見日夕不見月雲烟慘慘兮晝夜寒噫嘻乎何天設之危艱我來倚絕壁而長望蓋不知蜀道之為難

大梁行【以下家集】

朝登古城口夕藉古城草日落獨見長河流塵起遙觀大梁道大梁自古號名區富貴繁華代不殊
高樓歌舞三千戶夾道烟花十二衢合沓輪騶交紫陌鳴鐘暮入王侯宅紅粧不讓掌中人珠履皆為門下客
片言立賜萬黃金一笑還酬雙白璧帶甲連營殺氣寒君王推轂將登壇彎弧自信成功易拔劍那知報怨難
已見分符連楚越更聞飛檄救邯鄲一朝運去同衰賤意氣雄豪似驚電楊花飛入侯嬴館草色淒迷魏王殿
萬騎千乘空雲屯綺構朱甍不復存夜雨人歸朱亥里秋風客散信陵門川原百代重回首宋寢隋宮亦何有
遊鹿時銜內苑花行人尚折繁臺柳繁臺下接古城西春深桃李自成蹊朝來忽見東風起薄暮飛花滿故堤

蔡州行

蔡州城高高且壯四十年間兵不向旌旗忽乘雨雪入一夜開門納兵仗請降盡是洄曲軍拒戰不覩牙城將
韃靼將軍拜道左緋衣小兒來天上州人始識裴丞相

流螢篇

廣儲六月清無暑流螢暗逐薰風舉始見昏連萬戶星更看夜照千門雨千門萬戶競高低拂檻縈廊亂復齊
碧莎映水光初迴綠柳棲烟影乍迷水光烟影飛還歇肯使炎精易淪滅帶火終須避太陽含輝却自親
流月長信宮中一葉秋玉階金閣見螢流貴嬪羅扇開香篋侍女珠簾捲畫樓誰家怨婦縫縑素當窻忽見流螢度
蟋蟀床空寶瑟寒鴛鴦機暗孤燈暮螢飛螢度自年年却笑明珠按劍前莫言腐草無生意莫道寒灰不再然
還將斥鷃鷗鵬語三復莊生第一篇

觀漲

五月十日雨如射西山諸溪水皆下大陸朝迷牛馬羣疾雷夜破蛟龍鱗洪濤冥冥夕風急白浪閃閃山水亞浮波噴沫來崔巍巨邱欲沒高岸頽咫尺莫辨天宇濶倉卒但憂坤軸摧固知

一葦不可濟雖有萬弩何由迴農家夜起築隄障婦女走觀色沮喪惡少迎人爭渡喧父老攜幼登城望門前祇訝海勢翻井中暗覺潮聲上憶昨曾為萬里行洞庭灩澦何渺冥鯨吞鼇橫那可測盤渦駭浪誰能平只今夢寐時作惡聞此終夜令心驚旋看雨霽勢亦止沙嘴忽落千尺水雜花濛濛夏壩靜細草青青夕洲靡行人褰裳掇菱苳稚子垂竿取魴鯉眼前喜愕俱已忘就中消息誰為此

寄贈張方伯

君侯風神有奇格秀髯方瞳兼廣額少年甲第已崢嶸壯歲功名更輝赫長淮之西古蔡州我侯清風千載流行人尚聞歌叔度童子猶思迎細侯出參方岳聲雷動復道中州又棲鳳大省才賢豈易推巨卿名位由來重黃河清洛靜風埃少室喬嵩雲霧開行見虞廷咨岳典共看商室濟川材憶昔別公汝水上太行西來隔千嶂抱病還依故里居有懷空向夷門望夷門道接大梁東車輪日日度春風道傍為問南來使早晚朝端召寇公

木槿花歌

朝見花開暮見落人生反覆亦相若夜來白露洒園藿已是繁華不如昨朝花枝上鬪綽約暮花辭枝竟何託持花為謝青樓女鏡裏容華不待汝

聽琴篇

美人橫琴坐我堂酒闌為鼓三四行燈孤月明客不發絃悲調急秋夜長吾家瑤琴久不拭金徽玉軫無顏色感君對此如有情一彈使我三嘆息樵歌響答山澗幽楚歌慷慨雲夜愁瀟湘猗蘭稍平逸四座但覺清商流始聞白雪停翠竹烈飈吹我溪上屋忽然翻作廣寒遊知是霓裳羽衣曲含宮移羽何春容泠泠萬壑吟風松烟岑一夕怨鳴鶴江天何處驚蟠龍我初好音惟好此橫笛短簫徒聒耳平生頗抱鍾期懷四海難逢伯牙子今夕何夕願不違為君擊節淚沾衣高歌雅和人世稀河轉參橫君莫歸

懷三吉士

黃河西來走蜿蜒睢漳之水相蕩泊少室王屋俱崢嶸太行林慮朝中嶽含靈萃異幾百年中產三士誠磊落神標秀骨自殊衆水之文蛟山之鶴十年戢鱗在烟海一日比翼棲雲閣蔡君通朗及衆藝馬氏多才步前作昂藏崔子抱羣經徑操巨舸從伊洛文昌鬱鬱高中天出入彼此同輝燿玉京神仙皆有侶茅齋野人少相託平生契誼懷數公眼底安得常相樂眼底安得常相樂聯牀並轡今如昨

觀打魚用東坡韻

大魚跳波如擲塊溪日溶溶照金背小魚呬沫沿岸行潛向沙邊翻荇蒂家僮舉網欣得鮮持

向庖丁割為鱠磁甕始見紅尾搖霜刃旋看錦鱗碎我雖愛此不忍食悔不先教放溪瀨自愛含生天地間寧知失意波濤外嗟哉小物尚有然人間得喪誰得會君不見鯤與鯨釣者持綸空爾思倏忽乘雲下滄海

孤雁篇

孤雁北來來幾時窮冬無侶鳴聲悲雲長路渺去安極日暮天寒飛更遲洞庭瀟湘落秋水苦竹黃蘆一千里清怨時從鳴笛生斷行暮逐哀箏起塵沙關塞愁轉蓬隨風且落江湖中微軀幸免庖人俎短翮長辭獵士弓君不見隴山鸚鵡解人語一生自恨黃金籠

北風行

古申城邊秋風落北風慘慘夜復作玄冬烟霧卷寒沙白晝雷霆出陰壑寒沙陰壑晝難開萬里悲風何壯哉高空落木下不止長路斷蓬吹更迴嚴威著地坤維裂鷹隼入谷龍蛇結寒雲凍月光杳冥荒臺古林氣慄冽郭西村舍雖近城蕭條盡日無人行門前但聞衰柳折牆外祇聽枯桑鳴鄰翁歲暮缺衣褐茅屋欹斜用繩縛塵生釜甑暗不掃寒入肌膚利如割堂上書生感歲侵臨風三嘆不成吟暮花飄揚不可見病葉憔悴傷人心出門黯淡天無色衝飈四來山為黑黃河欲度波浪陰滄海無梁星斗仄嚴霜大雪來幾時葳蕤朱鳳號南極

雨夕行

城頭雨脚黑不斷堦下凍潦流已滿出門咫尺無所適積霧連雲接平坂城中佳人沈與趙我忽思之費招挽趙子閉門卧不出沈生衝泥來獨晚臨堦下馬入我堂琅琅高詠不可忘瑤徽浮塵為我拭磁甕濁酒為我嘗西鄰彭生亦豪士四壁風雨卧一床隔牆深夜呼即至三人團坐傾壺觴須臾簷雨亂沾席窓風蕭蕭動烟栢照夜青缸寒向人促曙紅鑪暖留客請君再歌我擊節晨雞已下西城陌嗚呼人生歡樂難再來古人滿眼俱塵埃何況與子異鄉域此地相逢能幾迴

白雪篇

玄飈作雪龍沙窟萬里吹花度南麓千門九衢堆已遍翠崖丹壑沾應足曙輝寒素積崔巍中天照耀瓊瑤臺羲和不知六龍在仙人遙乘萬鶴來依樓傍檻墜深院輕羅白紵誰曾見已將弱舞鬪迴風未遣明姿讓流霞城中車馬不動塵党家金帳暖圍春豈知窮巷衡門裏亦【一作無】有當時高卧人

雨雪呈望之

北風蕭蕭天雨雪洪川大陸冰嶙峋城闔咫尺不可越念子鬱鬱傷我神十年骨肉更知己四海兄弟今何人夫子風流本絕世致身況在萬里津頃聆清辭叩哀玉復睹高價收名珍愚弟

病歸卧邱壑山中日與蓬蒿親喜看結駟來天上又許題詩到水濱嗟哉十日不一見眼底勝會真難頻茅簷白日苦太短祇有長夜堪留賓瓦鑪木檠亦不惡梅花栢葉俱鮮新只須對此共歌笑莫使離別成逡巡

寶劍篇

戴仲鵬將赴春官來別何子何子作寶劍篇贈之其辭曰

我有雙龍之寶劍重之不減雙吳鉤雄遊九天橫素秋鷗鳴匣中聲啁啾扶風豪士邯鄲俠千金在傍不敢酬雪花星文照玉玦贈汝慰我心所求汝今年纔二十四北上長安見天子手翳鳳凰跨騏驎肝膽義氣無與比杏花江頭春風起綠袍青綬帶秋水想見提攜白日前更看結佩青雲裏我初鑄此良已勞昆吾鐵冶風雷號寶鞘玉珥黃金錯何以繫之赤錦綵砍地翻虞滄溟倒倚天未覺虹蜺高十年在匣尚未試嘗恐棄置成鉛刀君不見豐城紫氛埋古獄星辰夜搖魍魎哭奇器逢人自有時肯使塵沙竟湮沒又不見藍田寶山空突兀頑石却指神鋒禿平生雖有百煉鋼一用不謹為棄物吁嗟戴生爾無忽

寄王職方

故人王郎天上客一歲寄書凡兩束山中病夫儔侶稀念子不見心轉鬱長淮浪高河無梁我無羽翼到爾傍京師南來四千里春鴻秋雁每相望【一作莫相忘】

寄李空同

黃河臘月冰十丈縱有鯉魚那得上楚天鴻雁避霜雪未得逢春難北向康王城邊沙草曠梁王臺上多暮雲野人歲晚誰相對桐栢山中空憶君

歲晏行

舊歲已晏新歲逼山城雪飛北風烈徭夫河邊行且哭沙寒水冰凍傷骨長官叫號吏馳突府帖連催築河卒一年徵求不少蠲貧家賣男富賣田白金縱有非地產一兩已值千銅錢往時人家有儲粟今歲人家飯不足饑餓翻飛不畏人老雅鳴噪日近屋生男長成聚比鄰生女落地思嫁人官家私家各有務百歲豈止療一身近聞狐兔亦徵及列網持矰徧山域野人知田不知獵蓬矢桑弓射不得嗟吁今昔豈異情昔時新年歌滿城明朝亦是新年到北舍東鄰聞哭聲

嫦娥圖

月宮戕戕冷光射桂樹長生花不謝玉宇瓊樓閉早秋金蟾銀兔啼寒夜夜寒露下步瑤臺羅襪仙裙冉冉來屏障乍開雲母隔簾櫳遙望水精開明星迢渺斜銀漢誰擬丰神傳素練霓裳

羽衣世莫聞霧鬢雪貌人難見靈藥空疑后羿妻吹簫跨鶴幾人迷君欲遨遊廣寒殿直攀萬丈青雲梯

胡生行

近時逢人論術數胡生相法稱獨步閉戶時看神相篇然燈夜讀石室賦吾觀此術非荒唐異人歷代各有長我朝名家亦不少神妙無過袁柳莊君學本從袁氏出識鑒至今如畫一為客十年凡幾更閱人四海無一失初從燕市度生涯一日聲譽傳京華衣冠每動公卿座車馬爭迎貴戚家自從仗劍離京域當時朝士無相識已往豪華不可論只今形貌猶能憶漂泊江湖不自伸袖中書在半埃塵窮途反遭俗眼士末路難逢好事人昔聞燕邸招藝匠袁生抱術金門上文皇自有天子鬚羣臣盡是封侯相君臣千載當一時雅鑒風神猶在茲才殊未可尋常得數偶還教際會奇古來相心不相體眼前貧賤那能擬志士翻居草澤中貴人多在塵埃裏胡生謂我顏色奇願我已是雲壑姿希夷不識錢若水麻衣道士應當知

袁惟武山水圖

源潭窈窕開層島疊嶺撐空互傾倒人家萬樹隔村原細雨冥冥春更好清江柴扉映春草樵歌漁唱歸林早帆色遙隨返照迴岸沙却被垂楊掃袁侯此圖愛藏護畫手莫識馬與顧掛壁盤紆見巖壑開牕拂拭生雲霧嗚呼此圖侯當珍重留壁間萬金莫買真江山

卷十二

歸來篇

君不見陶公飲酒負奇氣平生下筆五千字不肯上書干明主安能束帶見小吏歸來不願千頃田但須囊中有酒錢男兒委身事權貴摧眉折腰誠可憐朱君雄豪氣如虎風期直與陶公伍青袍銀帶不復視壯年棄官如棄土雅性好酒兼好文眼中富貴豈足論五花換酒召賓客千金買書遺子孫人生百歲終蕭索如子從容胡不樂未似原生少宿儲却比蘇家多負郭長安陌上久離羣予亦還山卧白雲南巖桂樹花自發歲晚相看一望君

雪中宴袁揮使惟武宅

四郊飛雪暗高城北風怒號天杳冥將軍宅中晝擊鼓哀箏鳴笛羅後庭我時凍吟在西野忽見將軍送書者開書讀罷喜即行邀我入門方下馬凝輝絢素開簾櫳流風迴霰滿堂中青氍毹帳高雪不濕蘭燈夜照氍毹紅卿家父子皆好客能留對雪歡今夕已看稱壽奉千金況復徵歌出雙璧梁園賓客多交遊謝家兄弟盡風流古人勝事長已矣吾輩優遊亦爾儔

鴻門行

沛公昔日分義軍旌旗十萬西入秦山東諸侯皆後至咸陽萬姓思為臣項王東來怒如虎置酒朝會鴻門下門前壯士擁盾入座上小臣拔劍舞爭雄較勝未可量相看杯酒成倉皇揮刀醉擊玉斗碎攬帶空懸寶玦光沙丘城邊祖龍死芒碭山傍匿天子澤中夜聞白蛇斷灞上朝看赤雲起君不見劉郎供帳出秦宮宮中火照三月紅英雄為謨自有術亞父徒知殺沛公

垓下行

咸陽原上失秦鹿戍夫入關競馳逐君王自負十尺軀傍人更訝重瞳目橫行按劍一何威叱咤四海隨指揮諸侯西向受金印壯士東歸盡錦衣陰陵道中夜失援垓下孤軍獨迎戰百萬王師來震天八千子弟隨飛電自言百戰當一身寧知一敗損威神美人帳下看無主駿馬江邊棄與人楚歌聲高暮雲佇孤燈對酒慘不語蓋世英雄力拔山一夕悲哀淚如雨君不見三軍縞素行負戈烏江不渡愁風波古來失道衆所棄父老雖憐將奈何

長歌行贈旺兄

兄為吾祖之長孫能將孝義持家門耕鑿不隨時俗改衣冠頗有古風存我家東岡舊鄉土穀有田場桑有圃諸弟誼誼逐城市兄也蕭條守環堵僕僮馴雅妻更良男女膝下皆成行女長適人止近里男大為農不出鄉只今汝年六十七我翁為叔汝為姪歲時相看如父子登堂過庭禮不失弟昔省兄盡兄懽夜秉燈燭羅杯盤兄前勸飲嫂勸餐留我一月相盤桓自從離兄

仕都下都城誰是悠悠者萬戶清晨霜滿裘九衢白晝塵隨馬朱門金鎖午未開我曹不敢騎
馬回此時吾兄正穩卧日高戶外無人催愛兄好靜謝塵網一卷道書常在掌托身未肯附年
少舉手何曾揖官長頃來生事日看微種麻自織身上衣少兒從學長幹蠱我兄心中無是非
君不見人間歲月坐相迫胡為東城復南陌兄今已作白頭翁弟亦長辭青瑣客山中桂樹况
逢春谷口桃花更照人花前樹下一壺酒弟勸兄酬不畏貧

短歌行贈賈西谷

城西草堂日無事廣文先生騎馬至先生雅性嗜林壑為愛吾廬有幽意長溪風起寒日冥晚
雲含白冬樹青山城沽酒不易得為爾且繫雙銀瓶先生好吟近頗酷手書佳句已盈軸燈前
朗詠三十篇一一徽音中金玉顧予疎陋非良儔感君過野常優遊城中豈無萬戶侯金盤玉
饌不少留從來富貴安足慕水上浮漚草頭露君不見賈生自負洛陽才南遷且作長沙傳

漢將篇

漢家西北烟塵起烽火夜照西京裏單于奔【一作崩】騰一萬騎關塞逶迤五千里飛符插
羽募精強連營列陣掃邊疆已見將軍屯細柳更聞天子獵長楊長楊羽獵兵威振疊鼓鳴鉦
聞遠近龍虎遙分天上軍魚蛇徧閱雲中陣長安驄馬俠少年金鞍玉轡鐵連錢共看拔劍追
驕子自許彎弓射左賢驚風晝起邊沙漲疎勒黃雲迷所向飲馬寒臨月窟傍驅兵夜度天山
上降旗欸節樹戎城卷旆迴旌入帝京征人半死龍庭戰壯士俱標麟閣名麟閣功名不易得
貴臣良相徒顏色邊人盡道李飛將還漢誰言蘇屬國玉門關外朔雲愁燕頤書生亦白頭君
王自憶廉頗輩義士羞稱萬戶侯

孤鶴篇

我家孤鶴李侯贈霜儀皎潔三尺高向人似矜短羽翼失侶豈免長呼號赤霄青雲暮延佇天
長路遠飛不去日來秋塘啄苦蓼時向空牆倚脩樹憶昔初在山人家雌雄和鳴閑且嘉夜寒
對舞庭中月日暮雙棲嶺上霞李侯平生重幽德致此遠自東吳國金櫳玉檻脫相送異種奇
毛惜不得一自天涯失舊行垂頭戢羽空徬徨朝聞橫笛音相和夕對鳴絃影自傷荒堦雨濕
多泥滓毛翮摧頽風不起奮迅那推一鶚先昂藏且在羣雞裏吁嗟人世是還非華表千年更
一歸蓬萊宮內青瑤樹會接文鵠比翼飛

冬雨嘆三首

季冬十日雨不絕寒烟凍霧何淒淒城頭無由見白日坂下祇是愁黃泥鄉中餓叟納官賦白
頭赤腳行中路薄暮臨河望郡城水深岸滑何由渡

一冬枯槁雪不集細雨冥冥高岸濕天邊鴻雁安所歸歲晚蛟龍不得蟄昨聞汝北多死亡橫尸委骨官道傍我里四鄰久已出到今不知死何鄉

三

西望千峯萬峯連出門朝暮生雲烟日傍雨脚下平地風外濤頭衝遠天急飈北迴振林薄白晝狐狸行近郭城下饑烏啄死人蒼鷹側來怒相攫

懷舊吟贈阮世隆

君家高樓對芳樹開宴曾留三日住銅槃絳燭煖照春金壺銀漏寒催曙知君重義多豪遊滿門賓客為我留珊瑚不避鐵如意驕驄皆纏金絡頭爾時北上與君別蔡州城外花如雪夢裏猶尋汝上雲醉中却憶淮西月丈夫富貴各有因如君立身亦不羣行年四十未白髮生兒十八期青雲君從秋日遙分手我向東風一回首山下長攀舊薜蘿樓前應長春楊柳

官倉行

長棘周袤三丈垣高門鐵鎖緘兩關黃鬚碧衫下廩吏白板朱書十行字帳前喧呼朝不休剪旌分隊聽唱籌富家得粟堆如邱大車檻檻服兩牛鄉間餓夫立牆下稍欲近前遭吏罵

除夕醉歌二首

今歲相逢惟此夕美人金罇莫虛擲千金一刻真可惜夜久衾帷望河漢寒星欲沒明燈爛長歌坐待東方旦

二

孤城歲徂嘆幽獨舉觴醉飲城西曲野風蕭條山雪暮寒梅無花柳難綠今年今日不可留明日明年更可愁山中縱有如澠酒春花爛熳與誰遊

醉歌行贈柴逸士

今年中秋與君共舉觴待月城西宅良夜清尊逢故人空堂明燭留遠客山城暮雲黯未收流烟何時散高樓清風徐來勸我飲明月不至令人愁君是長安舊相識坐論舊事還相憶金市豪華如夢寐玉京仙侶無消息人生去住安有同有如長風吹斷蓬得隨江湖扁舟外不恨關山橫笛中酒中雲散天如洗月明忽墮金罇裏起看皓彩發青巒坐見流光盈綠水濶舞高歌夜未央攬衣擊節為君起

和獻吉送公順

君不見池中魚君不見澤中蛇一朝羽翼起烟霧向時頭角盤泥沙神物舒卷各有時男子豈得常在家君今年纔四十餘雙 駟馬高蓋車手中持文符腰下佩轆轤登山采球琳涉水采珊瑚吁嗟至寶今豈無莫使和氏空號呼

古峯畫梅歌

空江月墮孤山曉直幹橫枝疎更好夜來夢破碧窻虛殘雪半庭寒不掃小橋水淺影初斜野徑風清香未老霜魂月魄獨俤停玉骨冰肌自枯槁溪頭數點瘦花明塢雲漠漠林烟渺逋翁湖山詩思閑寂寂柴門春醉倒山亭晝午鶴飛還一聲長笛江門悄

登山吟

風吹葛蔓石磊磊蘿薜搖烟映山鬼我行登山采石耳長歌捎林暮風起君不見寺傍桃李飛如霰青春已破白日晏萬事盡付東流波高飛且嘆南來雁

落花嘆

君不見樹上花東風吹始開東風吹開更吹落世間有樂寧無哀汝南何生未三十頭髮未白心已灰見此落花三嘆息東風吹去何時來

復見阮生行

阮生別我尚總角三月不見冠峩峩未知華實竟何似眼看玉樹成枝柯君不見世間日月翻如波昨日黑髮今則皤龍駒千里汗成血道傍老馬空蹉跎人生少時不努力齒大身長嗟奈何

古井篇

君不見城邊古井荆棘荒沙崩雨塌官道傍當時碧甃映朱閣黃金闌干銀作床美人銅瓶響哀玉寧知委棄同悲涼梧桐花乾薜花澁鷺鷥側窺蚯蚓入百丈寒泉尚堪飲心長綆短空愁立

古松歌

賢隱寺傍之古松奇絕可比徂徠峯問之故老迷歲月但見皮肉屈疆苔蘚裂高枝上掣玄冥風迴柯反掃陰崖雪藤翻蔓卷空林黑集霰流烟豈終極斧斤相顧思盤錯梁棟誰來誇正直昔予山遊駐車馬行吟屢憩茲松下松根老僧為開徑野色巖姿坐生暝葉暗秋燈 殿深花香晚飯齋厨靜一年幽憂不到此寧知摧折空山裏龍盤虎拏終有神白骨蒼鱗半枯死滄波古岸霜氣夕砭砭猶看數千尺石上連朝走雲雨山中十月飛霹靂千靈百怪相護訶過客居

人盡憐惜君不見泰山五大夫零落今看在何處滄海空流使者槎悲風暮起將軍樹嗚呼人生富貴竟何益松乎松乎吾當為爾誅茆傍青壁

隴右行送徐少參

隴右地長安西行一千里秦日長城號塞垣漢時故郡稱天水聖朝掃盪無烽烟射獵之地為桑田熟羌賣馬常入塞將軍遊騎不出邊知君風采古遺愛揚策傳符度關內父老三秦望節來葱嶺諸羌遮馬拜開藩分道鎮邊塵居守巡行歷幾春熊軾朱幡今岳伯豸冠白筆舊臺臣瓦亭之西半山谷土室陰陰連板屋落月孤城清渭源寒雲古磧黃河曲十年此地曾遊歌別來風物今如何竹花秋臨鳥鼠穴楊葉夕渡魚龍波回看萬里風雲色少小趨庭淚沾臆相送悲吟不盡情關山隴坂高無極

遊西峯示四子

今我不樂遊西峯喜有四子來相從日長古寺風景靜蜀葵始青榴始紅彭生舊時同遊者每遇遊山先跨馬徐生愛山欲留宿朝見青山獨開目白云邑城盡原野頗恨無家傍林谷陳阮二生皆少年陳生家亦近此山阮生志不在山水騎馬欲行仍復還吁嗟汝輩各努力此身會見生羽翼乘風高舉或遠遊安得久為山人留他時倘願騎黃鵠隨我江邊伴白鷗

甄邦治行樂圖

黃金雖有餘不如常乘下澤車紫綬結腰下不如常騎欵段馬人生富貴皆有憂豈必只願封公侯君今出有駿馬更輕裘及此壯年當出遊西飛日月如東流君不見馬少遊

長安大道行

長安大道如弦直車馬相逢不相識金鞭玉轂共爭先日日紅塵大道邊七貴門前羅將相五侯座上列神仙五侯七貴同杯酒萬騎千夫盡奔走一言得意賤可貴百計奉身無亦有杯酒經過日共遊比權並勢暗相謀才見黃金結兄弟忽看白刃起仇讐薰天灼地期長久覆雨翻雲亦隨手富貴誰言福作門驕奢終與禍為鄰瑤臺歌舞新更主金谷池亭別與人豪賓貴客如風霰鞍馬當時候雷電得飽空聞鞦韆上鷹附炎不見梁間燕尋常只道泰山安頃刻寧知滄海變秋來春去互推遷物理相尋是等閒豈知盛滿衰仍至豈識憂從樂極還獨怪梁生何感拂袖長歌辭漢關

入京篇

軒車若水流宮闕似雲浮畿甸一千里山河十二州城中甲第共崔巍別起雲薨接露臺旭日纔臨萬戶動飛塵遙見九關開九關雞鳴競車馬百僚已集金門下入衛皆為龍虎軍來朝盡是貂蟬者天子乘春覽物華霓旌羽扇五雲車六龍不駐千官仗匹騎常過七貴家七貴家連

鳳城裏轉日薰天勢無比池榭春來錦繡圍樓臺日暮歌鍾起復有蒙恩過董仇執柄持權得自由不使府中除將相直教門下謁王侯王侯貴人慕豪富意氣相看益驕妬未惜朱閑驤裹駒豈論金谷珊瑚樹托身日月有光輝舉翼風雲多會遇可憐漢室盛衣冠楊雄蓬巷獨饑寒終歲校書空閉閣十年執戟不遷官公孫射策取卿相李廣馮唐徒自嘆

送熊廷振之楚藩

燕京春色花太半豫州楊柳風吹斷南雁新衝汝雪來北車久待河水泮與君結綬俱明時送君執手如前期丈夫勲業豈必少四十遭逢猶不遲即今君身更磊落義氣如山誰可奪同榜衣冠照鄉里十年名位登方岳帝城朝開羅旆旌欲發未發明星明麒麟獻納遙相憶江漢風流須此行

送顧錦衣赴廣東僉憲

君不見錦衣白馬若雷電當朝氣勢人爭羨顧君出入身不移心看富貴同貧賤二三貴人隨至尊冠冕劔佩如雲屯青袍自向將軍幕欵段不叩諸侯門外臺新捧廣州檄青冥斧鉞生霜日海嶠諸城發鼓迎江天萬里褰帷出丈夫不言自立身清水白石何粼粼金張門客不足數嶢嶢赫赫何為人

送樊生

翩翩南圖鳥昔是北溟鯤纔見搏風一日起忽看垂翅九天雲樊生此行覽吳越大江石城通日月峒峒南京十二樓波浪蹴踏金銀闕爾上金陵望帝關星河北極開幽燕丈夫常懷四海志才人亦賦兩都篇排空萬里有毛質再接扶搖上九天

彭生行

岷峨山根江水坼萬里波濤混吳越傾湖倒海不可量仰看一線青天上蔚藍秀色盤三巴間產錦石兼丹沙王嚴揚馬各挺出異才豈必生中華彭生昂昂千里駒少年騎馬來成都飛黃驤裹未即試已覺奇氣排長途君不見岷山不崩江不枯古之高才何代無

黃河篇

黃河崑崙源九曲與天通銀漢貫箕尾左盤日月宮奔流下龍門噴薄沙海風三山萬里倚窮髮鼇極虹梁開恍惚排空雪垂銀城便可因之向溟渤郭生少年觀上都還家且泛黃河牕讀書豈必破萬卷覽勝何須行九區蓬池已在梁園裏嘯歌綠水洪波起揚帆他日乘高秋見爾星槎掛斗牛

三清山人歌

山人佩劒冠遠遊腰間鞶囊垂虎頭七星照耀金銀鈎東行策杖指盧霍逝將滄海尋丹丘三清西南龍虎連攢峯疊翠盤石蓮千崖萬壑不可以徑度玉梁倒掛銀河前青蛻下望憑雲烟石壁中開日月懸傍通七十二福地白玉樓臺羅洞天此中棲身煉大藥寶笈靈書啓五岳騎鹿時見南斗君聞笙夜侯綵山鶴我今遊日送冥鴻欲訪名山入越中飛梁萬丈倘可接共爾青天躡彩虹

昔遊篇

三星爛夜河漢流觴行瑟作中堂幽李君勿嘆息薛君且停謳英英孟夫子聽我當筵歌昔遊昔遊少年觀上都並轡驕嘶雙紫騮雲中十二樓羅綺照燕州夾槐複道臨仙苑垂柳通闌對御溝平明向帝宅半醉過王侯遊梁詞賦那稱數入洛聲名未足儔自言與我共聯翩場翼寧知落九夭折花別青門揮袂渡湘川斑竹古魂垂淚雨蒼梧遙夢結愁烟南嶺越江圉東城移海郊不記流年幾拋擲五見楊柳垂青梢鴻雁散他縣鷓鴣棲故巢君從歧路悲轉蓬我在長安嗟繫匏金門上書久不報雲閣題詩空自嘲以茲守蹉跎舊客罕經過日與李薛輩詩酒縱歡歌春風宛轉青絲鞵夜月留連金叵羅筆翻翠虹霓手掣生蛟鼉三千豔女羅紫宮傾城一笑揚雙蛾星分霧散去長安豈意天垂雲雨懽龍劒雄雌忽復合朝天再覩漢衣冠帝京宮觀一如昔盤龍曲鳳青雲間九衢車馬流如水五侯甲第峙如山星樞常不轉海岳自迴環昔日繡衣一何貴今看竄逐宰河關可憐舊賓友逝者誰復還二三壯士力搏虎轉盼埋骨黃泉灣榮華閃爍若電露俛仰今古凋朱顏君不見漢李廣威名萬里匈奴聞彎弓貫白石射虎生黃雲一朝謝病逢醉尉灞亭不識故將軍君不見秦范雎折脅摺齒隨王稽一言奪相印七國趨關西雄豪趙魏二公子徒使虞卿從魏齊貴賤傾覆如旋風王侯豈異鳥與虫魯連獨蹈滄海去張良仍從黃石公孟夫子總角與君戲共許非凡倫萬金腰裏騰天雲子今胡為在風塵低頭面男子身笑予落魄亦如此痛飲狂歌非隱淪回首向崧岳少室高嶙峋寂寥紫芝曲空負桃花春會須約爾同歸去為招李薛兩才人

贈商三

去冬雪雨留薊門開筵謔浪倒金罇今春燈火到長安過門不肯迴銀鞍燕山花隔平山柳馬上東風幾回首

大梁吟送李進士

大梁擅豪華鉅野生龍蛇頃來曹李輩擢秀冠詩家神駒並逐兩超絕凡馬百萬空咨嗟李邕門下多奇士曹是賢甥李高弟登龍自昔忝通家附驥相看總名世梁王臺館罷歌鐘兔園賓客有遺踪侯嬴舊隱夷門里李渤今歸少室峯回望嵩高瞻岳首即尋玄圃問河宗可憐二子詩家秀吾生已愧盧王後司馬黃金賦未逢楊雄白首書空就李當春日別燕川曹也誦詩神黯然蓬池更憶阮公嘯腸斷洪波綠水篇

東海太守行贈徐以敬

西曹大夫東海太守且停爾車飲我酒二十讀書飽經術腰下組綬無一尺一朝天子賜五馬
十年官至二千石漢家盜賊滿山東十城九城荆杞中玉食常懷股肱郡蒼生久慕循良風况
君兄弟皆甲第出入光輝無與比兄飛仙舄宰王畿弟握侯符長千里四世五公自此始不見
關西楊伯起

卷十三

石齋歌

濯錦江中錦為水白石粼粼映江底江頭齋閣石嵯峨卜築題名總因此崖撐壑拄盤天地產秀生神豈人意日月宵通灩澦根風雲晝吐岷峨氣明公少年天下奇琅玕五色動光輝扶疎太華仙人掌照耀銀河織女機明堂大厦要梁棟不獨文章翰林重懸磬真諧韶濩音國琛果獻珪璋用公登雲閣望雲林霄漢長歌白石吟功成思袖補天手力在寧忘障海心衛公德業懷應滿李相風流今不遠海內完名已玉成平生貞志同金斷萬里橋邊綠竹園百花潭畔平泉館待公一起慰蒼生還卧西山未應晚

五馬行

使君五馬來月氏方瞳夾鏡光離離長身峻耳高七尺錦雲罕地玉花赤杏韉蹙雙盤龍文羈翠刻金玲瓏青絲遊韁綰不住鐵色蹄翻錦苔地天閑沙苑貯幾時一朝分賜使君騎使君行春常露冕緩鞚張油下山縣朱文露網動輕車四野人家望通轡去年來時楚江秋長鞭馳過黃鶴樓楚城駿馬千萬匹解鞍坐視不敢儔今年朝天入五鳳紅纓寶玦連錢重曉隨鸞聲撼玉珂九陌風微塵不動天子命下巡吾州輝光重整金絡頭吁嗟吾州本狹促迤邐寧當千里足行行前駕肅且閑郡人遙望雙旌竿馳道父老應開顏區區狐豕誰敢前桑條吐葉青鬱鬱滿路春塵繞車轂使君不惜驅馳勞無令暴吏登民屋出門一送五馬行我馬踟躕皆不鳴相逢同是他鄉客惆悵城邊暮春別山亭草色細雨時野館梨花寒食節夕陽微微鄴城樹寒烟漠漠淮川月願言努力策霜蹄千金重有登臺期

憶昔行

我年十一十二餘與子握手相懽娛嚴君視我猶視子日向庭前問詩禮我亦視君如弟兄夜入同衾晝同起當時見子已不羣紅顏如玉目有神花邊燦燦丹鳳雛天上矯矯石麒麟笑予是時尚垂髫把筆從君弄文翰聯翩白馬控雙御出入城中誰不看我當辭歸君失懽徘徊欲別良獨難別來有懷徒悵望夢繞秋風沁水寒杳杳雲鴻異鄉縣十載長安見君面昔別未冠今已婚回憶少年空嘆羨一官碌碌經三春二十光陰似飛電君有長才未得施卧龍儀鳳猶棲遲男兒成名在少壯感會風雲須及時人生聚會豈常有但願相知不相負君不見古來金石交結髮寸心期白首

崔生行【并序】

予之至京師也友人崔太史子鍾見之曰久不聞何子言矣為我作崔生行

崔生自返金陵謫騎馬復走長安陌時危頗負經濟才海內俱【一作但】識文章客自從盜

賊近神京四海不見烟沙清黃河流血日慘怛中原戰骨霜縱橫朔方兵馬又已弱天下財賦難盡樵書生不得言世務大臣誰有匡時畧我到長安訪交友子與河內猶相厚感君戀故有綈袍吐膽傾心共杯酒六年更見玄都花萬事空傷薊門柳河內憂時未解顏子亦談兵不輟口金礦玉璞隱光曜紫氣龍泉鬱盤久議論反遭時輩忌形容豈免流俗醜王良伯樂不在御驪騮裹徒能走人言古人未可輕古人往往皆無成子雲老大不曉事殷浩當時空有名事去惟應嗟白首時來未必濟蒼生即今風塵尚瀕洞羽檄飛符遞相送西北山河戰角悲東南天地軍麾動江海未見魯連恥朝廷不聞賈生慟塵埃早知才質殊霄漢況覩名聲重閤宮清廟待琴瑟大廈明堂要梁棟天生公等世所須努力他時有大用

憶昔行【并序】

予上京師之二年汝正有湖南之行新政弛廢故人幾何晤語未諧離告又即愴然悲歌不能自已感念往昔要之將來耳

憶昔長安相會日君方壯年我年小只今容顏有更變何況世事無紛擾先帝衣冠半零落十年賓友全稀少君今始作紫薇臣笑我金門落魄人馮唐上書亦嘆老子雲識字空愁貧艷陽三月桃李耀君非壯年我非少花開酒熟君遠行可惜春風阻懽笑明星迢迢車關關遙向楚水辭燕山但看朱紱在腰下莫使白髮生顛間武昌城邊江色澱襄陽漢水尤堪羨東行何日訪鱸魚南飛不得隨鴻雁少癖山水耽雲松兩年楚上多行蹤浮湘直下三千里望岳遙瞻七十峰知君跌宕輕駟馬顧予豈是功名者安得浮沉帝座傍會須覽眺蒼梧野蒼梧風烟秋色開武昌高樓吹笛哀帝乘白雲去不返仙人黃鶴何時來君行訪古兼化俗長揖輶軒指南極岸上遊穿羆虎林潭中坐傍鼉鼉國他時倘覓桃花源北風為爾傳消息

田子行

君不見黃河西來北入海千載却倒東南流淮水如絲納九曲桐栢山作崑崙邱我家清淮邊君家大河側開關二水今合同人生變化無南北田子之生河降神十五手掣生麒麟二十辭家觀國賓三十謁帝為近臣赤青瑣日月上金馬銀臺河漢津自矜一身遇明主便欲登天叩天鼓天門晝闔守虎豹雲師屏翳雷公怒烟氣縹緲隨飛龍電光閃爍笑玉女太清星辰下羅列歛忽閭闔生風雨丹誠不回白日照杞國憂天獨勞苦我持彤管雙鳳翎浮沉帝傍近紫庭文園著書久消渴據地酣歌常不醒長安少女花在側茂陵美妾空娉婷漢皇不好相如賦方朔誰知是歲星愛君襟期特奇邁諫垣給舍持風采平生古今開萬卷搖筆風雲動五彩致君堯舜豈無術許身稷卨終難改袖中一扎諫獵書三歲磨滅未見採鍊石何時更補天銜沙枉自思填海君不見楚人當時不識玉海客無心采明月明珠暗投反按劍白璧三獻還遭刖連城高價後始定照乘奇光有時發鳳凰不及鴟鵂鳴鴛鴦却笑驪騮拙君不見長孺

<集部,別集類,明洪武至崇禎,大復集,卷十三>從來歎積薪公孫布衣為漢臣千秋開口取卿相董生白頭甘賤貧萬言不如一言重直絃曲鈞安可論賈生何能善絳灌任安徒事衛將軍我今與子俱落魄過飲悲歌慨今昔咸陽酒客五花馬邯鄲博徒千金擲古來豪俠亦可喜

可憐聖賢皆厄塞豫章干雲世希用龍泉貫斗人難識神駿翻為轅下駒冥鴻已愧籠中翼出門與子常相憶清淮大河見顏色

樂陵令行

山東郡縣一百八無有一城無戰場到今漂血成野水如山白骨橫秋霜雲臺功高將不收投筆亦有書生謀黃金大印賜豪貴白面豈得言封侯唐朝公卿集如雲平原太守名不聞二十四城見賊走抗城乃是平原守君不見前者寇盜時縣吏州官各亡命北梁白馬終日行濟上黃旗錯相映不聞開門戰但聞開門迎嗟乎平原太守樂陵令

少谷子行

少谷子在武夷之山二十抱策叩燕關朝排閭闔暮湖海九霄萬里身翻攀豈徒聲名冠帝里要使蹤跡窮人寰竭來京華始一識意氣形神兩相得肺腑真成水石痼詞章亦帶烟霞色龍姿鶴性不易馴海思江情浩無極頃將東遊觀岱宗便欲下泛滄溟中鼉風奔浪巖洞黑鼇日壓山樓觀紅南浮江淮覽吳越復上會稽探禹穴去鳥晴生雁宕雲飛虹夜躡天台雪波濤窈窕岑嶠移遍訪名山入武夷仗劍不憂百怪出采芝或得羣仙隨只今妙年始三十辭官讀書志何逸九曲烟花對草堂三山蘿月開芸室已看鳳凰在千 回首驂騑空萬匹八月高城氣稍勁流螢木葉交相映燕山遊子落日吟海濱歸客秋風興他日遙尋少谷峰武夷莫作終南徑

九川行

君不見自從天地開天下之水皆西來黃河崑崙一線出下轉秦甸轟奔雷長江廣漠兩盪潏濁涇清渭中縈迴帝遣九龍下治此江漢安流涇渭理華嶽中斷仙掌高却放黃河行萬里九龍蜿蜒上天去至今猶餘九川水秦中雲雨四時遍北地塵沙幾回徙我來長安不見九川水得見九川子九川子是非常人朝辭川上麋鹿群夕登青瑣為帝臣已從華袞補日月況執彤管排風雲長風西來吹北極西望川流渺何極野岸空懸舟楫心塞林暮繞波濤色吁嗟江漢猶阻兵中原不見黃河清虺蛇豺虎滿道路黃埃濁浪無人行九川子何不更鞭九龍起坐視天下橫流水

送葉生還閩中兼懷鄭繼之

葉生行吟燕市中葛巾麻鞋歲將晚兩都為客今始歸五岳尋仙不辭遠江南畫舸春柳低海上茅堂白雲滿谷口如逢鄭子真為道棲遲未應返

送林利正同知之潮陽

憶在成均共攜手泉山門下相知久萬里恩情若父兄十年道義慚師友君才豈孤一第名佩

刀今作嶺南行掛帆夜宿天邊樹伐鼓朝登海上城燕京相逢顏色好相逢何難別草草過家
登堂壽禮畢道予問訊泉山老

金陵歌送李先生

李公為舅有呂甥甥舅四海皆知名呂君關西昨日去公自金陵來復行金陵江水無斷絕金
陵之山高巖巖龍虎千年抱帝京星辰萬里羅天闕白鷺洲前芳草歇清江浦上看明月燕山
北望花如雪

今昔行送何燕泉

君不見燕泉何子生南岳十八名聲動江海年今四十少方伯富貴由來重文采金章紫綬乃
自致黑髮紅顏未曾改憶初射策逢先皇我為進士子為郎芳花醉踏清沙苑春樹迎開畫省
堂每投桃李報瓊玖多謝相知更相厚倚玉元非異姓兄斷金況是同心友寧知世事多變更
岐路人間各分手四海風塵半甲兵十年意氣還杯酒子方出守紫微垣予亦棲遲金馬門黃
金盡識故交態白璧翻思明主恩中原送別哀離亂汝水嵩川客心斷行馬秋臨清洛流戰場
暮弔黃河岸薊桑青青燕草碧梁王城邊杏花白功勳名位行有期慷慨為子歌今昔

同崔子送劉以正還關中

燕川芳草歇已久行子西行更回首駿馬春停渭曲花金鞭暮指秦中柳看君兄弟皆豪雄十
年側想中丞公東山雲月卧未起北海賓客誰相通荷花初紅酒初碧汝歸登堂見顏色若問
長安舊友生崔何二子常相憶醉歌贈子容使湖南便道歸省兼訊獻吉

徐卿此行壯觀莫與伍東將入吳西入楚都門帳飲慨今昔酒酣拔劍為汝歌起舞聖朝分封
重茅土詞林禮樂超前古冠冕諸邦拱至尊冊書十道開天府匡廬峰南繞江漢洞庭武昌半
樓觀壽酒花開海上堂使舟草滿湘西岸憶卿翻飛霄漢裏結交豈少青雲士眼中何人最知
已十年之交吾與李李生近買陽羨田又欲鼓柁襄江船風塵落日倘相遇為我問訊江湖前

薛生行

君不見少府忘年交禰衡中郎倒屣迎王粲坐間賓客盡傾倒海內賢豪流英盼古人愛才今
不如薛生豈得無嗟嘆昨來布衣見天子日向長安乘欵段公卿門前恥干謁東歸把釣黃河
岸年少今看萬卷開遠遊自負三山願丈夫有才須用世未許終身隨草蔓閑居好著子虛篇
行路長歌白石爛

晚過田水南有贈

田郎閉門著書今幾卷我欲與子數相見謔浪雖稱青瑣賢經過罕識黃門面長安雨積鞍馬

稀堂下苔生集秋燕四海何人問草玄一經徒使桓譚羨

延津歌送韓令

延津寇過餘少男延津縣令莫停驂雙鳧直向黃河北一雁先飛清衛南黃河岸邊不種麥濁浪滔天多賈客城中少男爾勿愁縣令到時為買牛

谷進士宴歸圖歌

五城十樓春窈窕九衢夜半人行少月高醉客金鞭垂花簇銀鞍弄腰褭我皇九載羅豪英坐收四百皆才名四百人中見谷生綠袍白面誰不驚谷生自昔中州士布衣三來謁天子十年讀書梁王臺一日走馬長安市長安鍾鼓聲入雲相逢却避新郎君赤鯢在天振羽翼神駿得路超凡羣嗚呼此圖人共羨已識君身不貧賤萬言莫忘北闕書千載常記南宮宴嗚呼此圖人共羨

遠遊篇送楊中舍承家雲南省墓

君不見昆明池去京一萬里山盤海曲在天上日轉星旋羅地底生神發秀千百年太宰源流自茲始七歲辭家朝帝京登台踐斗榮身名水木更起邱原情請帝帝遣中書行中書此行天子重赤車駟馬都人送岳樓畫錦湖光開京口春帆江色動瀟湘鼉鼉經水國衡巫瘴癘雲來黑銅柱標南問南紀錦官城西指西域揮毫憑軾驚蠻夷却似太宰中書時相如使蜀人同羨遷史浮湘志自奇憶昔滇中為使者黔公宴我滇山下酒罷曾彎壯士弓賦成尚倚將軍馬今日看君萬里歸山川草木倍光輝公卿禮數古來少父子聲名天下稀五華岡頭日朝放點蒼山北雲如障遠遊可樂須早還帝里親闡兩相望

裕州行

今年春夏雨不絕黃河以南漸殺麥裕州城中十萬家自經寇盜惟黃沙名商大賈歲不集新絲舊穀嗟何及郝侯五馬天上來褰帷露冕開風霾教農服田賈服賈只有牛馬無豺虎

石川子歌

石川之水東流入東海濤雷雪幾盪嚙白石爛爛色不改泰山嵒峩青石室樓閣窈窕雲霧密懸峰牖牖瞰海底紅輪倒影扶桑日波上三山渺安在海靈冥冥現百怪蛟螭九首盤為梁神仙萬古長相待石川子七年葺茅卧烟島餐藜被褐身懷寶海東隱淪見面難地北潛夫著書早自從召起綰銀章常夢山中把瑤草白雨青蘿晝自垂沙風赤葉秋空掃京華相遇謫【一作識】仙才笑解金龜沽綠醅花邊昔放雙鳧去雲裏今騎一鶴來蔣琬元知非百里李渤終為諫官起冥鴻逝鵠須爾期天路雲衢自茲始君不見魯門海鳥本避災國人祀之反求福雖有鍾鼓羅玉饌驚鳴駭顧安能食男兒固要為龍蛇胡為屈身終日隨塵沙

杏林曲

君不見蕭御醫何年種杏成杏林霞蒸日爛開芳甸門庭垂實虎晝守飛花九陌人人羨菊泉橘井俱仙靈豈如萬樹春風散今皇御醫皆不賤麒麟緋袍常引見奉詔時翻本草經承恩數錫仙桃宴君今一身官未尊白頭抱藝趨金門輕財重義世罕比起死回生不自論林中有草金光映服食可以延壽命蕭君蕭君進此藥令我皇帝萬歲無疾病

周儀賓朝天歌

周君來從大梁發搖鞭却指秦樓月燕山臘盡春未生可憐裘馬衝霜雪憶昨雲霄謁帝關春卿引見紫宸班天門九重羅虎豹一月不得朝龍顏館甥帝室恩數少尚女王家禮非小中山更傳聞樂對陳王亦進通親表伊昔梁王全盛時車騎從官皆漢儀遣使常聞八珍送入朝數賜飛龍騎百餘年間事勢殊諸侯出或乘驢車朱門賓從想冠劍白頭王孫行路衢君歸為我一問訊梁園賦客今何如

送五清先生赴浙江提學歌

天台文宿衝紫霄先生奉勅馳星輶越山桃李花萬樹春色早渡錢塘潮憶昨先生遭斥逐漂泊湖湘望巴蜀九江鴻雁春冥冥七澤龍蛇晝盤曲洞庭天高急霜霰冰河雪岸開燕甸北來驄馬一日聞傾都走識先生面十年卜築楚村墟萬里今瞻漢宮殿當朝門生貴不少先皇學士人猶見金門誰留供奉班銀魚舊錫恩榮宴長安春回獨回首翠烟漸入龍池柳薊門禹穴自此分送錢先生百壺酒丈夫轆軻心不疑賢聖流離古來有已看身作指南車况復名高懸北斗隋珠和璧世珍重眼前點毀終難動聖人不久奏雲門海內近亦求梁棟琴瑟須聆清廟音豫章且待明堂用我聞衡嶽與天參七十二峰江漢南不然從此可棲息無使天柱石鼓空嶢嶢

贈范君

桂陽之山石巉巖四時雲氣流杉松江開秀色蟠三楚天削芙蓉羅七峰翩翩烟霧下鳳鸞往往霹靂隨蛟龍鍾奇產異理亦有黃金丹沙間瓊玖何況人傑非地靈碩士名儒映先後君山燕泉各一時晚逢范君亦其偶范君古貌更好古問之君山乃其祖學海遙聞前輩風辭場獨覺良工苦君為進士宰江縣頗厭簿書耽筆硯神龍未應困泥滓驂騑會自迫風電君山十年絕相見見君如見君山面燕京四月花滿甸邂逅不得同遊宴花間送爾雙鳬翔廬山高高橫玉梁雲停雁過一回首月明琴靜誰舉觴我自辭家來帝鄉宿賓舊友稀登堂悵望南邦思桂陽感今道故增悲傷

相逢行贈孫從一

長安風吹萬楊柳與君走馬相逢久昨朝邂逅尊酒間二十年來一回首我官十年前君官十

年後眼底相看已壯齡世間萬事真翻手憶初少小來東曹君家兄弟同遊遨尚書庭前兩玉樹白日燦爛秋風高爾時見君氣已豪花顏雲髮青錦袍石麟在天動鱗甲赤鳳排雲生羽毛只今骨格殊恒調傾都見者嗟英妙恨不置之玉堂賓誰令久待金門詔永嘉山水稱絕奇且與謝客同襟期花裏開簾仙吏出松間著屐山人隨尚書風義古無比如君更是尚書子尚書東山閒白雲高卧不為蒼生起漢庭我亦東方生悵望名山無限情海雲浩歌起春色送爾萬里東南行

李大夫行

君不見大梁李進士年未三十官大夫金鍾翠釜識國器汗血飛黃看過都昨來走馬長安道一日聲名盡傾倒墨卿學士競迎致搖筆登壇為揮掃盧前王後不足論曹劉沈謝升堂早我方避世金門前君獨時時問草玄金聲一擲天台賦鳳沼常留春草篇憶年二十當弱冠結交四海皆豪彥文章天上借吹噓杯酒人中迴顧盼十年流落失邊李詞場寂寞希篇翰自從去歲得李薛令我唱嘆增顏色對坐相看兩鳳毛破圍實藉千軍力安陽崔史文絕倫意氣頗與二子親蘇臺徐卿愛才者曲巷往往停車輪斯文在天未墜地我輩努力追前人波頽瀾倒挽一髮鯨翻鼉擲爭嶙峋薛生歸釣黃河岸君亦遙維沔川纜霄漢終還五馬車江湖暫解雙龍劍古來丈夫或未偶畏途轆轤無不有李廣羞過灞上亭賈生愁醉長沙酒倘遇馮唐老見君一言更薦雲中守

海山謠壽李宗伯

一鶴東北飛徘徊若返顧仙人乘之海外來衣裳窈窕流雲霧碧海三山列仙囿貝宮嵯峨羅萬牖上臨紫極躡三台下見瑤京開北斗手發玉緘龍虎文再拜遠為尚書壽尚書巖巖霍岳姿身長八尺揚脩眉夜懸赤舄星辰側晝入銀臺獻納司先皇舊臣盡雲卧爾時出入名聲播二十餘年列九卿近日新銜參八座海內清心祗獨知當朝苦節誰人過海門波濤春吐吞中有桃樹盤石根千年柯幹撐日月萬里枝葉垂崑崙觀圖願君壽與比長為梁棟留乾坤

河嵩篇壽張母

梁王古城河水頭北堂坐對嵩山邱雲間二室三花樹天上崑崙九曲流絳霄寶婺光射地星宿潛通河嶽氣緘書爛熳歌白雲長安遠附青鸞使

古愚翁挽詞

古龍啾啾啼劒井井底秋泉七星冷漪蘭堂上瑟不鳴悽調空懷金石聲劒亦不復得瑟亦不復聞悠悠何處尋封君何處尋封君林壑幽魂風雨黑錫山崔嵬暮峰影吳江慘澹秋波色江之南山之北松梧幾樹封君宅來往徘徊嘆行客

哭幼女行

二十生男不解愛頗厭世間兒子態年來抱女心甚憐却悔從前空慷慨女生一歲眉目揚笑
指兄姊羅成行鏡裏嬌啼映牕牖床前學步牽衣裳春風吹魂魄不住來從何來去何去錦襖
曾占夢月時玉錢又哭埋香處乾坤得失安有憑昨日樂極今哀生常怪他人不快意乃知我
輩真鍾情皇天能生亦能死造物弄人每如此雲散雲凝亦偶然花開花謝緣何事婦人性癡
還過傷奔走叫號如病狂作詩示妻兼自解轉見人間父母腸

馮都督歌

都督猛氣世不多一日百戰千里過賊頭纍纍十馬馱東至滄海南黃河宋門西平傳凱歌洛
水轉鬪風揚波敵營晝雨淋滂沱面貫雙箭猶揮戈君不見諸將歸來金滿室生封萬戶食千
邑都督河頭死為伯

三山春宴圖歌

自有三山鎮京口形勢跨絕東南山江吞海吐互變見參天峙地何巘岼憑風倒影萬樓閣動
搖縹緲虛無間色開島上金銀闕氣接天中龍虎關我從唐翁畫圖見大夫指點三山宴仙人
驂鸞倏來往烟鬟霧珮流雲霞江桃千春一放花海桑亘古終難變開圖為寫長生詞却訝丹
青山水奇白浪閃灼金芙蓉青天靜拭青琉璃蓬萊下用六鼇載緱嶺遙將雙鳳騎地靈生人
本非偶禱尼降嶽理亦有大夫家住三山口綵衣歸來奉翁母願言壽比三山久

王都諫畫鷹歌

蔣生畫鷹筆勢何 藏塞林海嶂產真骨歛爾飛立都諫之高堂千年古色動崖壑一匹素練
開風霜都諫常稱蔣生筆此鷹神駿果無匹乍見遙驚俊思生細觀轉覺奇姿出人間鷺鳥各
異種紛紛搏擊相矜寵飽颺饑附更誰憑掣臂翻鞬空自勇此鷹不逐羣雁飛亦似都諫獨立
霄漢當天闔羽毛森然振赤日意氣矯欲排翔雲君不見郊原白日荆棘簇射獵無人敢馳突
樹裏鴟鵂尚九霄草中狐兔仍三窟爾鷹爾鷹安得一起乘高秋惡鳥不鳴獸辟易再使郊原
麟鳳遊

題袁惟武鷹熊圖

林良畫筆真絕倫蒼鷹玄熊俱有神白頭翁鳥更相共毛羽遙看欲飛動空山古林霜色高秋
天骨勢何其豪猛氣應知萬鳥避威風頓使羣狸號畫史當年元有意袁君意氣還相似執節
寧辭皓首心承家況是青雲器圖龍寫鳳皆可羞此幅未許千金酬世間玩物不足貴要見英
雄到白頭

卷十四

赤壁圖

周郎舳艫大江半曹氏旌旗眼中暗當時萬馬下中原江水千年餘斷岸黃州逐客玉堂仙停舟到此悲秋天龍爭虎鬪慨往事酌月酬風懷昔賢古人今人皆已矣吁嗟丹青乃誰子赤壁之山只如此

劉武選百鳥圖

鳴呼鳳凰不可見人間百鳥空啁啾西飛鷓鴣雀亦五色滿眼誰別臯鸞儔劉侯此圖愛者衆畫手莫識元與宋粉繪剝落絹素新萬羽千毛尚飛動侯言此畫先人傳珍藏未肯充南貢十襲翻令錦繡輕百年轉見丹青重頃來數相見手攜登我堂開圖見百鳥從此雙鳳凰鸛黃烏黑隱可辨行鳬立鷺遙相望延頸戢翼各拱向宛如萬國臣妾朝天王君不見蜀道阻絕岐山已頽瀟湘無人衡岳崔嵬竹實未結桐花不開鷓鴣怨杜鵑哀鳳兮鳳兮何時來

畫竹

殷君示我林垵竹臨風寫雨奪天巧尺縑蒼筤只兩根氣勢已覺千林少蚪蟠鳳起倏有神出雲入霧何縹緲聞君魯門西草堂萬竿白日森烟霜怪道君身瘦如竹只對此君不食肉

雷黃門凱旋圖歌

漢家賊盜臨京都西衝河塞東海隅虎豹奔突豺狼呼天子九重怒按劔將軍五道催飛符黃門鐵鞚按營壘監視將軍奉天子征者不憂居者喜曉戰遙隨金鼓前晝行獨擁旌旗裏烟沙忽傳畿甸清黃門奏捷旋神京將軍歸來天子迎冊書十萬納御府勲級三千羅紫庭封侯拜將珥貂列白金緋衣照雲月黃門功多不自說受爵元看陸機小却賞誰知魯連潔高堂白日披圖新戎衣慘澹猶風塵坐令慷慨悲今辰書生從此識汗馬丈夫常憶畫麒麟

呂黃門畫竹歌

黃門持此竹云是溫徽筆初聞一葉掃風雨迴出千竿貫霜日層沙曲澗開烟湍高天雲影樓榭寒黃門峻節與之比手排閭闔呈琅玕琅玕摧折鳳不食咆哮虎豹天門黑鴟鳴鳩啼百草死誰看青青滿林色君收此幅今西行雷電隨入蒲州城龍盤嶰谷山中石更待伶倫截鳳笙

彭中丞四民圖歌

漁舟暝入桃花潯春山如聞樵採音高原犁鉏破烟雨書閣窈窕穿松林中丞雅愛山水障清

晨自掛高堂上綠樹逶迤轉衆流白雲合沓開層嶂萬里寧論戰伐功百年宛見升平象憶昨
寇盜日橫行中原白骨哀蒼生攜男抱女路斷絕痛哭不見天邊城漁奔樵竄學士徙縱有隴
畝無人耕至尊九重憂旰食命公殺賊賊始平近郊無復戎馬迹比屋仍傳雞犬聲明公壯年
心許國何況此身際日月二載驅馳掃漠南一時談笑清河北出關三分大將旗來朝獨擁諸
軍節樂土重開日光普天不動黃塵色即今西戎忽復驕朝廷親遣霍嫖姚已聞土魯還金
印不見中丞下赤霄形像雲臺猶未畫姓名麟閣早須標開圖更賦出車什四海甲兵從此銷

桃源圖歌

昔我遊武陵坐石窺花源岸坼丹洞閤風迴綠蘿翻崩崖奔古月沓嶂響哀猿行車一以過始
知人境誼真陽仙令欲南往手持新畫來相訪武陵山水久不覩今晨置我高堂上巖穴如聞
雞犬聲村墟但見桑麻長髣髴潭水濱點綴桃花春山川似晉代衣服猶秦人回首茫然一烟
霧尋源誰復知真處投簪福地終有期畫中先認桃花樹

吳偉江山圖歌

吳偉老死不可見人間畫史空嗟羨吾觀此卷江山圖飄然意象臨虛無想彼濡毫拂絹素酒
酣落筆神骨露萬里青天動海岳空堂白日流雲霧洲傾岸側波嶺銜島嶼倒影翻源潭江邊
萬舸一時發中流颼颼開風帆崩濤湧浪勢難久漁子舟人各回首去雁遙知七澤中落花誤
認桃源口烟峯蒼茫貌二叟面髮衣冠頗龔醜石林沙草恣點染舒卷滄洲在吾手憶昨弘治
間偉藝實絕倫供奉曾逢萬乘主招邀數過諸侯門京師豪貴競迎致失意往往遭呵噉由來
能事負性氣轆軻貧賤終其身嗚呼吳生豈復作身後丹青轉零落殘山剩水片紙貴百金購
之不一得此卷流傳天地間我即見汝真顏色

張季升望雲圖歌

黃門身在青雲上眼中白雲日南望白雲飛入楚山裏封君之堂應在此俞卿善畫更能賦畫
間青瑣開縑素晴窗落筆白雲生寫出黃門萬里情

邊人獵圖歌

邊沙蕭蕭天北風高林盡屯鞍馬雄羌兒裝束身手健真與此圖形貌同冬寒獵傍長城窟城
下平原日將沒呼鷹放犬無不為數騎彎弓競馳突月高琵琶海西城拂廬雪乾毼氍毹輕金
鍾酒亦易醉玉腕胡騶驕不行白髮老兵黃戰裙抽筋仰視天山雲衆中若認射鵰手漢家誰
是李將軍

畫馬行

畫馬如畫龍縱橫變化當無窮吾觀月山子落筆窺神工曾向天閑貌十馬十馬意態無一同

此馬傳來幾百年古絹猶開沙漠風樹裏河流新過雨簇簇草芽寒刺水圉人雙牽臨水邊草色離離亂雲綺令人疑到渥洼傍波底風雷鬪龍子細看不是白鼻騮恐是當朝獅子花紫燕織離各惆悵其餘駑劣何足誇憶昔愛馬不惜千金貨君王勤政樓頭坐奚奴黃衫雙繡靴廐中騎出樓前過紅帕初籠汗血香玉鞭輕拂桃花破吁嗟玩物竟何益遺跡徒使丹青播只今烽火西北來沙場未聞千里才千里才固有時回頭為問御者誰君看赤驥與騏驎挽車太行嶺心期田子方踟躕駕轅頃霜凋苜蓿漢郊冷骨折秋風自嘶影君不見古人養馬如養士一飽能酬千里志今人養馬如養豚廐下常堆蒺藜刺古之良馬何代無可笑今人空按圖

畫鶴篇

昔聞少保寫青田古墨千年人不傳郎君此幅何時得蕭颺秋堂掃烟色雪翎風翼如有神萬里出海誰能馴我初見此鳥重是仙人禽朝飲玉河湄暮宿玄圃林回首寒江鳬與雁日晚哀鳴羨霄漢

赤壁圖歌

老瞞橫槩江之皋眼中吳越一秋毫吳人穀弩乘江左江頭鳴笳畫舉火旌旗飄揚北風前舳艫化作江中烟英雄一去音塵滅斷水殘山弔詞客白雪堂寒草烟暮黃泥坂下臨皋路酒酣喚客吹玉簫江風山月不待招昔時霸業那足數鶴夢悠悠眇千古回首東坡百世人圖畫蒼茫空有神

畫山水

蜀溪繭紙明如練并州剪刀碧雲斷泥金作繪誰所為華堂粉壁光凌亂枳花竹葉春江曲江頭無人水空綠逶迤石逕林中出草碧沙明淨江日欲覓秦人武陵下不見溪邊種桃者高樓窈窕鎖烟霧只疑行盡瀟湘路瀟湘却憶舊時遊紙上烟波生暮愁

畫菊歌

楊郎畫菊只三本千花萬草無顏色夏卿墨竹差可比陶生桂樹何須得徐君向我誇所有閣中攜此更攜酒翠幔披雲出院遲金杯映日凭闌久深黃穠紫雜烟皋想見五色臨揮毫叢篁瑣碎白晝靜錦石爛漫霜天高楚江茅堂若在眼鳳闥彤闥對秋晚白葛飄零處士稀朱絃寂寞佳人遠寒香晚節真可憐惜哉楊郎不在前開窗為我拂絹素落筆點綴黃金錢徐君徐君珍重此君不見天寒歲暮百草死綺羅無地看桃李

題文與可畫竹上有東坡山谷題識

客從南方來見予手持錦軸長丈餘云是與可之畫蘇黃書中堂展玩思超忽四百年來真故物敗素飄零色已改古墨慘澹神猶發文生此竹世希有一枝不異雙瓊玖冥冥烟幹動石壁

瑟瑟風葉臨窻牖筆下何須掃萬竿
曾中已自橫千畝眉山長公元擅場
豫章太史誰可當片言相推四海重
隻字尚使千年藏客從何處得此幅
令我嗟嘆久憐惜蘇黃不作與可死
人間書畫無真跡勸君寶此勿輕擲

題黃車駕畫竹

畫竹忌屈不忌直息齋由來有筆力
今之畫圖幾百年人間尚自留真墨
空堂畫挂風雨寒明滅纖霧生微瀾
細觀見竹不見畫何時石上削此三
琅玕八閩高士黃司馬平生好文兼
愛畫碧草停珂夏省中白雲捲幔晴
窻下每逢賓客出評品遂使破素增
高價開圖似惜孤鸞叢胡為寫置荆
棘中君不見洞庭之上瀟湘岸翠篠
脩篁沙草亂鳳凰不棲鷓鴣怨

吳偉飛泉畫圖歌

長安獨過田子舍留我一玩飛泉畫
絕壁如聞風雨來晴天安得蛟龍掛
吳生跌宕得畫理潦草落筆皆可喜
飛泉却出沓嶂間山即真山水真水
客堂六月生畫寒耳中髣髴高江灘
源潭窈窕不可測波浪洶湧多奇觀
泉邊二老顏色異偶坐似是莊與惠
萬里誰論到海心百年詎識臨淵意
偉哉田子今儒宗文標南指匡廬峰
不須對此更惆悵會觀瀑布青天上
杉風松日隔縹緲雲瀧雪瀨何雄壯
我常夢往神空向豈無吳生好手筆
為我寫寄廬山障

畫魚

大魚昂藏若人立衝波跋浪風江急
傍觀二鯉各有神倏忽波濤隨出入
中堂髣髴動杳冥坐久始識為丹青
青天萬里拂絹素筆力咫尺開滄溟
禹門天池雲霧裏白晝雷霆行地底
何人有力移置此酒酣相視一改容
只愁化作三蛟龍

題大司馬王晉溪先生十牛圖

君不見將軍臺閣龍圖張何人畫牛
司馬堂十牛戢角垂其耳掛之中堂
見者喜風林烟草恣牧放水涉沙眠
無觸舐黃犍黑牯觔肉真司馬堂中
安用此豈知此物公所珍展畫似對
桃林春高亭青松拂赤日南山白日
消黃塵攻駒不羨三千牝考牧還歌
九十惇尚書況登本兵部天營十二
屯貔虎南征北伐運籌策破敵擒戎
在樽俎已看神武藉經綸要使蒼生
有環堵蒼生十年望蘇息海內荒城久
荆棘犁鋤未慰三農心輪輓空嗟萬
夫力我知明公分主憂坐清寇盜安
王侯沙場之地皆田疇盡却戰馬歸
耕牛君不見中堂此圖日張掛丹青
照耀麒麟畫

點兵行

先皇簡練百萬兵十二連營鎮京觀
團營十萬更精猛嗚呼耗減今無半
昨傳寇入白楊城有勅點選營中兵
軍中壯丁百不一部遣老小從征行
自從御馬還內廄私家馬肥官馬瘦
富豪輸錢脫籍伍貧者驅之充介冑
京師土木歲未已一身百役無不受
禁垣西開鎮國府內營畫

夜羅金鼓四家驍健三千人出入扈從圍龍虎邊頭城塹誰營屯遂使狼烽暗北門天清野曠
恣剽掠百里之內烟塵昏肉食者謀無遠慮倉皇調發紆皇顧即今宣府大失利殺將覆軍不
知數遼東兵馬久已疲朶顏反覆非前時又聞迤北外連結朝廷坐失東藩籬往時京邊土苦
樂今頓異且如私門卒食糧日高坐此兵昨一出見者淚交墮從令荷戈趨戰場身上無衣腹
饑餓君不見府中搥牛宰羊猪穿域蹋鞠行吹竽高馬肥肉留京都可憐此兵擊匈奴

遊獵篇

周王八駿行萬里朝遊崑崙暮滄海驅霆策電徧天地虎驟龍馳倏烟靄犇戎造父兩為佐大
人王母遙相待千金白狐來四荒螻蟻下國輕天王君不見秦皇叱咤役九有海東驅石石為
走橋邊孺子如婦人博浪沙中鐵椎吼又不見武皇旌旗日絡繹射蛟潯陽江水赤五陵俠少
夜相遇探丸殺吏還驚辟天門嵯峨城九重虎豹為衛蛟龍宮紫微鈎陳翼帝座至尊祗合安
高崇脫淵之魚出山虎白龍魚服何勞苦沉江距河勢有然萬乘反遭匹夫侮君不見曹家老
爽誠愚蒙平生不識司馬公死生禍福在人手寧能常作富家翁一門流血豈足惜坐使神器
歸奸雄昨夜昌平人夢天龍文赤日繞燕川城中莫辨真天子道上傳看七寶鞭腐儒為郎不
扈從願奏相如諫獵篇

觀吳進士舞劍歌

我來江夏吳郎宅夜觀吳郎舞劍起古匣塵埃鐵生繡玉珥金環為予理燈前照耀雙寶刀蛟
龍盤挈雷怒號仰瞻南斗有紫氣却顧東海無波濤吳郎別我適南國萬里開樽動顏色我亦
將之五岳遊須爾仗劍芟魑蜮不然持此擊名王況今關塞風塵黃酒酣自覺神益揚左揮右
霍秋月光吳郎蛇矛更精突墻頭角弓力十斛平生豪俠真可憐耳熱白眼看青天嗟哉此宅
不足展君舞室卑地窄難迴旋

柳絮歌

長安三月百花殘滿城飛絮何漫漫千門萬戶東風起陌上河邊春色闌美人高樓鎖深院白
花濛濛落如霰晴窗窈窕朝日遲亂入簾櫳趁雙燕遊絲相牽時裊裊委地飄廊不須掃君不
見江頭綠葉吹香綿隨波化作浮萍草

明月篇【并序】

僕讀杜子七言詩歌愛其陳事切實布辭沉著鄙心竊效之以為長篇聖於子美矣既而讀漢
魏以來歌詩及唐初四子者之所為而反復之則知漢魏固承三百篇之後流風猶可徵焉而
四子者雖工富麗去古遠甚至其音節往往可歌乃知子美辭固沉著而調失流轉雖成一家
語實則詩歌之變體也夫詩本性情之發者也其切而易見者莫如夫婦之間是以三百篇首
乎雝鳩六義首乎風而漢魏作者義關君臣朋友辭必托諸夫婦以宣鬱而達情焉其旨遠矣
由是觀之子美之詩博涉世故出於夫婦者常少致兼雅頌而風人之義或缺此其調反在四

子之下與暇日為此篇意調若髣髴四子而才質猥弱思致庸陋故摘詞蕪索無復統飭姑錄之以俟審聲者裁割焉

長安月離離出海嶠遙見層城隱半輪漸看阿閣銜初照潏潏黃金波團圓白玉盤青天流影披紅蘂白露含輝汎紫蘭紫蘭紅蘂西風起九衢夾道秋如水錦幌高褰香霧濃瑣闥斜映輕霞舉霧沉霞落天宇開萬戶千門月明裏月明皎皎陌東西栢寢峩峩望不迷侯家臺榭光先滿戚里笙歌影乍低濯濯芙蓉生玉沼娟娟楊柳覆金堤鳳凰樓上吹簫女蟋蟀堂中織錦妻別有深宮閉深院年年歲歲愁相見金屋螢流長信階綺櫳燕入昭陽殿趙女通宵侍御牀班姬此夕悲團扇秋來明月照金徽榆黃沙白露逶迤征夫塞上憐行影少婦窻前想畫眉上林鴻雁書中恨北地關山笛裏悲書中笛裏空相憶幾見盈虧淚沾臆紅閨貌減落春華玉門腸斷逢秋色春華秋色遞如流東家怨女上粧樓流蘇帳捲初安鏡翡翠簾開自上鉤河邊織女期七夕天上嫦娥奈九秋七夕風濤還可渡九秋霜露迴生愁九秋七夕須臾易盛年一去真堪惜可憐揚彩入羅幃可憐流素凝瑤席未作當鑪賣酒人難邀隔座援琴客客心對此嘆蹉跎烏鵲南飛可奈何江頭商婦移船待湖上佳人挾瑟歌此時憑闌垂玉箸此時滅燭歛青蛾玉箸青蛾苦緘怨緘怨含情不能吐麗色春妍桃李蹊遲輝晚媚菖蒲浦與君相思在二八與君相期在三五空持夜被貼鴛鴦空持暖玉擎鸚鵡青衫泣掩琵琶絃銀屏忍對箜篌語箜篌再彈月已微穿廊入闥靄斜輝歸心日遠大刀折極目天涯破鏡飛

邯鄲行

邯鄲道上車馬多行人夜火渡漳河邯鄲女兒年十五能彈琵琶善歌舞青燈朱戶夜當壚壚頭酒熟喚客沽玉壺青絲為君繫不妨醉向邯鄲途君不見邯鄲市昔日繁華安可擬鳴鸞佩玉青雲間鬪雞走馬紅塵裏平原門前客如雲千載淒涼竟何是黃金白璧成飛灰歌樓舞榭空流水傷心萬事俱可嗟草長叢臺白日斜廢苑當時在何處舊宮今日作誰家古來富貴俱寂寞有酒樽前胡不樂

玄明宮行

君不見玄明宮中滿荆棘昔日富貴今寂寞祠園復為中貴取遺構空傳孽臣作雄模壯麗凌朝廷遠勢連袤跨城郭憶昨己巳年來事秉權自倚薰天勢朝求天子苑暮奪功臣第江艘海舶送花石戚里侯門擁金幣千人力盡萬牛死土木功成悲此地碧水穿池象溟渤黃金作宮開日月虹蜺屈曲垂三梁蛟龍盤挈抱雙闕城中甲第更崔嵬親戚弟兄皆閹閹撼里歌鐘賓客遊排門冠劍公卿謁生前千門與萬戶死時不得一邱土石家遊魂泣金谷董相然臍嘆鄴塢宮前守衛無呵呼真人道士三四徒石戶蒼苔生鐵鎖玉階碧草搖金鋪星宮晝開見行鼠日殿夜禱聞啼狐遊客潛窺翠羽帳市子屢竊金香鑪桑田須臾變滄海桃樹不復栽玄都我朝中官誰最貴前有王振後曹氏正統以前不得聞成化之間未有此明聖雖能斷誅罰作新未見持綱紀天下衣冠難即振中原寇盜時復起古來禍亂非偶然國有威靈豈常恃玄明之宮今已矣京師土木何時止南海猶催花石綱西山又起金銀寺君不見金書追奪鐵券革長安日日迎護勅

苦熱行簡問陶良伯

六月二十火雲發京師毒熱勝吳下清晨衣冠不敢出對食欲餐汗滿把閉門袒跣真發狂
隱几寤寐何由假風雲昨日忽入城疾雷破牆雨破瓦此地樓臺更鬱蒸西山殿閣空瀟灑
姑蘇才人玉堂客鄰近不得同杯斝因君欲訪姑蘇臺臺下清江千尺瀉上有萬竿修竹林
干雲蔽日森炎夏君不見九衢亭午日如赭鳥飛投林獸奔野紅塵騎馬何為者

修竹篇

君不見真翁堂下竹貫日干雲千尺高亭亭萬木避霜色颼颼空巖迴翠濤平生直節本無偶
手栽琅玕種瓊玖風月何曾忘此君松梅况自稱三友東曹郎君翁所奇節概更與翁名齊神
龍昔向滄波化彩鳳今從玉樹棲高堂茲辰開壽籙却洗金盤對春竹霓旌晝下仙人車雲管
宵停羸女曲翁家舊住上林西托根自近蓬萊池雪崖氷柱映樓閣雨露常沾萬歲枝

七夕詞

雙星渡河月西沒悲參怨商愁夜獨宵闌箕斗自低昂心憐情恨看七襄人生失意無賤貴寒
機織婦鴛鴦思金屏玉瑟宮娥淚

同崔呂孫三內翰集徐子瞻辰樓

秋日徐君北樓上北樓峇崑連北斗窻牖臨觀日下花闌干坐拂天中柳南州孺子美如玉北
門詞客同杯酒咫尺金門接玉堂碧霄共立空翹首

晚雨君卿招不赴

騎馬出門還復入六月陰晴不可卜簷前星出乍有無城上雨來時斷續炎天留客夜苦短燕
地近秋暑偏酷何人同對寺中花憶爾獨伴啼烏宿

觀石鼓歌

我來太學謁孔廟下觀戟門石鼓陳之罍詛楚幾埋沒此石照耀垂千春苔昏蘚澁讀難下蟲
彫鳥剝細不分古畫詰曲蛟龍隱石氣慘淡烟霧氛周王功勲史籀筆數石散落岐陽濱中興
氣象豈復覩大篆意格誰曾聞先秦文字稍近古兩漢摹搨多失真六朝以來尚靡麗鍾王往
往稱通神唐韓宋軾遞歌嘆長篇險韻何悲辛大觀之間入汴國君王好藝崇斯文高駝巨艦
遠載致金填玉嵌傳相珍靖康乘輿忽播蕩保和玩物隨烟塵神驅鬼守散復聚至寶豈得空
沉淪文皇北來定燕鼎不置太廟留成均博士無煩上書請諸生頗得親講詢虛廊畫壁安置
穩大厦長簷覆蓋新不隨鍾鼎怨磨滅已與琬琰爭嶙峋平生博覽愛古跡世上墨本徒紛紜
此雖殘缺歲已久尚覺隻字輕千緡璧池日月動華袞奎閣星斗羅貞珉嗚呼孔廟在萬世此

石與廟長無涇

同李進士觀銅雀硯歌

君不見鄴中魏帝無宮殿千秋遺瓦磨為硯墨客騷人空嘆嗟朱萐綺構誰曾見李君好古精鑒別冬天拂拭開烟雪虛堂叩之哀玉音泥沙洗出黃金屑廣州紫石鸚鵡眼歙山龍尾何希罕濡藻光迴星漢垂蟠花背刻龜螭斷共憶高臺羅綺春翠眉艷骨飛黃塵提攜故物悲年代感慨新章泣鬼神君不見臨漳此物難復覩河沉岸坼求者苦縣人相傳為贗古嗚呼日掘西陵土

太白山歌【秦集】

我聞太白橫西域百里蒼蒼見寒色靈源萬古誰窮探雷雨窈冥巖洞黑中峰迢迢直上天瑤宮玉殿開雲烟千盤萬折不到頂石壁鐵鎖空高懸陰崖皚皚積古雪絕壑長松幾摧折鳥道斜穿劒閣雲龍潭倒映峨嵋月高僧出世人不知飛仙凌空笙鶴隨洞天福地在咫尺悵望塵海令心悲

子昂畫馬歌

學士宋王孫畫馬皆龍姿曾寫飛黃出天廄尚留雲影落瑤池池頭馬官錦靴袴緩鞚長牽時拂顧萬里精神開絹素百年毛鬣生風霧吁嗟內乘無人識想見奔騰過都國翠仗朱軒數往來金羈玉勒增顏色只今天子罷南征又聞東巡遼海城安得四馬忽然生登臺一顧千金輕天上常隨八駿行

卷十五

避雨山舍望見蒲圻縣【以下使集】

向晚蒲圻道遙聞雞犬喧斜光入深巷疎雨過閑門縣市渾依水人烟只類村蕭條燈火夕沽酒共誰論

景港渡

秋臨景港渡澄波生綠苔舟移遠岸動帆挂好風來斜日畫旂捲中流清吹哀榜人歌未罷前導已相催

辰溪縣

早發辰溪渡清川喜泛舟山城欹粉堞江驛映朱樓雨驟沙頽岸天寒水露洲蠻音聞漸異迢遞動鄉愁

沅水驛四首

小驛孤城外陰森草樹幽晚涼憑水榭秋雨坐江樓絕域鴻難到空山客獨愁夜深歸渡少漁火照汀舟

二

長劍向燈看休歌行路難巖窗懸石 江檻殺風湍城古蒹葭夕堂空蟋蟀寒幾回青瑣闥朝罷想鳴鸞

三

去國日以遠登樓思故鄉雨來江氣白日出市烟黃島嶼秋逾靜軒窗晚更涼憑高凝竚久槐影下微陽

四

江上西風起蕭條暮雨頻山樓連堞壘郡路入荆榛懷古過沅水悲秋弔楚臣芷香堪採掇思寄日邊人

沅州道中四首

山行多雅興十里幾人家林葉垂朱實蹊藤落紫花緣崖防轉石傍岸畏頽沙不見前溪堡遙聞奏暮笳

二

歲月驚長道風塵惜舊綈鈎雲盤曲磴沿月遡迴溪南國疲征斂西戎厭鼓鼙山深正愁絕落日鷓鴣啼

三

共說關門險峇嶺不可攀山峰藏曲折澗道瀉潺湲絕壁人愁下長林鳥倦還官程元有限行旅敢辭艱

四

向夕人烟近肩輿歷翠微驛花明去節山霧上征衣果熟收梨棗蔬香煮蕨薇開樽對佳客且喜吏人稀

平溪

徙倚平溪館天高秋氣清
水螢光不定山籟響難平
夜火雲間戍寒楓江上城
終宵無夢寐高枕聽灘聲

清浪

駐旌清浪衛半日費攀躋
窗迴開千嶂城高控九溪
征徭無楚戶耕種有蠻妻
愁問滇南道迢迢隔嶺西

李參謀府二首

參謀開夕宴邀我坐深更
暇日遊觀少清時號令平
旌旗巡哨堡鼓角啓嚴城
莫笑書生腐樽前解論兵

二

高衙赫宏廠鎮坐撫南蠻
畫戟環千土雕甍插萬山
秋高鼉鼓振風靜虎旗閑
聞道西戎亂將軍莫破顏

鎮遠三首

古郡青山下經過駐使車土官迎詔拜蠻客望城遮疊嶂營孤壘清江繞百家晚來官署裏獨坐詠皇華

二

地僻先搖落空亭長綠莎山川連蜀道市井雜蠻歌旅篋衣裳少秋程風雨多無人相問訊盡日撫寒柯

三

寥落古城池斜光照戍旗關臨苗子砦洞入長官司殊俗終難近蠻音久易知踟躕暮江上又是仲秋時

查城十五夜對月五首

中秋看月色移席近前楹河漢三更沒關山萬里明風烟依獨戍砧杵閉空城此夜高堂上多應念遠征

二

天上何所有團團白玉盤可憐秋半月只是客中看影直朱樓午輪高青嶂寒美人何處共光彩隔雲端

三

驛舍山東下閑吟月出歌婆娑籠夕桂窈窕入雲蘿玉魄中天滿清輝近水多廣寒高幾許臺殿鎖嫦娥

四

小市無兼味鄰家酒亦慳佳期三五夕遠客萬重山霄漢分秋色風塵照旅顏去年當此夜坐對紫薇間

五

我愛秋宵永西林待月斜百年幾圓缺今夜倍光華兄姊俱殊土田廬有舊家金波如客淚獨洒向天涯

安南

崎嶇踰嶺路到郭已昏鍾城險苗難近關高賈不通郊烟秋牧馬崖日暖收蜂民俗殊中域生涯亦頗同

送孫教諭

三年別燕市萬里喜相尋祿少供親膳官清任士林板輿迎白髮芹舍擁青衿莫謂蟠龍久風雲起碧岑

永寧舟中

霜降水還漕舟行不覺勞順風欹浪疾亂石下灘高漁舫依紅蓼人家住白茅鄉園待歸客應已熟香醪

江門

小店江門市孤舟聞暮砧遠沙含細雨缺岸隱疎林旅宿青楓晚人烟翠嶽深漸臨巴蜀道一慰望鄉心

灩澦

霜落夔門樹寒江灩澦孤狂瀾須此障砥柱賴誰扶入峽愁孤客當關用一夫何勞念西域千載固輿圖

峽中

自昔偏安地于今息戰侵江穿巫峽隘山鑿鬼門深濁浪魚龍黑寒天日月陰夜猿啼不盡淒斷故鄉心

旅行

日暮行湘水春深別上都繫舟南斗近倚劍北雲孤骨肉千行淚風塵萬里軀王孫江上草何處采蘼蕪

滹沱河上【以下家集】

長堤枕春郭斷岸入殘暉栖鳥張燈起驚鳧解纜飛古人堪墮淚吾道豈常非未識臨河意中流擊柂歸

渡淮

津口風翻旆春陰鬱未開淮流衝古岸沙店倚長臺鳥向平蕪下人隨返照回未忘舟楫興臨路獨遲徊

贈劉大參

自識文翁化佳聲滿大藩野人看露冕稚子望行軒草色青春細棠陰白晝繁東風應有意先到宛陵原

寄陰舍人

卧病春城暮相思汝水潯紫薇鸞掖遠碧草鳳池深鳴珮他年夢看花此日心故知俱散盡北望一沾巾

雨霽

斷雨懸深壁餘雷振遠空蒼林橫落日碧澗下殘虹萬井波光靜千家樹色同何因共朋好歸詠舞雩風

雨

獨坐浮雲起徘徊夕照孤長風生遠樹細雨入平蕪暗牖飛蟲落高林宿鳥呼昭回曾有倡此日慰田夫

鳴蟬

仲夏鳴蟬集窗臨碧樹陰清心吾愛爾長日自悲吟露葉朝栖靜風林夕響沈偶通觀物理幽意坐來深

送孫太守

五馬朝天日傾城出餞時倪寬行考最何武去留思碧草朱輪動青雲皂蓋移聖朝崇漢吏功業正當期

五月望月食

月食逢中夏山城黯黯陰孤燈今夕淚哀角萬方心霧嶂看初滅【一作滅】風簾望轉沉清光無遠復齋坐及更深

葵

春後羣花盡孤葵且自芳弱莖依井上勁幹拂簷長衛足全生理傾心倚太陽幸因佳客至採掇薦中堂

立秋寄獻吉

山城一葉下水榭已迎秋夜迴商風至天空大火流稍蘇司馬病翻遣宋生愁日暮關河外思君重倚樓

寄樊國賓

不見樊卿久空憐歲月長愛書王逸少癖畫米元章業紹青緇舊名沾玉牒香十年相會地燒燭對秋堂

沱西別業

使君方擁郡別業枕沱湄城倚章華殿山藏大禹祠賭碁憐謝傅看畫憶王維未是懸車日烟雲入夢思

東昌公哀祠【并序】

東昌公奄沒已踰三時痛悼之餘篇什尚缺然其情未可已也於是作哀詞五首

壯志空寥廓中年與世辭露寒青草夢風慘紫荊悲入政光前輩傳經實我師大蘇碑不忝慚繼子由詞

二

岳城淹六紀東郡未經年別駕王祥勝彈棊子賤賢一官猶黑髮萬事已黃泉銘石看遺績淒涼太史篇【太史康德涵也】

三

江海悠悠逝那堪死別情向平婚未畢卓宰宦初成夜雨原花落秋風墓草生九京何日返空復望佳城

四

復魄黃河遠歸程汝路偏素車臨故域華表立新阡室女啼秋夕鄉人弔墓田蕭條風雨候愁絕對床年

五

一自封泉室偏驚節序除白楊悲北郭青草蔓荒墟天地存亡裏江湖涕淚餘寂寥身後事不忍讀遺書

巾元夜月

片月東城上長風度早秋光臨青嶂發影抱碧潭流灝氣沉沙浦餘輝戀水樓何人更吹笛關塞不勝愁

西郭

西郭棲遲地寒山夕景繁雞豚歸故道烏雀下秋園開戶林風入沿坡草露翻香杭夜來熟歲暮足盤餐

穫稻

穫稻妻孥喜中宵尚築場但堪供俯仰那復問倉箱合畝黃雲盛翻匙白雪香更須催釀酒溪上鯉魚長

夢何粹夫

內翰同鄉客新知交更深春從都下別秋向夢中尋圖史留東觀詞章侍上林中宵憶顏色慰我索居心

晚歸自溪上

秋到城西樹緣溪落葉多數家連水竹一逕入烟蘿廢井寒螢聚閒窗暮雀過濯纓聞孺子燈下亦悲歌

客至

蓬門斷來往草徑自荒蕪有客何方至呼兒問濁醪彈棊待風月把酒話江湖更枉新詩贈長吟興不孤

登樓二首

眇眇憑高暮淒淒景物閒秋陰生巨壑雲氣度西山一郡寒烟畔千門落照間此時瞻北極萬里欲飛攀

二

縹緲東樓上長凭興不慳病來踈眺望秋至廢躋攀日落河山暮風迴草樹班夜殘猶未倦坐待月臨關

同沈清溪夜坐二首

細雨侵高樹空堂散鬱蒸詩成揮彩筆話久落青燈鳳字慚嵇叔龍門愧李膺瑶琴多古操數為拂朱繩

二

移席留長坐更深雨漸繁竹寒庭鶴警燈靜壁蛩喧舟楫淹歸計琴書代晤言知君多雅興常過蔣生園

雨夜似清溪二首

院靜聞踈雨林高納遠風秋聲連蟋蟀寒色上梧桐短榻孤燈裏清笳萬井中天涯未歸客此夜憶江東

二

微雨初搖颺風吹灑更長冥冥來石壁颺颺近秋堂螢火流深塹鷓鴣下淺塘吳歛當此夕哀切興難忘

雨後邀馬君卿

寂寂楊雄宅琴書誰與同青山過片雨白日抱殘虹塵榻還堪卧清樽未可空相看城郭暮那忍負秋風

雨中和清溪

濛雨蕭條至悲風日暮多積陰生徑草永夜落庭柯宅愧高人隱門勞長者過白鷗如有意相逐下烟波

清溪草堂【并序】

沈子高吳人也構草堂於清溪之上以為隱居焉今年北游至申來訪予道清溪之勝遂為作詩四首

草閣臨溪上幽期孰與論白沙連曲岸秋水到閒門檻外常垂釣舟中數舉樽風情有如此不異浣花村

二

夜夜聞清瀨朝朝見碧潯百年應有寄終日自長吟宿槳依沙樹開窗散渚禽生涯衆人事不獨愛幽深

三

隱者常稀濶幽居獨羨君汀洲起漁唱籬落傍鷗羣水接吳門樹窻生禹洞雲更傳詩句好還似沈休文

四

太湖湖上地聞占好園池有業堪投老無官可避時渡傳桃葉詠門聽竹枝詞何日山陰棹溪堂見戴逵

懷高鐵溪先生四首

積雨空林畔庭除烟霧昏佳人不我至樽酒向誰論野樹斜連屋秋山遙對門何時孤興發騎馬到荒村

二

吾慕高夔府風流漢長卿新詩裁錦字麗賦擲金聲早謝人間事幽通物外情相違動旬月何日見黃生

三

磊落眞邦彥襟期亦我師右丞元好畫謝傅未忘棊花鳥留新興雲山待妙詞小堂能枉駕一為細論詩

四

僻居臨水次竹樹稍深幽對景非無酒登高亦有樓好風吹永夜片月度清秋不見孤舟至令人憶子猷

八月丁日

孔庭嚴祀典冠冕萃吾鄉
霄漢迴清樂星辰入畫裳
萬年仍俎豆千仞自宮牆
此日斯文地瞻依病未忘

初度

此日逢初度悲懷却自寬
久為京洛客初乞茂陵官
堂上慈顏喜燈前稚子懽
一杯承膝下願得歲相看

夜

地遠柴門靜天高夜氣淒
寒星臨水動夕月向沙低
入室喧蟲語張燈住鳥啼
自然幽意愜不是戀深棲

陰

慘澹長陰合蒼茫四望同
地秋還易雨樹晚故多風
樓閣山寒裏衣裳水氣中
農家務收穫早為豁層空

吾州

遼邈吾州地名從申伯來
通淮一水下入楚萬峰開
舊國無遺廟寒城有廢臺
秋郊獨臨眺懷古意悲哀

北望

北望風塵裏遙思日月邊
山河臨地極樓觀倚星躔
翠羽開諸國金甌至萬年
自從歸病後常夢五雲前

贈張合之秀才二首

張子元奇士攜書過我林
激昂高論氣落遠遊心
一飯山家晚孤燈夜雨深
城邊有岐路送爾獨長吟

二

匹馬何時出還家此日心
卞生懷楚璧郭隗待燕金
雄劒青雲志哀絃白雪吟
功名少年在不必淚沾襟

雷

不見蒼山破虛聞巨壑馳烈聲迴地底餘響落天涯
魍魎何由避蛟龍得自隨中宵沛雲雨威澤正當時

月二首

宛宛秋山月今宵尚未圓光生萬里外影對一樽前
城靜虛弓倚樓高破鏡懸草堂風露下終夜不成眠

二

片月中秋近輝光一歲無天清驚塞鴈夜冷落楓烏
不寐知宵永無言對影孤更深何處沒萬里墮江湖

三關

楚塞三關隘雲峰入望重何年戎馬地空有昔人蹤
積水沉秋堞長烟帶古烽乾坤當失據饕餮任羣兇

九月

九月清霜下中林蕙草寒暮霞多變態秋色不宜看
丘壑容吾拙乾坤敢自安古來俱涕淚況復歲華殘

卷十六

樊秀才園內菊

樊生園內菊相對小塘西露蕊淒淒放風枝裊裊低栽【一作種】依石竹下發【一作開】
與畹蘭齊明日重陽酒殷勤為爾攜

九日同馬君卿任宏器登高四首

歲歲重陽菊開時不在家那知今日酒還對故園花野靜雲依樹天寒鴈聚沙登臨無限意何
處望京華

二

遠地宜登望秋光薄暮濃樓高窺萬井潭迴落千峯花為重陽發人懷百歲逢同遊俱俊彥尊
酒得從容

三

病思逢佳節孤懷憶遠遊河山還似昔烟樹不勝秋故國浮雲去高臺日暮愁牛山元有恨休
訝淚長流

四

向夕楓林爽行吟未擬回明霞積水外落日古城隈鼓角秋深怨風霜歲晚催莫將遲暮意孤
負菊花杯

登釣臺

野濶窮秋出雲寒望未開萬峯遙駐馬殘日更登臺水落龍蛇蟄【一作卧】沙空鴈鷺來孤
懷對搖落吟罷有餘哀

孟冬

孟冬嚴氣至坐見物華微古樹猶秋色寒山半夕暉江湖深欲凍鴻鴈各知歸羸病便深卧從
茲日掩扉

寄孫世其舉人

得意西風裏寶筵聽鹿鳴此生看事業今日重科名錦樹連江路秋花照楚城北來休太晚慰我隔年情

除架

苦葉蕭疎久秋匏亦委沙家人空抱蔓山鳥莫啼花零落親寒事蹉跎感物華衰榮轉相代何必恨生涯

十月

十月蒼山靜孤村帶郭長卜居憐此地高枕復吾鄉野霧沉寒日城陰遲早霜一年看欲暮酒熟共誰將

懷孟望之

消息三秋隔虛瞻鴻鴈羣長安望不極落日起浮雲奉使何時出吟詩誰共聞豈知離索久病思日紛紛

寒

水郭逢寒早城陰慘澹中遠山常霧雨衰柳更天風病骨思狐貉愁顏付酒筩關河待冰雪何處有途窮

殘菊

寒叢後搖落冬至亦蹉跎病葉強相守孤英無奈何園籬空自愛霜霰暮還多幸有餘香在深杯為爾歌

韓席二僉憲見過留飲

野外慚共給臺端枉駕來河魚還自取樽酒為君開落木寒風急孤城暮雨催相逢孟冬節翹首待陽回

晴

冬郊零雨霽烟郭望初分獨樹餘寒照平沙足晚雲風鳶高不下野鶴迴難羣夕坐親杯酒長歌還自聞

雪柬沈馬任三子

黯黯山雲起茅齋傍水涯一冬纔見雪十月已開花霧裊寒城霰風吹野岸沙同遊詞賦客騎馬入誰家

喜望之至以詩迎之

經歲青山下空吟求友詩故人天上至慰我病中思臘近冰霜苦春回草木知小堂終日待枉駕莫教遲

再別清溪子

冬館蕭條別開樽為爾吟岸梅催客鬢江柳送歸心南國浮雲暮孤城積霰陰逢春湖鴈起休滯北來音

得錢水部書

故人俱落魄水部近何如河上三年別天涯十月書烟波愁望裏風雨夢魂餘更枉懷人【一作停雲】作長吟淚滿裾

懷沈子

沈生南國去別我獨淒然落月清江樹歸人何處船十年安陸舍數口太湖田想到鄉園日生涯亦可憐

別望之

相送不得遠臨水一悲歌行雲暮不止遊子意如何楚塞風烟迴燕關雨雪多春還問消息尺素莫蹉跎

洪法寺別錦夫遂伯

古寺垂楊裏樓臺照落暉重來舊遊地却與故人違雲樹千山暗風花三月飛未將湖海淚空灑路傍衣

寄孫世其

世路渺難定相期未有涯昔為燕地客常到楚人家繫馬中堂樹聽鶯上苑花故園看北斗腸斷憶京華

酬葛時秀

罷歸翻自喜舊業有青山積雨稀來客孤雲獨往還良朋枉高倡撫卷一開顏何日還乘興題詩到竹間

懷葉時華

佳人湖上住亭榭迴堪憐手把青荷葉行吟綠水邊客皆蓮社友人是竹林賢欲繫空庭馬聞君高樹蟬

雨夜

雲薄高城上孤亭郡郭西暗中螢火度燈下草蟲啼零落同遊客淒涼舊雨題高歌視雄劍慷慨為誰攜

遊賢隱寺次馬君卿韻

繫馬長松下風烟幾日留天高還薄暮地迴更逢秋孤嶂開僧舍千峯繞佛樓自能來白社不用遠公求

與孫世其晚坐

留客江村暮開尊對浦沙池心上孤月樹杪落殘霞地僻唯宜竹秋高未有花琴書堪晤語隨意宿山家

十四夜

水際浮雲起孤城日暮陰萬山秋葉下獨坐一燈深白露蒹葭落西風蟋蟀吟關山今夜月橫笛有哀音

雨中

一室高原次遙天起夕風雨來汀樹外日沉山霧中鳬鴈秋沙靜鷄豚委巷通白雲望不盡相對意無窮

寄雷長史

不見雷夫子相望歲半餘王門盛賓客仙府足圖書賈傅才誰敵相如病獨居憐君兼吏隱休憶錦江魚

宿胡山人家

騎馬侵晨出看山至日昏鳴鷄千嶂裏高樹一家村白石斜通逕清泉直到門祇疑人世外別自有乾坤

登堅山寺

西峯插天起絕頂寺門開雲裏一僧住山中無客來落花平講席積草徧香臺我欲聞清梵焚香坐不回

寄焦太史蘊德

抱璞聲名舊逢時意氣殊麒麟出天廐騶裏在雲衢世史稱司馬英詞繼董狐遙知東觀裏終日會文儒

寄馬君卿進士

憐君得意日騎馬向春風通籍金門裏分曹畫省東宮袍唐進士陸戟漢郎中辭賦相如妙聲名誰與同

寄阮行人

夫子風流士高懷近若何張騫能奉使阮籍自行歌文字留中嶽樓船渡大河梁都看不遠枉駕幾時過

寄張季升給事

獨立當霄漢清譽在處聞朝趨青瑣闥日侍御鑪薰溫室千年樹蓬萊五色雲同年還愧我天上早離羣

寄孟望之

昔在長安日相看慰別顏君行太行谷予亦下燕關春去無消息秋來書未還可憐骨肉夢常越萬重山

寄戴仲鶚進士

戴生久離別宦況近何如白日閒官舍青雲近帝居明時難自晦直道未應踈問我生涯事山中懶著書

懷李獻吉二首

聞君在羅網古道正難行無使傳消息憑誰問死生東方元太歲李白是長庚才大翻流落安知造物情

二

冠盖京華地斯人獨可哀神龍在泥淖朱鳳日摧頽世路無知己乾坤孰愛才梁園別業在何日見歸來

九日同諸友登賢隱山五首

九日西山上登臨思渺然高城過一鴈疎柳歇繁蟬勝槩仍佳節同游似往年休將竹葉盞空對菊花前

二

古寺來遊日高秋雲物清樓臺萬里目時序百年情野樹斜侵郭河流曲抱城明年當此際誰與共題名

三

野望秋無賴西風城樹凋浮雲滿天地落日更蕭條醉舞隨長劒哀歌逐短簫龍山高興者千載竟難招

四

野寺空崖裏高臺舊國傍山川待我輩風日媚重陽雲嶠秋臨迴松林暮倚長由來宋玉意搖落自悲傷

五

薄暮經行處千巖落照深孤松秀雲壑衆草莽寒林故里登高興平居懷舊吟風前一感慨不異古人心

望京師寄王臧方

北望依南斗長安萬里愁西風入上苑楊柳落金溝雲近蓬萊閣天迴太液流仙郎歸畫省高詠接同遊

九日懷鐵溪

獨憶高夔府何時騎馬來一秋常卧病九日廢登臺寂寞傳杯手淒涼作賦才陶家園內菊風雨為誰開

雨後次孟望之二首

斷雨藏深浦殘雲霽晚空人家亂水外野艇夕陽中風急鳴江鶴天高落塞鴻滄浪浩歌起身世羨漁翁

二

萬里看無際高秋接素氛沙村昏片雨石壁斷孤雲鴻鴈常求侶鳬鷗不離羣寒山有落木風起暮繽紛

霜節

鼓角蒼山畔孤城此歲殘迴風夜不止清霜日以繁未惜瓊樹晚還悲瑤草寒陽春在何日幽谷待鳴鸞

為王子悼亡

玉魄無消息星辰隔紫泉舞鸞沉寶鏡飛鳳落金鈿不待中郎貴空傳上婦賢平生浣沙處流水恨潺湲

送柴先生之霍邱訪朱調元

客裏黃金盡天邊逐歲華寒燈具行李早飯出山家東路蘼蕪滿西風楊柳斜朱君舊相識見爾惜生涯

送孫世其舉人歸華容二首

似爾聰明少吾生望未涯孤城常作客九月始還家暮雨沉關樹寒風落渚花洞庭秋色裏為我弔長沙

二

爾去荊州府孤帆幾日開山過宋玉宅江到楚王臺落鴈衝人起浮雲度水來悲懷兼別緒歲暮若為裁

萬歲節

北望看辰極孤城首重回祥雲九重殿仙露萬年杯鳳輦通宵備龍旗拂曙開侍臣金鑑錄誰有九齡才

任宏器過訪

磊落同鄉友相尋到水涯山中沽白酒籬下覓黃花積水寒天濶連峯夕照斜興來高詠起揮翰滿烟霞

客至

野外逢迎少柴門落葉稠人閑不掃室客到始梳頭且為烹茶坐還因看竹留登臨如有興更上水邊樓

上祖塋

故域西山繞佳城望轉幽松寒迷唳鶴草暖集眠牛不見丘原起空懷霜露愁諸孫時掃謁哀淚灑松楸

上亡兄墓

阡兆還經歲音容不可追幾時門吏散今日路人悲壑有藏舟處林餘挂劒枝哀哀憐小弟難忘鵲鴿詩

訪賈西谷

儒宮入古檜泮水靜塵埃偶到閑官舍能孤遠客杯開門黃葉落展席清風來更喜庭前菊寒花日暮開

西郊秋興十首

立馬西郊地悲風慘澹生白楊落古墓黃葉下孤城流水年年去浮雲日日行滄浪清若許聊可濯吾纓

二

谷口風兼雨茅齋淦淦秋寒烟浮島嶼白水亂汀洲散地耽高卧何時作遠遊近來疎懶甚一月罷登樓

三

野屋清秋暮寒沙易朔風歲年悲老樹岐路感孤蓬醉豈逃名士狂非避世翁尋常門自掩無客到山中

四

舊家瀨水上門向釣臺邊近市來沽酒中流坐放船蒹葭開晚照洲渚接寒天漁父如相識長歌過我前

五

村居元舊業草舍僻臨城久雨蒼苔積閑門掃更生窺人一鳥下見客衆鷄鳴翻怪巢由輩空多世上名

六

蕭條萬峰裏門巷靜無譁積草惟三徑垂楊自一家寒雲抱古木晚日媚殘花歲事看如此能教負物華

七

寂寞高臺畔空令故國存古人不可見遺迹更堪論雲度孤城夕天連積水昏興亡向來事無處問乾坤

八

亭古楓杉落緣溪不柰秋西風怯纖綵細雨戀重裯雙鷺寒窺井孤鴻晚過樓白鷗還有意相逐向吾洲

九

嚴風日以發落葉轉紛紛遠樹斜銜照寒山半入雲步兵常嗜酒水部本能文悵望千秋上斯人亦不群

十

古人歌舞地今日幾豪華世事那能定吾生詎有涯秋蟲不去戶寒鴈各依沙獨少高陽侶時時過酒家

賈長教舍白菊

君家白玉朶不數黃金花
淡淡含秋色亭亭傲歲華
閑雲依檻靜明月傍壇斜
偶坐題詩去寒香為爾誇

雪

一雪今冬早霏霏白滿沙
隨風斜着樹帶雨不成花
曲檻寒仍裊空庭晚更加
城中一萬戶歌舞是誰家

寄贈莊國賓

上館宜才子佳名玉葉光
文章奪雲錦衣服惹天香
下筆驚鸚鵡吹簫跨鳳凰
淮王門下客冠蓋日相望

至日二首

一卧鄉園晚頻看物候新
冰霜寒近臘梅柳暗催春
直道何時泰生涯舊業貧
蕭條一杯酒愁絕對佳辰

二

冉冉天時逼悠悠人事催
坐觀羣物變又見一陽回
遠樹朝暉發孤城凍霧開
長安望不見迴首獨餘哀

長安月

萬里長安月曾看照綺羅
徘徊留舞席宛轉逐遊珂
錦幌披青霧朱樓拂絳河
佳人獨愁思終夕抱雲和

登釣臺四首

歲暮荒臺上孤高望不窮
亂山浮落日遠水抱寒空
野鷺時親客江鴻晚避風
終期謝城市來此伴漁翁

二

出郭冬初暮登臺日已曛
碧潭寒吐月孤嶂晚生雲
名姓嫌人識悲歌欲自聞
沙鷗莫飛去應共爾為羣

三

古人棲隱地今日我重來寂寞千山裏烟波萬古臺
岩寒蒼桂落沙晚白鷗迴慷慨無人測長歌不放杯

四

薄暮登臺罷雲山興不忘門人攜酒至日落更傳觴
一水星河渺孤烟島嶼長不愁歸路晚明月在滄浪

送柴先生二首

迢遞京華路憐君歲暮行一尊淮水上疋馬楚王城
白首家無定黃金藥未成蓬瀛如可涉約爾共逃名

二

季夏辭燕地經冬滯汝湄孤城一相送岐路不勝悲
為客江湖遠求仙歲月遲世途來不易相見更何時

送慈谿劉伯雨之南京尚寶卿

旬隔金陵迴天流銀漢斜江山迴帝宅牛斗上仙槎
拔擢符臺始聲名禮部遐行看好春色留賞舊京花

卷十七

答望之二首

念汝書難達登樓望欲迷天寒一鴈至日暮萬行啼饑饉饒羣盜徵求及寡妻江湖更搖落何處可安棲

二

日落荒山畔孤城更可傷生涯仍寂寞世事轉倉皇百口同饑饉千村盡虎狼知君憐老父南望白雲長

雪中簡賈長教

雲雪孤城暗深杯誰共揮霧中千樹失天上百花飛濕益青氈冷光連素壁輝知君郢中曲高調和人稀

寄周明府

舊業燕京下何方更卜家知君能大隱城市即烟霞商谷多芝草淮山有桂花相招空夢寐岐路滿天涯

贈韓亞卿返湖南二首

斧鉞辭燕闕檐帷駐楚宮使星天漢上卿月洞庭中劉宴經邦計蕭何餉士功歸朝論事業不愧古人風

二

送節初臨夏迴旌已逼年馳驅千里使經濟萬人傳髮變江湖上身歸日月邊淮西困饑饉側望達堯天

得五清先生消息尚客澧州悵然有懷作詩六首

憔悴東都士吾師更可嗟三年為逐客萬里未還家暮阻巴山雪春行楚岸花江湖無路覓流涕望天涯

二

昔遇南來客曾傳北寄聲飄零攜百口留滯傍孤城澤畔騷人興周南太史情天高地仍遠銜
謗竟誰明

三

洞庭西去路消息幾回聞地僻難逢鴈天長祇見雲白蘋悲楚客斑竹怨湘君宋玉哀師意空
傳九辯文

四

夫子先辭國嗟予亦罷官生涯同去住世事各悲懽楚地江湖濶巴山道路難白頭慈母在雨
雪更愁寒

五

跡為羈棲久身因放逐勞五溪淹日月三峽尚波濤夢裏摧雙翼愁邊見二毛清風引歸袂名
共蜀山高

六

儒行荆人識文章澧郡傳夷方仍俎豆客路半舟船太守迎徐稚諸生仰鄭玄獨憐門下士何
日進彭宣

寄杭東卿

海內賓朋隔天邊涕淚遙一書無計達萬里更能招碧樹東南地寒江日夜潮石梁如可度仙
路坐相邀

送羅秀才歸省

汝念高堂母還家秋色深遙知倚閭望應慰斷機心落月清淮朗浮雲楚塞陰西風吹匹馬惆
悵送歸吟

寄張提學伯純

舊屬朝端望俱稱柱下才九霄驄馬出千仞鳳凰來河洛經中嶽星辰動外臺山城有桃李花
向幾時開

聞陸舍人子引罷官兼懷徐舍人德章

惜爾官難達文章本鳳毛投簪歸海岸挂席趁江濤張翰元思鱸任公且釣鰲南逢徐孺子應話舊同袍

喜劉朝信過飲三首

坐惜芳菲晚何人到野中相邀一尊酒來對百花叢翡翠鳴春日遊絲墮碧空誰知豔陽節爛醉與君同

二

西郭棲遲地春風亦可憐落花寒食雨高柳夕陽天岸幘行林側移樽坐水邊啼鶯如有意數傍舞衣前

三

烟樹孤城外風花野水濱羣鷗不避客雙燕亦留人況值清明後酣歌爛熳春相看三月暮過我勿言頻

懷王舍人文熙

自我還鄉里無書到野亭江湖春浩浩鴻鴈日冥冥苑內花空發池邊草自青寧知同省客萬里各飄零

寄梁宗烈

憐君下第日即我挂冠時岐路千行淚浮雲萬里悲天高南海柱地遠曲江祠處處豺狼鬪相逢未可期

送公順赴湖南有懷舊遊

雄勝稱三楚茲遊不可無入溪身更遠望嶽興難孤江漢元朝海樓臺半入吳十年歷覽地夢繞岳陽湖

公順阻雨又贈

孤城三日住客子意何窮水國春多雨江沙晚更風宦情臨漢上鄉夢到秦中幾欲相拚過清

尊未得同

劉朝信讀書山寺

嗜靜山中寺藏修此度年白雲千嶂裏清夜一燈懸書卷留孤客盤飧傍老禪何時騎馬至訪爾古松邊

贈璽師

羨爾離羣友明心到灑然乾坤卓錫外日月轉輪前覺路開無極迷川度有緣黃金留淨界萬世此燈傳

壽徐廣文

七十六年過悠悠湖海人青松高比節黃鶴健如身子有徐卿貴官同鄭老貧春花歲滿眼常得醉佳辰

西谷有澗聘予喜其得勝遊因話澗中之勝

君向杭城去茲遊似馬遷應傳越客酒先泛楚人船入郭湖天迴觀潮海月圓因君話禹穴高興亦飄然

送高子登赴試

倚馬高槐下行歌夕更繁夏雲連楚甸秋月滿梁園題柱名千里登臺策萬言雲鴻天路永今日看飛翻

與徐生

念汝多風骨論文亦有神常懷萬里志須愛百年身涉海方知水為山不讓塵眼前書史在無限古今人

送徐生赴試

爾到梁都日西風發醉歌秋深花近苑夜迴月臨河姓擬傳霄漢身應謝薜蘿佳音附來鴈報我莫蹉跎

送張秀才還固安

十月燕山雪孤城易水風旅覓迷白草鄉淚劇丹楓萬里書生筆千鈞壯士弓論文更好武何地汝成功

贈葛時秀

磊落元高士飛騰且壯年驂騑萬里路鵬鶚九秋天白璧先淹楚黃金晚入燕春花爛熳日定醉曲江邊

奉寄泉山先生

館閣三朝舊江湖萬里長北山高硯硯南斗極光芒皓首歸難挽蒼生意未忘春風舊桃李何日傍門牆

為李秀才壽母

寒歲開筵處佳辰對碧山梅花似白髮萱草亦朱顏志與和熊苦身因駕鹿閑百年應自慰常見舞衣斑

送別劉朝信

萬里向天涯孤城對日斜雲山共此別世路獨長嗟暮雪燕關樹春風漢苑花知君騎馬地名姓滿京華

寄任宏器

白髮三年客滄江萬里船相思一回首懷抱即依然碧草成詩夢桃花入醉眠高車易傾覆何似廣文氈

送熊舉人

歲暮爾何適天涯誰共過敝裘衝雨雪匹馬向關河季子黃金盡安仁白髮多燈前解雄劍長夜一悲歌

寄王甥朝良憂居

念爾憂居日山樓不到城下帷如董傳閉戶即孫生苦塊冰霜重鯤鵬羽翼成人言爾似舅潦倒愧賢甥

壽李生父

五十五年人乾坤未老身佳辰近元日物色是新春白髮何須變青山不當貧充閭更有子莫厭酒觴頻

贈樊生鵬

羨汝非凡鳥羣飛志豈安即看成羽翼何日起扶搏丹徼通南極滄溟近北寒天風吹送爾九萬亦何難

和賈西谷暮春雨後之作

溪雨清明過游雲薄遠空鷗喧春水至燕落晚泥融麥秀千家暗桃花昨夜風獨憐艷陽日尊酒未能同

答劉朝信春日之作

聞君新歲作吾亦念生涯翠麥纖纖細青楊裊裊斜渴思春岸雨醉憶碧溪沙何日酬懽賞相邀共物華

九日袁惟學邀南園登高病不赴

經秋予卧病九日汝登臺悵望啼猿處無由躍馬來暮天雙鴈落寒日一花開亦有杯中物孤懷未易裁

三月七日同諸生出遊

清晨招爾輩同出眺烟沙寒食孤村路春風萬樹花藉蘭臨水曲折柳到山家獨少青尊共能無愧物華

九日震雷山懷望之

九日東山上思君江漢深故園頻宴會佳節自登臨衆壑流雲氣孤峰落日陰應知楚山上獨賦望鄉吟

立春日憶京

此日憶京華孤城春望賒雲霄雙鳳闕歌舞萬人家香脆金盤菜寒輕綵勝花繁華舊時事回首一長嗟

元日哭先人墓二首

春色松楸地淒涼望不窮一哀臨逝水痛哭起悲風江海無歸路塵沙有斷蓬一杯元日酒空灑九原中

二

地下今安在人間春自來空餘萬行淚不盡百年哀松柏開神路星河隔夜臺林鳥暮啼急佇立不能回

社前一日上先墓

莽莽乾坤闊悠悠歲月過極知恩似海空有淚懸河巢燕營新壘林花發故柯春風如往日愁到此山阿

春望

荏苒青春望棲遲白日歌柳隨愁共結花與淚同多異域猶戎馬吾生只薜蘿萋萋春草色依舊滿山河

春來

春來稀灑掃門徑碧苔滋積雨忘昏曉幽居感歲時寒雲低旅鴈城樹暗黃鸝獨立傷春色蕭條萬事悲

寒食

沙岸青春雨風吹野水涯不沽寒食酒空映古墳花城郭人烟細樓臺暮景斜東流爾何意滾滾送年華

清明

碧草晴川麗遊人興渺然歲時聊杖履兒女更鞦韆沙白孤城日山青萬井烟風花暮無數片片落河邊

仲春二日

荒村春甲子暮雨散高天石壁臨斜景雲岩落暗泉長官行問俗父老更占年早晚春濤至相將泛野船

晚晴

茫茫春水地斜日滿菰蒲隔水雲峰峻含風雪壁孤晴光催谷鳥暝色下城烏仄徑漁樵過相逢亦我徒

春興

二月已過半三月來逡巡柳葉細可采桃花開太頻白馬過遊客黃鸝呼醉人紅顏樓上女端坐獨傷春

清明自先塋歸

感慨清明節留連野外尊花明兼柳暗萬落更千村黃鳥鳴官路青山繞郭門常懷九原下悽斷百年魂

過袁惟學南園集飲二首

始識南園路垂楊一逕斜誰言此城市吾意即烟霞客醉迷深竹鶯啼過別花圖書一萬卷不異子雲家

二

獨坐春林暮飛花送酒杯亭陰連水曲山照落城隈萬竹當堦倚千峰繞戶迴高人讀書處莫厭我頻來

同趙先生宿山家

同宿京華地今來又六年那知風雪夜復此共床眠水曲隣燈照山高石溜懸中宵不成寐話舊各悽然

劉朝信西園

邀客西園內知君愛醉吟相看二月盡無奈百年侵春水桃花岸高亭橘樹林晚來有幽意西望白雲岑

葉邦重山居

幽棲近蘭若來慰野人情戶外雙峰秀堦前衆壑平鳥鳴春樹裏僧傍翠巖行日暮山鍾發相隨夜到城

寺僧留宿

留宿頻經夜虛空斷俗緣獨吟依野衲不寐聽山泉水月人間地香燈象外天何時謝城郭來此共安禪

別寺僧是日立春

別寺逢春日山盤野菜長老僧朝具飯留客更焚香雨暮楓花靜雲寒栢樹蒼獨慚騎馬去塵事未能忘

出寺過胡山人家

細雨清沙路經行獨杖藜那知白社客更向碧山棲花好圍牆發鶯嬌入院啼風光不能醉吟望轉淒迷

飲邦重山莊夜歸

殘日暄歸騎漁樵仄徑逢烟中望北郭樹裏下西峰深夜明林火蒼茫度水鍾朝來向城市誰憶白雲蹤

賢隱寺次劉朝信

翠壁青蓮界蒼苔白石關春來初出郭日暮更登山歲月頻經眼烟霞可駐顏化城依宿處自覺此身閒

袁揮使別墅次朝信惟學韻

出城山水地朋舊共斯遊吟倚將軍馬來乘老氏牛桃花紅映郭柳色翠臨流寄語尋幽者無勞此外求

游堅山阮生談西巖險絕予未嘗到

聞爾西巖上經行此路艱風高吹獨立雲細裊難攀目送千峰盡身隨一鳥還更傳僧八十終日閉松關

夜酌黑龍潭二首【并序】

于時相從者徐羅彭阮胡五人黑龍潭予嘗過望見之未嘗到也是遊予自發西山有此意而彭生即攜一壺酒馬上從予至則夜矣相與酌石上一二行而徐生復不舍遂卒遊蓋甚奇也

川流一曲抱峭壁萬年開白石傳杯坐青天送月來蛟龍亦自舞鷗鷺豈相猜誰識仙潭上天

留此釣臺

二

百頃風潭靜澄波夜轉明江山一壺酒天地六人情醉踏金鰲背潛窺玉鯉行龍宮月長滿何惜坐深【更】

留賈西谷學舍

獨院團雙檜清陰午更繁笙歌聊輟講市井不聞喧壇杏當筵墜堦葵夾座翻憐君交誼重數到廣文園

王生館雨坐

獨坐王生館淒然歲暮心高城翻落照空院積寒霖鴈鶩秋飛盡蛟龍夜或吟西山舊松竹雨雪共蕭森

過先人墓示彭天章二首

三宿孤墳下肝腸爾獨知不禁桑梓淚難忘蓼莪詩逝水有歸處白雲無盡期九原靈爽在相見是何時

二

少小承顏日恩深世所稀倉皇成永訣冥漠竟同歸天地空形影音容有是非此身如寸草何以荅春暉

同季升過李生書舍

避寇孤城裏君家數倒尊柳邊開草閣花下覓柴門臺古如山郭塘幽似水村南鄰張給事常與坐黃昏

登西巖寺二首

西林禪誦地石壁倚天開曲磴千盤上飛泉一道來園禽巢古殿野鹿過香臺共坐題詩暮山花落酒杯

二

野寺千峰裏遊人一徑深窗喧石澗水殿落翠巖陰花樹三春暮山川百代心天風日夕厲難上最高岑

遊賢隱寺

寂寂春山寺雙峰晝自陰行吟白雲裏獨慰翠微心石磴懸蘿暗巖亭雜樹深還疑武陵口溪水入花林

過萬家庄

野屋水潺湲緣崖一徑攀迴風吹落日臘雪滿寒山千嶂啼猿裏孤峰騎馬還蒼茫雲霧合無路覓禪關

訪堅山寺僧不遇

峭壁何年寺重來雪路迷烟霞開寶地霄漢接丹梯逼面千峰起回頭萬壑低無人獨歸去惆悵白雲西

再至寺

山家晚飯罷清夜宿西林古壁棲金象花宮出梵音三生石上話萬劫世間心獨愛寒岩栢蒼蒼一院陰

卷十八

登堅山寺絕頂真武廟二首

古廟堅山上丹青碧蘚封遊人不到處一老自鳴鍾絕壁飛泉掛危峰曲逕通峇嶺一以望頓覺世塵空

二

同來息心石不避捨身臺洞裏烟雲出窻中日月開孤僧絕頂住遊客半空迴不盡登高興無人送酒來

懷西山

不到西峯久那堪病後情雲思丹壑卧花夢碧巖行城郭邀來往朝廷問姓名人間自多事嘆息此浮生

自山家歸寺

暝色延歸路雲中見上方萬山懸馬首一徑入羊腸暮雨橫沙界陰霞拂院牆更深磬管發身世樂何鄉

近寺

梵宇頻經處林深入磬聲懸崖攀葛上曲澗遶松行花鳥還春日樓臺即化城亦知身是妄從此學無生

過書院二首

書院新開日文旌暫過時衣冠成小試絲竹更相隨凍柳依高堞霜荷傍曲池夜來占寶氣應向斗牛知

二

駐馬高城畔酣歌送落梅風霜十月盡杯酒衆賓回柳色含春動笳聲向晚催故園無限意行節為遲迴

登樓

孟夏遊茲地登樓慰所期樹陰深坐客花晚更題詩滿院紅榴發當簷白果垂風情真可住俗物苦相追

過杜家庄

山老頻邀客茅茨隔暮烟聞雞度絕嶠立馬看飛泉種柳非無地栽麻亦有田謀生今已定不用卜居篇

獨坐

獨坐孤燈靜憂心倍寂寥橫河當戶轉落月去城遙淚向何時盡魂從暗裏銷此身雖復在甘與歲時飄

獨立

鼓絕孤城掩溪傍春事殘岸霞晴映樹汀雨暮生寒風外看花盡烟中望柳繁靜觀時物變獨立思千端

袁秀才書院芍藥

亦是傾城色開仍傍杏壇日遲深院落風轉曲闌干不恨先桃李皆言勝牡丹春華惟在此遊客好相看

李秀才圃中牡丹

此地無車馬名花亦自開何須照羅綺但遣絕塵埃近水紅雲綻憑闌白日迴姚黃與魏紫空向洛陽栽

李秀才書屋冬菊花

萬樹皆零落亭亭獨自栽根深飽霜雪花好爛池臺短鬢煩相映孤懷為爾來凡花與衆草歲暮不同開

趙生書堂竹

愛爾書堂竹青青耐久看到門惟一徑入院迴千竿雨映爐烟細霜生簾色寒晚來幽獨興題句刻琅玕

梅

野水無人地寒梅獨自開
花疎間翠篠樹古積蒼苔
嶺雪春潛至林風香暗來
一枝猶可折橫笛暮休哀

懷賈長教壇上杏花

山城疎雨過綠草暗庭陰
坐愛三春樹懷君雙杏林
日長鳴鳥至風靜落花深
悵望高壇上何由共爾吟

櫻桃

滿郡櫻桃熟筠籠處處傳
千枝垂更密萬顆落仍圓
細寫愁難破嘗新淚泫然
金盤賜朝士猶憶拜恩年

芍藥

芍藥春風晚開遲莫自嗟
城中雖有樹此外更無花
倚席低行月翻堦鬪落霞
佳人對瑤瑟一為惜年華

雙栢

雙栢種何歲蒼然盤據深
蛟龍猶有甲鸛鶴爾何心
月過陰移壁風生響度岑
萬年烟霧裏長得護禪林

雪

莽莽黃雲起淒淒素雪浮
堂深偏近燭院迴不依樓
喜見漫天舞愁看向日流
更將三白兆一慰老農憂

聞雷

中宵岩電發二月始鳴雷
落地殷仍起盤空劃欲迴
蛟龍入浦激風雨過城隈
獨坐明燈裏空堂萬慮催

曉起見雪

曙色空窻裏鳴禽更好音
幽棲忘盥櫛偃卧問晴陰
卷幔山雲起開門野雪深
不愁泥濘路騎馬度西岑

雨

疾雨衝城下春寒入暮催樹明捎落電山暗轉奔雷正月花狂放三江鴈亂回國西兵馬急愁問羽書來

密雨

密雨過清朝空山對寂寥久陰雷電蟄曠野虎狼驕鷺立清沙近鷗行白水遙眼前常見汝俗物謾相招

漁樵

白石樵人路滄江漁父潯桃花夾兩岸松色映孤岑坐傍鼃鼃窟行穿虎豹林古今問答意誰識邵公心

淮陰侯

大將登臺貴三軍拔幟豪力能分楚漢功本冠蕭曹故壘風雲偃空山虎豹號獨憐飛鳥嘆不及范生高

吹笙

寂寂花宮月何人吹玉笙響從銀漢落清過彩雲行夜靜疑天籟更深入梵聲幽心與禪意淒切轉關情

廢屋

廢屋空山裏風沙不見人壞牆惟有徑獨樹更無鄰寇盜三關逼徵求萬國頻江湖暮搖落回首一沾巾

燕子

燕子今春到茅堂水郭西本無華屋志難向玉樓棲雨細鳴相並風輕落故低
淘河莫深訝只是為唧泥

病馬六首

柴公有名馬騎出自京華峻耳批雙竹奇毛散五花老能知道路病已困泥沙
貴賤誠如此長吟為爾嗟

二

此馬非凡馬曾酣百戰場聳身思剪拂馳志在騰驤側立青雲迴悲鳴白日長
君恩如不棄終擬報田方

三

從來西域種會是渥洼生不惜千金買寧辭萬里行天寒思故道歲晚滯空城
牽向閑階下長鳴意不平

四

老向關山裏龍媒世不知恩深思欲斷力盡淚空垂苜蓿辭天苑塵沙別月氏
東郊望春草生意在何時

五

惜爾西來遠愁看更向東毛寒常帶雪骨瘦不禁風惆悵臺邊土淒涼塞上翁
徒聞穆天子八駿歷層空

六

踟躕才難盡踟躕意若何沙寒苜蓿短路晚疾藜多不復馳金市猶思飲玉河
側身千里外常恐歲蹉跎

途中寄別餞送諸生

网络繁忙，请稍后再试

送劉大理守衢州府【以下京集】

西寺平反久南邦出守初高門廷尉宅五馬使君車
海岫晴浮越河關暮泊徐蒼生望杜母行
駕莫躊躇

送馮大和

久客依親友深秋念此行亦知彈劒鋏不是愛冠纓
木落燕天鴈花催楚岸鷺故山松柏樹何
限女蘿情

送石令之廣濟

萬古黃州水孤城赤壁山仙鳧從此去賓鴈幾時還
柳澤春陰細琴堂晝日閑知君忠孝志遺
愛楚人間

送張子行

汝陽張季子冬暮獨南行此去棲淮曲何時入漢京
龍劒雄雌別鯤池羽翼生試看古名士多
自少年成

元夜孫世其席上餞勤甫

京國上元夜相逢魂黯然張燈非舊俗滿月是離筵
楚塞干戈外春城鼓角邊同遊重分手海
內各風烟

送謝邦用之湖南

同作燕京客君為楚上行雲霄無舊侶江漢有深情
鼓吹春天樹樓船水國城遙傳持憲使元
是漢廷評

送呂子

京洛三年客雲霄萬里違上書俱不報解珮獨先歸
北極臨燕甸南山繞漢畿相將未可料岐
路斷蓬飛

送顧汝成赴浙江參議

水部名元重藩參位不輕十年垂紫綬萬里為蒼生
舟楫江邊驛旌旗海上城風塵尚未息慷

慨望君行

李南陽宅餞子容

封王金冊節漢使玉堂英禮樂逢今日山川壯此行渡江春草歇臨海夏雲生賓客南陽宅遙遙萬里情

送高穎之給事使楚道過揚州

諫垣初北上奉使且東還冠冕留仙宴江山慰客顏節停淮海曲槎到斗牛間別後金門侶應懷玉殿班

餞子容

客館西垣靜開尊為汝歌檻花深晚坐城樹喜頻過綵鷁春湖色驪駒白玉珂還鄉君信樂予柰別愁何

送鄒子之浙中訪迎張子

此去尋張子東行指宋畿秋城悵獨往春棹好同歸雨外吳帆重江中越岫微平生壯遊興送汝益翻飛

送熊御史尚弼謝病還江西

晨車發帝里秋棹返江鄉草奏孤臣淚懷歸久客腸海鷗思避俗湖鴈喜隨陽攬轡平生志還山未可忘

送蕭升之任登州府學

廣文騎馬去東郡有花開日對蓬萊觀春登海上臺人看鳴鳳下客擬釣鰲來莫謂儒官冷絃歌擁俊才

送王有鄰之趙州

大郡須才美君才美更多雙幡朱析羽五馬玉鳴珂橋市連燈火城亭入芰荷兒童迎太守齊唱趙州歌

真空寺送人不及二首

尋僧憇古寺候客掩松門碧水城隅路青山塞口村迴舟非盡興駐馬獨傷魂日送寒天鳥孤飛日易昏

二

古路城中斷荒原寺半開碧山從此去芳草為誰來野送空臨水燕歌獨上臺林風暮吹急歸興颯餘哀

汝立席上送世其二首

故國思先往兵曹喜暫過江雲同楚望邊月自燕歌市夜盤殮易城春鼓吹多一盃今對汝他日異關河

二

汝去來何日令予轉念家興同張季子愁異賈長沙河塞行無雪江鄉到已花洞庭風浪濶漂泊問龍蛇

送以行往平山省外父母次韻

歲暮忽為別亦知非遠遊彩衣思孟里鳴玉向秦樓岸雪晴含照林楓尚帶秋如憐早春色絲鞵返皇州

送劉子遊西山寺

我憶湖西寺春山爾獨行乍暄饒柳意空谷自鶯聲人減同遊伴花含往歲情片雲回首暮天遣別愁生

送王生還嵩盟兼訊趙叔

此向嵩州去遙看溟海窮行人三月盡獨馬萬山中雪嶺銜西日春沙起北風傳書問故舊天地一冥鴻

送施聘之御史南還

翮翼青冥去高秋隻隼孤許身酌日月垂淚向江湖事業臺中草生涯水上蒲他年問書札滄海一潛夫

送王判之永州

日出楚帆高秋行不覺勞衣裳南嶽霧舟楫九江濤謝傳非忘屐王祥已佩刀雲霄北萬里風便一鴻毛

送李令赴宜城

名邑今為宰東行更屬秋青天見海岱明月下河洲柳傍彈琴坐花隨放舄遊蒼生未蘇息須拜富民侯

送韓仲子並訊其弟季子二首

昔別留談數今行出餞遲萬人皆涕淚四海一瘡痍花映投簪日風流攬轡時西雲暮不斷遙起漢關思

二

令弟先君往伊予實嘆嗟竄身還故里避世入山家斜日秦城柳繁烟渭曲花豈知燕地客騎馬日風沙

送兄二首

兩兄憐小弟千里會長安曉向蘆溝別宵迫松寺懽風回鴻鴈急雪度鵲鴿寒暫聚遙分散臨岐忍淚看

二

風蓬皆萬里骨肉我三人岐路緣何事他鄉愧此身柳含燕甸色花隔楚園春佇望行車遠迢迢起暮塵

送曾建昌取道還瀘州

之官懷印綬過里訊松筠峽纜牽瀘水天梯截少岷雲山蟠越舊錦樹雜冬春日極西南日高歌動我神

送郭進士告歸大梁

病卧歸夷梁瞻雲佇太行金門謝通籍漢署憶含香沙柳繁臺閣春花宋苑牆古園風竹動蕭灑讀書堂

送沙河方令

野曠孤城出山高上黨分春沙平落日古樹密屯雲桃李今年種絃歌此地聞未須愁簿領應不廢詩文

送賈郡博之階州

十載一儒官西行路復難羌夷應俎豆邊徼有衣冠隴坂盤雲上秦城向斗看好音懷萬里早晚報長安

送汪二司業還南京二首

帝宅龍盤內儒林鳳覽中此來名益重相送意無窮畿甸江山抱宮牆日月通仙舟上南斗攀望彩雲空

二

溟漲開鯨力雲霄列鴈行中朝貴昆弟時論有輝光柳別金門色花攜玉殿香佇聆前席問獻納在明堂

送楊子濬下第還廣東

憐君不得意春盡獨還家路入蘿蕪草亭深枳殼花客舟江上遠鄉樹嶺南斜盛世多遭際寧容問釣車

別王秉衡

逸氣如孤鶻長凌萬里雲賈生能抗疏司馬善為文歲月交心舊山川別思紛城南相送罷消息幾時聞

送楊驛丞

聞說丹河地孤城海上開鹵烟出市井潮影動樓臺漢使傳宣過夷官入貢來皇華歌送客應閱出羣才

送江華州

為郡稱先子承家氣益豪少年乘五馬何夜夢三刀天入黃河迴雲開華嶽高古來名勝地此日羨賢勞

送都玄敬主事二首

夫子風流士高才耻受樊長貧思故里多病乞文園落日空山暮清霜十月繁修程正迢遞努力為加餐

二

此別何時晤佳期難重尋扁舟南國遠歲晚大江深白首三年客滄洲萬里心平沙有歸鴈竝起送離音

送戴生歸獻縣

旅室蒼苔靜寒城月色陰歸人對明燭別調入瑤琴渤海高雲夕滹沱積雪深趨庭知有日應慰倚門心

送曹瑞卿謫尋甸二首

逐客滇南郡雲天此路長高秋行萬里落日淚千行作賦投湘水題書寄夜郎殊方氣候異去矣慎風霜

二

一封朝北極萬里暮南溟地遠投蠻府天高哭漢庭旅情生白髮行色傍秋星若過湘潭上休看杜若青

卷十九

送宗魯使安南

日月天門迴星辰海國遙龍函隨勅命使節下青霄荒服周王域南溟漢將標壯遊真萬里無外見今朝

送顧侍御還南京

南國鳳凰土北臺驄馬臣一鳴望霄漢千里出風塵折柳此為別看花俱愴神飄零四海契慚愧十年人

九日夜過劉以正別士奇

重陽愁獨酌深夜喜相過萬里惟秦客三杯亦楚歌霜筩沉海月風鴈起滹沱醉別黃花去能忘白玉珂

送顧華玉謫全州

白日春城暮孤雲天際陰君行萬里外予憶一何深夏擬浮湘水秋應到桂林衡陽去不遠莫使鴈書沉

送楊太常歸省三首

扈聖元公在寧親季子歸鳳凰銜寵詔駟馬動光輝回馭心先切題橋志不違都人看祖帳共嘆此行稀

二

錦里趨庭日聲華冠蜀都弟兄今二妙父子宋三蘇禮樂風雲地旗常日月圖今皇念大祀未可滯江臚

三

聞道西南寇猶多虎豹羣過秦應有論諭蜀可無文未返巴山使空懸棧道軍煩將父老意歸報聖明君

送寇定州

五月燕京寺高雲動客旌南風開菡萏君到定州城霄漢仙鳬去風塵老驥行年來傾蓋意深感白頭情

送彭總制之西川二首

江漢兵戈阻鄖陽節制移遙憐蜀父老再覩漢旌旗躍馬終難據窮猿本易追威明聊一借勲業況當時

二

蜀道青天上岷山赤日西九重連授鉞萬里動征輦開府松杉靜懸軍玉壘低知公安蜀計諸葛大名齊

送呂內翰上

弓劒登天壽衣冠望國門碧山秋殿閣白露漢陵園雨落千官淚雲隨六帝魂詞臣松柏賦音繞鳳凰原

送徐內翰上陵

君向六陵間中元月正圓攀松立暮日藉草坐秋天殿閣西山抱關門北斗懸先皇舊侍從獨到泰陵前

送曹遜卿還汝寧

三年觀國士此日暫還家去指清淮月行攀上蔡花燕歌送楚客邊鴈起城笳却喜干戈後鄉園見歲華

送李體仁按雲南

漢使西南域天王節制名九霄看鳳下萬里避驄行風偃蠻夷靜霜驅瘴癘清壯遊仍攬轡從此慰平生

送呂揮使

駟馬赤電奔少年風義存名登大司馬身覩漢皇尊北海連龍磧西山出鴈門臨行贈寶劒持此答君恩

送郭刑部守寧波

漢庭黃綬吏西省白雲司豈謂為郎久猶言出守遲雲霄懸賜履江海入褰帷古越今名郡風流當在茲

送石秀才下第還趙州

念汝不得意行歌燕市中鄉書催朔鴈旅食寄霜楓荆玉已三獻冀羣當一空驅車薊門外未可嘆途窮

田子宅宴別

永夜愴離析同心耽宴遊世情俱慷慨鄉意轉綢繆竹戶霜燈裊風城海角流豫章天更遠西北有高樓

寺中送段子還蒲州

段子兩龍劒西行歌莫催探花天上返觀日海邊迴一別雲房樹相思雪夜杯禹門讀書處終夕聽風雷

送范以載之南京

不見君山面看君意獨哀曾陪竹林醉今識仲容才駿馬登臺去蒼生攬轡來春江暮雲樹愁望北帆開

送欽師歸西山

近向雲間至遙從花下還赤崖春到寺白塔晝開關風雨如西塞烟霞似北山到來應待我祇樹幾回攀

送忽生還關中次韻

望爾西行路春風萬柳條嘯憐黃鳥近去恨白駒遙彈劒歌今日張燈宴往宵秦川待歸客花色醉中饒

送以道次君卿韻

汝到河西日常令消息聞風塵暫把袂霄漢忽離羣帆轉天邊樹樓停海上雲飄飄岐路側何地復逢君

送趙叔鳴視學山東

爾道東行日斯文北學傳鳳凰千仞上騷裏萬金前嶽峙高無極滄流渺百川古來齊魯地風教有遺編

送侯汝立之東昌

東郡瘡痍日蒼生屬此行二毛猶未見五馬亦為榮月對河關上秋從海嶽生向來嵩少約西望各懸情

送士姪歸雀巢縣

見汝【一作喜見】南歸日令予【一作應憐】北倚樓彩衣花縣酒白鴈楚江洲閉戶自茲始佩韋須古求行藏愧汝叔日憶竹林遊

送郭外舅之江陰

郭舅佐名邑出門憐汝甥春風到江縣花下早鳴鶯聽訟琴堂靜哦詩竹檻成臨行贈玉佩空有渭陽情

送劉西曹決獄畿內

日下秋官出天邊漢使分令行乘肅殺風覃藉仁聞香署含清旭仙闈上白雲鑪薰亦暫別遙想畫甌氤

送胡別駕出關

天上黃華戍雲邊鐵壁城風沙行塞日金鼓出關情轉餉留蕭相揮鞭讓祖生軍儲西北計從此樹勲名

送毛汝厲按湖南

臘送燕門節春迎楚水艤揚帆泛廣漢擊楫渡長江地絡蠻荆域天躔翼軫邦此行君不忝才氣本無雙

送王夢弼之高郵

南竄隨春色東行識壯顏閭閻猶涕淚道路復追攀風節雲霄上霜威海岱間聖明憐萬里不久賜君還

送望之赴汶上二首

相送一如昔出關行復留初看萬里至忽是五年流老駿從東路春鴻向北州青門數行柳烟色暮含愁

二

春郊餘雪日河甸起風沙送折燕中柳行逢汶上花賓朋半海內弟妹各天涯駐馬臨岐處飄飄獨望家

送客二首

方岳從來重君才世豈多中原雖寇盜晉國有山河勸俗銷金甲求賢訪碧蘿政平人自理不用事煩苛

二

海內蒼生困看君紫綬新天官元貴客岳伯是詞人雲極行山目花傷冀北神平生膠漆意翻恐愧雷陳

送葛時秀任東明

東明花滿縣令宰即神仙宓子今為政河陽復壯年隼旟開雨雪鳬舫向雲天何地傳消息相聞在日邊

陸子樓餞祖邦

渺渺楓江濶高樓望轉傷同來送歸客予亦念還鄉塞接寒天迴城銜落景長重逢是何日尺素莫相忘

白將軍征南兼壽母

將軍天上出萬里擁舟航玉帳駐南國金尊開北堂海雲添寵色江日借恩光報主身何壯猶牽寸草腸

送錢推府之閩

越水到閩鄉風帆萬里航雲間開瘴癘山雨暗桃榔器本中丞後才仍佐郡郎燕京把劔別此去有輝光

送施御史便道壽母次韻

繡衣真畫錦彩服更花辰海鶴稱觴數江魚入饌新近懽追里宴遙祝借朝紳堂下忘憂草今春倍往春

贈王舉人

王子萬人英詩名少日成驪珠眠自抱天馬傍誰行旅食青楓改秋吟素髮生過逢見汝意潦倒愧吾情

贈管汝齊

冠裳同海內盃酒對寒宵舊識三秦客今看萬仞標芙蓉生露掌驤裏在烟霄願聽雲門奏春風入鳳簫

贈權僧過昌化寺見訪次韻

問爾湖邊寺微鐘翠巘西千巖一徑轉落日亂藤迷數見談天竺相從過虎溪山中送客罷獨禮白雲低

贈呂道夫轉右給事

右掖言司舊重題御陞名碧霄通漢苑丹地接秋城報主褰龍袞驚人想鳳鳴懷中一諫草何日為蒼生

贈呂子遷左給事中

月明鳩鵲觀日麗鳳凰城自昔飛騰入今看草奏行銜沙填海志鍊石補天情無限乾坤事非因萬古名

贈鄭佐

老鄭空同客長歌北海尊十年舊賓友誰到李邕門天地頻回首江湖一旅覓關城獨歸鴈風色傍黃昏

君采遷居

宅卜宮牆近堂開燕雀馴遷居憐客次過覓喜吾隣題竹元因主看花更屬春知懸孺子榻虛薄愧高人

贈時亮

象郡開梅嶺羅池傍柳州山川盤秀地文物迴風流丹就還珠洞書藏駕鶴樓風塵望爾去霄漢獨相求

賀汝濟生子

夜夜生蘭夢年年種玉心充閭看氣色入戶試啼音明月含珠浦高枝發桂林北堂書報日何啻萬黃金

贈董侍御

何處采芳蘋維舟湘水濱草間露彩薄沙上月華新杳杳侵瀕路依依向楚人汀花不寄遠惆悵獨逢春

贈劉東之憲副

浮生能幾見孰謂別離輕遠道惟長劒寒宵共短檠旌旗臨漢水雨雪度秦城鄉井衣冠少分攜益愴情

過寺中飲贈張元德侍御

竹林清宴集秋夜劇呼盧即席花偏艷開尊月不孤君為淮海俊我乃洛陽徒腰下金龜在明朝付酒壚

元夜寺中集

火樹連龍苑烟花繞鷺峰詞人高宴會令節喜過逢閣度銀河上窻含寶月重九衢風起夜處處有歌鐘

夜集贈呂仲木

石室抽書舊金門待詔來官勲三載見客抱此宵開劉向本經術馬遷真史才斯文久寥落望子早登臺

贈王子

王子萬夫特英風千仞餘未投湘水賦曾上漢庭書日月方前席江湖漫卜居城南相覓處花暮獨迴車

胡戶部父母同受封命

紫誥開天府瑤函照楚鄉白頭偕二老綵服有諸郎草動春江色花攜漢署香夜來望南斗萬里益光芒

贈祖邦

白下通緘少燕都見面遲客心悲歲晚歸路及春時姓入山公啓人傳水部詩同年吾不及相望赴前期

吳逸士

逸士古豪士劒歌山燕關不博邯鄲市常遊五陵間賓客重然諾公卿多往還千金何足貴義氣高如山

秋夕懷曹毅之

百卉飄零盡孤鴻何處歸高樓橫暮笛萬戶搗寒衣南國江湖遠佳人尺素稀獨愁誰與晤明月鑒重幃

懷望之姊夫

自爾出門去天時十月催如何千里外不見一書來遠嶠寒雲起高城旅雁哀鄉園莫久滯星駕及春回

懷姊

逐子東歸日輜軒惜路岐那堪骨肉淚灑向別離時旅病秋來減鄉書歲暮遲庭闈欣見汝千里重予思

懷三兄

輶車北上日相送及燕州為客全經夏還家已過秋鵲鴿寒更急鴻鴈晚相求況是諸兄隔天涯重倚樓

子純宅夜集懷望之

花月同遊客江湘萬里遙燕閒如我輩盃酒又今宵轉覺花愁思翻教月寂寥無論去與住俱是斷蓬飄

懷劉園諸友

亭榭劉園麗攜遊汝輩頻竹高停翠袖花密隱朱唇橋是經行地城餘戰鬪塵京華又二載腸斷楚鄉春

過子容有懷獻吉

故友何人在常時獨爾遊停盃思北海躍馬為南州雨助鳴蛩夕風驚過鴈秋有懷俱不減攜手重遲留

懷李生園東季升

李生北園內亭榭近如何草徑猶紅藥柴扉自碧蘿江湖歸路少天地戰場多空憶張夫子清尊夜夜過

雪簡川甫

一雪數花集空庭寒起遲微風罷弱舞初日尚餘姿自抱朱絃瑟誰看玉樹枝仙曹有高倡不送鳳凰池

寄任司訓

不見任公子飄飄旅客魂苦吟惟白髮生計有清尊散吏真兼隱荒城不異村人間好事者誰到廣文門

至日寄望之汶上

至日懷親友題書在帝鄉風雲餘歲色梅柳復年芳白髮行藏裏清尊涕淚傍思君魯城北汶水日湯湯

簡以道

久雨文園客風流漢長卿苦吟生白髮消渴望金莖雪盛黃精草雲深赤石英早尋方外士服食使身輕

寄空同子卜居襄陽

爾定襄陽宅雲山好傍誰草憐【一作隣】王粲井花醉習家池留滯悲江漢驅馳感歲時扁舟空悵望未有鹿門期

雪簡鄭客

燕雪未成花蕭蕭覆淺沙
誤聽梁苑竹擬放楚江槎
集霰含風色流雲轉日華
城中百萬戶歌舞醉誰家

寄錢水部

多情錢水部別後有哀吟
萬里秋風興孤舟日暮心
白沙官舍迴滄海故園深
悵望佳期隔殷勤數寄音

寄王文熙

之子南歸日江湖淚泫然
涼風一夕至秋月幾回圓
鴻鴈求巢急鷗鵬各自遷
三年望天末徒有寸心懸

寄顧華玉

詞客金陵去那期歲屢過
相思秋水隔悵望暮雲多
清廟朱絃瑟華堂白紵歌
徽音久寂寞高調近如何

簡都玄敬

故友日零落都君情不忘
草玄常避客頭白近為郎
宦況思江上鄉心望海傍
聞君話山水吾亦慕南方

寄徐太守

塞鴈去復盡燕臺愁望春
十年同病客萬里各風塵
南國已碧草清江空白蘋
秋來有詞賦莫使怨騷人

閣內簡張員外

我在金門裏聞君候瑣闥
去天俱咫尺瞻日共光輝
柳下宮官出花邊閣吏稀
晚來沙苑外騎馬欲同歸

寄易內翰

日日望長沙憶君城柳斜
風塵愁燕雀江海嘆龍蛇
公子天邊草夫人廟口花
故鄉盃酒罷遙亦念京華

寺中齋居簡崔內翰張侍御

徑雪草生細林寒鶯到稀傷春懷二子齋沐掩禪扉石室棲金馬天花落繡衣分明共朝市鵷鷺不同飛

喜望之量移兼寄

嶺海投荒日燕臺望遠時三年一消息萬里轉相思歸鴈先知暖驚鳥尚繞枝湘江催發棹預報北來期

立秋日寄粹夫

一葉悲天地秋風淚萬行江河無日夜邊塞有烟霜鴈鵠思高起龍蛇願久藏蓬瀛何處涉頭白恨無梁

寄家書

一返滇中使重嗟故里違老親遙在念薄祿未能歸雨雪三冬暗家書累月稀淚臙燈下發迴鴈隔雲飛

寄三子詩

三子者王康呂三子也三子俱產之關中並見而同隱西望興懷為詩寄之

鄠杜終南曲邠岐渭北陞水多龍卧處山有鳳來時星宿中宵動風雲萬里移滄江問靈劍離合少人知

卷二十

駕出

九重玄武仗萬歲羽林軍朝帝乘輿出行天警蹕聞螭頭蟠曉日雉尾拂春雲佇望南郊氣遙連北斗文

大祀

金榜星辰幕瑤函海嶽編受禧同漢室登禪異秦年日抱龍旗轉天流羽盖旋揚雄老陪從白首賦甘泉

駕幸南海子

鐃音發桂時春狩踐蘭區水盡緹城合山迴帳殿孤公卿隨八駿虎旅備三驅如聞後車載倘遇渭川夫

駕入

地轉瑤壇迴天迴翠輦高入城傳鼓吹開殿引旌旄珮委春池草盤行上苑桃九天燈燭裏齊拜袞龍袍

慶成宴

漢主汾遊日周王鎬宴時禮成天地協樂奏鳳凰儀上殿承天語登筵拜帝釐載歌天保頌還稱既醉詩

皇陵

陵闕皇靈閟山河王氣遙萬年龍虎抱每夜鬼神朝玉盃留天地金燈照寂寥如看翠華度縹緲在青霄

內直

閣院雨晴初微風動綺疏鳳池通紫極雲闕過【一作迴】清虛袞職聞封事軍情見捷書非才叨侍從徒望五雲車

入直

賦豈文園客名慚騎省郎聞鷄趨建禮駐馬望宮牆風晝楊花色烟春蕙草香露盤天漠上消
渴意何長

晚出左掖

洞門餘積雪御苑覆高霞吏散層霄上城行五鳳斜青回初霽柳紅動峭寒花立馬清沙外空
【一作宮】林集暮鴉

奉和嚴太史謁泰陵三首

敬皇十八載四海一何安鼎成棄萬國弓墮哭千官白日園陵闕秋雲松柏寒龍遊萬歲後寂
寞葬衣冠

二

世切如雲望天摧格帝功彌留念諸將顧命託三公玉几星辰上玄宮霜露中松楸慟哭地白
日起悲風

三

夜壑霜鍾杳秋岑玉殿扃總帷風淅淅銀海月冥冥象衛朝羣帝龍藏扈百靈臨門日呼召天
語舊臣聆

酬郭內翰上陵還詩

帝遣朝陵日暫辭供奉班楸梧開玉殿雲霧宿春山晚向松間散晴從花下還知君有佳句傳
和五陵間

答潘都諫郊壇見遺之作

羽衛天行路龍帷御宿亭璧壇流霽月銀闕動春星諫獵心空赤逢時鬢尚青極知陪從地瞻
切五雲停殿試宿禮部張子淳郎中署奉和馬張二光祿喬直閣諸公

東殿春朝晚南宮夜宿深鎖闥猶月色開閣更松陰地迴神仙接天高象緯臨諸君清廟作三
嘆有餘音

得顧華玉全州書兼知望之消息

地北憐為別天南真可哀同時萬里去隔歲一書來水濶蛟龍出山深杜若開相思有詞賦愁

絕並登臺

得朝信惟學書

稍喜豺狼息仍悲鴻鴈音故人雙尺素遙比萬黃金水上春花樹城邊秋竹林天涯暮風雨腸斷北山吟

得鄭繼之書

鄭生湖海去高興渺難降累月音書數清秋涕淚雙天邊登越嶠雪裏渡吳江萬水千山暮何時到爾邦

得王子衡顓榆書

萬里一書劄逾年傳帝都竄身天地遠垂淚海雲孤柳送燕臺駿花留漢殿鳧赤霄終道路白髮且江湖

次韻張郎中九日無菊

九日盃空綠秋城菊未花雨叢寒慘淡風樹晚欹斜獨客悲漂梗佳人怨折麻何時開爛熳沽酒到君家

除夕和以道懷弟之作

汝弟猶吾弟君家更幾家情知思棣萼愁與對椒花酒罷看參遠燈寒望斗斜相憐謝池草明日又春華戴生在吾語感秋思歸詩以慰留之二首

到日中元節淹留歲漸微而翁在異縣知汝苦思歸旅館空彈鋏秋風未授衣敝床還可宿暫住莫相違

二

二十年方妙昂藏見爾才青雲滿霄漢黃鵠尚徘徊寶劒休輕試家書莫屢開百年深有望吾道豈塵埃

答汝忠

俱向滄江起同懷魏闕情乾坤尚戎馬我輩復簪纓戢羽棲雲閣聯翩入鳳城誰知薦賢內今日忝齊名

夜過川甫

日午詩相約更深馬獨來
慚非問奇客知是草玄才
月柝楓烏起霜燈竹戶開
因思高李輩詞賦擅梁臺
九月二十五日會曹汝學侍御于麓堂夜歸遂過侍御宅

東閣留樽罷西臺夜過時
題詩倚驄馬換酒脫金龜
菊院霜天靜楓城海月遲
向來秋寺約還許赴佳期

冬夜過飲戴時亮進士

琴酒楊雲宅談玄靜夜真
庭無旋馬地空有聚螢人
霜霧生陰井風燈動夕鄰
喧喧萬車馬日出自紅塵

徐子容見過

三月三十日燕京春興悽
相過話遠別此去憶深棲
江漢今舟楫乾坤尚鼓鼙
風塵歸未得送汝萬行啼

與王宗哲過訪劉德徵兼有所懷

天街並馬過零雨碧氛氲
王子真乘興劉郎雅好文
燭筵揮玉軫風戶裊鑪薰
忽憶橫簫客遙隔彩雲

端陽日過子容登瞻辰樓

五日訪南州瞻辰上北樓
旌旗夾水殿簫鼓送龍舟
滄海猶多難佳辰但百憂
浮雲暮南適遙向楚江頭

九日顯靈宮宴集

九日無風雨賓朋更遠來
菊花催醕酌仙侶得追陪
眺迴山河出登高殿閣開
攜遊有諸妙詞賦豈吾才

登紫極閣

層閣重重麗丹梯裊裊孤
風雲上紫極氣色覽皇都
苑靜芙蕖落城喧鴈鶩呼
蒼然見淮楚鄉思滿平蕪

侯郎中劉主事見過對菊

菊樹開初爛軒窗坐晚晴客非先有約花亦太多情霜艷娟娟靜風香細細生天涯一盃酒今夕對寒城

過君采次韻二首

海內風塵隔天邊江漢流昔牽春草夢今並玉珂遊神駿元千里仙人自十洲慚隨燕雀輩白髮世間愁

二

自君來此地謂我頗同流復往江湖去寧忘霄漢遊龍蛇蟠海曲鴻鴈向河洲從此風波隔長安日暮愁

世其宅夜集同君采作限難字

冬夕具盤餐明燈坐不寒獨憐竹葉盞仍對菊花團素月縈窗細高雲傍苑殘美人江國去惆悵采芳難

秋夕同蕭執夫舍姪士飲

把燭開塵榻幽尋欸夜扉寒城颯欲暮風葉坐來稀野興林間竹鄉心楚上薇蕭條共盃酒潦倒愧朝衣

除夕劉戶部宅

畫省開雲幔西堂對雪峰一年惟此會萬里幾相逢守歲親燈火朝天候鼓鏞江湖有岐路漂轉嘆萍蹤

晚過以行

伯兄難更見愛弟復佳名往日題詩客黃昏駐馬情春星度北牖暮【一作舊】雨到西城腸斷池塘草東風亦自生顧九和內翰約看花城南寺病目不赴

不赴城南約遙傳寺裏篇看花吾未老出郭偶無緣簇馬低春日啼鶯隔彩烟風沙開病眼愁向艷陽天

遊郭氏山亭

舊日追遊地新年此度過庭春歸雪篠洞古發烟蘿遲日登臨倦名園感慨多風花騎馬去須

放酒顏酡

九月四日劉子見過二首

入閣開塵榻留尊對苑牆
杪秋餘暑濕高樹獨風霜
歲逼鄉心甚天增病骨涼
自憐情興減不比向來狂

二

汝病稀相見高詩久不開
側思金石奏喜挹蕙蘭芬
細菊妍霜晝繁砧亂朔雲
蕭蕭秋日興對爾憶離羣
九月五日與張劉崔三子約
九日遊法藏寺塔劉嘗約遊
西山竟寒盟故云

未省重陽菊誰邀我輩看
城南有塔寺共擬集衣冠
雲起登臺興風迫落帽懼
此盟今夕定莫似碧山寒

登塔二首

古塔層城畔秋毫萬里看
登高攜賦客落日眺長安
天地懸相抱江山鬱自盤
誰能絕頂上不避北風寒

二

塔廊徐暗轉不覺此身高
月牖通天漢風簷散海濤
望餘秋色遠登罷客心豪
去鴈休回首冥冥一羽毛

訪客鑑公房

病客依棲地石房鍾磬深
清齋忘肉食獨宿見禪心
閣日斜寒晝窗雲下夕陰
吾居亦鄰並日為過西林

齋宿大興隆寺

疊雪霾雲磴陰霞絢石房
沉冥通別理宴息對焚香
暖色含初篠遲烟散遠楊
齋心臨暮景屬意向春陽

春日劉薛二子過

林花寒不拆城鴈日喧呼
壯覺風情減春增旅興孤
經過留翰墨潦倒念江湖
未似高陽侶垂鞭向酒壚

再過玄明宮

朔海風雲變玄宮日月移登臨逼九日搖落倍前時翠竹寒虛寢荒藤蔓曲池重看石槨地徒有雍門悲

九日登仁壽寺後山

石閣凌香岫憑高烟霧開人疑送酒客地即望鄉臺鴈度桑乾去雲從碣石來魚龍瀚海北萬古一悲哀

十月望夜劉薛二子過對月

院寒冬月白城夜海雲收上客扳蘭省清光近鳳樓關山一北望河漢迴西流未見乘槎使迢迢上斗牛

九日登慈恩寺閣三首

不到慈恩久今來九日期天寒鴻鴈少秋晚菊花遲搖落悲風雨登臨感歲時牛山何處是異代獨興思

二

地幽人跡少僧至掃莓苔閣迴湖光入林昏雨色來登臺憐作客入賦耻非才何事臨佳節秋懷未肯開

三

莫引憑高目蒼茫海色遙秋空波瀾瀾寒日樹蕭蕭關塞俱搖落音書久寂寥天涯有兄弟猶滯楚江橈

自滇蜀歸李戶部馬舍人見訪

官舍掃莓苔故人尊始開相違頻問訊乍見各徘徊瘴癘一身在風塵萬里來欲詢滇蜀勝慚愧子長才

雨中過李真人方丈二首

勝地豈常得幽盟難重尋清晨驅馬出聊此息塵心鳴磬秋堂濕然燈古殿深吹簫愛仙侶縹緲隔珠林

二

層臺暮雲外寂寂羽人居積雨堦除靜含風殿閣虛洞中留白日窗下寫丹書即此觀幽逸能令世慮疎

早入宣武門

藹藹名都會鵷鴻共接輶金貂萬戶客鐵騎五陵豪夾道紅塵滿千門白日高寂寥楊子宅隨分守蓬蒿

望海

登高望遠海萬里一長吟島嶼迎寒日波濤帶夕【一作積】陰豈無乘筏嘆亦有釣鰲心去從吾好三山烟霧深

中秋夜集呂給事宅

銀漢高秋露嚴城月色陰美人今夜酒遊子故鄉心烏鵲江邊去蛟龍海上吟漢宮樓殿迴莫使暮寒侵

與韓汝慶行歸長安望月

中秋高宴會客散向長安皓月千門裏青天並馬看明添花蘂亂陰益柳條繁悵望高雲上何由振羽翰

晚過周進士言別聞琴

朱絃久寂寞此夜拭瑤琴坐對燕京酒同悲楚客吟城高下木葉樓迴上秋參別後清江夜遙思絕代音

與孫世其過張秀才

長夏稀朝謁相邀此地同占晴行苑外避暑出城中翠篠含風靜蒼波暎日空因思共童冠歸詠舞雩風

與孫戴張三子納涼

薄暮攜三子追涼步短宵水邊低出月樓上忽橫簫久露花沾濕微風竹動搖醉歌聊永夕坐待紫宸朝

避暑存上人方丈

燕地炎蒸月西林大道傍上方留避暑長日坐焚香細竹軒窗靜高雲殿閣涼何時更乘月過宿贊公房

出遊功德寺

昔聞功德寺今出帝城西晚日丹梯近秋天翠巘齊荷衰猶【一作斜】映水樹古曲盤堤十里經行地清沙送馬蹄

宿淇公方丈

落日罷登臨禪房秋坐深不妨留枕簟聊得謝冠簪樓閣湖天影松蘿洞月陰明朝又朝市回憶碧山岑

天壇沈道士觀中

夏日天壇上登臨傍九霄川原一以眺樓觀鬱蒼苔洞口逢丹侶花間醉碧簫清沙日色盡翻恨馬蹄遙

張子純宅對月

長安今夜月留客此堂開影落清樽裏光從玉殿來苑花添悵望鄰笛助悲哀幸接仙郎飲高歌愧爾才

病居田給事中夜過

卧疾春天暮相尋客夜幽劇談翻愈病沉醉忽忘憂西月低臨牖明星遠動樓看君上馬去猶使興情留

春雪諸翰林見過二首

正月燕京雪飛花落滿筵輝輝映旭日脉脉向春天苑草寒猶細宮雲晚更鮮中原有戎馬何日凱歌旋

二

冉冉烟城裊飄飄苑雪過人稀春夜靜花劇暮寒多置酒邀金馬開軒對玉柯陽春有高調莫惜為予歌

酬盧侍御見訪有作用韻

柱史事沉冥行驄到我亭數章天北極隻字斗南星坐久鶯初喚吟餘草更青朱絃山水調淒切為君停

同張仲修再過劉子

劉家好兄弟鄰近苑西樓數有花辰會兼成月夜遊留徐還下榻訪戴不迴舟況接張公子詩輕萬戶侯

過田郎

晚就田郎飲高歌坐此庭炎天忽雲雨西日更雷霆席傍簷花濕窻臨苑樹青相過戀朋好常得慰飄零

同崔太史張侍御飲周都闔亭子

公主山亭在元戎小隊回碧沙霑細雨白日映輕雷已並花邊駿難孤竹下杯良宵可乘興歸騎【一作蓮漏】莫頻催

郭氏園亭

漢苑清霄近名園不出城曲穿陰洞入危傍峭岩行賓客冠簪盛公侯甲第榮日斜登覽罷悵望有餘情

過孫世其時有警報

一自來京邑常時過爾吟飄零嘆往昔留滯到于今各有江鄉思兼之邊塞心明星罷擊柝悵望北城陰

過遠夫

堂上炎天迴明燈夕坐深相逢濁酒醉獨悵白頭吟苑柳通西內邊烽起北岑此時對遷客何意復冠簪

出閣過勤甫省中

竹垣通左掖花省接仙郎並坐停杯晚高談卷幔涼水陰沉紺殿山影落雕牆愧我同朝客傳君寡和章立秋日呂景二內翰呂田二黃門見訪

高城下一葉亭榭已蕭疎河漢生秋早星辰動夜虛玉珂停驂裏金硯落蟾蜍俱是文章伯相看我不如

再遊郭氏園亭二首

仲夏一到此主人開水亭園林再駐馬臺榭已流螢細竹搖風牖孤雲度石屏停杯更暮雨何限北崖青

二

日暮北亭上悵然秋望深碧山聊拄杖滄海未抽簪苑上開雲閣窻中疊霧岑長安足塵土常過此登臨

過顯靈宮

不到玄宮久桃源更此行行知瑤水近坐望赤霄平洞草秋先長壇雲晝自生雙雙玉簫發風引度仙城

卷二十一

十四夜對月集陶良伯

陶令堂中月深更酒為携金波流未滿白露迴含淒鴻鴈秋江北芙蓉漢苑西一杯同悵望萬里各羈栖

十六夜月集侯汝立

秋月尚不減客堂清宴闌把盃看玉 駐馬簇金鞍漸覺歲時暮況驚關塞寒霜笳中夜發葉落滿長安

夜集勤甫宅時秉衡至

同鄉耽宴集浮歲感飄零況復故人至相邀明月亭琴清繁玉露坐久密秋星從此冀佳貺無忘瑤草青

同崔子鍾過董文玉宅

崔生亭伯興董子仲舒才不為相鄰近那能數往來霜天留把菊風檻促行盃尚憶秋參落酣歌送我回

十月四日過良伯

古堂秋色暮霜晝靜煙沙鄰並常盃酒寒天尚菊花流雲行苑細返景抱簷斜隻鴈南翻去飄飄各念家

夜集世其次戴子韻

醴酒燕京夕朱絃楚客心情親不覺醉慷慨豈忘吟哀柝霜天迴蔡篁雪館深江湘舊行地何日更南尋正月四日同子純過劉汝忠次韻二首

並轡來仙第深盃好共揮遠天初夜色新月更春輝燈夕看相近花時會莫稀雲霄望羽翼真喜接高飛

二

邂逅憐新歲朱絃為客揮春風歸柳色月夕助燈輝歌酒三人共乾坤一笑稀看君俱妙思操

翰忽如飛

顧以行諸客見訪次韻

海內朋簪盍天涯意氣親雪峰斜暮景霜草勁寒春客夕留尊久仙曹染翰新諸君千里駿霄漢迴風神

人日齋居過王德徵

齋居春晝冥獨過子雲亭雨雪逢人日江湖問客星望來花漸發愁劇柳還青更話東歸棹遙遙海思停

立春管汝濟見過次韻

勝日高人過蓬門氣色新青榆初改歲白葡共嘗春鼓吹闐京邑樓臺接漢津扳留慨時序晤語覺情親

寺中張子言自浙來話

石閣晴雲抱花宮夕漏催我遊天姥夢爾向海門迴日月雙龍劒乾坤一酒盃山中問百草早晚拆春雷

夜過劉以道兄弟

風燈懸岸館竹色靜春沙山水停湘瑟池塘到謝家雪融花尚細烟裊柳初斜對酌情親夜能無戀物華

過城南寺

出城春漸近到寺日猶高野望增樓閣沙行散竹桃吏情雙白鳥世故一青袍苦被微名繫乾坤無地逃

過以道喜其弟以正至限韻得衣字

美人今夕酒行子暮春衣常念賢兄弟經年望爾歸喜占烏鵲噪愁慰 鴿飛謔浪相逢地銀缸照益輝

出遊城南寺

樓閣倚清沙春尋【一作深】景未斜聽鶯到竹院並馬入桃花不倦登山屐猶遲泛海槎芳樽爛熳倒吾醉亦忘家

王壽夫過分韻得吾字

自別君昆弟同遊獨愧吾十年常道路萬里各江湖乍見形容異相思夢寐俱向來飛動意執手五雲衢

清明日同諸友遊城南寺

風晝人遊少沙郊馬並行穿花尋野寺冒雨出春城骨肉新傷淚賓朋遠至情天邊有芳草故向客愁生

子純邀過東卿

朝回聞折簡騎馬過西隣把酒對今雨看花逢故人雲陰初薄暮鶯囀尚餘春向日江湖夢飄零見爾頻

亮公房雨後

夕宿西林院蕭蕭竹樹分風雷迴驟雨星月度微雲妄色空中滅名香靜處聞早知禪可托未忍去人羣

城東泛舟

水郭移尊宴沙原列騎停岸開平放舸林轉曲通亭雨意雲垂白風情柳送青衣冠夕臨泛東望極滄溟懷麓堂集將遊東園以風雨遂止二首

仲夏陰晴半林塘水石隈窻雲開遠色簷日度輕雷雨阻東山屐天留北海杯門牆接苑樹長晝得遲迴

二

東園春餘麗西亭晝不譁雨來留聽竹風起罷看花堂是裴公野庄仍李相家庭堦有碧草早見茁蘭芽

李川甫戴時亮過訪

豈是高人室能勞二妙來炎天雷雨豁深院鬱蒸開改席因風樹留尊對晚苔高吟俱感激琴

罷轉餘哀

暮雨劉以正過飲

驟雨暮不止轟雷昨夜奔炎蒸三伏破風霧二儀昏欸客深投轄寬愁細倒尊秦川與楚塞留
滯兩鄉魂

鑑上人房訪太和兄飲

雷雨思炎月塵沙苦冀方久 河朔飲今醉雪山鄉蘿月搖丹牖松雲抱石堂憐君依宿地碁
簞轉清涼

同川甫寺中避暑

偶到清涼地番思苦熱哀水堂 菖折風殿薜蘿開逃暑無三伏憑虛有一臺西山晝雷雨不
見洗天來

同李川甫鄒子家過張子言舍

白晝風雷過城波靜碧沙濕雲翻抱暑西日半籠花元禮舟堪並鄒陽賦更嘉同遊仲蔚宅杯
酒重年華

訪子容自荊州使回二首

使節荆門返文章楚郡傳綵雲神女賦斑竹帝妃篇弔古南遊日憂時北上年停盃問世事轉
眼幾回遷

二

下馬逢今雨東堂覓舊醅入秋翻暑濕過午復雲雷花已經年放人今萬里迴世情吾懶道但
飲莫停盃

雨中劉汝忠過對碁觀詩談邊事作

城晚客居靜邊秋代馬多黑雲浮日動白雨映天過謝傳惟碁局劉琨只嘯歌異時安見汝談
笑却干戈

中秋十三日子容樓

對酒中秋日憑欄萬里遙風高塞國鴈月近海門潮興逐燕歌起魂從楚望銷無邊漢宮柳烟色晝蕭蕭

十四夜李川甫宅

獨院淹杯酌高秋驚旅魂風蟬急白露沙葉靜黃昏月上看天柱潮來望海門平生壯遊志非爾向誰論

十五夜劉子緯宅子靜初至對月

長安今夜月復滿桂花輪笛裏三年淚尊前萬里身關山上雲霧樓閣下星辰況接離羣友悲歌對愴神

過宗哲故宅

過門猶宿昔駐馬復誰留雨院殘春竹風庭折晚榴還家無二頃歸櫂有孤舟日暮隣人笛淒然涕淚流

八月二十八日子容過對菊

近節逢花放開尊集異鄉乾坤共一笑風雨似重陽誰識暮蟬意獨憐秋樹芳它時益爛熳邀爾醉西堂

九月一日過劉氏昆弟對菊

謝庭看朔菊楚客醉燕邦瓊樹元相對金花亦自雙霜雲陰夕院燈火燦秋牕待到重陽日還來倒玉缸

汝濟夜過同以行對菊

搖落相過地芳菲晚更親酒醺留媚眼燈色笑生春風雨新晴夜江山未老身百年如不醉恐負此花神

同許補之劉子緯登定州塔

塔閣盤空上笙簫遶洞行懸梯出萬井飛蓋俯孤城燕岱風雲色滹沱鴈鶩聲登高並回首直北是神京

夜集錦夫同本貞限韻

萬里同鄉友飄零嘆此逢江山饒涕淚歲月老形容風散城邊角雲傳海上烽中原尚格鬪未可問雲松

繡水晴瀾

獨憐繡溪水却出錦屏山岸夾桃花浪沙明碧石灣泛霞開激灩乘月弄潺湲千載高人去誰來釣此間

以行自西山還相訪

聞汝西山去題詩十日還獨行翠微裏應到玉泉灣石壁雲孤裊冬巖菊自斑烟霞發妙思高詠眇塵寰

夜歸昌化寺

日落歸山刹松風處處聲幽深不易到昏黑更多驚壑斷尋溪入峰迴截嶺行茲遊藉朋好奇絕冠平生

平坡

晚眺平坡上蒼茫萬壑前一僧行樹杪諸客到寒天險駭將崩石清憐乍坼泉翠華公主塔縹緲碧山巔

圓通寺

曉問圓通寺青山拄杖尋飛梁裊石澗寒日抱霜林殿閣攀躋遠關河眺望深下看孤鳥翼萬里送遙心

仁壽寺

塔廟開龍象叢林會法筵散花金布地拄杖石飛泉漂泊登高興依棲習靜緣北風吹袖起昏黑下諸天

詠天寧寺塔

七級芙蓉起千年舍利藏地形標海嶽人代閱隋唐鏡現三天象珠含四日光白毫空萬里處處有迷方

菊莊

吾憐陶處士瀟灑出塵埃白髮秋逾短黃花晚自開
百年常對酒九日漫登臺却顧輪蹄者悠悠徒爾哀

大功德寺

寶地烟霞上珠林霄漢間宣皇留殿宇今日共追攀
御榻臨丹壑行宮鎖碧山帝城看不遠時見五雲還

玉泉

行遊金口寺坐愛玉泉名雲去隨龍女風來動石鯨
入宮朝太液穿苑象昆明却望天河水迢迢萬古情

望湖亭

獨上湖亭望霜空萬里明檻疑天上立槎是斗邊
行雲霧開山殿芙蓉暗水城先朝四百寺秋日徧題名

慈恩寺

海子橋西寺高樓御苑花中流自日月平地有烟霞
客至開金殿宸遊想翠華十年復到此朋輩各天涯

一舫齋

乾坤聊一舫高卧此齋深竹散琴書色窻開島嶼陰
乘桴浮海意擊楫渡江心無限風波裏何人嘆陸沉

鏡光閣

峻閣峩峩上層城眺望中風鈴齊送響雲磴曲盤空
海色搖窻碧蓬萊影日紅翠華無復到長鎖翠微宮

關門

虎衛關門迴龍沙塞曲深風雲時有氣日月晝長陰
中使西來訊千官北望心天寒漢宮闕翠盖憶春臨

寄題蒼谷寺

曲水盤山地松門路不分青天望嵩少白晝吐風雲過客空高興徵君自有文霜鍾翠微裏日暮渺相聞

鑑公房石鐙

石盃何年鑿瑤燈此夕然雲流自五嶽月色近諸天定裏金輪轉光中玉鏡懸西來不滅影常照法筵前

張侍御仲修送弓

繡服意相親彫弓把贈新獨憐投筆志未老據鞍身晝控鳴風鏑宵彎抱月輪倚天時一望西北有邊塵

新鄭道中

客路臨新鄭雲沙轉望平夕烟生斷塹野水入荒城下馬看碑誌逢人問地名千秋陵谷在懷古亦多情

淇門

何處問商圻荒原尋斷碑鷄鳴深市井鴈入古城池斜日人空吊浮雲世自移祗餘淇上竹綠色映寒漪

銅雀臺

美人望陵處無復翠華過殿冷閑歌吹宮春罷綺羅落花嬌靨盡芳草怨魂多日暮漳河水東流空白波

壽鄭廷瑞太守

五馬歸來日閑身六十強春花自爛熳雲水共徜徉邑種萊公竹邦留召伯棠平生天下志白首付滄浪

初度

此日吾初度深盃且自揮眼看兒女大身覺弟兄稀未得浮滄海徒然傍紫微齒年今不小心事已多違

秦翁輓章

不見此翁起誰尋處士家邑人傳月旦蒿里慘霜笳水面藍田月春殘清渭花隴雲深一墓寒
月晝空斜

輓謝晚耕

五十不入城獨吟稱晚耕日南提劒志海上却金名故里松猶在秋田草自生江湖夢顏色悵
望有餘情

輓謝中丞

閩海通南極三山產異才循良三歷郡鎮靜久登臺神鬼愁先見黔黎望復來誰看大星落天
柱使人回

吳中丞雙輓

近讀中丞傳兼聞節婦吟死收銅柱續生有栢舟心滄海空潮汐青山自古今雙魂俱不泯何
恨九泉深

海嶽陳翁輓章

白雲送秋老一墓海門邊花憶啼鶯日風悲種樹年人間餘翰墨天上有神仙從此遼東鶴千
年更一旋

百戰

百戰將軍死中原將士哀山河猶汗馬霄漢已雲臺敢料安危勢須還節制才南征聞日遠消
息幾時來

觀兵二首

將帥俱分閫朝廷再剖符選徒皆虎士戰馬盡龍駒直指黃河外長驅碧海隅感恩須此輩萬
一為捐軀

二

組練回天地戈鋌白日搖王師一奮怒寇賊可潛消使過傳金節軍行奏玉簫人言漢家將今
是霍嫖姚

諸將

萬方皆寇盜諸將半公侯未息蒼生困猶煩玉食憂珥貂前日賜汗馬幾時收莫倚兵車力安危在運籌

防寇

萬國猶防寇三年未罷師天清聞鼓角野曠見旌旗岸雪晴含照山雲晚趁姿孤臣北上日想望太平時

盜起

盜起從畿甸徒勞將帥心徵兵搖白羽募士散黃金天地河嵩隔風塵海岱陰萬方吹畫角此曲淚沾襟

花當

聞道花當種緣邊部落遙百年為漢衛每歲欸天朝犯順若無敵背恩誰爾驕側想文皇日龍驤親渡遼

內直遇雪

裊裊城雲影蕭蕭急霰催遠從仙閣度輕繞鳳池迴弄日搖彤管含風引玉杯春還今歲早先報漢宮梅

入朝遇雨

躍馬天街霽趨朝冷色催好風先北起微雨自東來柳拂重城鎖花籠複道迴萬方憂旱日沾灑望蓬萊

將雪有懷

長安十萬戶騎馬欲何之已動尋梅興空成采葛詩雪心知霰集雲意怯風吹今夜西堂燭蕭然有所思

冬月

冬月少光輝霜天影漸微鼓聲仍雪塞燈火自風扉水凍蛟潛泣沙寒鴈不飛何時漢家將雙照羽旗歸

秋雨

斷續城頭雨空齋綠蘚封孤燈聞過鴈四壁起鳴蛩細草傷心碧幽花滿目濃美人居綺陌幾日【一作惆悵】不相逢

十七夜月思

秋夜已如此美人安在茲含顰向玉魄揚采憶蛾眉嫋嫋芳香歇盈盈白露滋河關悵伊阻誰復訊佳期

卷二十二

雨雪曲

蒲海雲成陣天山雪作花
長城烽火入邊騎動鳴笳
霧深迷漢月風起暗邊沙
一夜關河冷征人盡念家

星變

星變干常紀花開與令違
九重方避殿四海望垂衣
賦歛何時緩流亡幾處歸
廟堂圖至理早晚蒼天威

冬月

冬月今宵滿他鄉此夜情
城高初影堞樓靜故當楹
霧濯寒輝苦風吹夕暈生
捲簾愁不寐庭樹宿鴉驚

月食

月蝕中秋夜中天萬國看
衣冠連大內鍾鼓動長安
光沒天河曉陰沉渤海寒
聖心應念此長望五雲端

九月十五夜月

萬里高秋月青天此夜看
乍流關塞影遙出海雲端
淅淅開風幔輝輝傍菊欄
清笳奏城闕為報漢宮寒

中秋無月

月賞今年罷高樓獨客愁
關山中夜笛江漢故鄉舟
暗雨捎簷入秋螢度檻流
應知雲霧上天柱有人遊

六月望月食

未月黃衢厄妖遮赤道行
魄殘疑近晦食甚始生明
奏鼓風颺慘登壇雷雨清
攙搶猶未掃天意豈休兵

元日

元日王正月傳呼晚殿班千官齊鵠立萬國候龍顏辨色旌旗入衝星劔珮還聖躬無乃倦幾欲問當關

五更

五更霜雪霽忽夢紫宸班天上傳鍾鼓風前想珮環鷄鳴無復詠馬動亦虛還憶在先朝日朝朝見聖顏

三月三日

病眼看天地風沙當晝吹賞心孤酒伴行樂過花時水曲蘭芳靜城陰柳絮遲東郊有車馬春色報人知

秋夜

暝砌凝寒色高樓閉綺櫳露蟲吟蟋蟀風葉下梧桐此夜關山月何人悵望中冷然感秋思況復聽征鴻

元夕

燈火萬家歡高樓玉漏殘舞留華月緩歌裊綠雲繁雪郭春初霽烟城夜不寒畫橋垂柳外遊女珮珊珊

十月一日二首

今日孟冬朔輕烟澹曉暎北風飄一鴈寒氣入千門消息斷行客關河迷故園浮生元不定俯仰任乾坤

二

嚴霜淒卉木茲歲忽將周寂寂龍蛇蟄寥寥江海流暮燈喧巷哭風角起邊愁不盡中原望難尋萬里樓

歲晏

歲晏看人事蒼茫繫所思浮雲當日暮積雪見春遲報國元無術寧親未有期獨憐張內侍吟絕四愁詩

中秋

風塵悲海內滿月對長安聞道王侯第中宵晏未闌
遏雲催玉管生水弄金盤獨念南征將關山此夜寒

三月三日

三月正三日長安春可哀鴈從南國至花向北人開
戎馬中原地鄉關萬里臺蹉跎嘆物色容易歲年催

清明日病懷

旅舍清明日長安新火烟桃花轉愁思竹葉興蕭然
客病閑官馬囊空澁俸錢故鄉聞稍定南望好林泉

謝崔太史惠菊

遺我高庭菊懷君秋樹林香添竹葉盞色助草堂
吟翠蓋翻風檻霜天倚玉簪晚芳如不歇可比歲寒心

觀荷

入院高荷密留尊 菖遲絳房扶水萼翠蓋倚風枝
檻坐明星夕窻過驟雨時流螢點點度故傍綠陰池

寺中吾子館海石榴

西林雲晝靜覆院海榴花坐映東窻下疑窺鄰女家
枝枝搖綠水片片落丹霞錯比珊瑚樹光輝逼【一作闕】日華

汝慶宅紅菊二首

紅菊開時暮亭亭冠物華亦知顏色好不是艷陽花
羅綺嬌秋日樓臺媚晚霞清香如不改常傍美人家

二

秋花何太艷綠盞慰飄零笑比西施醉愁憐楚客醒
雲高開爛熳烟細裊娉婷好為多沽酒頻來倒玉瓶

沈道士館牡丹

仙亭牡丹樹不數玉山桃忽漫相逢處
開花爛熳高彩雲停度曲遲日動揮毫
明歲天壇路春風憶錦袍

雨中紅芍藥

百花堪獨立一雨更風流日暮行雲女
仙裳覆楚丘明添丹臉淚暗抱錦心愁
晴晝猶須賞何人駐紫騮

長安柳

三月長安柳春風吹暮天花飛御溝水
葉傍漢宮烟繞岸猶堪折臨流更可憐
故園無限樹零落戰場邊

芍藥

城中芍藥偏席上把殘枝上苑相看日
春風爾較遲艷歌翻錦瑟酣醉倒金卮
南國今開罷園亭數夢思

觀竹

相國西垣第新看種竹成葉香鳴鳳宿
根古蟄龍生雨洗琅玕色風傳竽籟聲
山林輕肉食心迹喜雙清

魯山院竹

泰公堂下竹覆地長新篁雨飈春牆碧
風含石室涼經行留下榻晏坐對焚香
遺響流笙鳳時時落上方

聞鴈

見汝今南下憐予一望家亂聲求侶急
高影背人斜月靜林無葉雲寒菊有花
萬行關塞淚秋日墮悲笳

鸚鵡

不恨金籠閉其如鐵鎖牢側身燕雪苦
垂翅隴雲高豈為能言語番令妬羽毛
角鷹何猛氣翻掣錦鞵絛

春鴈

花初背楚澤雪罷度桑乾漸起隨春色高飛犯朔寒書停江國望陣倚塞門看憶爾常南北無嗟行路難

鴈

嘒嘒邊笳怨飄飄南鴈翔長風度關塞九月下瀟湘積水浮連影遙空起斷行故園秋望盡聞爾淚沾裳

聞鴈

鳴鴈南方去人今北地聞水寒沉塞角沙暮起秋雲獨叫如求侶相呼恐失羣高樓潛望爾鄉思轉紛紛

驪

碧山誰放汝華館故相羈野性看人駭閑身顧影疑草香春過處花暖晝眠時無限雲林好樊籠祇自悲

蘇子遊赤壁圖

垂老黃州客高秋赤壁船三分留古跡兩賦到今傳落日寒江動青天斷岸懸畫圖誰省識千載尚風烟

彼美東隣子

彼美東隣子花間白日醺纖腰人不見妙曲轉愁聞舞罷空明月歌餘尚彩雲章臺楊柳樹花暮落紛紛

雪夜九梅翁園同蒼谷宴集二首

邨城風雪夜騎馬叩誰門乘興寧迴棹寬愁數倒尊茆堂開洞壑楓岸疊沙村朝市山林意非翁未易論

二

冬夜南園集携遊興未窮登臺望積雪下嶺逐迴風駿愛林中馬冥思海上鴻不因蒼谷子誰識九梅翁

到鄂簡王敬夫【以下秦集】

杜曲花無數城南柳更重去天惟尺五隔歲一相逢雨過春陂水雲開紫閣峰好陪王學士杯酒日從容

同敬夫遊至華陽谷聞歌妙曲

名邑今重過終南第一遊山中白雪倡天上綵雲流柳散秦川色花含杜曲愁同時霄漢侶十載卧林丘

過康子德涵彭麓別業

不求金馬召翻愛碧山棲柳色閑門閉桃花曲徑迷酒船時問字翠壁有留題只此林泉好無煩到濟西

荅張道夫都閫病懷

不到將軍第秋清病起遲誰知平子後復有四愁詩月幌臨書帖風庭掩戟枝東橋好山水何日赴幽期

九日同陳侍御鳳谷登宴

栢臺驄馬使蘭谷鳳仙家暫駐三秦節來看九日花風霜高錦樹雲日麗清沙去去層霄上回瞻北斗斜

送閒雲子還河內

爾西訪崆峒東隨河上公神仙自有友不與世人同王屋留雞犬天壇躡斗虹白雲從此駕去去入無窮

卧病簡汝濟士奇時濟二首

卧病常遲起焚香獨燕居聊因謝簿領暫得弄琴書嶽色盈虛牖泉流遶暗渠雖然官府內不異在林廬

二

習隱開三徑耽幽構一齋吏人稀到戶鳥雀自馴堦藥補身差健詩成悶強排同聲二三子不見好音來

過馬谿田村居

宛宛清河曲團團翠竹村卧龍元勝地容駟已高門野曠嵯峨出天寒雲霧屯何時還過訪無限欲相論

冬夜過仲木

漢殿詞臣第秦川處士家過逢遙慰藉文翰轉光華夜興山陰雪春情渭北花江湖望霄漢相對一長嗟

寄彭幸菴中丞

山海藏身遠朝廷屬望頻駿功收戰伐龍卧偃經綸星宿黃河氣風雲華嶽神生才元有待終起慰斯人贈張時濟陳伯行胡承之周少安三月三日出城遊宴

芳筵開上日才子出京華暫別含香署俱停訪石槎秦川平對酒漢苑曲穿花應共題春草相過謝客家

送張行人賁大行皇帝遺詔使秦蜀

我皇忽晏駕君行辭直廬九霄持使節萬里捧哀書湖望雙湖鼎橋回駟馬車錦城花滿樹爭識漢相如

清明日病卧聞三司諸公出城

伏枕花辰過閉門樽酒空賓朋臨水上供帳出城中柳色龍池雨鸞歌杏苑風秦川多勝事遊賞未能同

秦府進歷

寶歷頒天闕金樽宴錦軒萬年周正朔七葉漢宗藩向日奠堦曉含風蕙砌暄同懽承睿欸歌舞頌乾元

拜將壇

漢主西封日淮陰拜將時壇場如往日朝代幾遷移王氣風雲歇雄圖日月垂江山弔故國誰復見旌旗

秦嶺謁韓祠

捫蘿登峻嶺級石上荒祠雪阻南遷路雲停北望時文衰真有作道喪已前知千載經行地高

山空爾思

登五丈原謁武侯廟

風日高原暮松杉古廟陰三分扶漢業萬里出師心星落營空在雲橫陣已沉千秋一瞻眺梁甫為誰吟

普緣寺有馬融讀書洞

春山尋古寺昏黑尚攀緣仄徑千盤轉巉崖萬仞懸虎常啼白晝猿忽墮青天欲訪名賢洞冷泠隔澗泉

書院課士雨至有作

雨色閒堂靜橫經坐晝深笙歌非絳帳絃誦有青衿竹勁捎簷碧松寒覆院陰萬人憂旱日洗耳聽秋霖

登樓鳳縣作

近訊中原使兼登萬里樓朝廷仍北極行在且南州峽斷風雲隔江通日月流如聞乘八駿早晚向崑丘

東河三月晦日

雨宿東河夜送春山館寒遠沙霾霧樹危石上風湍慣涉波濤險偏經道路難平生四方志回首欲求安

青峰閣曉霽

初日東峰上微微霽色分丹崖含宿雨青嶂拂歸雲候騎林端發鳴笳樹裏聞前山更可愛晴望碧氛氤

草店雨行

山館夏陰澹雨行寒色淒奔湍迴白石折坂下青泥棧道常通北江流却向西千峰問來路烟霧使人迷

馬道驟雷雨復霽

萬壑驚雷起千峰鳴雨過稍看風瀨減更覺夏雲多虹飲垂青澗猿行掛碧蘿山中無吏事長嘯荅樵歌

弘道書院

梁棟起層雲松筠散夕曛九巘瞻泰岱清渭接河汾冠盖時時集絃歌夜夜聞登堂持節印衰薄愧斯文

咸陽原

千秋陵墓地駐馬惜茲行晚日登原殿晴天見渭城望春時極目訪古獨含情奈有咸陽草風吹歲歲生

草堂寺

昔讀高僧傳今看勝地形院寒留檜栢殿古落丹青寶塔參遺影荒臺問譯經駐車春日暮散步出林垌

說經臺

西海何年去南山萬古存風雲留福地星斗上天門有欲誰觀妙無為自覺尊青牛不復返空誦五千言

普緣塔

石蓋凌空起丹梯出翠微雲從珠頂覆燈轉鏡中輝鴈沼波濤湧龍宮日月圍何能攀絕頂一覽漢邦畿

磻溪

丈人昔未遇垂釣此溪中不感風雲會誰知八十翁晚楓漁浦暗春草獵原空獨令千載下懷古意無窮

長春宮

夜宿仙人館晨聞鳳吹停玉牕開曉月丹井汲春星久秘長生訣空留不死庭下山回一望巖壑杳青冥

益門

益門通漢沔棧閣上雲霄蜀道從茲始秦川望已遙生風鄰虎穴迴日過龍標眇眇征途子雲山誰見招

新開嶺

塹山通大谷槎嶺掛天梯倚【一作獨】立飛雲上回看落日低異花千種色怪鳥百般啼晚就松林宿烟昏度碧溪

柴關

連峰入冥雨絕壁閃餘霞水認秦人洞林疑謝客家石門踐苔蘚源口覓桃花他日求棲息無言此路賒

武關

北轉趨劉垌西盤出武關微茫一線路迴合萬重山天地幾龍戰風雲惟鳥還關門鎖溪水日夜送潺湲

昭烈廟

漂泊依劉計間關入蜀身中原無社稷亂世有君臣峽路元通楚岷江不向秦空山一祠宇寂寞翠華春

鹿苑寺【即摩詰宅】

舊宅施為寺青山屬野僧高人不可見勝迹已無憑色藉荒庭草陰垂古殿藤千崖一微逕異代幾攀登

過華清宮

冬【一作偶】駐華清殿千秋憶翠華青山無帝宅荒草半人家雪下湯泉樹春回繡嶺花長安望不遠誰見五陵霞

望終南

近覽南山霽遙迎西日曛黛橫千里色花抱【一作挹】五臺雲城闕行相映川原望轉八刀丹梯懸石洞未訪赤霞文

首山

王君首山下新起讀書樓雲霧懸蘿入湍波湧竹流具茨黃帝宅嵩少羽人丘想待功成去方
為此地留

兩河口

東下商南路西辭蜀北門青山兩河口古戍百家村曲棧盤林杪危湍噴石根經過回白首蹤
跡半乾坤

卷二十三

上李石樓方伯【以下家集】

三晉多人傑吾師出固然素汾經太岳紫塞入幽燕世業端居里名邦倚舜田由來天運復誰謂地靈偏郭相慚先達王通俟後賢明經超第一射策對三千感會逢昌紀登庸起少年劒鋒寒照雪辭藻麗生烟博物張華讓才多子建憐八义迎客賦隻字使人傳豈獨文章貴還應器識全雄談飛玉露浩氣豁金天亮節唐元振英風魯仲連青雲仍自至黃鵠任孤騫簪筆星辰上持書日月前觸邪稱獬豸特立憚鷹鷂東觀臨晨入西臺薄暮旋朝回焚疏草吏散閱陳編百采班行整羣公禮數虔一年巡洛表兩命下秦川斧鉞威關隴舟船達澗瀍石林風淅瀝霜仗月嬋娟邊徼邊宵遁茅茨犬夜眠激揚弘憲度旌別布威權制作人文渙經行草木鮮闡幽輝往哲訪古徧遺阡汲黯還辭漢張騫又使邊臺端堪秉節湖上且移旃城接三江樹波通七澤蓮蠻夷恩已洽州郡役多蠲糾察元無隱棼棼肯自便駐車仁雨渥登座法星懸遠臬馳譽久當途薦疏聯碧梧看鳳時喬木待鸞遷分陝推公爽封侯得傅玄開藩臨宋苑張幕傍河壩位重心逾下名高守益堅薇花當省署棠萼滿郊鄴聲價隆方鎮光芒動斗躔明堂求畫棟清廟想朱紘寇準真時望王公勸早宣麒麟功不朽金石頌應鏤愚本蓬蒿質那堪侍几筵垂髫蒙引拔撫志荷陶甄附驥懷深願登龍感夙緣未除原憲病空負樂生愆舊業心常在脩途步轉遄鸞鳴猶待律魚得敢忘筌草野瞻飛盖雲逵望著鞭臨風歌此曲慷慨不成篇

寄徐博士二十二韻

有美雲間士才名洛下傳逢時不得意謫宦轉悠然殊渥優文學清階謝糾纏班行亦霄漢官侶是神仙樓閣星辰麗宮墻日月連院桃紅爛日闕檜碧參天賈誼為王傅陽城淑後賢諸生攻誦法六館藉陶甄玉序金鋪列虛廊石鼓懸雅音淒古調奇字索遺鏤劉向憂經術揚雄困草玄羅傷廷尉宅座嘆廣文氈魯壁藏書日齊門鼓瑟年青衿時涕淚學士盡奔遷鸚鵡愁金絡騏驎耻玉鞭客心千里鴈歸興五湖船上國同傾蓋長宵更接筵彩雲停翠管白雪繞朱絃悵別燕臺下淒涼楚水邊海鷗終浩蕩天馬自騰騫朋舊稀相見江湖益可憐因風問消息尺素幾時旋

寄邊太常

不薄淮陽守翻辭大省寮聯翩追近地奉引憶先朝碧落仙人館銀河織女橋漢儀瞻鹵簿虞樂典簫韶日月旂常動星辰劍佩搖聳身殊道路回首隔雲霄河內猶宜借山陰豈見招乾坤五馬貴江海一麾遙雅識懷金奏同遊嘆玉鑣歲年雙轂轉岐路一蓬飄鸞翮終難鍛鸞遷本在喬九苞應不遠覽德是何朝

復菴王公錦

斯人中土彥未老即重泉薦鶚推前達乘驄憶少年聲名起霄漢詞翰落雲烟志在身先退才高道亦全劍橫常自許寶棄復誰憐世業襄城舊孤墳汝路偏脩文應地下遺像儼生前未得瞻風槩空令涕淚懸

愚菴王公瓊

大夫元曠達襟抱絕塵氛香署星辰列清班鵷鷺羣兩都看宦達百案重廉勤要地能知止危途耻策勲早投南郭隱不待北山文身向歸來健名從死後聞一官無厚業諸子有餘芬鳴瑟哀梁木遺書落案芸風花虛館榭烟草自丘墳野路東流水空山歲暮雲九原長不起回首一懷君

雷

十月鳴雷動中霄萬壑哀初聞蟠地出忽覺遶庭迴夜水蛟龍鬪寒山風雨來江濤何處拆天柱此時摧詎識乾坤意深愁號令乖攬衣還不寐坐望積陰開

雨後溪園即事

偃息春朝宴輕陰散野園山雲行翠壁溪雨度河源鷺浴晴相倚鳬飛暖自喧疎楊映遠岸細草入平原開徑徒懷侶臨流且避諠豹終隨霧隱龍豈怨泥蟠鴻鵠皆千里雞豚自一村幽棲何限意難與世人論

中元節有感

去歲中元節朝陵百職同嚴趨神路左遙拜孝園東龍虎瞻王氣乾坤仰帝功未迴衡嶽駕空墮鼎湖弓啓兆龜圖順編年鳳歷終玉衣陳畫幄寶瑟闕玄宮北極猶前日南薰亦舊風病若逢此日長望五雲中

九日

盜賊無休日憑高淚滿纓岷峨日悽愴江漢失澄清故國遺軍壁孤城傍敵營兵戈生朔氣鼙鼓入秋聲吹帽他時興登臺此日情賓朋共一笑俯仰異平生黃菊淮川晚丹楓楚岸晴蹉跎栗里醉憔悴澤中行近郭青山抱迴堤綠水縈長陰接遠甸短日背高城墟里孤砧發關河一鴈鳴臨觴憂戰伐對食想昇平元帥誰摧敵尚書尚用兵幽人獨北望疲卒舉西征秋圃芳菲雜閑門烏雀盈垂蘿飄几席落葉裊簷楹夕竹捎烟勁寒花泫露明光陰玄鳥變湖海白鷗輕放逐寧違性棲遲且避名蒼生大臣在莫自涕縱橫

悼馬詩【并序】

予家買得一馬齒小而良丁卯歲季夏十五夜予忽夢一龍子立堦下跼蹐而死夢警僅在戶外呼曰廐馬死廐馬死予怪且惜之作悼馬詩十韻

乘爾方踰歲何期病忽危四蹄猶未鑿雙淚泫長垂渥水千年降房星一夜隳早逢田子嘆終共塞翁悲顧影辭金絡遺骸戀敝帷詎能酬飼秣那復效驅馳苜蓿殘空櫪莓苔滿故池風塵思駿力烟海失龍姿惆悵玄黃句淒涼赭白詞平生精志在不愧主人知

郊觀二十二韻【以下京集】

今代園丘地天開壯麗區神祇二后配禮樂百王殊制作由皇祖儀章藉老儒萬靈欽受紀七聖亶承圖柴望兼虞典登封略漢模巍基錯采繪法象備堪輿丹戶乾坤闢雕牆海嶽扶瑤壇上星斗琳觀俯虛無輔弼朝玄座勾陳衛紫樞風含浴殿暖雲臯露盤孤好時瞻春祀嵩高聽夜呼公侯守禁籙虎旅發金吾玉輦臨犧宰珍饈走膳夫廟縣鏞鼓列庭舞羽干趨俎豆聯周籩圭璋飾夏瑚祠官足錦繡道士住蓬壺澤草三花綻宮霞五色敷時時聆磬管鬱鬱鎖松梧日月藏金櫃龜龍祕赤符祈天洪洛誥渡海斥秦誣杜甫唐三禮班生漢兩都侍臣從此賦千載頌文謨

壽許司馬

間代生豪傑乘時見哲人雄姿龍馬異偉器廟廊珍浩蕩天開運崔嵬嶽降神扶持元有自制作固無倫磊落先朝事崢嶸報主身九霄隨日月萬里出風塵柱下曾簪筆臺端早曳紳觸邪持豸角糾繆逆龍鱗道直官頻謫時危志不伸流言鑠金石雅操厲松筠行路知桓典專城借寇恂清譽高士論優詔闡皇仁紫禁彈冠入黃沙捧節巡讜謨仍寡合正氣凜難馴厚寵臨危辱幽期邁隱淪班行看解綬河上羨垂緡謝卧東山裏夷歸北海濱蒼生懸望切青瑣薦書頻改革逢多難倉皇憶舊臣帝心虛簡在神武藉經綸指顧三邊靜吹噓四表春朝廷推汲黯帷幄用陳遵圖識魚蛇變營觀虎豹旆赤墀分雨露畫省接星辰下殿常宣問臨軒數見親御香攜滿袖瑞錦賜袍新不屈朱門貴能憐白屋貧散衙時待士開閣晚留賓片善無攸伏微言得具陳重闈俱鏤鏤諸子益振振寶氏燕山桂莊生漆園椿趨庭羅彩服列鼎席文茵夢燕佳辰協乘牛紫氣真庶司欽軌範斯世待陶甄願保喬松歲長登要路津頌聲垂琬琰勳業上麒麟末進瞻休采愚衷實忤忻魏公中土彥誰謂德無鄰

壽泉山先生

德業台衡望精神光嶽靈漢儲懷羽翼周士服儀刑紱舄登三省臯比擁六經飛章白獸闥解組鳳凰亭慷慨陽城餞悽惶楚澤醒丹心對日月白首卧滄溟積慶璿源濬垂芳奕葉馨彩衣萊子宴玉樹謝家庭海嶠神仙窟烟霄鳬鶴翎棲身葺薜荔返老斲松苓花映衣裳古芝凝眉髮青三山開壽域萬里動文星雨露知桃李春秋報莢莢聖朝耆俊禮早晚賁雲局

簡粹夫

二十知學道于今猶未真白髮空愁我金丹不遇人側身向天地舉足墮風塵乘雲空有興涉海浩無津聞君能鍊骨妙論頗通神倘惠長生術高揖謝親賓

送梁鴻臚之什邡次孟望之韻

王官葉縣宰仙令漢庭聞寵餞傾朝俊清光憶近君鷁舟三峽去鳬舫九霄分錦水流營月巴山入陣雲朝廷再遣將郡邑半從軍雍齒封侯地期君早樹勲

寄贈王子衡御史時按關中

獨坐清關內臺中覺汝賢函嶠天下險周召國風先按節人文朗登臺使命宣豺狼避驄馬神鬼泣龍泉文彩驚流輩微庸憶往年衣冠隨謁帝館閣望登仙省接星辰近池臨雨露偏畏途逢改革新法忤權奸放逐江湖去飄零歲月遷地卑棲鍛羽天近起聯翩殘寇猶衝突蒼生極倒懸專征空授鉞募戰豈論錢漂血江河赤僵尸楚蜀連俊才兼武畧要地有威權馬上排金戟軍前贈玉鞭笑談安石計激切賈山篇漢苑南山下秦城北斗邊相思一回首萬里各風烟

贈良伯

帝座神仙侶天河烏鵲橋常時異棲息今日共雲霄念子飛騰入相看衢路遙人猶惜駿褭吾已嘆鷦鷯苑旭高雲閣宮花並玉鑣明光羨起草努力在清朝

贈劉生

劉生何激昂下筆已成章誰敢輕年少吾尤重老蒼王揚操翰墨游夏早升堂汗血真龍種奇毛本鳳凰炎天留玉樹花夕映冠裳霄路雲鴻羽他時看爾翔

送鄭伯生送親還夷陵

送喜潘輿動承歡解玉簪私情烏鳥疏恩詔鳳凰林晝錦供萊服秋懷罷越吟路難回馭志江穩放舟心雨露殘冬景風塵靜夕陰荆門巴國盡巫峽楚宮深碧樹猶春色黃鸝更好音莫因鄉土樂長往故山岑

聞河南捷呈閣內諸公

近得河南定旋收東海疆元兇親受縛餘孽遠潛藏始失徐關險終連郢塞長狐狸窺社稷螻蟻竊侯王清洛千營駐黃河一葦航詎能逃汝漢那敢傍嵩邙勇略傳諸將兵威借朔方中丞兼節制上宰極扶匡霽色瞻宮殿陰氛散渺茫凱音連報捷獻壽屢稱觴天子開麟閣羣公奉柏梁中興當此日漢武是今皇愴往衣冠禍哀茲盜賊猖缺斨悲相國開網見殷湯格鬪中原血誅求海內瘡猶須哀痛詔可少治安章斟酌調元氣扶持立紀綱薦新行太廟覽政坐明堂

不獨殲豺虎還應感鳳凰蒼生倚君相拭目看時康

子衡在獄感懷二十韻

朋儔日乖蹇念汝涕如瀆賈誼生非晚鄒陽志不羣書從梁獄上哭向漢庭聞天地虞羅密江湖釣餌芬路豺那可問屋鼠竟難熏已懼蒼蠅點真成貝錦文神龍在污淖驚鳥失青雲日月盆還覆薰蕕器不分斗間誰辨劍野外枉懷芹談虎嗟何及亡猿禍已云高才元脫略衆口但紛紜木直防先伐蘭芳忌自焚晝臺幽白日冬井下霜氛曉榻明星暫陰墻白草曛連驂虛繯綬尺牘阻慙懃石父遭齊相鍾儀滯楚軍受書賢不死演易聖猶勤縲紲終非罪文章固有勳燕臣霜霰烈庶女震雷殷佇見天王聖金雞早赦君

寄題丹陽孫氏七峯山房

聞爾山房勝青天秀七峯芙蓉疊日月雲霧裊杉松塔倚岳巒積窻通洞壑重丹霞互明滅瑤草自春冬靜得沉冥趣幽探仙聖蹤源潭暗雷雨白晝有蟠龍

蓉溪書屋

書屋蓉溪曲雲林蜀嶺斜一經韋相業萬卷鄴侯家檻護連枝秀池看並蒂葩謝庭森玉樹漢省接金華山月岷峨雪江天灩澦霞花潭通白石錦水出丹沙星野光芒聚鴻霄羽翼遐地靈與文物今古擅三巴

方朔圖

調笑東方朔沉酣金馬門竊桃王母見懷肉漢皇恩月下雙鸞返雲間八駿奔玉盤春不獻丹核代長存事往丹青錯圖開錦繡屯素湍搖弱水玄圃折崑崙種樹非潘縣迷花似楚村千年一結實萬古自蟠根海日紅猶爛天風裊更繁神仙皆羽翼洲島異乾坤無路乘黃鶴何由踏赤鯤市朝棲大隱那識歲星魂

友竹

買園惟種竹身與竹為儔一逕白雲裏千竿清吹幽江亭朝對雨水榭早迎秋翠袖天寒倚朱絃日暮愁風因故人至月為此君留逸駕今誰並前身是子猷人多嫌寂寞吾獨慕清修苦節長如此虛心不外求琴樽忘老病几席共綢繆歲晚根逾固霜繁花益稠山空鷓鴣怨海濶鳳凰憂高志寧須待深棲且自謀何因孤興發吹笛上君樓

渡涇渭【秦集】

北回亂涇渭東眺極澄瀛落日兩盪潏遙天雙帶縈波流互明滅岸折屢崩驚【一作洲渚各

縱橫】隔樹【一作歲】望迴合分濤揚濁清堰渠饒上壤形勢迴西京漕挽通秦甸津梁跨
漢城湮沉九州會雄壯八川名空挹入河志復含浮海情風沙滿世路雲浪渺江程鵲去星源
遠鯨翻霧島輕片帆儻可借萬里自茲行

卷二十四

舟次漢陽【以下使集】

使客舟從漢口來武昌城對漢陽開千年洲在空流水百尺樓高鎖舊臺太白未輕崔顥句老瞞元祐禰生才山川不盡豪華盡落日烟江思轉哀

武昌聞邊報

傳聞彊騎近長安北伐朝廷已遣官路繞居庸烽火暗城高山海戍樓寒一時邊將當關少六月王師出塞難先帝恩深能養士請纓誰為繫樓蘭

長安驛

暮雨蕭蕭雲黯黯數家山下起炊烟窗聞早鴈秋多思門對寒流夜不眠遠使正持三楚節舊遊曾扣九江船驛程南去無窮路來往風塵閱歲年

雲溪驛

雲溪驛裏經過處六七年間兩度行風土不殊初到日雨牆難認舊題名異方見月思鄉縣遠客逢秋念友生明日巴陵江上酒弟兄相對不勝情

岳陽

楚水滇池萬里遊使車重喜過巴丘千家樹色浮山郭七月濤聲入郡樓寺裏池亭多舊主城中冠蓋半同遊明朝又下章華路江月湖烟綰別愁

岳陽城中聞笛

何處笛聲三四弄坐聽疑隔楚江濱落梅折柳怨清夜激羽流商哀白雲月上山樓人獨倚風高秋院客先聞洞庭空濶瀟湘冷縹緲餘音送鴈羣

七夕

夜久高城風露收微雲斜漢兩悠悠閨中擣素思關塞樓上穿針待女牛屏燭夜深秋似水池花香淡月如鉤桂宮高處寒多少誰念嫦娥此夜愁

寄君山

塵踪西過巴陵地尚欠君山寺裏詩十里無緣携客到六年不到使人思空巖竹映湘妃廟舊井潮深柳毅祠湖上老仙誰得遇夜寒橫笛向江吹

華容弔楚宮

別館離宮紛綺羅細腰爭待楚王過章華日晚春遊盡雲夢天寒夜獵多廢殿有基人不到荒臺無主鳥吹歌西江烟月長如舊只有繁華逐逝波

秦人洞二首

桃川道士來相送指點仙蹤玉觀西雲鎖洞門何處問花開溪路幾人迷石橋自發新秋草丹竈長封舊日泥落日山中不勝思松陰竹色冷淒淒

二

聞說秦人此避秦碧桃零落舊時春家移洞裏難知姓水到人間易問津山色溪聲自今古石床礪戶空埃塵洞前即是南征路來往年華客鬢新

月潭寺二首

玲瓏金刹白雲邊踏閣攀林一徑穿龍出洞門常作雨鶴巢松樹不知年僧來殿上鳴鍾飯客到山中借榻眠怪底夜來難得寐秋風窻下遶流泉

二

綠蘿陰下到蒲團茗葉松花進晚飧近水雲霞晴亦雨傍巖樓閣晝常寒旅懷寥落逢秋半僧話淹留坐夜闌惆悵塵蹤又南去朝來鍾磬隔烟巒

出新添城

出城凝望一沾巾行到窮邊見洞民青草時多逢瘴死白茅屋為住山貧秋來萬里倦為客日落千峰愁殺人聞道徵兵需北戰朔方應已困烟塵

憶中舍諸寅

憶昨共陪天北極幾回朝賀識龍顏簾開仙掖宮雲近地隔金河苑日閑青瑣夜歸池上珮朱衣曉入殿中班只今遠使違趨奉清夢常依霄漢間

憶諸同遊

冠珮長安多貴游別來時復見新秋花邊騎馬春遊寺月下橫簫夜上樓鴻鴈不傳長道字江山應繫遠人憂遙知賓館常懸榻經歲誰能為我留

安莊道中

處處人家空薜蘿幾年凋弊擾干戈山過白水峯巒峻路入盤江瘴癘多嶺徼土風連百粵郊原人語雜諸羅側身西望看銅柱此地曾經馬伏波

漢將祠

嵯峨高嶺入雲平嶺上人傳漢將名殊域歲時供祭祀千秋祠廟著神明古牆不辨丹青色深夜猶聞劍戟聲下馬獨來詢舊事殘碑無字紀南征

新興

蕭條窮巷掩荆扉立馬荒原見鳥飛城為燒殘廛市少地從戰後草萊稀燐生陰雨黃昏見鬼哭秋山白日微却怪當年出師者豈無寸策達戎機

普安

日下孤城生夕烟相逢只說敗師年塞門晝閉青山上戍角寒吹白漠前寇至不知重嶺隘兵來能得幾家全居人尚想黔中將統領三軍獨晏然

九日黔國後園二首

何處風烟消客愁將軍臺榭枕山丘一年又過重陽日兩鬢空愁萬里秋水國陰多寒已至炎方霜後瘴初收憑高欲送登臨眼更上池邊百尺樓

二

天空遠水明秋岸梧葉蕭森楓樹殘黃菊數從行處見紫萸獨向醉中看浮雲樓觀滇城暮落日山川熨道寒忽憶登高去年客慈恩湖閣共憑闌

白帝城

峽口風悲猿夜號孤舟燈火宿烟臯草深廢井人家少水落寒山雉 高自古金湯難恃險當時版築豈知勞永安亦在荒城裏玉殿淒涼空野蒿

歸州

暮雲天際見高城行盡千峰峽漸平古郡山頭萬家住客舟江上一燈明竹枝慣聽巴人曲鳥道纔通楚國程未卜東歸何日到片帆斜月對離情

郢中

荆門南下接平疇蕭索風烟似晚秋衰草茫茫楚宮廢荒城寂寂漢江流人亡異代空遺宅歲暮他鄉獨倚樓最是陽春音調古至今歌罷少人酬

呂公祠【以下家集】

落日蕩漾古水濱邯鄲城邊逢暮春趙王臺榭草花盡呂公祠堂松桂新馬上十年元是夢世間何處可還真黃金白髮俱閑事赤日紅塵愁殺人

還家口號

十年奔走違親舍此日歸來喜不禁敢向明時輕組綬祗緣多病乞山林閑居擬著潘安賦高卧寧知謝傅心早晚南巖桂花發開軒相望一長吟

高夔州先生示賞李秀才園中芍藥詩用韻奉荅

李家芍藥開滿堂夔州太守更清狂題詩晚坐朱欄靜對酒春憐白日長好為池臺留爛熳莫教風雨怨淒涼佳期卧病難乘興悵望殘花憶謝郎

五日

五月五日天氣鮮艾葉榴花堆眼前鄉土歲時殊不惡閭閻風俗自堪憐鄰人角黍能相送野老蒲觴得共傳回首十年車馬地每逢佳節淚潸然

病後

病後頻驚節序過不將風景怨蹉跎秋來門巷依楓橘歲晚衣裳戀芰荷洛下閑居辭宦早茂陵消渴著書多鳳凰池上三年客腰裏空鳴白玉珂

吹笛

橫笛高城弄晚颼碧空如水鴈來時關山月落腸應斷樓閣秋生響易悲楊柳天邊渾折盡梅花江畔故開遲武陵回首南征路一曲那堪馬上吹

沈逸士來自吳下能詩善鼓琴間投篇什見訊顧館於城中予以病不得造乃作此詩招致敝

庄

寂寞秋山卧病年美人勞贈白雲篇陳蕃已下迎徐榻王子寧回訪戴船郭外樓臺堪眺望水
邊花樹足留連廣陵失後無新譜莫惜携琴為我傳

邀沈清溪趙雪舟馬百愚登樓次百愚韻

村居邀客慚供給且為青山一倚樓十里沙平遙對酒百年地迴更逢秋城中車馬何人到水
曲風烟盡日留無奈天涯歸思切孤帆八月下長洲

馬百愚同沈清溪見訪次韻二首

門接漁樵只數家柳條藤蔓轉相遮不妨佳句頻題竹况有清尊共對花開閣定攀棲舊榻入
溪還擬著浮槎誰言人世相逢易浩蕩江湖未有涯

二

共憐野外多風景乘興閒過碧水涯草閣連朝聞雅詠楓江萬里得佳期馬卿作賦無勍敵沈
約為文有妙思莫向尊前話離別雲山秋色易生悲

十一月五日雨中邀沈清溪趙雪舟

仲冬風雨似秋來無客蓬門晝自開幽抱向人那得盡窮愁泥我若為裁不禁遠岸梅花照更
見孤城柳色催三徑已拌留二仲相過此地莫遲迴

雨晴

竹裏柴門冬日輝水邊烟霧晚霏微背霜石壁丹楓盛待雪沙田青麥稀自愛羣鳬將子去却
疑雙鶴見人飛西郊風物晴還好誰共看雲興不違

冬至

至日哦詩野水濱乍晴天氣最宜人簷前白日不覺晚山下寒梅俱放春遠客盤飧還偶共故
園風俗自須親病來又見陽回節鳴玉何由拜紫宸

立春

今年臘月逢春日喜見東風隔歲吹沙上柳條已堪把城邊梅花亦不遲離離山郡開雲雪冉
冉鄉園易歲時欲與鄰翁試新酒相邀酩酊莫深辭

燕子次杜工部韻

燕子飛時江柳春眼看節序幾回新亦知社日歸鄉國忍對秋風別主人
舒倦不殊羣物理往來寧有百年身空簾寂寞山堂夕惆悵花枝淚滿巾

秋興八首

高樓一上思堪哀水盡山空鴈獨迴萬里關河迷北望無邊風雨入秋來
故人尺素年年隔薄暮清砧處處催徒有寒樽對花發病懷愁絕共誰開

二

憶在京華近侍年五更清珮入朝天鳳凰池接夔龍會閭闔樓開日月懸
南國自通滄海貢邊塵不動玉門烟只今病卧遥回首夜夜清光北斗邊

三

前歲今皇新御極鳳銜恩詔出明庭孤槎奉使日南國萬里題詩天畔亭
地入金沙江浩浩風連銅柱海冥冥昆明亦在滇城裏池上虛疑織女星

四

蜀中形勝千年在峽樹江花照使袍神女廟深虛暮雨漢王臺迴落秋濤
漁人東望滄浪濶客子西來灩澦高不見啼猿繫舟處風波遥夕夢魂勞

五

漢水東馳入楚來長沙秋望洞庭開江清樓閣中流見日落帆檣萬里迴
去國尚思王粲賦逢時空惜賈生才湘南兩度曾遊地惆悵烟花暮轉哀

六

秋來門巷少經過日日幽懷對薜蘿一笑流光拋客路十年歸夢落漁簑
沙邊返照寒初斂水上浮雲晚故多苦憶梁園辭賦客黃河愁望渺烟波【時李獻吉在汴州】

七

裊裊西風歇衆芳天高谿谷迴烟霜孤城落鴈衝寒水萬樹鳴蟬帶夕陽
塵滿一區楊子宅蓬生三徑蔣公堂相過未有求羊輩醉裏狂歌亦自長

八

千年申國有提封楚塞重關渺未窮舊事祇看東逝水高臺不斷北來鴻連山落木蕭條後隔坐殘花悵望中正是平居多感慨底須辭賦荅秋風

聞望之買馬促裝以詩留之

聞君買馬衝宵發正為慈顏在遠京已喜尺書前日至不妨旌節隔年行故鄉歲暮難為別長路天寒益繫情擬辦盤飧留暫住況逢風雪阻嚴程

同焦太史游青峰禪寺

裊裊丹梯百丈懸上方宮在白雲間川原暮過淮西雨樓閣晴開楚上山厭逐風塵為客久喜將樽酒對僧閒同遊更有情親在並轡山中日往還

十二夜月

待月東林月未圓水邊樓閣半輪偏誰家玉笛休空怨此夜清樽益可憐即向乾坤生羽翰更看江海淨風烟停杯席上遙相問却愧當年李謫仙

人日懷孟望之

人日登高聊引興萬峰寂寞對申臺鶯花出郭還難見雨雪逢春尚未開沙畔柳條悲暮角城邊栢葉照寒杯關河悵望東歸使渺渺孤槎幾日迴

贈袁將軍惟武

雄劍光寒射早秋南征曾共伏波謀萬營貔虎胸中算八陣龍蛇掌上籌誰識淮陰堪拜將獨知定遠合封侯漢家武略多名帥功在雲臺百世留

寄贈劉東山先生次林都憲韻

一疏歸來卧舊山幾回天上識容顏城邊黃石留侯去海內蒼生謝傅閒日月夢隨天闕仗烟波家在洞庭灣南瞻江漢無多路不得乘槎一往還

寄懷端虛堂

草堂風物迥無倫夔府詩成更有神携酒幾時容入社卜居今日願為鄰謝安亦有東山妓文舉元多北海賓珍重城邊花竹樹年年不厭訪君頻

酬高新甫

連篇落落見才華未報瓊瑤祗自誇靈運詩成應夢草江淹筆在更生花行吟出郭愁仍破病起逢春思益嘉不惜清詞三百首品題常到野人家

代孫太守自題沱西別業次劉東山先生韻兼酬東山

黃鸝未比謝家莊綠野還連晉國堂亭榭寥寥看市遠江湖渺渺接天長慚過高士蓬三徑喜望佳人水一方安石他年如未起賦歸應許共徜徉

寄張別駕

苦憶朗陵張別駕尺書今忽到林丘江東亦起秋風興溪上難忘雪夜舟山郭有花空悵望水亭無客自淹留汀蘭岸柳俱相待莫負清樽此日遊

九日不見菊次劉朝信韻

一秋風物已淒涼九日無花只斷腸徒把清尊留客醉不教繁朶向人黃鳴絃急管休相聒舞蝶遊蜂莫自狂獨坐孤城正愁寂更堪落木下斜陽

夜坐

暮雨寒雲黯復開山齋獨坐思難裁水生門外沙鷗至月落燈前江鴈來四海交遊總霄漢十年蹤跡但塵埃長安不見空回首歲晚愁登萬里臺

九月二十六日同賈廣文劉舉人任貢士高夔府先生宅內賞菊四首

陶令門前花盡開郭西騎馬看花來疎枝淡蕊寒仍發細雨斜風晚更催擬向夜深還秉燭可憐秋盡始傳杯相逢一笑真非易共把繁枝醉不回

二

秋來搖落倍堪嗟喜見孤芳殿物華深院護籬元密密小堂穿徑故斜斜清詞屢動詩人座白酒還逢處士家老逐少來無住日莫教空負滿頭花

三

淺白輕黃千萬枝幽香今日始相期雨中籬落人稀到水畔亭臺蝶不知折向秋風堪寄遠種因晚節故開遲去年此會今皆健來歲花時可對誰

四

野店山家開已殘寒來移近曲闌干
亭亭似與霜華鬪冉冉偏隨月影繁
千里況逢佳客賞幾人能得故園看
清尊歲暮東籬下采采金花不滿盤

卷二十五

生子

兩歲歸來生兩雛故園夫婦亦相娛
盧家自愛添丁好徐氏誰言二子殊
未論圖書能繼業且教門戶有懸弧
劬勞正念吾親在更遣悲歡此日俱

溪上

溪上茅齋不掩扉西風初罷芰荷衣
月寒沙柳蕭蕭落天晚江鴻肅肅飛
野客哦詩水邊立家人沽酒夜深歸
相逢醉語休辭數城外黃花漸覺稀

無題

舞嬌歌出絳紗黃金不惜教琵琶
鴛鴦本是雙棲鳥菖元開並蒂花
紫玉豈忘韓重侶綠珠寧負季倫家
多情自古還多恨腸斷春風巷柳斜

次韻荅莊國賓見訊

多病無能合罷官清時那敢獨求閑
遠沙月出明如水高樹雲來暗似山
已恨緇塵侵素服不教青鏡老紅顏
美人歲暮勞相問叢桂山中祇自攀

贈潁川張子辰秀才

聞君已是青雲翼萬里飛騰竟若何
縱有當時許由耳莫教更洗潁川波
麒麟自掣黃金鎖驤裏終鳴白玉珂
知爾匣中雙寶劍塵埃他日為誰磨

荅雷長史四首

每誦清詞動我愁山中歲暮若為酬
因攀桂樹遙相憶欲寄梅花可自由
萬里江湖雙涕淚百年天地幾交遊
誰憐舊日中朝客謫向王門半白頭

二

玉壘青城萬里山亦知歸興滿鄉關
沙邊返照寒將歛江上行雲晚未還
道路南來多壅隔雲霄北望少追攀
曳裾受簡皆清事莫向滄浪羨我閒

三

汝上相逢歲已長故人官况近荒涼天涯白髮催遲暮客裏青尊送夕陽賈誼功名終負漢馬卿詞賦尚遊梁看君尺素遙相慰况是羊何有和章

四

十載寒氈鄭畫師風流文采更堪思朱門鼓瑟官仍達青殿揮毫出每遲百里風烟還薄暮孤城雨雪已多時極知歲晚傷心切起傍官梅自詠詩

送馬公順視學湖南四首

關中人物從來盛况汝才名天下稀得路驂騑看獨步出塵鷹隼羨高飛十年京洛猶今日萬里江湖更落暉同是燕臺舊遊客可堪相見又相違

二

洞庭雲夢眼中寬襄國荆門掌上看三楚樓臺皆壯麗萬年江漢自波瀾烟花白日空愁暮鴻鴈青春尚避寒莫道秦川歸未得人間今日路難行

三

兩年懷抱值君開聞說京華首重回天上故人難再見世間岐路轉堪哀孤舟落日三江口遠客浮雲萬里臺南斗尺書相望切暮天鴻鴈幾時來

四

武昌南望盡雲沙楚岸湘亭更好花桃李百城開士館星河中夜傍仙槎南宮書畫新連舫吏部文章舊滿家直北五雲天更遠欲從何處望京華

王君宿邀蔡大尹過予舍至期雨候蔡不至作詩促之

招邀數費主人迎枉顧何慚令尹情祗為泥途妨出郭未應風雨却寒盟雲間不見仙鳧下花外如聞駿馬鳴玉舄凌空休更怯銀鞍傍險亦須行

讀李子良嶽詩有感

北朝宮闕已陵夷南渡衣冠更亂離誤國始知金櫃册蒙塵空嘆翠華旗龍爭虎鬪中原破海倒江翻萬古悲猶是昔時歌舞地風塵今日淚還垂

早春眺望

山郭輕寒細雨開水邊沙逕獨徘徊艱難世事棲田里潦倒年華斷酒盃
晚日殘霞皆白媚白梅青柳遞相催茅堂春色無人見迸淚看花日幾回

感春

羸病江湖春意生清沙遲日眺【一作照】孤城緣堤塹柳葉相暗隔屋山桃花獨明萬里江
天雙起鴈誰家園樹亂鳴鶯風光物色元非惡觸目經心偏苦情

寄五清先生

地北天南一寄聲楚山蜀道兩關情他鄉歲月仍羈旅故國風塵尚甲兵張翰本非思玉鱸謝
安終不忘蒼生遙瞻山斗徒勞仰苦恨江湖不易行

懷西涯先生

六省尚書第一班兩朝元老領千官空教外國聞裴度未見東山起謝安歸去朝廷公望重老
來湖海路行難兵戈此日交馳檄將帥何時議築壇

寄希哲望之二兄

東風悵別十年懽北斗愁臨五夜看海內君親情獨苦天涯兄弟見俱難孤城落日黃鸝暮紫
塞青春旅鴈寒君夢可曾回故里予心終日在長安

寄任司訓

江湖不見任公子風雨常懷老鄭虔異域親朋皆萬里故鄉花柳又新年青春已共浮雲去白
日難同逝水還為道故人從別後一身顚顚淚雙懸

寄馬君卿固安

絃歌今作王畿宰辭賦元傾上國人易水塵沙連雨雪漢家樓觀接星辰交期祇望雲間履生
計猶慚海上綸寇盜縱橫朋舊隔江湖此日淚盈巾

雨中留蔡黃二親

門巷泥深過客難百年聊共此盤餐浮雲落日山河暮細雨青春樓閣寒近夜蛟龍還入浦久
陰鴻鴈更移灘年華滾滾相逢少莫厭拌留到夜闌

清明日上先祖并兄墓

城西鬱鬱見佳城駐馬山頭悵獨行萬古松楸此丘壠百年花柳又清明音容地下空成夢骨肉人間益愴情更望老親封葬地恨隨春草一時生

袁惟武邀客泛舟夜下次韻

春水逶迤碧樹邊滿筵賓客醉開船情親不厭頻來往笑語何妨更接連遶岸星河天共轉近城鍾鼓夜初傳人間此會真非易荏苒春風為爾憐

葉四公子西園

邀客西園公子家東風二月已飛花巷遮碧柳行春馬樓倚青山落暮鴉移席尊罍遙出浦入舟燈火更依沙清吟況接同鄉彥應有文星動水涯

張太守宅同賈長教會集

遲日香風細細迴招邀更喜廣文陪千年又下南州榻二月同傳北海杯午院雲陰移几席春城雨色映樓臺三鱸五馬皆高客獨愧江鷗共往來

春興

東風回首即殘春日日清江愁白蘋北去雲霄無道路西來天地有烟塵身經貴賤知交態事到安危憶古人却喜故園桃李樹花開又見一回新

袁冲霄先生同惟學過訪

風起高城春日斜相留肯醉野人家白雲對酒看山色青草題詩到水涯隔岸鳴鶯深坐樹傍樓飛燕故穿花竹林萬古追遊地二阮風流未足誇

同高鐵溪先生劉朝信兄宿賢隱寺次韻

雨過青山暮色來僧堂客至燭花開半空樓閣星河動滿院松梧鶴鶴回浮世黃塵兼赤日古人白骨已蒼苔兵戈此際同盃酒愁聽春城鼓角哀

袁惟學南園

樹裏行盃坐日斜池邊立馬聽鳴鴉苔陰雨暮寒青竹水色春深靜白沙開徑蓬蒿無俗客入城花柳似山家百年懷抱君應識不是淹留為物華

登謝臺

故國蕭條登此臺暮雲春色轉相催蓬蒿滿地悲風起樓觀當空倒影來山鳥不隨歌舞散野
花曾傍綺羅開今來古往無窮事萬載消沉共一哀

楊花

三月楊花裊裊白憂人淚點暗中拋漫天撲地有何意惹草粘沙多似毛忽趁狂風翻自遠更
遮落日強相高紅塵滿眼青樓暮攪亂春愁為爾勞

暮春

城邊楊柳飛白花河上春風吹暮沙飄飄歲月此雙燕渺渺江湖聊一槎人情翻覆似波浪世
態變化如雲霞駟馬高車有憂患只須料理東門瓜

秋夜

黃菊花垂霜月陰碧林丹樹各蕭森關山日暮豺狼近海水天寒鴈鶩深萬事誰能看倚伏此
身何必問升沉干戈未息瘡痍在永夜遲迴折寸心

賢隱寺別劉朝信

臘近孤城送客難一尊蕭寺共悲懽山空木葉鳴風急水曲松林背日寒岐路人間妨躍馬十
年天上憶鳴鸞知君此去長安近擬向雲霄直北看

歲暮

歲暮孤城日易陰溪邊茅屋苦寒侵江湖更覺龍蛇遠霜雪翻教燕雀深病起一身惟縱酒愁
來雙淚忽沾襟山林鍾鼎皆吾志北望悠悠萬里心

對雪懷劉朝信

十月孤城雲黯然萬峰飛雪此溪邊烟斜細細縈寒日風急飄飄落暮天何處玉珂迷紫陌幾
家銀燭照華筵茅堂此際堪乘興不放山陰半夜船

寄胡宗器悼內

玉蕭不聽鳳凰鳴銀漢愁看織女星永夜機中悲蟋蟀十年窗下拾流螢白頭司馬空多恨清
淚安仁更苦形見說生兒是奇器他年應慰九泉靈

穀日

翠壑煙開風滿林岸雲沙雪暝陰陰城邊瓜地謀生計溪上青山獨往心野客開樽閑共語田夫負耒亦相尋茅堂春事年年異不廢鶯花此日吟

送任宏器入京二首

四十功名亦壯年丈夫才氣豈徒然渡河春羨蛟龍起望闕晴看日月懸江畔梅花初送雪天邊楊柳正含烟悲歌此日臨燕趙未許奇遊屬馬遷

二

與爾相逢已十年孤城此別意蕭然春來鄉里交游少日暮江湖涕淚懸麒麟未應辭道路豫章終擬出風烟因君遙起長安思況是征鴻又北遷

再送宏器

春日城邊駐客車夕陽山下惜離居燕關悵望風雲外楚水分携雨雪餘萬里登臺先郭隗十年題柱老相如長安三月鶯花爛得意休忘尺素書

題葉邦重山水畫限韻

我愛君家畫裏峰更看茅屋傍雙松白雲不是人間路滄海終期物外蹤野徑一春無駐馬石潭深夜有蟠龍移家欲向溪邊住坐聽青山日暮鐘

題張給事安期圖為乃翁壽

黃髮仙翁白鹿車安期親見棗如瓜玉盤已獻千年實玄圃先開五色花壺裏青天長日月眼中滄海又塵沙觀圖宛識封君面壽酒頻來給事家

贈楊靜之歸真陽

人物遙從泮水看眼中鄉里舊衣冠江鴻終擬登達路海鵠還應愛羽翰九日黃花聊對酒千山紅樹正憑欄真陽城外秋仍好悵望西風白露繁

到寺

樓閣山空暮景懸上方鐘鼓晚來傳白雲獨照孤燈裏新月遙臨雙樹邊常恠陶潛慵入社亦知蘇晉愛逃禪高僧老衲真吾侶蘭若松林可度年

太虛上人為起書樓

書樓新起賴休公況接丹梯百丈通祗為雲林巢此地不須車馬到山中白雲倚檻臨丹壑明月開軒坐碧空更作百年投老計已將別業傍禪宮

遊西山胡本清邀留

獨馬尋僧春到寺萬山邀客晚登臺野人門巷松邊入稚子盤餐竹下來江鳥亦隨山鳥喚紅花偏映白花開頻遊苦為東風意況是情親豈浪猜

新色寺與諸生留別

落日鄉山客淚邊離懷相對各淒然秋原臺殿臨寒景長路風塵入暮天去國已違丹壑志望鄉空賦白雲篇平生師友兼恩義未卜相逢是幾年

趙生書屋

城中無日不塵埃騎馬尋朋此地來籬落過人驚鳥雀庭堦留客掃莓苔不妨濁酒繆綢醉況有秋花爛熳開人世相逢元未易高城鐘漏莫頻催

題任宏器思親卷

十載音塵別夢遙月寒山色暮烟高慈烏樹老情空在杜宇林疎血未銷恨入東風傷綠鬢淚隨芳草濕青袍海天恩義憑誰話目斷雲孤思正勞

贈嚴生

嚴生開卦南門市一日聲名動此邦共喜君平今有後誰傳郭璞世無雙白雲晝覆焚香室清月宵臨讀易窗不把升沉更問汝行藏吾已傍滄江

述懷

紫芝黃獨幾回新霜雪山中又見春萬古光陰雙過客五年江海一歸人豺狼滿地無行路戎馬他鄉有戰塵瀟水河邊釣臺上分明天與此閑身

送周大

月白寒城菊有花孤燈落葉映交加冬亭霧露縈沙曲夜閣星河傍水涯千里賓朋常命駕百年父子更通家梁山楚水無多路來往風塵易歲華

題劉朝信唐學士瀛洲圖

香裊重簾玉署清翠微樓閣報平明花邊歸馬仙袍濕柳外啼鴉御苑晴秦國姓名青簡重龍圖風月彩毫輕千年芳躅君應接共看層空一鶚橫

送惟學南還【以下京集】

一年賓館復彈劒九月燕京未授衣世路風塵悲旅鬢春園花竹夢荆扉扁舟舊泛心常往萬卷今開志豈違京國重來又三載臨岐真恨不同歸

送趙司訓喪偶還羅山

燕姬砧杵催楊柳楚客衣裳緝芰荷宦況不為游遠賦閨情空續悼亡歌愁聞鄭監青氈苦老覺安仁白髮多日暮千山歸故國秋深一鴈度黃河

送易太史歸省湖南

楚鄉秋去息風塵碧石清沙江色新入里競迎金馬士趨庭遙拜白頭人天邊拄杖尋南嶽海畔登樓望北辰亦是長沙詞賦客莫看搖落重傷神

八日王宗哲宅見菊

燕臺菊樹艷秋堂楚客鄉心益渺茫人世幾回逢一笑天涯明日過重陽高雲錦石寒相映細雨清沙濕不妨況是右丞多雅詠可能無興醉花傍

九日雪荅崔太史

常年九日多風雨風雪今年更可哀颼颼仍兼木葉下輝輝故弄菊花開關河朔氣催燕塞城闕秋陰起漢臺今日春秋誰紀異亦知君是廣川才

苦熱

燕京閏夏清涼阻楚客羸軀毒熱偏雨過即如卑濕地雲來翻助鬱蒸天南邦僻地寒江閣西嶽高峰玉井泉思有丹梯凌倒景恨無孤棹截長烟

雨中

苑上行雲細裊裊城邊鳴雨忽垂垂炎天樓閣虛相映燕地風塵日自悲滄海未通吳貢賦黃河猶閃漢旌旗腐儒退食真何補悵望寒江暮有思

聞河南寇

檄書近報河南寇楚塞梁關轉戰空豈有兵車能遠救即愁道路阻難通江淮城塹西南險嵩
洛山川天地中今日至尊憂不細幾時諸將捷音同

西海子

寺下烟波春不開苑中風浪隱樓臺源泉細繞西山出雲氣深從北極來萬里乘槎觀日月十
年登閣望蓬萊黃塵碧水須臾事莫使魚龍夜夜哀

汝忠宅待月同望之

空堂濁酒三人醉萬里清光迴未開深夜西鄰還鼓吹碧天東望有樓臺虛疑星漢城邊照實
怕風雲海上來坐對孤燈各愁思九關哀角更相催

卷二十六

別王秉衡御史

客車梁地相逢日驄馬秦關獨去時
荏苒風塵千里別飄零江海六年思
旌旗暮入黃河戍殿閣晴登華嶽祠
攬轡未應違壯志揮毫先已見雄詞

元夜仲修宅對月

春月重看此度圓酒杯聊得慰愁顏
宮前火樹晴相照苑外金珂晚並還
南去漢兵連楚蜀北來戎馬傍關山
侍臣尚憶先皇宴慚近清光霄漢間

省中贈勤甫

春城紫禁轉逶迤退食相尋出省遲
晝漏遙從宮閣報晴雲先傍苑牆移
行吟才子陽春賦坐映仙郎白雪姿
少日從遊並英俊十年潦倒愧君知

遊郭氏園

郭侯園林清客心況有樓閣炎天陰
亭亭高雲石五色颯颯白日松千尋
已辦清尊為樂事不須出郭開塵襟
鄭谷秦樓豈異此市朝巖壑空長吟

送杜司訓之藍田

少陵詩卷名山水王氏丹青老歲華
勝地常令一悵望儒冠今喜慰生涯
青氈不愧商岩草白髮何愁杜曲花
秦嶺終南得見否宦遊吾已倦塵沙

送張子之浙江

張子別我吟玉壺荷花五月下江湖
南探禹穴行逾遠東望滄溟興不孤
司馬少年遊萬里左思當日賦三都
平生壯觀今塵土回首高歌愧爾徒

寄杭東卿高曾唯二憲副

舊遊俱是吳中俊相憶遙為越下吟
他日雲霄須比翼此時金石更同心
樓船水戰江流急鼓角秋城海日陰
寇賊兩鄉今阻絕北雲南樹各沾襟
【一作各天風雨一沾襟】

簡施聘之

欲扳御史新驄馬擬脫仙郎舊錦袍
五色文章真鳳鳥百年功利一鴻毛
當壚不愛燕姬少倚瑟番驚越調高
二十年來空落魄風流今已愧人豪

壽西涯相公

黃閣文章鳴大雅玉機功業贊維新
十年天下先憂淚五畝園中獨樂身
南極壽星朝北斗靈芝仙草映長春
裴公郭相看前代社稷蒼生望老臣

小齋初開崔郭田三君子至

本買堂齋為客居敢扳冠蓋枉吾廬
清風坐引高人榻深夜門停長者車
竹下涼蟾輝几杖花間螢火靜琴書
黃門翰苑俱鄰近濁酒盤飧意不疎

送雷長史

彤管先朝隨帝子白頭今日奉王孫
漢庭亦羨相如美楚客重看賈傅尊
花下圖書開王殿日高琴瑟在朱門
十年亭閣淮西宴腸斷梁王雪夜樽

寄黔國公

萬里山川開百粵十年戎馬暗三巴
伏波銅柱衝炎塞橫海樓船出瘴沙
鴻鴈不傳天北字瓊瑤空憶日南華
飄飄奉使金門客目斷銀河八月槎

送趙元澤之嵩明州

日莫千花出漢園秋深萬水入湘沅
干戈喜見黃塵息勲業愁看白髮繁
西域瑤琨常北貢南天星斗似中原
一官萬里何嗟嘆倚劒長歌行路言

七夕

楚客旅魂驚巧夕燕京風俗鬪穿針
樓臺送暑催秋扇關塞迎寒起暮砧
海內弟兄風雨夢天涯兒女歲時心
乘槎莫問支機石河漢年年此夜陰

雨夕集世其館

秋風淅淅吹人衣鳴雨瀟瀟晚細微
萬里賓朋留不數十年江海願常違
高城木葉聞先下客舍流螢見已稀
為報春來【一作求】鴻鴈侶塞門霜雪好南歸

八日勤甫惠菊

燕京明日是九日庭下菊花無一花豈意南人分玉樹遂令僻地有瑤華當軒獨酌憐秋石倚檻叢開映晚沙便語南隣田給事不妨就飲過西家

宗哲初至夜集

衛川舟楫九秋旋京洛衣冠更此筵萬里況逢鴻鴈候一杯仍對菊花天燈前月落城烏起堂上雲開塔樹懸聚散古今同逆旅莫看風景倍悽然

九日送師御史之浙中

燕臺九日送行旌欲行不行驄馬鳴祖席正逢黃菊興親闈先動白雲情霜飄斧鉞江邊駐日出樓船海上行磊落此身真報主豈徒壯觀說平生

和張子純白髮

我見秋風驚壯心君悲白髮苦相侵愁多不道潘年少吟苦誰知越思深客裏歲時供覽鏡天邊霜雪助沾襟平生浪說如雲盛蓬鬢稀疏底似今

送張國賓進萬壽表還

名王表達維藩禮賓使恩勤奉教時鳳管暫停秦女曲龍旗遙覩漢官儀秋楓旅夢迴青瑣春草鄉情動玉池歸到定知承睿問雪園梅殿有佳期

送張元德侍御巡畿內

漢京樓殿鬱雲虹淮海文章御史驄三輔自來多寇盜五陵今日更豪雄埋輪亦在都亭下攬轡仍行甸服中滹水太行烟霧裏獨看高隼擊霜空

夜集劉德徵

冬夜深杯醉減愁北堂寒色坐幽幽長安第宅頻相過海內冠裳此並遊竹靜風燈懸近牖天清霜月起明樓燕南楚北誰非客旅鴈賓鴻各自求

慈仁寺送良伯

入寺松陰散鶴羣出城冬旭裊烟氛叢篁僻地猶風葉獨鴈荒臺倍朔雲不奈旅魂江北斷更看仙侶日邊分燕山樓閣晴無數朝暮鍾聲送客聞

劉德徵上陵還有贈

仙郎昨自五陵歸駿馬朝回獨掩扉已向西山瞻帝寢更從北極眺王畿
霜鍾澗壑流清漢玉殿松杉眇翠微先帝侍臣零落盡泰園【一作園花】宮草日霏霏

登勤甫樓

天畔登樓冬日微帝京臨眺轉依依河水海雪春聲動苑柳宮梅歲色歸
豈意雲霄今下榻祗緣鄉土更沾衣風塵此地愁回首嵩洛他年願不違

月夜王宗哲宅贈田勤甫江西提學

南城吹角此宵寒遠客今歌行路難歲暮風烟殊去住天涯燈火共悲歡
西江日落移舟入南斗星懸倚劒看廬岳玉山千萬里不知何地望長安

送劉養和侍御謫金壇

丹陽北郭是金壇此去無歌行路難當道豺狼曾避馬得時鸛隼却驚鸞
風霜華杪留顏色鐵石人間識肺肝漢北陝南今涕淚不知遷逐向江干

送王秉衡謫贛榆

嗟君萬里復南遷此別江湖倍黯然日落塵沙行海上春生霜雪到天邊
中流得瓠常相保九折回車且自全世路風蓬各飄轉不知攜手是何年

送許庭美之浙江

浙上烟塵接楚臯干戈休嘆此行勞吳花越草新詞賦海岫江峯壯節旄
誰惜鳳凰先折翼獨教神駿久悲號尚書風義今如在況覩君才奕世豪

送韓師之邵陽

千金市馬幾登臺老駿誰憐萬里才豈有明珠終暗擲只看桃李向陽開
劍門日落兵西阻河華春生鴈北來父子通家真骨肉不堪岐路重悲哀

送殷近夫之青田

石川居士昔淩霞為吏風塵不怨嗟海上故栽彭澤柳江邊新種洛陽花
飄飄暮送凌空舄渺渺春迴上漢槎安得便同仙令去遠從勾漏覓丹砂

奉寄泉山先生

北戰南征兵未休我師高卧只林丘蒼生尚繫裴公望白髮寧忘范老憂江上弋人徒慕鴈海邊漁父不驚鷗冥冥蘿月三山外獨倚京華萬里樓

晚過君采次韻

朔雲卧對寒城菊燕月留沽晚市醪向客靡蕪南國遠背人鴻鴈北風高杜陵愁極惟雙淚潘岳情多已二毛同病相憐不同去莫將江海問西曹

得獻吉江西書

近得潯陽江上書遙思李白更愁予天邊魑魅窺人過日暮鼃鼃傍客居鼓柁襄江應未得買田陽羨定何如他年淮水能相訪桐栢山中共結廬

夜訪黃明甫

相憶江湖夢寐前相逢京洛更悽然白頭重感同盟意春雪猶傳寡和篇醉裏菊花開晚暮坐深金鼓動霜天十年岐路無窮事話對秋堂夜不眠

雨過徐舍人

長安六月半雲雨孺子軒牕清杳然炎暑未能侵此地虛無只擬對江天花邊冉冉輕雷映竹裏微微夕景懸訪舊一尊那惜醉衝泥匹馬更須憐

雨後汝立見過承詩贈

渺渺城波淨客堂朝回高詠接仙郎炎天忽送風雷氣僻地惟聞草木香欲借沙堤添水檻祗疑車馬駐江鄉一杯暫許留今雨隻字真看比後光

十六夜劉子宅對月次韻

芙蓉清月鳳凰城露白秋堂碧霧輕一歲未令今夜減百年能得幾宵晴雲間鸞鶴霓裳曲海上神仙赤石英楚奏燕歌俱感激塞垣江國重含情

夜過君采

天邊歸客滯寒城下馬殘尊萬里情冬館明燈猶艷菊水鄉春棹杳啼鶯風塵歲暮愁相送險路人間悵獨行莫把悲歌助哀柝北堂今夕淚沾纓

無題回文

絃中曲怨不同調早見相如病骨銷
眠獨夜烏啼渺渺夢多春草碧迢迢
烟生暗閣鸞沉鏡月落空樓鳳罷簫
年往恨花飄水逝傳書有鴈一停橈

送海岳陳翁還常州

海岳先生眉髮青北遊歸興渺滄溟
雲霄萬里看辰極河漢孤槎送客星
裊裊菊花南國宴萋萋草北山亭
水雲曲奏流金石風雨蛟龍夜夜聽

送良伯

去年秋杪遙相送今歲冬殘復此行
寸草獨牽千里思一枝同有上林情
江楓野泊停霜夜海日官船動水程
何處逢人問消息梅花南國望春生

以道席上送世其與其妹丈蕭執夫同行

燕山杯酒暫相隨楚岸扁舟遠並移
鄉土青春歸有伴風塵滄海見無期
舊遊每憶三江興此去遙傳五岳詩
弟妹憐予各飄轉天涯送汝不勝悲

兩湖書屋

書屋何年結構成青天對落兩湖清
岸迴沙檻鼃鼃坼水抱晴牕日月生
開卷已知當世事下帷應見古人情
扁舟南國無由並暮采芙蓉恨獨行

送韓大之赴新都

漢庭仙令幾時回蜀道風烟此日開
萬里一琴將鶴去九霄雙舄望鳬來
雲邊石棧斜懸閣樹裏春流曲抱臺
藏器久知盤錯志脫囊今見古人才

送劉朝信之江山

江山縣中山木蒼颼颼風林開豫章
嶺石細通閩鳥道澗流斜帶楚人鄉
青天岸幘時行郭白日彈琴不下堂
同學共知年少志豈將書劒負行藏

簡汝立

汝病幾時辭省署我懷終日念鄉關
風塵對酒空行路雨雪逢春尚在山
少室三花無客采小山叢桂有人攀
淮南洛北如相訪一鶴雲中往復還

蘇考功宅宴集

九衢春月罷歌鍾萬井晴烟翠欲重吏部文章今再見漢京冠蓋日相逢流鶯漸歷宮中柳鳴鶴先傳寺裏松細酌清吟聊此席北山南郭是吾蹤

荅盧侍御樊氏洞中觀梅見懷之作次韻

主家花憶繡衣人仙洞詩看玉樹親未假霜威同索笑却因麗藻獨傷春秦簫暗度樓中月洛襪微生水上塵白雪西臺真有調碧江東閣恨無津

送賈學士之南都

金陵樓閣九天開銀漢仙槎萬里來宮月夜懸鳩鵲觀江流春轉鳳凰臺真從北極看南極却望中台接上台鳴世早傳吳下作逢時真【一作更】羨洛陽才

和李宗易內翰立春日作

春日長安車馬迎密烟輕旭弄朝晴詩來草動池塘色吟罷花增館閣情萬里江湖桃竹杖十年風雨鐵燈檠一官樗散空時序又見春盤細菜生

送施聘之侍御

海甸春風攬轡情燕關驄馬去還鳴繡衣霄漢花間出錦纜江湖樹裏行近日西臺多諫草少年南國有詩名別絃更憶風流調愁聽東城二月鶯

送劉令還襄陵

聞道襄陵有勝遊西行風景似南州竹蟠縣裏青青出水到城中曲曲流仙客候鳬知下舄吏人迎鷁見回舟亦知枳棘棲鸞地露冕重來只暫留

送都南濠歸吳

愁論白首為郎日喜見青山送老年去望雲霄皆動色到知鄉里更稱賢丹梯五岳盧敖杖春水三江范蠡船他日著書應不少可無人識子雲元

輓陳翁

復清堂上罷鳴琴彭澤門前柳自陰萬里聲名傳翰墨百年圖畫想山林江邊鴻鴈冥冥逝海曲蛟龍夜夜吟五色近看雙鳳羽赤霄應慰九原心

三忠祠

三忠祠在帝城東檜栢陰陰沙院風朝暮冠裳頻下馬春秋香火一開宮中原涕淚江山遠異代精靈廟宇同漢業崩摧如宋業古今南北恨無窮

送杭憲副兵備天津

天津橋北望京樓金鼓東行節使舟日月晝懸滄海樹龍蛇春壓九河流百年貢篚通南極萬里旌旄屬上游莫笑談兵尊俎上書生元不為封侯

謁李文達公祠堂

故相勲名未渺茫先朝賜第轉輝光青松雷雨餘枝幹古屋塵埃自棟梁魚水已無千載遇斗山安有一時忘雲孫更是通家誼常拜冠裳到此堂

衍慶堂為無錫錢世喬作

華堂結構琴書敞吳越衣冠族姓繁遠向西山占氣勢深從江水問泉源新巢燕雀生成去古木蛟龍屈曲蟠他日長卿乘駟馬始知于氏有高門

寄世恩愛日樓

東曹昔賦望雲行南國今傳愛日名九折豈忘回馭志百年真慰倚門情江鄉春水鱗魚至海岸冬雷竹笋生珍重樓中調膳者此身何止萬金輕

送闕郡博

郡學宮牆入翠微廣文今去有光輝久知白首甘貧病且坐青氊息是非石磬古堂時自發風雩春服暮同歸城中來往多冠蓋名教無言樂地稀

送吳司訓之內丘

內丘城閣夏陰陰窈窕儒宮雙檜林六月沙郊騎馬到四時潭水聽龍吟青氊况屬斯文地朱色還聞大雅音亦是洛陽年少士白頭今日始冠簪

鱗魚

五月鱗魚已至燕荔枝盧橘未應先賜鮮徧及中璫第薦熟誰開寢廟筵白日風塵馳驛騎炎天水雪護江船銀鱗細骨堪憐汝玉筋金盤敢望傳

卷二十七

雨過何太僕

簷日陰陰喧晚雷坐深庭樹不思回捩風鸛鶴城邊去截雨虹蜺海上來詩興西堂還舊草酒杯東閣又官梅陰符遁甲談兵罷愁向烟塵兩鬢催

為隴州李舉人壽其伯尚書公

見說尚書解綬還七年高卧隴西山曾懸履舄星辰上更閃旌旗楚蜀間老伴青松全晚節靜餐丹藥駐春顏竹林仲子追隨地二阮風流尚可攀

荅劉子緯雨後之作次韻

萬里秋風張翰魚扁舟常憶楚江漁窮愁阮籍猶耽酒老病虞卿只著書風晝海蒸雲自起水天沙霽日微舒劉郎數月稀相見喜送新詩慰索居

天壇雷道士院

帝宮高鎖漢郊畿羽士琴書靜可依蘿洞晝棲雲霧入石壇秋禮珮環歸叢叢晚竹臨風整嘒嘒元蟬曳日微渡海却思千載事買山今恨十年違

送王御史德輝西巡

中朝御史重西巡獨下青霄斧鉞新隴雪洮雲行塞日胡琴羌管奏邊春蒲桃不博涼州地天馬還隨漢使臣白筆萬人看氣象肯令河外有烟塵

送衛進士推武昌

少年佐郡楚城居十郡風流盡不如此去且隨彭蠡鴈何須不食武昌魚仙人樓閣春雲裏賈客帆檣晚照餘大別山前江漢水畫簾終日對清虛

送顧隱君還常州君來視其姪中書子進士

北庭綵袖日邊聞南甸青山海上分阮氏竹林推叔父謝家玉樹有郎君河關曉發隨燕鴈江路秋帆拂楚雲歸向惠泉攜舊客菊筵開酒送清芬

十六夜尹舍人宅次劉汝忠韻

今年月色倍常年今夕還如昨夕圓江上鼃鼃皆有窟塞南鴻鴈不同天坐遲宿霧開風館酒
罷餘輝散燭筵忽聽玉簫傳鳳曲瓊樓高處綵雲偏

九日獨酌簡何太僕

無客秋堂菊自芳寒城獨酌對重陽愁來轉覺登臺懶病裏誰傳落帽狂海內弟兄非異姓楚
南賓客本同鄉十年躍馬從君地風雨看花意不忘

冬至

小至燕關眺望深吐雲山谷氣陰陰異鄉醞酒誰相醉獨客篇詩祇自吟入面風霜增老色向
人梅柳動春心江湖更發南尋興極日茅堂楚岸林

送杭大參之河南

十年京國重才雄汝鄧山川喜借公杜甫交遊傾海內謝家兄弟擅江東褰帷正屬瘡痍日開
府元當控扼中冬暮遙看南去節楚天春望北來鴻

同馮光祿登慈仁寺閣

今度慈仁寺閣遊翠烟冬日抱重樓冥冥繡拱盤空界裊裊丹梯接帝州立傍星辰天北極坐
看雲霧海東流也知光祿高情興自合題詩在上頭

哭以道

淚墮平生邂逅吟想看垂死更傷心天涯見面愁雖減海上傳書病已深萬里艱難歸葬日百
年哀怨絕絃音他時若挂留徐劍忍向橋山覓墓林

送以正歸其兄櫬還關中二首

賢兄客死在燕山令弟將歸陝路難哭向北雲扶旅櫬望窮西日見鄉關原鴿雪羽飛偏急屋
樹春花發自斑岐路斷腸生死別暮天回首淚潺湲

二

君家昆季總能文哭友那堪更送君嗚咽黃河流渭水迢迢白雪度秦雲即看斷鴈離羣去況
屬連枝落葉分少弟長安終日望西來消息早相聞

二月見梅

二月寒梅開滿枝素心寧與艷陽期攀桃映李千花妬弄日含風一樹垂不向天涯傷歲暮豈緣江北見春遲巡簷一笑聊相慰鬪色爭妍非爾時

送蔣子雲冬官病還揚州

卧病長安不出門話歸南國暫留尊春來日日風塵色海畔冥冥天地昏坐傍桃花停岸舸行隨楊柳到江村楚山亦有蘼蕪草遊子空傷萬里魂

九日同張膳部劉符臺遊法藏寺

東林地僻無人到九日天清有伴尋在野興深增感慨望鄉心遠慰登臨叢篁雨颭春牆碧老檜霜留古殿陰共酌昏鍾驅馬出獨聆風鶴送餘音

詩上郭价夫內翰兄聊寫隕珠之痛兼致夢蘭之望云

四十生兒身未老萬行哭子淚難收乍看入掌明珠動不見凌雲玉樹留門下公侯應有種堂中賓客尚回頭蕙蘭若報三春夢消息先寬二老憂

對雪

九衢飄雪亂人行獨坐開堂烟霰生曲檻回廊輕駐景裊雲停日重含情風前花絮疑三月天外樓臺望五城出塞燕歌翻自苦入筵春曲向誰成

閣直立春日雪

天門望雪瞻華蓋御苑迎春試碧桃牕色向明通散帙鑪烟當晝引揮毫雲連睥睨銀城迴風繞罽毼玉殿高綵仗數移西闕宴金花虛映北宮袍

送崑山王令還

九霄懸舄朝天至萬里揚帆上斗回海甸風流無陸謝漢京詞賦有鄒枚青鳬野送高旌駐綵鷁江行疊鼓催悵別忍看燕草色寄詩須折早春梅

懷寄邊子

汝從元歲侍今皇誰念先朝老奉常一出雲霄空悵望十年岐路各蒼茫春天縹緲金莖露晝日氤氳紫殿香獨有揚雄尚陪從白頭抽筆賦長楊

題嚴內翰賜扇

端陽綵扇百官傳每歲宮臣賜獨偏君去翰林供奉久始來經幄拜恩年頒從殿閣風先動捧
向雲霄月並懸象轂銀鐙倍光寵好揚薰吹助虞絃

寄題鄭園

三山今有鄭公園避俗從來亦避喧蘿竹青青垂谷口花林靄靄覆桃源天邊鴻鴈春寥廓海
畔蛟龍畫曲蟠南斗尺書招隱意白雲叢桂幾攀翻

立春日

楚客年華悲塞國燕京春色念江潭香迎苑雪梅先放翠入宮烟柳乍含行在旌旗猶駐北朝
廷冠冕自通南青山起策青藜杖白髮羞看白玉簪

送陸舍人使吳下

柳拂清江畫鷁飛節旄更喜便南歸迴風樹裏吹【吹一作催】官騎返照河邊上客衣北固
樓臺秋寺遍長洲花草故宮非登臨莫怪多詞賦吳下才人是陸機

送徐舍人使南都

御書親奉出金扉草綠南徐四牡駢江上登臨鄉思遠客中離別宦情微潮生鐵甕迷前代雲
起金陵識舊畿悵望一春詩社冷有誰吟對省中微

送秦豫齋南歸領教安仁

兩年京國喜同遊忍送孤帆下潞洲世事悠悠鴈南去客懷渺渺水東流雲間樹色通吳會月
下潮聲過石頭聞到錦江三畝宅開門遙對萬峯秋

送李長蘆先生

十年相見倍相親風表依然道義存幾憶趨庭陪鯉對無緣縮地拜龍門停杯慷慨論前事撫
劍踟躕感舊恩一別重逢更何處鴈聲東下海雲昏

送徐主事還金陵

送客出門三月暮片帆遙見石頭城南方山水登仙輿北望星辰戀主情花暗河津天雨細月
殘江館夜潮平鳳凰臺上重回首六代繁華野草生

送夏少參之蜀

岷峨東下江水流劒閣西來烟霧收黃牛峽隘幾人到金馬臺荒何處求父老三巴應渴望丈夫萬里是奇遊錦官城外經行處古柏祠前拜武侯

至日過徐德章

竹門寒旭鳳城隈春氣潛浮地底灰世路十年長不定客懷此日更難開天邊梅柳垂垂發歲暮陰陽冉冉催見說吳江酒船到即留飲夜深回

陸子樓夜集

夜來繫馬樓前樹暮倚危闌對雪人世百年還易過天涯此會亦難逢浮烟近接千家市落日遙聞萬井鍾殘歲良宵俱可惜紅塵分手莫匆匆

望雪

中原日見黃塵生上國空懸白雪情當晝風雲垂忽散久晴江海凍難成農人隔歲猶須慮寇賊今冬尚未平安得時和人更樂普天無盜勸春耕

送周令之蒙城

少年學道天下無白首談兵氣尚矍郎位星辰瞻百里縣城山水接中都留侯黃石橋邊履葛令丹砂海上爐暫向風塵淹老驥擬看雲影候仙鳧

亟谷草堂贈許廷綸

萬里河山一草萊百年松檜此堂開晴瞻華岳青天上晝望仙人紫氣來避世且耕歸馬地乘時須起卧龍才長安送別風塵暮洛日嵩雲首重回

寄康子

十年朋輩飄零盡海內兵戈戰鬪餘花劇秦川誰見汝鴈稀燕北渺愁予碧山擬著潛夫論丹壁應藏太史書自笑此身今更出風塵空望白雲居

壽羅山胡侍御

直道清風天下重壽年況復古來稀江邊舟楫非忘世海內干戈早拂衣白石靈芝春自長秋山黃鶴健高飛更喜繡衣經故里遙看綵服拜重闈

和王司封

仙省新詩幾度傳一吟鄉思一淒然許身自比南金重浪迹聊為曲木全燕地湖山春酒畔楚天風雨夜燈前看雲聽鳥同今日躍馬登龍憶往年

送李公從地官

鄉路春行傍九河帝京晴望五雲多城邊金鼓花時發海畔樓船日夕過樹映仙郎添寵色草迎遊子助悲歌同朝更待青霄節並馬能忘白玉珂

用韻荅以行

無客琴書晝掩堂有詩先夢謝家郎雨來碧草遙添色風過紅蕖不斷香多病更逢愁是敵此身那得醉為鄉巷南巷北稀相見偏側歌殘送夕光

石磯

石磯無伴滿蒼苔秋杜春蘭晚自開江日烟波雙鳥去楚天風雨一舟來釣鰲獨有滄溟興夢鶴誰知赤壁才芳草歸人不愁思水雲山郭見章臺

元夕以道宅同蘇管二君子

烟滿春城夜色凝露融金掌月初升愁邊鼓吹頻催宴望裏樓臺盡放燈四海朋簪今有盍十年岐路已無憑相知更遇秦中俊欲贈瓊琚恨未能

輓范君山和其絕筆詩

老去詩篇興未休吏情終日問滄洲寒江夢落烟波斷南嶽魂來霧嶂收一別人間真異世十年天上可同遊魚龍寂寞瀟湘冷誰采蘋花薦晚秋

雲卿見訪次韻

悠悠世路誰知己莽莽乾坤獨愛才近接南州留下榻久開西閣待傳杯雪霜暮向天邊盡鴻鴈春從海上來細柳明沙相送地不妨騎馬夜深迴

封君許太史公壽章

仙人親捧紫瑤編鳳鳥雙盤赤錦箋天上封章傳翰苑山中壽酒屬春筵星辰影動台垣裏林壑光生海岳前回問郎君碧霄路石麟金馬玉堂懸

過寺訪以行

今年春色倍堪思
柰爾看春病起遲
牕矚太行雲斷處
坐聞江漢鴈來時
柳香漸撲燕姬酒
草色頻催謝客詩
更欲息栖尋野寺
細蘿芳杜碧山期

送戴進士時亮

戴生長嘯出燕州
知爾尋仙不可留
相望有時攀玉樹
此行何地訪丹丘
乘風逝鼓洪濤柁
觀日回登滄海樓
白晝果然生羽翼
青雲奚羨帝鄉遊

登樓觀閣時王令明叔邀張用昭段德光王敬夫康德涵四子同遊二首【以下秦集】

百丈丹梯俯翠岑
千年壇殿肅陰陰
風吹陸海黃塵暗
雲去函關紫氣沉
春花況屬絃歌邑
勝地還成翰墨林
香山洛社俱寥落
文采流傳直到今

二

峻閣含風落照孤
憑高千里視平蕪
鳳笙錦曲春縹緲
瑤草金光晝有無
採藥幾時尋碧海
種桃無復問元都
五陵冠劍豪遊地
猶是長安舊酒徒

輞川

飛泉萬壑通藍水
仄徑千峯入輞川
野老豈知旌節到
世人空作畫圖傳
鼉鼉岸坼深無地
鷄犬林開忽有天
即此買山堪避俗
桃源何必訪神仙【深一作疑】

華州作柬桑汝公

秋城雨色靜微塵
過陝山河望轉新
天上岳蓮開二華
雲中關樹引三秦
追遊少小還今日
浪迹乾坤任此身
乘興欲攀仙掌去
未知登覽共何人

東林書院

東林精舍接東城
出谷先歌伐木聲
氣象久瞻程伯子
樞趨今見魯諸生
芝蘭入室香俱化
桃李開門樹總成
河渭滔滔同向海
濟川舟楫幾時行

劉士奇張時濟過觀雪行

裊裊朱絃留上客
冷冷修竹對高軒
重簷舞雪銀花綴
曲檻回風翠葉翻
湘浦珮環臨渭浦
秦園詞賦擬梁園
從今開徑延三益
聊共傾壺散鬱煩

送胡承之北上

秦關迢遞南山曲漢閣嶙峋北極長揚策恥誇終孺子上書不學老馮唐斗邊銀漢仙槎影天上春雲畫省香此去中朝才子列定知詞賦有輝光

送盛斯徵巡撫四川

向來才藉九重知此去勲名萬里馳玉壘霜威侵斧鉞錦城花色駐旌旗征南諸葛籌先定化蜀文翁事更宜巴水秦山元自接好音莫遣北來遲

七言排律二首

平夷所老人【使集】

平夷老人髮兩肩哀哀淚落古城烟歲收斗粟輸田賦日向諸鄰乞米錢風雨飢寒趨路側子孫流落避兵年青春有伴難還土白首無家尚戍邊官裏征徭何日已軍中苦樂古來偏魂驚戰鼓心猶怯臂中飛弧肉盡穿獨去負戈巡夜柝誰來銷甲種春田朝廷德意思柔遠闔幄謨猷在識先荒徼本為王者外卒徒能受帥師憐敢愁溝壑填衰謝只擬封疆得靜便我願麾前法唐將籌邊有策到今傳

寄李郎中【家集】

星辰畫省鳳凰池同接金門白玉墀庭樹晝閑褰碧幕苑花春好並金羈西京車馬誰言樂東漢衣冠忽已悲萬里艱難歸故土兩鄉迢遞限雲逵青冥垂翅人皆惜白日批鱗世所知天上神仙元有謫古來賢聖本多危陸機入洛名逾盛司馬遊梁賦益奇海內競傳高士傳朝廷誰訴黨人碑齊堂雷震冤臣出魏闕天高獄吏欺千古死灰安國淚萬年災異廣川辭虞羅亦放冥飛鳥卜獵何煩後載罷得失竟須知塞馬榮華終不易塗龜嗟予蹇拙慚君匹念汝風流實我師索處自應思故舊生涯今已笑支離遨遊昔忝登龍會驚下深懷附驥思貢禹王陽同出處鍾期伯子是交期河陽雲樹情俱苦渭曲烟花願豈遲回首西山多寇盜扁舟南國有旌旗腐儒潦倒愁溝壑遊子飄零枉歲時路阻時危難會面不禁涕淚望君垂

卷二十八

兵書峽【使集】

空巖一卷書綠苔字應滅志決功不成千秋有餘烈

絡緯吟【以下家集】

絡緯催寒女悲吟入總幃秋風啼不斷相伴下鳴機

雨後十首

水漲孤村白天垂四野青開門秋雨霽閑步郭西亭

二

竟夕雨連舍今朝雲出溪輕雷千嶂外斜日數家西

三

三日不出門草長門前路登樓一水明倚柱千山暮

四

人歸郭門樹鳥噪野田風雨散高城上日落深澗中

五

畫角城隈起風吹響入雲清秋易生感深夜更多聞

六

遙看三角山正在雲生處日暮山人空攀荔枝樹

七

片片白鷗鳥看人隊隊飛沙頭莫相認與爾久忘機

八

檻倚崩沙出籬通亂水過家人休掃石自愛碧苔多

九

朝聞城西鍾暮望城西寺寺傍二古松長藤垂到地

十

塘邊楊柳樹春條秋未摧已送黃鸝去還看白鷺來

八哥

牕前八哥鳥學語太輕狂何須似鸚鵡自遣羽毛傷

獨坐

獨坐鳴蟲起秋懷已不勝西風牕下度木葉灑寒燈

獨立

獨立對秋陰冥冥望河渚只見沙上烟不見烟中雨

風雨

西郊秋日暮雨細更風斜應為重陽近來催菊著花

長安

白雲望不盡高樓空倚欄中宵鴻鴈過來處是長安

簡趙雪舟乞菊二首

聞道君家菊黃花爛熳開若能移贈我端勝白衣來

二

我有白玉酒君有黃金花相看九日到分送野人家

九月桃梨花

九月桃梨樹花開滿故枝寄言車馬客不是 陽時

寄劉東之憲副二首

百里山河外孤城雨雪中遷鶯猶未起應是待春風

二

長安經歲別日日望春歸不及隨陽鳥雙雙又北飛

寄孫世其四首

騷裊如龍馬長鳴碧草萋莫將千里志暫悔蹶霜蹄

二

對書當為讀對食當為飽平生無限事努力在遠道

三

戴生北上日吾吟寶劍篇相過若相見高詠亦堪傳

四

旅食京華暮那能不憶家封書何日至塞鴈一行斜

白雪曲十首

美人朝玩雪置酒臨高臺祗疑仲春月風送落花來

二

舞雪流中堂揮袖拂不去細看簷外花半著庭中樹

三

暗逐梁塵起潛隨燭影流似憐歌舞處故故入高樓

四

弱雪不到地宛轉高雲裏時有飛花落風迴更吹起

五

梅花開雪中相看鬪奇絕常教雪似花莫遣花成雪

六

裊裊冒城烟皚皚積暮天六花呈此日三白兆新年

七

艷曲燈前囀輕盃掌上揮開簾炫積素當戶挹流輝

八

駿馬黃金鑣胡鷹赤錦絛風搏千里翮雪點五花毛

九

公子狐白裘馳馬城東陌不見馬行影但見雪花白

十

簾幃照明雪美人起常早行看玉階上一夜長瑤草

出寺

春遊翠微裏晚下白蓮臺立馬遙回首青山暮雨來

璽上人送茶

鬱鬱雲中秀山僧採相饋我有毒熱腸此是清涼味

雨雪歌

千巖雲電烈萬室風霆翻中宵雨撼壁平明雪滿山

小景四首

樓閣倚江濱桃花照暮春安知看花者不是武陵人

二

草閣散晴烟柴門竹樹邊門前有江水常過打魚船

三

照日楓林赤含風菊蕊黃家家白酒熟何處過重陽

四

遠岸凍雲落高林寒日斜前村昨夜雪聞說有梅花

寄李獻吉二首

君作梁園客予登楚水臺春風河上柳不寄一枝來

二

渭水天邊樹黃河日暮流春來千里外知爾故鄉愁

題畫

翠壁層層合高松颭颭寒白雲晝不掃常滿石闌干

空屋見桃花

山桃空屋裡轉徙未還家獨有春風到猶開滿院花

聞蟬

二月寒蟬至哀鳴亂葉中林花滿眼發蕭颭似秋風

登樓

獨坐高樓上看花淚暗流東風無限好日暮使人愁

邀劉文直不至

劉郎招不至嗜酒世間稀爾是劉伶後何妨荷鋤歸席上分得時字送豫章二首【以下京集】

澤國登樓處江船見月時回書寄來使多是客中詩

二

花影晚離離迢遙動遠思清宵不成寐山雨到牕時

雙梧草堂二首

君愛堂前樹嵯峨碧幹雙相思秋月下楓子落雲牕

二

記得別草堂采采桐始華銀床飄一葉秋到美人家

扇面小景

山色碧於苔晴牕日日開遙知抱琴者應為看山來

題畫二首

縹緲春山雲離離春江樹君看江上山不是人間世

二

古洞入青冥山通武陵渡漁郎莫放舟恐失花間路

飲鮑以忠

萬戶夾垂楊君家大道傍相逢一尊酒何惜醉他鄉

謝泰公饋杏

饋我高林杏開函爛如火安得祗樹園從公問真果

送泰公茶

英英白雲華采采六山秀為問病維摩此味清涼否

晚出左掖簡薛君采二首

玉河迴宛轉丹闕對嶙峋出入雲霄上蹉跎江海身

二

露重芙蓉館雲輕翡翠城文園病司馬消渴望金莖

清明二首

城南好花樹不作看花行恰好人來日春風不放晴

二

何限新桃李春來樹樹花不爭風雨惡無奈委泥沙

秋日簡川甫

紅葉翻霜畫青苔積暮天若無桓子過誰問子雲元

荅施生二首

二泉門下士海內早知名通家一書札萬里各含情

二

日射江門動龍蟠海霧生排空有羽翼不上九天行

至日荅良伯

天邊登北樓歲暮望南國江梅與塞柳莫問春消息

十六夜賞月野塘宅

今夕非昨夕清光依舊多後庭開月燕窈窕轉春歌

鳳縣【秦集】

畢郢藏龍地南岐集鳳岡嘉陵江水色萬古向西康

六言律詩二首

上元葉邦重別墅歸【家集】

昏鍾野寺到郭晚飯人家出村斜日山顛水曲東風萬戶千門星河渡口深夜燈火城中上元
猶似去年今夕不堪烟景銷魂

盤屋清明日【秦集】

客裏遙逢令節城中不見繁華南山漠漠烟遠清渭迢迢日斜獨樹桃花自發高樓燕子誰家
可惜年年春色催人白髮天涯

六言絕句六首

贈賈司教先生【以下家集】

春風桃李絳帳朝日苜蓿空盤王公不志溫飽鄭老豈為飢寒

一賤一貴世態有憂有樂人情應鱸關西夫子知魚濠上先生

江南思四首寄曹毅之【以下京集】

燈下雨鳴秋舫浦口潮迴暮鍾何處相思不見江南開遍芙蓉

月冷荒祠苦竹秋清玉殿蒼苔一望雲帆無際沙明白鳥飛來

細雨寒城催棹夕陽孤嶼鳴鐘到寺莫題蕉葉渡江為採芙蓉

竹淨娟嬋帶月山寒杳杳沉暉天邊晚樹獨眺江上春潮客歸

七言絕句五十一首

玉菴【為黔國賦以下使集】

虛閣清風竟日留白雲暗對小牕幽我題名字琅玕上珍重霜標奈得秋

遊黔國魚池四首

小岸城邊上輕舸一溪宛轉向魚池水藤濛濛荷葉暗棹入中流總不知
池邊二十五亭臺箇箇朱牕向水開亭下扁舟蕩雙槳打魚送酒幾回來
半竿斜日疎蒲明兩岸人語鳧不驚菱葉拂衣香袖舉秋風吹浪綵舟輕
三陣五陣打荷雨一點兩點照水螢笙歌留客不知夜燈火迴舟直到城
夷陵

夷陵城邊江水渾無數輕帆落遠津萬水雲中三峽路猿聲愁殺渡江人
溪上水新至漫興四首【以下家集】

溪上水生三尺深茅堂清夏氣蕭森無錢即買扁舟至繫向門前柳樹陰
雙飛鷺 戀青莎對舞蜻蜓愛碧波一夕水風開菡萏畫船齊唱採蓮歌
菡萏風前花不稀菖蒲雨後葉初肥黃鸝白鷺知人意來往鸕鷀洲上飛
碧沙青泥俱可憐白鰱赤鯉不論錢莫嘆鄰翁生計拙買船沽酒過年年
秋日雜興十五首

寒蟬啼斷槿園空萬樹凋傷八月中只有南山蒼桂在一株花發向秋風
雨花風葉總堪憐海燕江鴻各渺然莫向高樓空悵望暮蟬多在夕陽邊
野亭千橘未全黃青柿紅梨俱待霜南鄰老翁種橡栗已見兒童收滿床
紫蔓青藤各一叢野人籬落管西風郊扉遠絕誰能到秋日蟲鳴豆葉中
道上高墳古鬱林夕園空鎖碧藤陰人言啼鳥多情思却為誰家作好音
急杵繁砧一郡秋西風落月萬家樓不知塞下征人怨但見閨中少婦愁
八月飄零九月來天時人事太相催千紅萬紫都看過只有黃花與白梅

荻岸秋清似畫圖風高沙鴈起相呼何如莫去瀟湘上借爾烟波畫引雛
釣臺臺下澗水清釣臺臺上秋草生當年誰是持綸者賢隱山高萬古情
溪上茅齋楓樹林渚雲沙日共陰陰連朝不遣家童掃紅葉蒼苔一尺深
栢林楓岸迴宜看楊柳芙蓉不耐寒最愛高樓好明月莫教長笛倚闌干
斜日村原秋水多家家門巷好經過繁絃急管休相聒田父山妻自解歌
蒼鳬攜子戲波瀾懶惰輕鷗不下灘白鷺照影秋塘裏似爾心情亦太安
鱖鱖鯉魚三尺身纖鱗照水白如銀未須更論成龍勢只在溪中亦有神
竹靜沙寒野日低門前秋草不成蹊山禽汝亦何多事來向棠梨樹上啼
鷄鳴曲三首

鷄鳴城中滿樹霜青樓旭日照流黃鳴箏錦瑟秋塵裏玉鴈金蟬共一行
青樓遙臨大道衢美人鷄鳴著繡襦誰家公子過樓下那不繫爾千金駒
樓上羅幃映早霞不須重鬪鏡中華春蘭秋菊皆零落爭似菖蒲不作花
喜戴仲鷗得鄉薦二首

梁園宋苑却宜秋夾道槐花照綺樓試問東瀛海邊住何如金明池上遊
馬上秋風得意歸丈夫豈是愛輕肥傍人休訝新年少曾向長安作布衣
慰任宏器諸友失第二首

莫將遲暮怨飛蓬萬事還須問塞翁黃鵠但教毛羽在不妨失意下秋風
青雲白髮太難平去鴈來鴻亦世情我亦少時曾得意十年回首是浮名
黑龍潭

白雨遙從白日來黑雲低映黑龍臺空思玉鯉臨淵嘆未掣金鰲跨海回

過先墓

愁摧斷柳柳還稀淚灑殘花花更飛一寸未忘遊子線萬年難覓老萊衣

野屋

野屋雙飛燕子低短簷千尺柳條齊桃花片片紅臨水小麥纖纖青映泥

對菊四首

三閭大夫不願醉五柳先生不願醒一醒一醉緣何事坐對寒花烟滿庭

菊過重陽開更繁城中車馬未曾看種來本是山家物白露青霜共暮寒

檻畔輝輝纖月斜幽香獨立殿年華多情似與詩人約一夜還開四五花

露委烟斜更有情黃花紫萼太分明只教秋色常為主莫遣西風怨落英

葡萄二首

晴闌裊裊風鬚動暑架垂垂露乳寒却憶高樓清夏日美人常對水晶盤

漢家葡萄出西域斗酒曾博涼州戍當日誰知使者勞至今人種葡萄樹

簡賈司教二首

郭西茅屋帶峯巒竹徑花闌亦可看騎馬自來還自去無人知是廣文官

古壇雙樹挺秋烟廢院殘花照暮天門外掃除無俗客我來時復伴青氈

吾郡古要害地也閑居興懷追詠古跡作詩八首

西來一道是淮源南向千峯盡楚山風雲尚擁蛟龍窟天地曾開虎豹關

寂寂孤城申伯臺廢園遺沼盡堪哀繁華惟見東流去歌舞空傳此地來

南山西嶺自天來翠壁丹崖映日開不見當時卧龍者只今惟有釣魚臺

仙人昔返上清家留下仙壇號紫霞世人不識蓬萊樹道士空餐松柏花

郡西山畔舊禪宮朝暮風烟多不同已見樓臺翠微裏更聞鍾鼓白雲中
震雷山頭石潭水夜夜蛟龍行雨歸青春下與滄溟會白日常聞霹靂飛
楚關申戌鬱茫茫野草春沙更斷腸山頭僧住何年砦山下人耕古戰場
故謝城邊溪水流郢中風物更堪愁行人欲問陽春曲此地猶傳白雪樓

卷二十九

別相餞諸友

雙井山邊送客時滿林風雪倍相思西行萬里遙回首太華終南落日遲

友人夜宿

相逢猶憶十年前青草書堂溪水邊四海交遊今殆半幾人風雨對牀眠

題馮大京畫蘭

雨葉風花獨耐寒圍春不借曲闌干國香空谷無人見映玉輝金畫裏看

適堅山寺

誰謂高僧不可逢出城西望有雲松騎驢不畏青泥坂拄杖遙尋碧玉峯

雨中看花七首

溪上雨色晚來頻枝頭花朵太禁春滿林熳爛誰覺汝一樹分明獨惱人

連朝風急雨滂沱樹頭葉暗花不多縱使明朝風雨息蒼苔狼藉柰愁何

昨朝日照花盡開今朝雨多花可哀由來落花無根蒂隨風吹去又吹來

正月已放山丹花二月桃杏似雲霞城中少年紫驪馬日暮來尋碧玉家

郭外春風次第來杏花開後桃花開近城早花開已謝狂風猛雨更相催

紅花紫藥千萬枝日夜雨打更風吹牡丹芍藥莫太驟暖日晴烟開不遲

牡丹雖遲是花王芍藥留之殿春光好花元待後時發穠李妖桃空自狂

賈西谷邀飲山寺朝信不至詩以促之

廣文邀客寺亭幽此是春山第二遊立馬望君君不到不知城市為誰留

任宏器草亭四首

蔀簷當午溪雲度花重寒枝閣曉庭芳草閉門春寂寂東風吹雨半池青
薔薇深院無行跡風到閑門掃綠苔明月滿庭香襲襲野塘新水藕花開
繞屋南山秋色靜數枝寒菊一籬烟酒醒讀罷秋聲賦風落松梢響石泉
門外水流雲自起雪峯半出草堂西孤舟欲作山陰夢月冷梅寒共一溪

岳豫之小畫四首

溪上水生茅屋涼溪邊風急樹顛狂山中車馬何曾到祇有雲松盡日蒼
碧江樓閣夕陽邊萬壑千峯生暮烟江上長松一千尺月明常繫打魚船
百尺孤城對碧山層層樓觀倚雲間水明沙白風濤靜更有何人到此關
樹下茅齋當畫清江邊寺閣倚新晴蒼苔石徑無人到獨有幽人江上行

元夕懷都下之遊五首

憶昨長安元夕來五侯絃管上樓臺已見炬如千樹列更看燈似百花開
龍岫層城接御溝香車寶勒夜深遊花坊競買千金帶綺陌皆懸五色毬
夾路香塵夜不開萬人爭道看燈來金波宛轉千門裏銀漢逶迤一道迴
紫禁煙花一萬層黿山雲裏見峻嶒繁星散作宮中炬明月來為殿上燈
白馬金珂上苑東六街歌舞散香風豪遊已作三年夢愁對春燈此夜紅
題潘秀才吹笛畫扇

幽人橫吹滄江靜滿江月白青山映好作穿雲裂石聲夜長恐有蛟龍聽

寄岳陽龐推官四首

君因謫宦留南郡予亦罷官歸故鄉同是鳳凰池上客江湖千里轉堪傷

洞庭湖邊花柳新岳陽樓上更逢春
閒來載酒題詩去還似當時賈舍人【唐賈至謫巴陵】

三載江城佐郡郎十年天下舊鵷行
曾持畫省郎官筆況著瑤墀近侍裳

湖水春來不見沙九疑南望是天涯
軒轅臺上清風樹湘女祠邊日暮花

閨情【以下京集】

秋風嫋嫋生羅衣美人夜泣紅燭微
郎騎白馬臨卽去樓上年年燕子歸

晚至昌平寺中

度盡青溪十里霜寒蕪落日下蒼茫
山城薄酒無錢買晚飯僧家石耳香

雪中漫興

長安雪花亂如雲複道層城望不分行
客遙傳五侯宅畫樓絲管畫紛紛

寫情

莫將錦瑟怨年華柳絮飄零夢謝家
小院迴廊鎖春晝何人來為掃庭花

送鄉人還

楊柳花飛蕪草青故鄉南望幾長亭
城邊客散重回首愁見孤鴻落晚汀

聞歌

明月暫隨秦弄玉碧空遙度楚行雲
莫言此曲終堪聽孔雀東南各自分

諸將入朝歌十二首

北掃燕齊南楚吳風吹殺氣散輿圖
蓬萊山下朝諸將天子戎衣親受俘

大將龍旗朝帝京至尊親遣貴臣迎
侍中獨領嫖姚部戰馬皆歸龍虎營

羣公陪宴栢梁臺殿上傳呼萬壽杯
元戎節鉞來江上使者樓船泛海迴

河濟江淮血不流中原萬馬一時收
黃金未散成功士白纛先梟敗將頭

河北諸軍盡有名雲中驍騎本輕生金裝白馬翩翩出不見長安子弟兵
玉佩金貂列上勲槌牛殺馬犒三軍萬里旌旗天上度滿城金鼓日邊聞
天下山河首洛中漢家州縣滿山東將軍不畫麒麟像士卒休論汗馬功
龍虎金陵擁帝居吳關水府控淮徐樓船一鼓風波力滄海鯨鯢作釜魚
闕下千官侍鳳樓苑中天子建龍旂豹房虎圈先班賞武帳前邊賜姓侯
戰士歸來皆武冠紫纓騮馬跨金鞍可憐萬國城頭月照見沙場白骨寒
少年生長在邊城介冑南征蟣虱生馬上朝來橫吹曲梅花一半是吳聲
杲杲扶桑朝日升東瞻碣石海波澄正德七年誅叛賊大明八葉覩中興
樊駙馬府中宴

主家行酒雙玉杯上客不醉歌頻催秦女簫中明月度鳳凰樓上彩雲迴
閣內杏花

東掖杏花開不遲日邊春色獨先知未薦玉盤千歲實空看【一作蟠】仙閣五雲枝

孫太史宅贈呂揮使二首

北土承恩天上還黃雲白雪暗西山奏凱未傳青海曲封侯須到玉門關

白馬驂弓出薊門相逢意氣倒金尊功勲要識將軍呂文字先看太史孫

贈薛君采二首

五花似玉麒麟骨八尺如龍驤裹身千金臺上求非易萬馬羣中認未真

爾夢仙人海上行蓬萊清淺不勝情金門再見東方朔咲指蟠桃花更生

送韓汝慶還關中二首

六月西山雷雨低長安城中十日泥君騎鴻鵠冥冥去此地愁看燕雀棲

華岳雲臺萬里情高秋落日眺秦城黃河一線通滄海身在仙人掌上行

燕京十六夜曲四首

御河橋畔千尺臺燕京女兒踏歌來臺上歌鍾日夕起橋頭酒壚深夜開

萬歲山頭鎖玉樓十王館中人不遊中宵金鼓雲間動翠輦龍衣過五侯

九衢車馬似山河萬金買燈不道多已留華月照歌舞更放香風吹綺羅

月高罷遊關九關暗塵吹污香霧鬢誰家少年亦太惡拾着金鈿不肯還

苦熱行十首

六月十一日苦熱奪伏爭秋番太強燕京何限好樓閣袒走狂呼無地涼

日午放朝車馬頻中天風火促颺輪侯宮戚館冰山冷赤日黃埃渴殺人

宮裏傳冰賜從官含霜弄雪白雲寒銀牀晝鎖瑠璃井玉殿陰沉瑪瑙盤

午門朝罷午時過千官萬馬汗成河莫道宮中愛長晝長晝宮中樂事多

西山松柏千丈臺陰崖脚踏層冰開巖樓洞閣生霜雪觸熱衝炎誰為來

長安萬家懸甌裏風捲塵沙當晝起五侯堂上冰成山朝見成山暮成水

城西山峻火雲峯丹梯無路躡芙蓉白石寺前堪避暑昨朝雷拔殿壇松

赤地驕陽草不生河潭霹靂懶龍驚彎弓后羿非夸父莫放青天十日行

晝夜蚊蠅飛滿天穿牕撲帳攪人眠乘炎趁熱雖吾畏露打霜飄不汝憐

邊馬炎天動萬羣昨傳遼水殺將軍王師六月殲獫狁兵氣遙蒸瀚海雲

內閣荷花二首

誰送仙葩此地栽綵雲飛掌對蓬萊雕闌玉檻圍花發不放金盤十丈開

風吹菡萏並頭開水照金魚隊隊回映日跳波珠易碎接雲步障錦成堆

送鞏丞之金壇因訊養和

鞏丞若問金壇宰為見風流御史才到日琴堂定無事松廳竹檻對江開

雨望西山

碧山鳴雨過嵯峨湖水風增萬丈波千尺浮圖清暑殿高牕白石細盤蘿

送王提舉

日出帆高烟水空嶺雲遙在粵天東此行不為浮江興他日須傳煮海功

東岳亭

卜築東岳白石缸孤亭裊裊出烟江細分楊柳開風檻倒影扶桑坐日牕

椒軒

春開軒地引紅椒錦樹西江望不遙當戶踈簾看結實背岡茅屋憶行條

寄少谷山人二首

武夷九曲上仙庭錦疊青天萬仞屏下望仙人釣鰲石北風吹霧海冥冥

台嶽中峯綵霧生石梁遙挂赤霞城仙潭尺素傳雲鯉報爾今尋華頂行

送陳進士還江西

廬山高起讀書臺萬卷少年今日開九????江流何處入海風吹浪楚帆來

張子近得道士飲鹿血術欲試未得吾家有一鹿欲取血飲張子臨庖哀呼不忍見死乃作詩遺張子焉

聞琅玉脯飲丹血補腦還精身體輕刀几即看衰一死道人那忍說長生

送甥朝良讀書梅黃山下

聞汝讀書山之中閉門千峯兼萬峯但知高鳳曾飄麥不論丁生解夢松

宮詞四首

杳杳高城南苑陰苑中日夕翠華臨城邊獵騎分行逐射得黃熊索賜金
碧草萋萋生御溝垂楊嫋嫋夾朱樓牕臨北斗空中起水接銀河天上流
微霜淒淒金井欄城頭月出凍雲殘玉樓高對蓬萊雪誰道宮中夜不寒
宮中夕寒花不開金屋沉沉玉殿苔纔見高臺燈火下更聞前路管絃催
寶鷄縣【以下秦集】

鷄鳴山下古陳倉板屋千家清渭傍曲岸迢迢凌秀麥流渠宛轉入垂楊

漢中歌二首

漢王昔日定三秦壯士東歸意氣新旌旗暗度陳倉口父老重迎灞水濱
燒棧登壇各有勲謀臣猛將鬱如雲關中自識龍顏主海內爭看縞素軍
終南篇

離宮別館舊京華表裏關河屬漢家二閣天圍青錦障五臺雲湧石蓮花

四圖詩贈何燕泉四首

卧遊亭在古椿園萬里輶車出塞垣天馬一從隨漢使
星槎誰復到河源 右職方奉使河南河北望行塵露冕褰帷拜野人嵩少風雲千里色
覃懷花柳萬家春 右藩省旬宣當朝太僕世稱賢在垌常歌魯頌篇天上驪驪惟一骨
苑中騾牝實三千 右大卿考牧西域百年通貢筐中丞萬里建旌旄坐掃蠻山開瘴癘
永令滇海息波濤 右都憲巡撫

元日

扶桑日射南山觀楊柳春回北斗城萬里冠裳遙望闕九霄車駕喜還京

畫竹

誰開素練寫烟梢欲采琅玕奏玉簫猶憶鳳凰池閣上坐聽風雨下層霄

米元章拜石圖

節比巖巖志比堅冠裳下拜也堪憐此意世人誰解識至今空羨米家顛

卷三十

嚴治篇第一

治民莫如嚴嚴者所以成寬也夫民心不一則散民情不制則亂法者所以節約其散而整齊其亂之具也嚴者所以立節約而作整齊也故嚴則法立法立則民寡過寬則法弛法弛則民多辜故嚴治之民始急而其終也舒寬治之民始舒而其終也急急則民怨舒則民喜始而喜不若終之不怨也故民難與為始而可與成終也夫衣冠飾貌人見而敬之乘駕唱騶人望而避之毀冠而囚首人不讓席矣敝車而單行人不讓路矣嚴與不嚴所由致相遠也故嚴也者所以飾威儀慎制度使人見之者也夫日月垂象人不敢侮也山川示險人不敢踰也故法立而民不犯刑設而人不入者嚴之為也是故先王之制階陛堂殿以異其等旂旒鸞纓以繁其飾官府爵位以差其品等異則尊卑別矣飾繁則上下章矣品差則貴賤定矣是故先王之時尊卑不相紊上下不相踰貴賤不相越夫錯其采物而明其文章防範其情欲而束縛其筋骨耳目有常從違一定僭亂不起奸弊不生故文字簡而刑罰省民生逸而政事清此先王之所以能宰制萬物役使羣衆而總一海內者也及至後世媮惰之風長矜肅之心喪上下相容頽其紀綱而決其防限於是豪暴擅制富強肆行宗黨連結而中外勢傾然後起而繩之發其隱伏摘其細微至於一法立而百偽生文例日增而不足吏議日異而不定人臣莫救其過而庶民莫必其命故法密而犯益衆刑繁而罪益多何者源不治而未流濫也夫操如束薪亡不折焉急如絞繩亡不絕焉故治不可急急則無不亂者也是故法者由嚴起者也故號不張則幹斜綱不振則目亂治不嚴則法壞夫嚴與刻異也嚴者立其法禁於未然者也刻者究其罪治于已然者也是故秦之法多如秋荼密如凝脂而民不知避也漢之吏搏如猛虎擊如鷙鷹而民不知畏也故不示而究人之罪是為刻而已矣非所以格民也故嚴父無姑息之子嚴君無姑息之民故三王之民殺之而不怨夫非罔之而罹其罪者則罪在已而不尤其上也又何怨乎

上作篇第二

夫觀世以易化者聖也矯時以從俗者明也物必有敝承敝者復其盛勢必有變襲變者反其常故五帝之世循環不悖而三王之時因革並施夫世之所使時之所移從來遠矣要之其原皆出於上之所作為教夫好劍之門多創客善醫之門多病人物聚於所致也故明聖之世則人飾義而服節汙濁之時則人毀行而喪守何也致之者則然矣正道壞則邪徑成公室衰則私門盛自古及今未之有易也正之與邪公之與私氓隸之人能辨其所好惡然所從違非者世之榮顯富厚者不在此而在彼也故五尺童子聞人稱其善亡有不喜者也至於榮顯富厚之所在則雖有縉紳冠冕之徒亡不棄廉捐耻以附者豈其所為自喜者不如童子也勢至而利交則情動而蔽其心也是故上之人觀於時勢之變推于教化之端明義崇節而紬勢利是以正道可復立公室可復振而遂邪順私之俗可絕也漢哀帝之寵董賢而孔光張禹皆在大臣位然身親屈焉王莽之世所為臣服盡漢公卿揚雄最號恬於利祿然且為媚作符命焉及至唐有八司馬者皆以其才而汙于王叔文之黨夫數子者或榮耀終身或貶死當世卒為世

之耻詬不道于君子之門雖其所自立然亦上之所劓世之所移也夫至著者義也至尚者節也故上以節義較天下雖有蠢愚必不以其身為標矣雖有闕必不以其行為名矣何者標者衆目之表而名者衆口之實也故張鵠以行賞亡不射矣詈鬼以除病亡不罵矣夫嚴母之育貞女也入則有重關之限出則有鳴玉之飾寢則有絺結之固然後淫邪不入情欲無感而修潔之行成也是故節義者士之大防也先王以此防人故立激勵之方興勸賞之法致式閭之敬施表墓之恩安車懸旌以彰其徵累帛加璧以示其予由是義明而節崇故雖有昏亂之世而無失身之士雖有污隆之時而無回面之臣豈不以上之所作邪是故義者有國之維也節者有國之衛也國之有不固者維不立而衛弛也

法行篇第三

夫為人君者法不可以有已為人臣者法不可以有已法者非甘物也有國者之藥石繩墨也夫諱病之人無不疾藥石矣不直之木亡不疾繩墨矣小人之徒亡不疾刑法矣夫奸邪者小人之為而暴亂者小人之行也正奸律邪誅暴刑亂者法之務也故法者小人之所不利者也小人忌正律之典懼刑誅之罪必務以敝其法援勢者為之沮行貨者為之誘怙強者為之撓造詐者為之竊法無不敝矣故法不可以有已也法不以有已則上不得賣而下不得請賣請不行則上自天子之門侯王之宮太子之家公主之室下至貴戚之臣近幸之人驚橫之吏豪俠之民亡不得行其法者矣故賣請不行則法行如流是故法不可以有已也千金之寶可以借客十金之寄不可以與人也非愛十金反不愛千金也寄也有所受也已不得有也夫法者人臣受之天子非人臣有之也天子受之天非天子有之也已不得與而人不得辭故有沒公主車馬則后弗敢怨邀太子車駕則君弗敢怒罪戲弄之臣則天子不得私執豪俠之民則公卿不得關說此法之行也昔者漢高斬丁公武侯斬馬謖皆垂泣焉夫丁公於漢高至恩也馬謖于武侯至暱也垂泣者至私情也然而必誅之者法也故法不可以恩暱而私情忍也昔者石奢為楚王相父殺人縱父而以身請罪王赦之石奢曰不可不縱父不孝賣國之法以縱父不忠乃伏劍死李離為晉文公理過聽殺人曰君以臣為理乃不明而過聽殺人臣當死也公曰子休矣下吏有罪非子之過也離曰失刑則刑失死則死臣之有失何以罪下吏也遂自死也夫死者人情之所愛而二子不然者所以顯君而明法也由是觀之法非不得以釋人雖自釋亦不得矣夫法清則政寬而人威法亂則政煩而人玩威者刑中而不可遁玩者刑不中而可幸也夫刑不中者上亂之也上不以法為可愛而與已則亂故以之飾喜怒行愛憎矣復恩讐制毀譽矣持辯以變約束舞智以易章程文之以深辭鞠之以巧詆則法令滋章而事不循其實對簿繁委而人不得其情上下相遁公私混淆盜賊多有而奸偽蠱起矣夫炎鑪遁于頑鐵利刃衄于輓毛密網漏于吞舟故法本禁亂而其極也亂生焉此執法之弊也故法不可使人有幸之者法可幸則良民懼於是平居之衆造善之人睹蝮蠆之吏搏擊之廝岸獄之地掩耳而不敢聽側目而不敢視束手足而無所措矣故清法之國人畏法而不畏吏亂法之國人畏吏而不畏法夫使人至不畏法而畏吏者非國之美也

任將篇第四

任將而中制者敗用兵而外監者疑夫獨任者事成之宰也專令者勢行之機也故掣于中者

垂成而敗撓于外者已行而反夫所貴于騏驥者必至也然繫其足則駑馬先之矣所勇于孟賁者必敵也然縛其手則女子勝之矣夫任將用兵之所尚者在事必成而勢必行也為中制以掣之立外監以撓之是繫騏驥之足而縛孟賁之手也故繫騏驥之足者不可望其必至縛孟賁之手者不可望其必敵用將而監制之者不可責其成功夫功以時會也賞罰所以勵功也便宜所以乘時也獨任者自制其賞罰而專令者得行其便宜者也是以功可就而時不可失也夫功者事之集也時者勢之會也故披刃冒矢以為功也贏糧躍馬以為時也故中制則事不一而績隳外監則志不一而日曠夫威者貴神速也幾者貴立斷也事以威立也勢以幾行也故任將者必假之神速之用而予之以立斷之權矣夫多指亂視多言亂聽千人輿瓢亡不破者也千夫牧羊亡不擾者也故以一御衆則衆志定以衆制一則羣疑生是故千人輿瓢不如一人負而趨也千夫牧羊不如一人驅而走也古者天子之遣將躬為推轂曰闔以外將軍制之故吳王用孫子而寵姬戮魏王用穰苴而莊賈誅二君者非不顧寵幸也知將不可以寵幸奪也淮陰一拜而為漢大將再捷而為齊假王使高祖中制而外監之無以摧項氏之權而制天下之命矣故期功者不惜神速之用知時者不吝立斷之權昔燕用樂毅而代之以騎劫卒使田單收其降城趙用李牧而代之以趙括卒使白起坑其降卒是故騎劫為田單之藉而趙括為白起之資此制之者過也夫功罪責於將也吾制之於已而監之於人成則衆冒其功敗則獨委其罪未有善者也故善用將者制其功罪而不制其事幾故士知有將將知有君士知有將則報義將知有君則盡忠

勢成篇第五

夫天下之勢不可使有成之者勢成則附之者衆也是故勢者上之所乘而下之所憑也龍之在天以雲而神虎之在地以風而威豹之在山以霧而變鯤之在海以水而化勢之使然也故人之于勢乃所以表神威行變化者也是故天下有能擬之人大舉之事必俟吾之壞而竊以濟其勢勢者天下之重吾弗可以一日釋也吾有所壞而適以濟之天下之重在彼矣故勢之濟有四不可不先也因其失而取之謂之藉資求所害而利之謂之賈惠舉其所不當而白之天下謂之假義造端以鬼其事謂之長惑此四者勢之所以濟也昔者陳平淮陰王陵皆項羽之臣而卒為漢用取於所失也沛公入秦約法三章去其苛刑利其所害也發義帝之喪縞素行師舉其所不當也白蛇雲氣鬼其事也是故亂非外至我有以招之勢匪彼至我有以致之故塞招亂之門絕濟世之端在有以固人心人心之固雖有能擬之徒不能奪也故藉資則無與也賈惠則不利也假義則罕服也長惑則無眩也然後天下之重在我也秦之失人心也陳涉非有諸侯之權甲士之衆以其萌隸之民戍役之卒揭竿挺鋤澤中一呼而四海嚮應者彼皆有欲起之心而俟先發者也故陳涉之得志輕在秦也夫天下之近禍履危莫過于從逆也惡安福樂禍危非人情也然而為之誠見其禍危迫於此而徼安福於彼也是故天下不可使有從逆之民從逆之民雖欲不適彼不得也欲不讐我亦不得也彼我一間固寧有死而長往無生而反顧者也昔者沛公送徒驪山畏失期之罪故亡章邯將兵山東畏被讒之誅故降李陵深入匈奴畏反國之辱故叛夫叛背至逆節也亡降皆耻名也而三人者以不貲之身干之患害之情窘於前而不暇自好也夫天下不自好之人鮮耻弗軌之臣幸危愁苦之民願亂以三者之狀而值於君之所壞此勢成之會也夫衆庶成風增積成山言勢以附成也是故弗軌之臣靡不自小以成大自寡以造衆者附之使然也是以有天下之計必先詳成敗之由明輕

重之機杜覬覦之罅遏擬偪之漸集內散之心斷外附之志使天下之萌蘖不生而勢長御之我則天下長安語曰涓涓不塞流為江河綿綿不絕纏為網羅故勢成而後圖焉莫之有及也

功實篇第六

功實之際後世人主常不能有所稽也夫功者人主之所誇喜誇喜之心熾於內而天下方有奇恠恢偉之事效於前於是功實之稽乃有所不能何者誠見其利未見其害知其福未知其禍也夫利猛獸之樂者忘銜轅之虞好馳坂之巧者昧仆輪之悔喜速瘳之藥者蒙毒發之戒是故快心之欲至而周身之慮移炫目之形接而見背之明蔽天下之事功在彼者我有不蔽其實實在我者彼有不顯其功故人主必詳於功實之辨而覈於異同之分也夫三王以善治為功五侯以善備為功七國以善戰為功戰者至凶事也功者至美利也究凶事而徼美利此三王所以不為而五侯所以不願也夫天下有不忘戰之臣有好戰之臣此二者功同而實大異名似而事不侔也是故不忘戰之臣多慮而有備好戰之臣貪進而寡憂多慮有備者清外而實內貪進寡憂者多事以虛國是故不忘戰之臣恒恐天下之有變而已無全策好戰之臣惟恐天下之無變而已不有功不忘戰之臣恒靜而致安好戰之臣恒擾而生禍此人主之當察也昔者秦之伯也累世而帝其帝也再世而亡帝之甚難亡之甚易成敗不遠而代盛衰並時而至者積功之極乃其積禍之盈也漢武之才過於文景承三世之富厚不易紀而虛耗者好大無厭也夫秦以白起為武安君商鞅為商君范雎為應侯漢武以衛青為大將軍李廣利為貳師將軍霍去病為驃騎將軍此六人者所謂功臣而人主之所貴者也然不察功實之辨故白起商鞅范雎之功日積而秦之社稷日蹙衛青李廣利霍去病之功益高而漢之海內益危也夫好功之臣人主之所不易使者非有厚養則不獲其死力非有大賞則不塞其望意高爵崇號以貴之則朝之位曠金玉重寶以富之則府之蓄靡土田苑囿以益之則國之地削重徵濫役則結民之怨破城侵境則深敵之讐夫然後臣其不可役之民疆其不可樹之地利其不可通之貨故計民則俘衆不足以補亡計地則降城不足以報賜計利則遠物不足以償費加危于當世而不為省流禍於後世而不能見此功實不稽之患也是故覩顯福者必思隱禍臨近利者必圖遠害功歸於臣而實弗被於國者明主之所不貴也

用直篇第七

夫國內有自擅之臣而外有敢敵之寇者在位無直節之士也夫直節之士行高而不回言危而不遜行不回故有匡救之義言不遜故有諫諍之忠於是內無不發之奸外無不見之亂雖有自擅之心者無不弭也雖有敢敵之氣者無不沮也夫山有猛獸藜藿不採朝有直臣奸宄不生故直節之士邦之司繩而國之強禦也故司繩不得職則邪枉行矣強禦不在列則盜賊至矣可不畏哉夫亡國之君非無直節之士也有之而蔽于邪臣間于敵國也夫直節者邪臣之忌敵國之憂也我蒙其蔽而受其間則直節不得志直節不得志則邪臣遂而敵國昌也夫直節去讒諂至讒諂之人者內順而外交能使視聽閉言語塞夫視聽閉則亂不見言語塞則奸不聞於是宮庭容久伏之禍邊境有卒至之憂勁弩射於城中長戟起於輦下上莫之知而下莫之告者大臣懷首領之愛而羣臣畏口舌之誅也昔趙高欲專制恐羣臣有言先指鹿為馬羣臣無敢言鹿者陳涉起山東二世召博士諸生問之皆莫敢言叛叔孫通乃詭對而出逃

夫二世弗明不能用直臣而蔽障于讒人故內以遂邪臣而外以資敵國也是故邪臣無不欲去其所忌敵國無不欲逐其所憂晉以垂棘之璧屈產之乘假道于虞而宮之奇去齊以女樂文馬遺季桓子而孔子見沮秦穆公憂由余之在戎餽戎王以女樂戎王樂其女樂五月不還由余諫不聽而亡夫外有悅目之欲內有惑聽之讒則賢不知其可寶而才不知其可惜也故虞為晉逐宮之奇魯為齊逐孔子戎為秦逐由余夫三國者非不知賢聖才知也悅于欲而惑于聽也夫直士人主之所難用也矯正而不能順遂自重而不能苟容非其職不食不得其道不仕夫邪臣者人主之所狎而重寶美色人主之所玩好也夫重寶美色在前邪臣在左右則無所置直士矣故孔子不與女樂並容于魯宮之奇不與璧馬同止於虞蓋勢有所不合也夫蘭艾不同室玉石不同藏故用直士則必去讒佞遠貨色矣夫讒佞者直士之賊也貨色者直士之蠹也養賊容蠹而曰我有以用直士難矣

敵中篇第八

夫敵非吾不能克之難也亦非吾制之難也吾能明敵之所以中我者難也是故知吾之能逆必反吾情也知吾之弗能逆也即以其情反之欲有以嘗之先反復我也欲有以實之先參伍我也以聲者下我也以利者市我也此六者不可不察也夫欲明敵之所以中我者在知敵之所忌敵之所忌必飾之使弗覺我也事無不去矣是故敵之鉅弗忌也忌其能明用人也將之賢不忌也忌其能同心也士之衆不忌也忌其能同力也故明則有以蔽之同心則有以間之同力則有以散之夫三者之害知者能諭之防之然卒為所圖焉者彼有以揣摩投隙而此有以中之也狩者之于獸漁者之于魚其伏機投餌也於其聚則多驚於其散則無獲必於聚散之間而伺之矣敵者之機我餌我者亦猶是也是故有所畏於我者視我以弗畏也有所弗畏者則視其畏也若是而不察焉者彼得志也同心之將毀之弗行也則必重之以輕其主使我的自忌之也若是而不察焉彼得志也士之同力始張其勢以解之又出其利以啗之則是道我以刑威也播虐則離我之衆誅降則堅彼之敵若是而不察焉彼得志也昔者秦之攻趙本畏廉頗曰吾畏馬服子將也趙人乃將馬服子而陷於長平漢畏項羽之臣范增也羽使至饜太牢以進進而視之曰吾以為亞父使也乃更饜以草具由是范增逐而項氏亡死東城田單守即墨謂燕士曰予惟恐剽吾之降卒以戰也恐伐吾士大夫百姓之墳墓也燕如其言而敵氣愈奮遂以其殘卒敗燕此皆弗能明敵之計眩于事情而中之者也故曰能明敵之所以中我者難也是故處敵者能知數者之情有來焉必覺也有往焉必察也燭於先後之間斷於有無之際內絕根株之病外固間隙之缺是故揣摩者不得其所出而抵投者不得其所入也故曰我不發其機雖巧不施我不會其情雖勞不行故為敵中者蔽在已也

固權篇第九

夫權有所受者固不有所受者雖得必失之夫偽摹不可以遠示竊得不可以厚享故勢有執于累歲而不能保一日之命威有行于四海而不能全一姓之族權無所受之也夫權者天子之所取重天下之所取鈞者也天子知之天下見之也故上不疑而下不議夫然後可固也無所受者天子不知天下不見者也故正坐而旁有窺之者矣前行而後有迹之者矣此至危之勢而彼方安之也夫人主雖使童子操金入市無敢攫者苟竊人主之金雖格僕而路人得執

之矣是非童子強格僕反乃弱也使固與賊異也故盜失財不敢告也亡遺物不敢反也故權在于有所受有所受者又在視其所受之人昔者舜受堯之天下禹受舜之天下堯舜皆大聖人也故雖受之天下而人信之至燕子噲讓國于子之子噲無知者也故雖受之一國而人不信矣夫信之故服服之故其受也固不信故不服不服故其受也不固弱子之產不與買惡人以為欺也瞽人之貨不與易惡人以為蔽也伊尹受湯之權放太甲霍光受武帝之權放昌邑夫擁君遷主非細故也已任之而人不疑者以受之者湯與武帝也湯非弱而武帝非瞽也夫權者富貴之藉也可以得富貴而不可以保富貴無所受之而受之非其主者皆危也夫見火知焚見水知溺者明也昧者不然不及火不知焚也不及水不知溺也夫班爵封者遺之券誥賜祠第者護之符勅此皆為世計者也今爵封我能奪之祠第我能取之是券誥不憑而符勅不效也此其章明宜鑒者也然爵封猶日賜矣祠第猶日營矣以鐵版為不毀恃金書為不刊者猶夫前日也夫欲以一時無所受之權而為世計豈不愚可咲也

處與篇第十

富貴者人主之所有也恒易於與而不知所處則恒失之故德不在于與也在于處所與處所與在知其所與之人所與在於君子也則增厚而福澤在於小人也則濟淫而福災在疏則恩當而見重在戚則分當而見輕是故與之擯罪之臣則以為異數而溢望與之寵幸之臣則以為庸格而靡加故與之不難也處與為難矣夫天下惟小人戚幸之臣不易處也數而與之則見顧遇而怙愛遲而與之則見希濶而怨生與之厚則不以為過而忽之與之薄則鄙而少之與之太難則曰吝而誹笑與之太易則曰汎而玩侮與之而有所相踰則不平而起爭若是者不可不知處也夫惠以示親施以示德無所因而與之則翔視而內疑必不親矣有所使而與之則矜能而自致必不德矣望之而必欲塞求之而必欲得不與則拂情而陰蓄忌與之則多嗜而需不已凡此皆禍之道不可不知所制也夫權勢者賞罰之柄名器者上下之飾而富貴者人主之有也故富貴有不可以易與者矣富貴者權勢之門名器之具也安可以易與也小人寵幸之人其未有富貴也則必遠權勢而不取畏名器而不干曰吾得富貴厚其身焉耳人主於富貴輕於所有而易所與則不勝其所悔夫富貴得則權勢可移權勢移則名器可假由是有擬尊之心有偪上之形而莫之制矣緣恩而寬忍則禍滋抑按而不揚則害成微裁之則逢其忿而恨積大發之則激其變而事起由是兵車戰於牆內戈戟攢於腹心事成是下賊其上而義紀絕也事敗是上陷其下而恩不終也二者之所來乃積愛之過也夫小人寵倖之人持衆歸之權必衆怨之所叢挾衆附之勢必羣攻之所向故其謀危者所以圖安也登高以臨危者疾趨而陟顛不知下平地之可息也向陽而畏熱者疾走而格日不知其就陰之可爽也故小人謀危以圖安者富貴有以賁之而謙遜之義不明也秦之二世寵於趙高封以萬戶授之相印殺蒙恬於外誅李斯于內然趙高知其威在已而以圖二世卒使閹樂弑之於望夷之宮故二世於趙高非不有以恩德之也而終遇禍者利害之情變也故富之而有不恩貴之而有不德矣昔者陳恒專國以其君積厚施而得衆遂弑簡公季氏執魯政厚私邑而弱公室乃逐昭公夫二子蒙於主者至厚也甚者見弑而次者見逐積愛之生害也故盜不以得財而不殺其主人妾不以得寵而不忌其主母夫人之心何可厭矣故驕子多不孝寵臣多不忠是故人主必審處于富貴之與知非其所當則毋以其愛私之其所當者則毋以其憎吝之明知其所失則毋遂事而自安獨省其所發則毋溺情而有所忍故韓侯則惜敝袴矣周襄則止請

隧矣漢文帝則夜收北軍之節矣何者富貴必吝于小權勢名器在杜其漸也夫天之生物能爪牙者則去其羽翼誠以飛而食人則害廣矣是富貴權勢人之羽翼也故其與之也而必使其可制於我我富之者我能貧之我貴之者我能賤之夫然後從而富貴之是以權勢之門不開而名器之具不亂也夫干將莫邪天下之至利以刺人無扞之者然倒持而外柄則刃反著于其身人主能無倒持其柄則可矣

策術篇第十一

策國者大抵務實於勢變而不詳於事理求伸其辯智而不要於指本善舉迫切之害而不及久遠之憂夫事理者宰勢變者也指本者統辯智者也存久遠之憂者弭迫切之害者也故天下之事有不可究極者則必有所據有不可總納者則必有所歸有所易觀者則必有所難見夫策國者設不可究極之形而不知所據是故離合不常而使人無定見馳不可總納之說而不知所歸是故語言不一而使人無專聽陳易觀之害而遺所難見是故急遽不詳使人多畏而少慮是故六國之王寡於成事而同以淪胥者眩於策而不能擇也夫仁義者策國之術也天下之通理百家之要本而長久之道也功利塞仁義者也是故游士失於謀人主失於擇當年而不成累世而不決者功利之說行而仁義不明也夫仁義不明而功利行則天下攘攘焉皆為勢往如是則得勢者興而失勢者亡矣故秦於六國非能施仁義也然卒并諸侯朝同列者乃六國有以藉之也夫德齊者以勢勝勢並者以德勝勢者功利之階也德者仁義之府也故功利者秦之所有而仁義者秦之所無也諸侯不以此時修仁義而乃稱功利焉釋其所無而尚其所有是故秦以一隅之僻據河華之要開穀函之塞東向而制天下天下之侯王視其分裂而聽其宰割卒無術以禦之者德齊而彼之勢行也夫為功利者謂仁為不殺義為不取故言仁義則見迂濶而情疏言功利則見切近而心向此過在策士而不究也夫仁義水火也水可濟亦可溺火可烹亦可燔故仁者可生可殺之道也義者可與可取之道也夫不殺不取者仁義之一端也故仁義之功利大矣而策士不能究也夫游談之士藉諸侯之車馬以為裝貨諸侯之財幣以為居齎寶玉以親外交市土地以厚與國是故列地里之險夷陳兵革之鈍銳算儲積之厚薄亂主客之形反內外之情分散其事而變易其說故使天下諸侯之心交戰而不定兩端而不果疑于似是而莫能可否惑于利害而莫能從違由是敗約解從奉名獻都要地率服而入朝于秦矣故諸侯之事秦而甘心者仰其威勢而幸其親已也此諸侯不詳于策士之罪也於是秦得以行其遠交近攻之術而五國先滅夫五國之滅者則齊之罪也齊之與秦東西相望嘗並帝而敵體故秦之所忌莫如齊然而緩攻齊者徒以有五國在也君王后【齊王之后】見諸侯之日屠於兵而境無遺矢之擾不知秦有所俟而以為厚已乃奉秦益謹而緩之救故齊之安者四十年及至勝后【齊相姓名勝音升】齊國亡而王建幽於共城【共地名】保一隅之衆亡五國之師便四十年之安滅百世之社稷此君王后之罪也夫譬之五國者鋒也齊則柄也五國者蔽也齊則地也此其勢至明也然坐視其鋒之摧而欲冀柄之無折立見其蔽之撤而猶希地之不露蓋長久之術不察而迷于利害之近也建之幽于共齊人歌曰松耶栢耶住建共者客耶【客謂陳馳】此疾勝后之不明刺賓客之賣國也悲夫然究其失策不可無罪君王后也夫婦人可以治國家哉

心迹篇第十二

天下之事在心知其意毋以迹固之則神明應而變化合變化合則端委見矣端委者變化之窾係也易曰天下一致而百慮同歸而殊途故百會於一而殊統於同夫端委者變化之始終也旁而通之以合變化約而省之以見端委聖哲之行也夫拘學不假於繩尺之外淺見不及于衣帶之下習而不思由而不察猶弓人之不能矢冶人之不能匠也故拘學不可以論廣淺見不可與指遠何也心不知其意而徒以迹固之也夫三皇不同道而皇之號不異五帝不同德而帝之號不異三王不同治而並稱王五霸不同功而並稱伯此迹異而心同者也曷可不為同也堯之禪虞後世稱焉子噲遜燕卒亡其國而天下笑之伯夷叔齊兄弟相讓孔子贊之宋宣公立弟春秋譏焉武王伐紂懸其首於白旗天下不以此貶其令名田常弑簡公則不能辭弑君之惡周公伐管蔡不為賊兄弟唐太宗殺建成而後世短之凡此迹若不異然不得同者不求之心而求之迹也故效顰者益其醜學步者失其故故求迹以為近則愈遠矣夫時易則勢移情移則事易使五帝可以相治三王可以相襲則禮樂不為異同而文質不加損益也故迹似者不可以論心迹者變化之散著也苟可以其類者同之是田常為武王之行而建成迺管蔡之誅也故以其迹則雖有若之似不得為孔子以其心則雖魯人之異可以學柳下惠故車人不量車履人不視足通其意也故莊生觀解牛知養生張旭觀舞劍知草書夫解牛于養生相懸也舞劍於草書至遠也然視之若一伎焉意誠通則迹不足以蔽之也是故圖以列陳也書以傳御也然以圖陳者不盡兵之道以書御者不盡馬之情盖迹之所求者有以限之也夫移易之間謂之變化變化之成謂之合同觀合同則可以見端委故物必求之端委矣端委見則能一萬物是故不出戶而知星辰不下堂而知山川夫天之相去至高也地之相去至遠也必身及而目覩是天不可歷而地不可紀也夫累寸者至尺必差累銖者至兩必差故括天下之物必求端委求端委乃見天下之窾繫窾者物之以生者也繫者物之以會者也窾繫得則心通心者天下之至神也故能周流天下夫一者萬之所從出也故言一而不及萬為有餘言萬而不及一為不足聖人之道一而已故無不足故曰至道約而易操明而易知是故聖人不學而能愚人學之不能直所從者異路也

卷三十一

何子曰世言曰勿為任任叢怨勿為激激干怒張子璉為御史嘗按治當世鉅重舉奏當世尊顯下弗厲其法而上不咎其言夫天下之事不患其任且激也患其先有意也先有意也任則貪功而悍作激則訐人以自標罕亡怨怒矣唯無意也雖多法而寡情人弗以為病也雖徑議而過實人弗以為搆也故隋壑之阻盜賊弗怨虛舟之觸褊心弗怒無意也

何子謂雷守王子曰夫擊與牧異法而柔與能殊情寇曰擊民曰牧遠曰柔邇曰能四者由有治以來莫之能有易也四者之易也弗晰而蒙於情也其弗蒙也移於勢也勢之移也畏以求免屈以求伸辱以求榮是三者心動而其情蒙情蒙而法易矣故縱奸漏枉牧寇也伐善殘弱擊民也親昵而多蓄柔近也疏眇而易威擾遠也由是求免而先畏求伸而先屈求榮而先辱其終謂之晰乎夫法以事起道以身立時而變化從乎其人羿之射也不以遠近要之中的而已矣扁之醫也不以強瘠要之對病而已矣夫能中而對者心一而視外晰也弗晰者心之蔽者也晰而有所移者蔽之甚者也晰也弗移也明而有勇者也

盛子令太平太平鉅多桀難治何子曰一人百羊無弗羣者百人一虎無弗搏者言治體異也十室之邑必有忠信百步之內必有茂草言惡必有善也故君子不以善隱惡不以惡傷善夫知而好白易遁也剛而好發易嘗也好尚而有欲易畏也三者凡以有已也有已者不可以治人夫執火而盜避借寇以明也屢罵而童子弗趨不慎出也虎豹之在山也莫之能近也然可以出而奔之者有嗜于人也是故君子之治民以民之知知民則獲見其情以民之怒怒民則獲伸其威自潔以求直則人弗得訾故辨其文異其品黑白章矣公其法定其守志令行矣制愛而取義誅利而尚節身名榮矣光祿署丞陳子為太谷令呂給事請於何子曰光祿丞也貳而內吏也大谷令也長而外吏也丞也令也貳也長也內也外也弗相諳也予曰丞嘗修膳致養於上矣其不知養民矣乎令也養民者也曰大谷何以養也曰和之曰大谷盡驚也安可以和也曰大谷固盡驚也將移之乎存之也若移之也用六師弗用令也其用令也則和之爾矣夫虎也馴之龍也擾之矧大谷者民也曰和之也不懼縱乎縱難制也曰是順私從暴也夫和之也者剛也柔之亢也下之疾也緩之馬調也則弗犯駕鷹習也則弗掣韁和也者非順私從暴也

何子曰天下之味五錯而味不可勝用也天下之色五錯而色不可勝用也天下之音五錯而音不可勝用也錯之者和之也和之用廣矣是故常以經變也變以緯常也常變經緯用無窮也

侯汝立氏者年三十四而為司馬選部郎中為東昌守始汝立力樹職正法又陳職抗章求免弗獲又乞徙學官便養又弗獲乃出守東昌何子曰鄙人曰丐乍富廢飯言創貧也然殉義弗折樹名以自著者貧賤之士多有之而貴習厚享者弗與也何耶予嘗有友三人焉三人者咸節士也大梁李子為郎吏言外家河內何子為史官言兵事高陵呂子為講官言時政三子皆貧賤士也苟有志於創貧賤焉則其能皆可以富貴也然而三子者弗為也夫才者弗憚獨任

而志者耻於旅升故致中曰聖矯衆曰高同流曰汚汚者未有不借聖以訾高者也天下治公道行於上天下否公議興於下道行於上也吾從上議興於下也吾從下非秉哲篤尚之士安有弗移於此者也

御史王子廷相按湖廣清軍其友皆曰今御史弗易任矣御史上予之重以俾法行下視其重以謹法守故御史重則政弗弊而吏不踰今御史有舉其職者上曰怙威而肆下曰憑勢而陵為御史者不亦難乎富人以千金使其子賈子盡散千金求息富人怒之主人有使其家監朴僕者僕怨而罵監由是觀之御史誠舉其職有不干怒府怨者耶景明曰夫今御史若是有之矣雖然子終不以父怒惰賈監亦不以僕怨廢朴夫覈名實非行禍福曷以曰肆別淑慝非任喜怒曷以曰陵若是曷以怨怒也如怨而怒又曷辭焉

張御史言事于朝有風按淮揚鹽何子曰淮揚天下之衢也舟車之所會多豪富私販豪怙勢富行貨私作奸勢撓權貨溺度奸敝法御史者剷豪以屈勢平富以拒貨治私以發奸小舉而敝滋大舉而變生故御史者莫有弗難于淮揚者矣夫至動者風也先發者機也捍難者格也能行三者于天下無難矣夫格者力之至也機者智之至也風者積之至也三者之變化格淺而機深風神速矣故風也者智者之所屈也況豪富行私者乎唐大夫為福建按察司副使何子曰天子擢大夫將以昌其法乎今天下吏治蒸蒸靡矣司法者怙威而劫于勢思以為媚縱弛其目變易其章久矣履正以蹈危守直以中害豈人人樂為者耶於是法令糾繆百姓無所護過日以滋偽吏無何於上下益舞智臨之又安與議於繩墨之間尺寸之內乎夫明法難執法又難也明法者奸弗眩執法者勢弗奪弗眩智也弗奪剛也孔子曰吾未見剛者此何可不謂難也法所以集衆心衛大勢也苟可以奪則政弗彊政弗彊則鉅豪免鉅豪免則眇弱逮法弗行于鉅豪而日籍于眇弱是踈天下之心而貶莫大之勢也憂治者寧矇然而弗視已乎故唐大夫之擢天子將以昌其法也夫使執法者皆有明陟賣法者皆有幽黜則履正守直之志遂而蹈危中害之慮踈矣法何有弗昌乎

趙守之延安延安劉子曰延安民鄙地薄不足以辱良太守雖然敦俗化鄙致厚易安可以無良守邪又曰守在廣平賦詩為文廣平之治不廢何子曰若是延安又何憂乎夫樸所以受飾也卑所以受潤也夫詩之道尚情而有愛文之道尚事而有理是故召和感情者詩之道也慈惠出焉經德緯事者文之道也禮義出焉夫飾莫大于禮義潤莫大于慈惠是故可以敦尚可以生息真陽陳子為鄉舉士績學待用者二十年矣不矯不附不害不干不矜不瀆非其任不舉非其人不見非其物不有湛然不為潔也闇然不為隱也皎然不為白也其視富貴也若惴其接厚利也若遺其處蓬居而藿食也若大享也選于天官天官以為垣曲令張給事曰夫令非難邪糾吏而子衆宣力而布德振廢而啟蔽陳子難乎何子曰夫行視其所立為視其所守發視其所蓄安輪之車其轍不踰重兵之陣其剛不缺積竹之矢其中不靡故推其所立曰行施其所守曰為出其所蓄曰發故曰不知其仕視其處夫陳子之處也仕道備矣張元傑為魏縣方子侯子曰剛明者魏縣之才也立剛以守致明以用者魏縣之政也何子曰夫棟撓輻不撓棟任衆輻衆任也火燭弗若水鑒火著外水著內也夫衆任者事集而易行獨承者敗著內者闇而愈章著外者日晦是故天下之易屈者過用其剛者也天下之易蔽者過用其明者也剛明之用可不慎乎往天下之吏率以剛明顯稍陟用之則剛者茸弗振矣明者蒙弗知矣此

其才豈損于為吏邪是故今之為剛者為赫赫者也為明者為皦皦者也赫赫者多威而寡惠皦皦者多譽而寡實是故吏日顯而民日弱矣夫用智醫而逆治者彊病也用仁醫而順治者弱病也弱病之人彊病之醫亡弗殆矣今天下之民異於往也往也殷富故吏用其才擾之弗覺也今也罷餒罷餒之民擾之必死語曰無急如束薪無弗折矣無察如撒藩無弗亂矣此之謂也

劉守之擢廬州也未即郡沮於言者乃俟調家居累一年餘又弗調守曰言者以予資弗任爾予未視治任弗任安可知哉予遂已邪何以見也乃復上京師謁吏部天子乃調守漢陽何景明曰予于漢陽甚感于古今之官用也古之用人視才視才也者考德績罷不能是故近者有弗取也遠者有弗棄也貴者有可賤也賤者有可貴也今之用人視地視地也者徵發身等居位也由是要勢者日躋之恐弗達也而守散官者踰考弗徙矣又安有超格軼資者哉是故近益近遠益遠貴益貴賤益賤夫若是使才有其地地有其才又何缺焉苟才也無其地地也無其才豈不難哉或曰漢陽素貴富富者懼不善使也貴者懼不善事也不善事者難于上不善使者難于下曰漢陽有貴富者也且有者取諸人乎無者取諸人乎是故有貴者不取諸人以自耀也有富者不取諸人以自實也為漢陽上下者免矣

何子謂寧國張同知曰夫飾車將以駕也飾馬將以馳也是故君子有名則寵有政則達夫修以立曰名行以理曰政名以榮曰寵政以顯曰達故名非飾標政非文具寵非耀時達非巧宦是故君子于名也思毀于政也思敝于寵也思辱于達也思塞思毀則終譽思敝則圖經思辱則常榮思塞則可達

鄭子擢郎中治大同邊儲有與鄭子戚者見曰乃君茲擢予為不懌郎中近官也治邊儲居外不得與朝士列是遠之也治儲之事散有聚無士需將徵豪干暴取凶不改歛貧不減費權利而府怨是難之也夫居遠處難非子宜也惟鄭子亦不懌景明聞之見鄭子曰夫謂子者過矣王臣弗以遠賤王役弗以難辭徧人多求親而憤疏庸士多倖易而脫艱馬越險則駑駿別刃試堅則鋼鉛見故弗居遠其心弗著弗處難其能弗彰惟子之心不問遠惟子之能不窘難是以用子也夫遠之者重子也難之者任子也子行矣鄭子曰吾釋矣雖然權利府怨可謂無邪曰執火不燔嚮者多焦導水不溺涉者多沒故利人曰惠利已為害已苟不利人又安怨如有怨焉則非我矣古也執利權者桑弘羊敗于害劉晏敗于專不害不專用之為經使上不缺行之惟通使下不病在子也夫在子也夫

李子將倅于蘇李子曰吾何以倅蘇也今之才吏予也弗能古之長者今也弗宜仲修曰不發靡著不興罔立行以敏達事以詳集弦急而矢飈櫛密而髮疏是故緩者不可以舉廢略者不可以週遺明法習文究情察物子其任乎本貞曰夫柱促而絃絕燭張而蚊至守止以制行勿使自亂處晦以含照勿使人見致用莫如藏理繁莫如約子欲揭揭焉明數數焉盡難矣李子曰二子之言叛予安適何子曰二子之言類乎叛者也仲修之言為治也已本貞之言為修也已李子曰予兩有之以應變可乎曰不可兩有之以應變是以我冒物也冒之不足則必易焉是故以我冒物者不勝易為通焉則變在物應在我織屨者不量足無廢屨也制車者不試轍無棄車也為政者不嘗術無反政也理會而事不相遠情見而物不縣殊夫治而罔修則任法

而情疎修而罔治則自愛而鮮任任法者必敝民自愛者必愚下是弗通之過也

蔡子由吏科給事中出為福建按察司僉事搢紳大夫或惜之曰蔡子厚積而慎修識遠而高計深亮物而濟務可使秉重居要內贊國經而外格時難今迺出近而處遠去言司而專職守弗足以施溥舉大匪衆望也何景明曰夫蔡子於屈伸之道能明之矣夫伸也者弗在高爵榮名也屈也者弗在居約處卑也志達曰伸志塞曰屈故爵高名榮而志弗達不失為屈約居卑處而志弗塞不失為伸嚮也一陳而求卑再陳而請病夫屈伸之道蔡子能明之矣夫人情智而自好智故洞先見末利害斯明自好故周畏不發不以冒危犯難蔡子智而任者也察物不擅行義不委私言若訥公言若訟非智而任者與夫智貴示任貴斷智而弗示則衆疑任而弗斷則中靡是故天以日月垂象人弗敢侮地以山川示險人弗敢踰孟賁狐疑則不若童子之必至猛虎猶豫則不若蜂蠆之必螫夫天下之事示則明斷則立矧司法乎司法者不示必有罔民不斷必有反令罔民匪智反令匪任蔡子智而不褻任而不易者推此可以達之天下也矧司法乎

何子告蔡子曰司法者人之司命也發奸糾邪董正弼善司法是據故情蔽曰闇文究曰深綱弛曰緩目數曰急闇則納愚深則繫怨緩則縱枉急則矯直四者司法之過也是故君子知詳而守易立嚴而行寬詳則弗遺易則弗害嚴則振寬則容詳易嚴寬是謂四德德以司法又何過焉

進士積試而外補者弗豫申伯溫為進士二年補丹陽令呂子曰丹陽無弗豫也予且甚喜東子曰何以知丹陽無弗豫哉且又何甚喜曰丹陽崇畜久試志在必行畜崇思發試久思任志行不違何弗豫乎夫天下患不行者三事權弗歸也衆志弗率也職序弗則也事權弗歸曰尸衆志弗率曰亂職序弗則曰越尸以處位視亂從越行何得矣一邑之事天下備矣舉其政事相歸蒞其民衆相率糾其屬職相則諺曰賈人之有牛不如庖人之得割故事有不能行于國都者行于一邑公卿或不能制一令制之故苟失其職尊近弗行苟得其職卑遠可為詩曰或燕燕居息或盡悴事國夫行矣皇卹顛顛如或弗行燕息又安肆焉故予喜丹陽者志行也東子曰子言善矣弗曰政在人乎謂令得行則是曰行匪艱予則弗能夫一邑之事天下備令宜知之均上下備文武善善而惡惡均上下則賦役備徵取寡備文武則知愛有禮知勇有義善善惡惡則賞不僭而刑不淫夫行人之所必怒是謂忘害舍人之所必悅是謂忘利故順上獲譽弗為也逆疆賈怨弗避也不以屈求伸弗以辱希榮是謂行志行匪艱乎呂子曰艱矣丹陽能之何子聞之曰呂子尚行而詘逸東子知逸以守艱丹陽之治備矣

進士周子賢為宣城縣孫繼芳曰予聞猛獸在山狐狸不穴長衆之治弗可弛也故立文明禁操法示毒法令流行故盜不生子賢曰予聞茅柔而人籍之澤下而水歸之恩惠慈愛所以結衆也刑罰法令所以滋亂也故文生導民巧法出導民偷生息安理盜故不起周子因孫子見何子告之何子曰夫羊牽則卻驅則行馬控則行驅則逸剛柔之性異也故恩惠慈愛存良輔不及也刑罰法令遏暴制太過也因而用之存乎其時周子曰予知之矣是剛柔之用也不執不廢以此長衆衆治矣教諭李君除襄陽通判問治何子曰治在教其友邵子曰予聞法由曰治風易曰教故制御董責人心威諷喻勸說民聽藐治民曰教無已緩乎曰子思曰修道曰教

夫飾行為修由理為道成訓為教是故標立者遠觀視風行者疾感動故儀刑聲聞莫如教夫吏不紀則民俗濫政不則則下志淫教者紀濫俗而則淫志之務也上敬主下貴貴上好士下賢賢上篤老下親親不取則下知介不害則下知仁其行約其施廣其動微其聞彰古者之待禽獸草木也不擯羣不射宿羽毛不成不登俎斧斤以時罟目四寸故山澤之蓄蕃殖聖人之禮其物若此也況其民乎今天下吏治弱者靡矣強者持其刑罰搏裂抗割之而已獵其民甚乎鳥獸折其民甚于草木又安有禮乎故曰不知教其行飾其理率其訓立古之教也

南陽多文獻仕族至文達公盛大矣然文達公嘗稱葉焦氏焉焦氏由此遂著于天下士大夫間矣焦氏始有侍郎宏再有參政寬再有運使鈍再有知縣欽至文禎為樂清簿文禎與襄王拱之葉牛道微及景明皆有姻舊往慶文禎文禎曰予忝于先矣夫先人皆顯仕于當世稱列于名公大君子予弗能踵躅紹芳矧有以增光益休者乎予豈終墜前聞哉三君子何以教也拱之曰夫良弓之子不失為箕良冶之子不失為裘若嗣宦焉弗在尊顯若能職焉將為休光道微曰仕族之家易興而難繼易興者澤未斬而賢可象也難繼者美在前而易見也夫良弓之子不失為箕失其弓矣良冶之子不失為裘失其冶矣故蓋愆為易而光烈為難子將勿忽其易以圖其難焉爾景明曰世宦弗若世德世宦之家多微世德之家多振世宦者富貴而損志世德者禮義而有恒也夫焦氏稱于文達公蓋有世德焉匪徒世宦已也文禎曰三子之言教之矣

大梁張德充例為周府引禮舍人何子曰夫化必觀世行必矯俗要其本源委於末流故良法既敝則美意或幾乎息矣今天下用士科貢興而孝廉賢良之舉廢科貢於孝廉賢良遠矣而人尚之其有以例拜官者則搢紳之徒弗道焉此何以哉或曰科貢者其盡非孝廉賢良之才者耶曰然則以例拜官者盡非科貢之才者耶故觀世以化者存乎上矯俗之行在其人焉爾夫使富者得官貧者得財上急國用下舒民力例之法意蓋無不善而官者因以率行厲職又何以累其人品哉顧上以此括財而窮欲下以此籍勢而遂身是末流之敝也昔漢文帝許民賣爵司馬相如以貲為郎而文帝之治不以賣爵貶相如之名不以貲郎賤故意美者不論法嗜修者不論資

陳真人壽何子曰夫闡教者道也受養者祿也厚生者欲也古之時真人不教而道著不祿而養豐不欲而生厚夫教而後著道之病也祿而後豐養之蠹也欲而後厚生之賊也夫壽者神之凝也天者物之役也真人能不用神邪能不恠物邪得寶而愛者不計藏而待其自敝則無敝日計藏焉使其無敝則敝嬰兒日啼而咽弗嗟不知其啼也日握而手不拳不知其握也日視而目不眊不知其視也夫神者不知而至者也故不用其神而神無不用夫知而至者神過也知而不至者神不足也過者中人之上不足者中人之下皆不能長生者害于知也是故不知而能與知而不能相懸遠矣神者氣之御也氣者形之御也氣以神動形以氣存不存而存故曰難老

何子曰夫人有天受之而益焉者夫天之受之者乃其虛者也天之益之者乃其謙者也故海之容也水思歸之矣月之缺也光思增之矣有富能約是以長富有貴能下是以長貴有齒能幼是以長年

何子觀河南癸酉同年會錄曰錄也序年列名凡以敦義識好爾然必昭著久遠其事者非諸子所共志者耶凡河南之士幾何也集于學弗萬人已爾集于試弗千人已爾然名于錄者八十人焉爾矣較之亦希罕曠絕之遇也其事何可以不昭著久遠耶夫身至眇也然且弗百年也即百年猶旦暮易至也榮勢往來若流光易絕也此三者非所圖以弗朽滅也所圖以弗朽滅也乃有在于形勢地位之外者乎夫至明者義也至永者名也疎利而義集義孚而名成是故君子顯義以遺名故形外也性內也壽弗長夭弗短也貴弗崇也賤弗貶也何子選次劉僉事詩總百五十六篇釐三卷皆精實確乎可以昭逖俟後弗惑矣曰嗟乎詩也者難言者也體物而肆采撰志而約情慎憲而明則是故比方屬類變異陳矣揆慮緒思幽微章矣徹遠以代蔽律古以格俗標準見矣故單辭寡倫無以究蹟指衆不一無以合方利近遺法無以純體是故博而聚之存乎學審而出之存乎心明而辨之存乎識夫詩之難言也獨言者難邪而知言者鮮矣

大學士靳公有菴曰戒菴何子記之曰隧也而風出之隙也而風入之口者身之隧也不慎故戎興意者身之隙也不慎故邪進是故物必有始而事必有紀惟先也則有備而無患惟衆慎而弗一也則多畏而慮不周夫室有關矢有機室之有關也匪室而有關也關在門也矢之有機也匪矢而有機也機在弦也關在門故室而寇不得踰機在弦故約百矢而弗匱也抑之詩曰慎爾出話言戒乎其口也曰敬爾威儀言戒乎其身也曰相在爾室尚不愧于屋漏言戒乎其心也夫心者天下之至一而萬事之紀也故放之六合而準彗于百世而無不括是故可以參天地而贊化育是故約而易操有功而不勞

何子讀韓子書律呂直解叙曰夫神理之弗著其器數之亡乎天生一成萬一上萬下器數下下也由後世以來弗之詳矣其上焉者又安有所達哉是故聖人得一而知萬知者知萬以得一談一者虛而寡用談萬者廣而莫歸要之以知其要實者為至夫天地之間者氣也制而利則曰器生之節度曰數神理者氣之宰也是故器數詳則神理日明神理明而天下之事得矣

卷三十二

疏書共一十篇

應詔陳言治安疏

中書舍人臣何景明謹奏為應詔陳言治安事邇者寢宮被災皇上兢惕勅諭羣臣下求直言大小臣庶仰見聖顏憂戚伏聽綸旨痛切無不感動流涕謂聖心感悟事當轉移悲喜相繼慰慶兼至然自勅諭之後已將旬日未一視朝輔臣言官奏論邊軍番僧義子數事一言未見採納一事未蒙施行臣觀災變之來天道甚邇陛下上回天怒下安人心如此數事宜急省改今復處之宴然未見損減一二豈陛下感悟之心忽萌而轉移之機復塞也臣民莫不失望中外實為軫心夫災禍切近悔厲斯深形勢積成改救何及臣上原天意下究民心近觀人事遠考古昔治亂存亡之機實在今日陛下欲圖理興化改絃易轍過此不為無可為矣臣聞天下之政精則治緩則亂明則治闇則亂治亂存亡事理必然方今上下依逢遠近壅塞法度有失禮義弗彰功實不稽名器多濫欺蔽之風長偷惰之習成兼以民生已困寇盜未息兵馬弛備財力並竭外僅維持中實潰散其勢如此而其治如彼臣竊憂之陛下不急省躬以懲禍始而欲肆志以待患成何也臣聞內外附固長久之道今聖躬單立皇儲未建內無手足相倚之親外無肺腑可託之戚后妃不得當御公輔不得通謁乃日與邊軍並出入番僧義子同起居此皆今日創見先朝未聞也陛下何不一如言者所議早示聽斷且甲馬馳騁之場不如廣廈細之上竺乾邪穢之教不如文儒談諷於前樂彼厭此臣所未喻若義子則陛下寵幸之臣自古寵幸鮮能善後原其所由盛滿為忌陛下尤宜早為裁抑明示區處使上者得保富貴其次得保首領義既不失恩亦有終豈不美乎夫國事執奏實在大臣大臣順旨事乃寢敝臣謂大臣奏事宜使即決是非直陳利害準則憲章制之理義不宜奏兩請之辭取阿上裁則制度不隳功實不謬名器可正其大臣進退當以義斷行賄干進無耻取容者併為罷斥而獎拔恬退訪求耆俊則名節明而仕不苟然後嚴督庶官以成精明之治寬撫百姓而培殷富之基治安之道此其大畧要之大本祇在聖躬夫言苟切心何畏逆耳陛下若以章奏繁委瀆亂聖聰莫若一御便殿宣進輔弼召集侍從尊卑之禮不甚峻拒上下之情乃可通達必能陳說利弊開道禍福指斥時事為切心之言以悟陛下矣臣聞先勞後逸先逸後勞先後之間相去遠甚故儆戒之後必有餘樂怠荒之後必有餘憂陛下若體天心之仁愛念祖宗之創建堅自忍制常加矜飭務舉實政不事虛文太平之治可以立就永踐九重之安長享萬乘之樂憂勤於一時而怡豫于無窮陛下何難而不為此乎昔成王感於風雷之變乃有刑措之休高宗感於雉雉之異是臻嘉靖之效陛下深惟感悟稍一轉移海內將從風而靡四夷必仰流而化商周守成之業亦何足多哉臣草茅微柔蒙先朝甄育陛下復收起於廢黜之餘恩德至厚嘗欲以言圖報恐干出位之咎然臣之懷誠積慮久矣乃今躬逢聖明開獎言路千載一時何忍容默用是昧死上陳伏望皇上亮臣愚悃曲賜矜納臣不勝幸甚

上許太宰書

中書舍人何某頓首上書冢宰許公下執事某誠至愚竊見明公自入吏部所推進者皆崇飾名節砥礪廉耻之士清議攸與羣望景附鄉鄙末進實亦私抃迺者主上幼冲權閹在內天紀錯易舉動大繆究人事考變異未有甚於此時者也然而上下之臣未見有秉德明恤仗義伏節者某雖寡昧諒明公之所必憂也夫國有人曰實無曰虛以今日觀之雖謂之虛可也其所以繫大小之望致虛實之原實惟明公之責是明公雖欲無憂不可得已頃者聞權閹多干明公之正者議者難之或謂宜少自貶以為容夫自貶以為容者患失者之所為也孰謂明公表師百僚堅立萬仞者而為此乎某於明公素未伏謁然慕義甚深區區之懷不敢不露竊為明公畫二策惟明公之自擇焉一曰守正不撓不容於權閹而去者上策也二曰自貶以求容于權閹而不容於天下後世者下策也夫今之計止是二者二者俱為不容然守正不容可以激頹靡于當時流聲烈于後世損少而益者多自貶不容則頹靡益恣聲烈且敗益少而損者多二者曷重曷輕惟明公之自擇焉昔者子貢謂孔子曰夫子之道大天下莫能容盍少貶乎孔子曰良農能稼不能為穡良匠能巧不能為順君子能修其道綱而紀之統而理之而不能為容賜爾不務修道而務為容爾志不遠矣由是觀之士而未祿尚不可為容況位冢宰統百官而均四海者乎而何以為庶官之地天下之望乎今時匹夫女子咸知太息用以為慰者以有明公在位望明公深惟保重某積懷甚久不敢輕造門下謹遣家人持書托閹者通焉幸明公賜察不即叱責

上楊邃菴書

僕聞聖人哲士取人於衆惡明主顯相識賢於集毀夫狗同情則獨行見遺實多口則廉節被黜何也獨行者同情之所繆而廉節者衆口之所黜也昔匡章棄於通國而獲與於孟軻即墨污於左右而受封於威王孔子明公治之非罪晏嬰脫石父於縲紲是故衆惡之中聖哲之所必詳集毀之下明顯之所弗蔽也今有操獨行秉廉節而干衆惡負集毀若李夢陽者明公在上何可弗少加察而一援之也夫僕於陽非敢謂其無過也自崇而弗下人太任而弗識時多憤激之氣乏兼容之量昧致柔之訓犯必折之戒此其過也若其飾身好修矜名投義見善必取見惡必擊不附炎門不趨利徑處遠懷不招之耻處近執莫麾之勇在野有兔置之武在公著素絲之直立志抗行秉心陳力咸可尚也前與御史相迂同黨交構恃其貞介不服文法遭延無已固其自取而尊達至為不悅縉紳靡然誹笑言官亟詆於朝法吏深鞠於獄惟恐摧之弗披而辱之弗窘也嗟哉亦已甚矣謂深懲以全之乃底其壞歷責以備之實求其缺謂其為高好勝多事越位不即攻之將為患害則陽之為害弗猶愈於賣法成賄汚行喪守玩公詭避行私煽虐甘心附媚役志富勢者乎凡此一切置之不問而獨於陽而較焉何也大槩習於苟同而畏異已溺於混濁而非獨清便於相容而憚弗羣務為蔽閹而忌太白故當事謂之橫伐奸謂之訐建樹謂之標已振起謂之輕事問民隱曰市名而出位持國法曰寡情而立威是以詭俗諧衆之人相倚為譽而直節獨行之士疾之若讎由此觀之仕宦之徒不貶損以就時游滑以希世何能免於今之人哉明公在上秉進退之權司統均之任獎拔廉直沮抑邪枉而陽為門下相知之士其困於人若此況門牆之外萬里之遠者乎夫讒言屢至慈母投杼浸漬之灌可解膠漆僕於陽有肝膽之交聞於人言猶弗能無疑明公之門陽不敢徑達雖有一壺何由少白然陽之事在江西者亦甚彰彰匪有隱惡難見也僕嘗究之衆議士民頗公學校之徒曰陽敦古崇禮志在澄清閭閻之下曰陽不為撫按官爾可使盜賊息權勢不害我也夫學校

之徒陽之黨也其言不徵閭閻之下無知之衆何以黨於陽哉今京師之士其弗知者則已流言傳訛昧形議影羣猜共怒一吠百聲持辯風起發言雷同矣間有知者則亦恐異同於威要之吏以遭口舌之禍視為秦越隨其軒輊夫反同情以伸人格衆口以明物此其弗利也必矣孰肯樂弗利而為之哉昔孔融薦乎禰衡汾陽解爵於李白揚善登俊閔才舒困昭昭人代矣今陽之文藻敷贍才辯捷給誠二子之流匹而拘檢行止閑於禮義可以用世賁治二子弗若也乃窘辱摧靡卒無一為之地者僕甚傷之伏惟明公秉道服人積望鎮衆力可以移易範可以表正於陽少加援察采士民之議捐比附之論使邪枉無順遂之私廉直無不容之嘆非獨陽之幸也國家斯文幸甚

上李西涯書

前伏聞明公體中不憚竊見在閣省食多事形勢心憂宜必至此某再造門下省問不得一望見顏色退而抑鬱累日又聞少康矣甚喜慰然疑久弗見出昨乃見有引疾求退之疏明公之識非末進可窺然竊以為未安也近河南盜賊日益橫起山東士卒經年露暴國有強禦而獄有言官野有屠戮而朝方宴笑廷議大繆市令不行勢急燔溺獨恃明公拯救爾未宜閉戶無聞在家不知迺復棄而引去益非明公所以後身而急國家之難也古之大臣功成事定然後避寵利持盈滿深思高舉保身完名是故保身完名者大臣之所以居成功處盛世也今明公責重望深任利害而當毀譽欲以此時保身完各難矣昔成王在幼殷人動搖召公告老公旦非之明公亦宜惋時悲人畧疑忌之嫌捐顧愛之念覽召公之迹體公旦之心則天下國家幸甚或以內有掣制事無違逆覽不可之幾行必止之志然已晚矣若欲轉禍為福求成於壞則猶可及也夫同舟之人胡越一心見禍知畏覩患思防人之情也今內之用事有未然者私意蔽於內而利害之實不省忌諱容悅者衆而剴切之言未至也誠指事為之勢陳禍患之形喻以同難之義導其共濟之美開誠以示獨任不却更執以不回之操斷以必至之勇若是而明公出焉不為不可也若必惡污就潔見危圖全不惟缺天下之望亦不能免當時之議矣又或顧患依違少撓即屈則出處等耳亦非敢望於明公也夫成美者納善感恩者報義故袁盎進說於申屠朱雲納忠於蕭望古之大臣欲有為者未必不有匡士弼贊義夫慫慂者也某在家五歲自期全命於蓬蒿之下過蒙明公收於廢棄之餘舉之下吏之列覩事激中既不能明諍於朝廷於明公左右又無以增明益高補遺而輔不逮實甚耻焉恐終有以負明公敢志其狂昧布腸腹惟明公采覽無繆於古大臣出處之義

與侯都閫書

侯都閫足下僕鄙薄於取與則甚謹而不敢苟足下前所惠牙筯并梳受之實非所欲初見來价道殷勤甚懇恐拒盛意故不復辭及途始知足下禮意甚衰凡物以表恭交以道接以禮雖孔子受之苟儀不及物君子弗屑也僕不敢以君子自號然不義之物受竊不安請以元封識返之幸不多怪僭妄敢呈一辭于足下僕自貴州抵雲南行陸四閱月車怠馬煩欲圖少逸故來就永寧之舟耳又聞霑益至永寧傳舍衛戍廢敝人皆狡不識上下又寡廝隸之役僕懼遲滯王命不即飭行李當時藩司諸公皆以足下當西路能禮往來士大夫為僕慰由是僕之西行遂果及歷烏撒黑張阿容摩尼之地冒赤水之炎犯雪山之寒入倒馬關箐霧雨連旬不開

竟日無人行廢蕪寒蔓猿泣鬼嘯思之令人神竦又羅羿出沒劫略於道前後繼聞誠非人所居者僕始悔是行然望永寧則如歸以其有足下在也及抵界殊自慶其出夷窟而至大境目若開而明者去城不數里則寥然無一人出迎僕以足下主是亦必出郊而城門咫尺之地不能屈足下車馬及館處至夜愈益不通問遂為盜所輕僕意足下素稱能禮士大夫者豈以僕不足齒于士大夫之行與抑足下所禮者皆要路顯赫而僕非其流與足下宜不如是之汙也僕不足言所執者乃王命也足下乃王臣也以王之臣而恭承王命不當乎何乃坐視其困而使之遲吾王命也凡禮之交際來有迎去有餞在主土者尤不可缺始而不肯枉迎足下託以他出其不枉送其亦他出乎若有他出為行者可也足下位尊恐屈官不出令麾下一出烏乎不可何使之寂然不出也意者足下以僕夫之故為累足下遂簡僕耶然足下為天子捍衛遠人使行不拾遺居者安堵其職也乃致盜入公署偷竊天子使臣之物是僕累足下亦足下累僕耶古人有我心則慰之詩非僕所敢希于足下也足下又以僕欲讓衛官故衛官不來見夫僕之隸役供具皆衛官所當承者今倨然侈然不與僕接足下又從而為之辭則衛官之簡僕固端於足下矣蓋君子之待人以義不以利害以情不以顯晦足下於二者不知察而人稱其能禮士大夫何也昔葉公好龍几杖門戶皆手畫龍形一日有龍下于庭葉公驚且走曰吾非好真龍也足下之禮士大夫無乃葉公之好龍與抑如僕前顯晦利害之說與足下審之僕願以君子成足下盜一事望足下留心僕誠亦累足下也僭妄盡所欲言甚得罪乞亮而恕之

擬與藩司論救荒書

頃者聞朝廷以淮西告災蠲其常稅命守臣存撫賑貸此正主上俯念元元之意惠甚渥也今郊廛鄉鄙之民捐室廬去田畝訣兄弟叛父母而出者聞皆賣其妻子身為奴婢甚者棄尸道路百不存一其未徙者又皆覆釜闔室坐以待斃有快於速死自經樹枝者夫死者不收而生者未哺往事已鑒而來勢方迫此正執事者所宜控竭智慮紓遐猷布隆惠以寬民生以承上意之日也然而利害之實不省緩急之端昧序內無存變之卹而外無應務之策甚非所以謹生齒之大命而彰主上之實澤者也竊於執事有不取焉誠使僕開其利害執事試聽之今為民計大率利一而其害有三徵求之擾工役之勤寇盜之憂此為三害而所利於民者獨發倉廩一事耳利害不並施而多寡不相敵今徵鷹犬者使吏執箠索民出錢又胡椒馬布泉鞶纓諸物屢下於民需價償之價倍而民實不得又屢取絺綌使女無餘葛此皆非賦之歛不貢之供猶日繼不絕是徵求之擾尚在也至王府黃河之役築城修塋之夫丁連老羸扶顛起廢裹糧數百里死者已半而莫為中止工役之勤如昔也前者因民劫畧為盜下令各鄉置捕詰之役以為便宜然捕者乘機生奸深察劾逮平日無賴子弟為之爪牙羽翼家歷戶至殺人牛馬取人貨財盜未及除而良者蒙禍有司因循莫為之省是寇盜之憂尚在而又倍之也發倉廩本以利民而其弊反甚倉舍一啓豪強駢集里胥鄉老匿貧估富公家之積祇以飽市井遊食之徒而野處之民曾不得見糠粃富者連車方輿而貧者曾不獲斗升又鄉民有入城待給者資糧已盡日貨餅餌而卒不得與比其少得不足償貸反因是致死耳聞目睹可為痛扼夫欲有所與必先為去其所奪養馴兔者不蓄獵犬植茂樹者不伐斧柯以其近害也故止沸不損其薪徒酌水澀之沸不見止養人飼其口腹而刳其股肉終不得活今三害未去而欲興一利以救民之凶何以異此也

與甯兵備書

日者見執事求退之疏出處大義要宜有此夫朝廷處執事者善矣執事之情則得矣然地方軍民其如何邪僕自愧身處闔閭之內職在書史之藝不親言責政要徒以口舌私自論列以伸執事於士大夫友朋之間則亦蔑矣更投之於弗合而忌之於必沮無怪乎勢之難也夫天下之事百人成之不足一人壞之有餘大抵今之人率不察於利害之實而必遂其意見之私略其所齊而惟攻其所不同故泛議者騰無情之謗而中禍者下有隙之毒天下之事奚所救而欲勿壞也僕所憤惜豈獨為執事耶夫良吏不媚上不求懷于民特士不求無非于衆而欲伸于偉哲不恒之士故其節介而惠不遺志遠而名不孤今河南之童黎則念執事矣京師之士有偉哲不恒者于執事又有不俟執手杯酒之交而知之者矣執事何以得此邪亦可以自喜矣夫以位榮人人所樂趨以事責位人所必避是故才者任難於亂而闖茸藉貴于平安今仕宦之情莫能易此平居攘華要以自利爾急則憚害而罕任雖在華要將委而去之即使執事他日見用屬時無事則不免言者之欲摧敗苟稍有事司權力當利害以責一旦之用將必有不捨執事者矣惟執事定志安身勿以時論少自沮易僕之所深望也昔馬遷奮格衆之見不愛其身以伸李陵陵卒隕其家聲以累太史夫陵實國士不能勇于一日之死而欲幸望于不世之圖卒之老于異俗而節不立身殞而志不明于人此義夫千載之恨也執事高俊樹立非庸可冀其一二然所伸于偉哲不恒之知者僕惓惓望焉惟執事圖之

與何粹夫書

景明頓首粹夫先生閣下日者先生示以疏歸竊與子鍾計慮謂宜且止更值時方忌諱虞有觸冒且疏而部不可之無益舉動古人以禮義制進退進不可苟退豈可輕先生裁之海內友朋屬目幾何三四君子悉已謝時仲木退耕于高陵獻吉羈處于大梁德涵久廢于岐下子衡伏竄于海濱有憂國傷人之思而寧無云亡殄瘁之嘆乎先生乃復欲憤世自遂長往之情得矣恐不免于扁心之譏而或繆于義退之道也夫據勢而經施從風而順化知遇曠代之事也經常以緯變成易以忍難君子隨時之用也若稍不可意不能其煩便自委去則天下欲承君子之澤幾無時矣僕不肖獲聽于先生先生服廉守介明德峻行雖子罕之却璧幼安之揮金閔叔之不食遺蒜無已之不受贈袍何以尚之至其瑰論精識周知曲中略于章句之末而超于尺寸之外可以參蹟濟務昭遠明微盖僕之所深尚者然數年以來執論究迹似猶獨行一節之事而未合於聖人通士之觀何也夫徇時就功世不能器秉樸滅華徒飾亡實四者皆非通聖也通士不居器而滯用聖人不專質而喪文故簠簋之器必飾金玉棟梁之匠不彫濩落何也物有所不容而貴有所必須也今先生或者敦質而太略于文器大而人莫能用惟先生少自抑忍順卑俟時以存人望以慰交游之私夫龍蛇之德變化之義先生蘊之素矣僕恃知愛輒敢既其愚臆惟先生亮之

與李空同論詩書

敬奉華牘省誦連日初憮然若遺既渙渙然若有釋也發迷徹蔽愛助激成空同子功德我者厚矣僕自念離析以來單處寡類格人逖德程缺元龜去道符爽是故述作靡式而進退失步

也空同子曰子必有諤諤之評夫空同子何有於僕諤諤也然僕所自志者何可弗一質之追昔為詩空同子刻意古範鑄形宿鎔而獨守尺寸僕則欲富于材積領會神情臨景構結不做形迹詩曰惟其有之是以似之以有求似僕之愚也近詩以盛唐為尚宋人似蒼老而實疎鹵元人似秀峻而實淺俗今僕詩不免元習而空同近作間入于宋僕固蹇拙薄劣何敢自列于古人空同方雄視數代立振古之作乃亦至此何也凡物有則弗及者及而退者與過焉者均謂之不至譬之為詩僕則可謂弗及者若空同求之則過矣夫意象應曰合意象乖曰離是故乾坤之卦體天地之撰意象盡矣空同丙寅間詩為合江西以後詩為離譬之樂衆響赴會條理乃貫一音獨奏成章則難故絲竹之音要眇木革之音殺直若獨取殺直而并棄要眇之聲何以窮極至妙感情飾聽也試取丙寅間作叩其音尚中金石而江西以後之作辭艱者意反近意苦者辭反常色澹黯而中理披慢讀之若搖鞞鐸耳空同貶清俊響亮而明柔澹沉著含蓄典厚之義此詩家要旨大體也然究之作者命意敷辭兼于諸義不設自具若閑緩寂寞以為柔澹重濁剗切以為沉著艱詰晦塞以為含蓄野俚輾積以為典厚豈惟繆于諸義亦併其俊語亮節悉失之矣鴻荒矣書契以來人文漸朗孔子斯為折中之聖自餘諸子悉成一家之言體物雜撰言辭各殊君子不例而同之也取其善焉已爾故曹劉阮陸下及李杜異曲同工各擅其時並稱能言何也詞有高下皆能擬議以成其變化也若必例其同曲夫然後取則既主曹劉阮陸矣李杜即不得更登詩壇何以為千載獨步也僕嘗謂詩文有不可易之法者辭斷而意屬聯類而比物也上考古聖立言中徵秦漢緒論下采魏晉聲詩莫之有易也夫文靡于隋韓力振之然古文之法亡于韓詩弱于陶謝力振之然古詩之法亦亡于謝比空同嘗稱陸謝僕參詳其作陸詩語俳體不俳也謝則體語俱俳矣未可以其語似遂得並例也故法同則語不必同矣僕觀堯舜周孔子思孟氏之書皆不相沿襲而相發明是故德日新而道廣此實聖聖傳授之心也後世俗儒專守訓詁執其一說終身弗解相傳之意背矣今為詩不推類極變開其未發泯其擬議之迹以成神聖之功徒叙其已陳修飾成文稍離舊本便自机如小兒倚物能行獨趨顛仆雖由此即曹劉即阮陸即李杜且何以益於道化也佛有筏喻言舍筏則達岸矣達岸則舍筏矣今空同之才足以命世其志金石可斷又有超代軼俗之見自僕遊從獲覩作述今且十餘年來矣其高者不能外前人也下焉者已踐近代矣自創一堂室開一戶牖成一家之言以傳不朽者非空同撰焉誰也易大傳曰神而明之存乎德行成性存存道義之門是故可以通古今可以攝衆妙可以出萬有是故殊途百慮而一致同歸夫聲以竅生色以質麗虛其竅不假聲矣實其質不假色矣苟實其竅虛其質而求之聲色之末則終於無有矣北風便冀反復鄙說幸甚

與李中丞書

自奉岳州顏色澧州書問今十餘年來矣執事名位日起內外屬望僕誠亦私遂期仰撫臨之初蒙降禮寒門頃者又辱封書之貺想聆德音式如金玉近覩執事疏奏條布舉捨興革濟務之功格俗之化蓋次第具矣天其猶有活中土人意邪僕觀比日之事大率上多取容而下多憤激譬之天下之勢病弱者也非一藥可療容者養患以待亡激者速禍而無補故非得大國醫使成專任久試之効何以救危困也夫古之人學道以為己也學官以為人也其心一也道無為己之德而官無為人之澤所從學者異也中者聖之則也正者人之矩也中正者易之體用也不容不激維中維正舍執事吾誰從乎夫樞機得人重于方鎮謂樞機約旋而博也事

勢有不然者矣上治則視樞機上忽則視方鎮樞機之地先君方鎮之地先民故方鎮者地遠而官尊地遠官尊則力可抗而權倖之威弗易及也即使執事入參樞機恐無所容其巧力而不可一日居不如在方鎮之猶獲志也僕之所望者惟得專任久試乃中土之幸瑣言鄙慮無足采者幸垂省覽復誨不宣

卷三十三

記問說共九篇

沱西別業記

沱出於江予嘗浮江下峽所束勢漂疾淪滙瀾湧漩湫莫得旁展既入荆地平溢十數里其勢始得自縱乃有別出若沱者焉沱至華容則蜿蜒迴復帶城抱郭起伏皆自重岡曲壠相應顯又瑩澈可鏡予望慕者久之乃知其地多秀產固有山川蔭之也吾郡守孫公華容人間以是語之公曰沱之西吾別業在焉始吾遊沱西見其地膏場繡澮可以稼穡水有青赤雜色之魚可以罾網中有夷爽可構而湖山四塞又可以眺而得也遂購得之他日獲解宦將惟是以終而子昔嘗得其槩為我記一言予業已奇公曰是予所云華容秀產也既公之子世其者來從予游予益奇之曰是又所謂秀產也而愈益信山川之能蔭也孰知予向所見山川者固公家物也公在壯歲官至郡大夫而聲績懋著向往方殷未可以言退也然予見今之仕者多以官為家而歸則無所終公乃預有是計其明達邈有弗可逮也別業至邑三里地名三里店東牆以城睥睨互出林表西峙白鼎後為黃湖前有湖曰田家湖湖之外為禹山列如屏障襍見丹碧雲烟之所出入光景之所射映朝夕四時之所變化不可紀狀而公誠有成功引退之時日處其中治田灌園持書訓子孫暇則置酒召客相與投壺彈棊無不可樂者此固公所先畫於心而奚俟乎予言也既紀其勝復為沱水四章他日過沱西之堂幸歌以自侑詞曰沱之水清且漣兮宜爾子孫秀且賢兮沱之澍有田膺膺我往于田其實碩甫沱之中其夷可宮我日以居裕其有終沱之外其山若會予日以絃用綏我年

沱水四章章四句

龍灣草堂記

龍灣在靈寶縣之南入函谷次古虢國左洪溜潤而秦嶺右盤山沃野流水湧泉可田圃而宜稻竹許子之家食也樂其地葺堂焉棲之今年許子召為尚寶丞數月復乞歸曰予茲得告歸斯堂矣其遂以息營養年勉遁以成學乎余聞之曰許子蓄久而升器飾而賁用然且翩翩然有高舉之思焉其志固君子所尚而非可以與世俗淺見寡聞者道也夫憤世之意淺則離俗之志不決復古之志少則繼往之作不興昔者王教之一也國有學鄉有序而已矣士不私肆其學而人不私宗其道其後郡邑之下有書院焉山澤之間有精舍焉學殊而肄道同而宗是王教之離也夫學肆而明也道行而達也從乎上者化流而易從乎下者化格而難苟遇其難也則君子亦自明其學自達其道已矣百世之下無聖人焉則作者之意亡百世之下無賢人焉則述者之意亡君子慮焉是故日之含照也不以蔀屋不輝雨之降澤也不以覆甕不注夫道隱而經要廣大而微志意修則立精思則通窮理而極數則神是故萬世不易者道也窮不移其守而困不遷其業者君子之學也夫龍門河洛之間古聖賢之都里聲教遺風存焉許子構斯堂而棲也豈徒自遁以遂其高者也

信陽修城記

僉事閻君子明兵備之三年城信陽成集余與都給事張季升登而觀之臺隍峻浚樓堞虧蔽表帶山河裏括萬家之室相顧歎曰壯哉麗乎斯地萬年之固也先是僉事甯伯東氏來兵備值大盜之後為防焉巡舊城視之曰庠也必崇而新之乃計費度工措財於官府取力於隙民歲餘城南門迤西北至東門起北門樓大功未就去又遇積雨牆壞數百丈閻君至則完其壞者城東門至南門立三門樓東縣鼓司晨西縣鐘司昏又置漏小南門司晝夜四時登城上令旁下而走水即積雨不壞其役不亟而功有稽其用經而力紓故三年而城成人曰二兵備之於役也於時事先後緩急各得其序理云城高三丈圍廣千三百五十六丈有七尺董其役者知州彭偉指揮袁鎧張恕孟漢千戶傅欽任武百戶王義梁山醫官周寶於是知州林君大霖指揮使鮑君國來請文紀諸石何景明曰古者諸侯守在四隣政貴人和不以險塞為固是故論治者有本末焉然時平而備弛併其末者亡之昔大盜之入汝南也更有棄城者矣然西平上蔡之長固死守吏也寇則踰垣踢門入即二縣有堅城令弗死唐縣城稍完則守此豈可謂末弗治邪是役也甯君經始閻君成之二君功德斯地者並久遠矣閻君今且明其陳簡其卒作其禮教夫城以蔽衆簡卒以守明陳以戰作禮教以經之所為兵備者無弗至矣此豈徒治末者哉

確山縣修城記

確山舊有土城緣塹委垣而膚溝正德七年北敵之南吏民睨城曰此曷足以捍而守之邪迺相與棄其城走匿山上敵迺入燔燒官治及民舍城中半赧八年僉事甯君河至始計度城役擇邑內有力者八姓限以工俾知縣吳照縣丞鄺琛典史吳金悉力董之以倥傯事九年僉事閻君欽代甯君兵備視城未就曰工弗可以已也役弗可以亟也弗已以終休弗亟以蘇憊終休蘇憊治之仁也可不務乎迺專以吳金董事責其成十二年知縣宋良臣至而吳金以他務出復專責之良臣良臣則均力嚴事葺其壞繚其未完樹三城門樓及月城角樓鋪樓內土城咸備十三年十月閻君登城視喜曰城不已就乎於是吏民又相與睨城曰嗟乎使七年有此城敵不得志也以茲而往可以捍我衆矣非二兵備之功乎非諸縣官之勤奉其令乎夫有勞逸之有始終之上猷於心下宣諸力一邑之城踰數歲經營於二兵備歷於諸縣官然則千百年之事可以苟焉為哉城圍七百餘丈高三丈陶磚括其表良臣曰是不可無紀迺使吳金來求予文刻諸石

略陽縣遷建廟學記

正德己卯春予董學事由徽州入峽浮白水江下略陽視其城中卑江水西來衝之多激流迅湍欹圻崩岸而學宮正居其卑夏縣書報江溢大水城陷學宮悉沒副使寧波呂君克中時按治關南迺行縣躬詣其地視之則堂壇墊為沮洳殿廡盪於沙石矣遂集衆謀曰茲地卑甚不可復即復終能免患邪於是使同知何子奇率學官張繡諸生羅江劉儀等改卜相其利宜圖惟久遠獲地于縣治之北抗敵可宮考兆曰吉僉謨畢諧君乃擇委漢中衛知事金坡治其工又發贖金三百餘附之坡程諸匠作鑿石伐材拓荒闢穢經始于庚辰夏五月又五越月而卒

其役凡為宮室殿五楹廡東西各八楹戟門三楹櫺星門三楹鄉賢名宦祠各一楹堂三楹齋東西各三楹儀門三楹學門三楹東西號舍各十一楹其餘牲所神厨廩庫咸備右高為廟左下為學崇卑就列嚮背因形棖題約制輪奐飾觀聖靈既妥賢才斯萃惟君思創樂成猷厥終始乃令教諭李崇實狀列其事請紀諸石按志云略陽地自漢歷唐宋為沔州隸興元府元始徙州治於鐸水改略陽為縣隸之至正十年縣令李舜臣建學於縣治北逮國朝改沔州為縣與略陽俱隸漢中府洪武四年縣丞葉禮徙學於縣治東北正統十三年大水學宮壞教諭譚志學修之成化四年又大水學宮又壞知縣李鑑修之坡之開茲地也掘土得古碑視其記實李舜臣徙學故地也蓋自葉禮改徙之後迄今凡三遭大水而後徙徙地仍復其故云豈非得數哉夫禮義之俗成於富厚忠敬之道可施蠻貊略陽為古羌氏之域至文王布岐周之治行江漢之化其風氣已開文命漸 矣矧由數代以及我大明治化惇裕之盛則風尚移易其有已乎然百餘年來人物聲名尚未底于顯融豈以僻處梁雍之間乎亦由屢兵荐沴役繁生鮮而士不得以隆其業也呂君奉聖上命蒞關南拊循其民簡練其卒厚農薄歛芟寇清刑然後興廢舉墜修學敦教獎官師勵人士以行其政教焉孔子曰足食足兵民信之矣余於關南庶其見之昔文翁興教相如為師蜀之有學蓋肇於此今茲之建是宅阜隆以降湍悍構造維新地復其舊天相人協理臻勢會肆寧厥居實惟永觀俾俎豆之事表于西南絃誦之音流于漢沔文翁罔專美矣後世必有考略陽之學究其文物所從來者則呂君功德何可以弗著哉何可以弗著哉

師問

有問於何子者曰今之師何如古之師也何子曰古也有師今也無師曰然則今之所謂師者何稱也曰今之所謂師也非古之所謂師也其名存其實亡故曰無師曰古之師可得聞與曰古者教之之法曰性曰倫性則仁義禮智信是也倫則君臣父子兄弟長幼朋友是也於是而學焉以由之曰道學焉以得之曰德用之而足以舉于天下曰業是故古之師將以盡性也明倫也則其道德而蓄其業也是謂古之師也曰何謂今之師曰今之師舉業之師也執經授書分章截句屬題比類纂摘略簡剽竊程式傳之口耳安察心臆叛聖棄古以會有司是故今之師速化苟就之術干榮要利之媒也曰師止是二者乎曰否不止是也漢有經師作訓詁以傳一家之業者也君子有尚之唐宋以來有詩文師辨體裁繩格律審音響啓辭發藻較論工鄙咀嚼齒牙媚悅耳目者也然而壯夫猶羞稱之故道德師為上次有經師次有詩文師次有舉業師師而至于舉業其卑而可羞者未有過焉者也曰然則廢舉業已乎曰何可廢也今之取士之制也士進用之階也曰是既不可廢子何謂其卑而可羞也曰吾所謂卑而可羞者非其制使然也師舉業者之敝也古之師之教者立廉耻之節守禮義之閑不重富貴不羞貧賤不詘身于威武不失志于患難故上樂得人而用之夫今獨不欲得是人用哉顧以身求之勢為難也故以言觀之以言觀之故有科舉之制豈逆其師之教弟子之學乃以為利之門也嘗見今之為其子弟求師及其子弟之願學者口訪耳探有告之曰某高官也其前高第也其舉業則精也其師之於是雖千里從之也又告之曰某未有高官也未有高第也其道德則可師也於是雖比舍弗從之矣夫巫醫樂工與凡百工相師法以習其技藝所以求食也安有士相師以求食而可為也此吾所謂卑而可羞者也曰若是則何如而可也曰今之舉業所習者固古聖人之言也因其言求其道修之內而不願乎其外達則行之困則存之興斯教也安知今之

師非古之師哉問者於是避席曰今日乃承益我以師之說

說琴

何子有琴三年不張從其游者戴仲鵬取而繩以絃進而求操焉何子御之三叩其絃絃不服指聲不成文徐察其音莫知病端仲鵬曰是病于材也予視其黢然黑衰然腐也其質不任絃故鼓之弗揚何子曰噫非材之罪也吾將尤夫攻之者也凡攻琴者首選材審制器其器有四絃軫徽越絃以音軫以機絃徽以比度越以亮節音則清濁見機絃則高下張比度則細大弗踰亮節則聲應不伏故絃取其韌密也軫取其枯圓也徽取其數次也越取其中疏也今是琴絃之韌疎軫之枯滯徽之數失鈞越之中淺以隘疎故清濁弗能具滯故高下弗能通失鈞故細大相踰淺以隘故聲應沉伏是以宮商不識職而律呂叛度雖使伶倫鈞絃而柱指伯牙按節而臨操亦未知其所諧也夫是琴之材桐之為也始桐之生遂谷據盤石風雨之所化雲烟之所蒸蟠紆綸困璀璨峴鬱文炳彪鳳質參金玉不為不良也使攻者制之中其制修之畜其用斲以成之飾以出之上而君得之可以薦清廟設大廷合神納賓贊實出伏暢民潔物下而士人得之可以宣氣養德道情和志何至黢然衰然為腐材置物邪吾觀天下之不罪材者寡矣如常以求固執縛柱以求張弛自混而欲別物自徧而欲求多直木輪屈木輻巨木節細木櫪幾何不為材之病也是故君子慎焉操之以勁動之以時明之以序藏之以虛勁則能弗撓也時則能應變也序則能辨方也虛則能受益也勁者信也時者知也序者義也虛者謙也信以居之知以行之義以制之謙以保之樸其中文其外見則用世不見則用身故曰雖愚必明雖柔必強材何罪焉仲鵬慙然離席曰信取於絃乎知取于軫乎義取于徽乎謙取于越乎一物而衆理備焉予不敏願改絃更張敬服斯說

樊少南字說

樊生鵬從何子受業能何子之道問曰投業進曰鵬聞古者冠則命于父兄先生字之以示成人鵬未有能成然已冠矣請先生有以字我也何子曰鵬莊生所稱南圖者也汝當字曰少南鵬又進曰字既得命矣恐弗稱也願有言以勵我何子乃使之坐而告曰爾聞夫鵬鯤為之也鵬之大數千里鯤亦數千里非鯤則不能鵬也鵬之南圖也扶搖而上者九萬里風蓬蓬在下足以任其力鼓其後而南非九萬里則無以南也故所托者小則弗能大所積者弗能厚則弗能遠蟻蠓之子翔于蚊睫離婁視之渺然無有也何也所托者小也決起而飛數尺屬于墻以投于地雉泄泄飛不踰十畝所積者弗能厚也今夫學者扁扁卑卑狹于守規空空懵懵日無所益而月有所亡者皆所托不足以致大所積不足以致遠者也於是而自念曰吾學大者遠者也何以不能大且遠也猶蟻蠓雉學鵬曰吾何以不能鵬也是故豫樟濩落小尚可以柱梁以櫨棘為之雖有巧工不能加焉自致其材也殫糲梁而適莽蒼返而腹猶果然飽也粥脫粟者未及郭枵然餒矣自致其力也是故鵬之能大者所托者然也鵬之能遠者所積者然也今爾亦審其托厚其積焉已矣其大且遠者弗難也詩云有扁斯石履之卑兮言所托也惟其有之是以似之言所積也於是鵬豫然作曰敬服先生之說

袁惟器字說

予申衛世家凡數十第然自昔稱袁氏曰袁氏世有文武士子弟匪徒襲紈綺者也至予同年舉人惟學兄弟于前又盛也惟學之季弟曰錡少而有成志循循飾禮讓能善士大夫其為士大夫者皆弗厭以與也於是交游者謂弗可名也當字之而朝信劉君以命予予重朝信命又聞其雅喜與也又惟學弟也則不得辭乃字曰器說曰錡釜類召南曰惟錡及釜左氏傳曰筐筥錡釜之器是也夫天下之事小大華朴不能齊也然亦弗必齊也齊于適用已矣支離壅腫弗足以器之而斲鏤丹黃反喪其樸皆弗適用爾矣夫錡為器至質也其為用至近也然羞蘋藻實俎豆奉賓客享鬼神曷可不謂至美且遠也予觀夫今之世家者子弟也疾而不足以器之靡而喪其樸者衆也而君乃修揖拜之節事孝敬之實則其誦子祖考而漸于伯仲者有然也君惟益崇其節充其實無破其質無易其近斯無虛于大夫士之所與而所以自致其器者尚有美且遠者也君其試以予言于其兄惟學其友朝信質焉

卷三十四

序十三篇

漢魏詩集序

夫周末文盛王蹟息而詩亡孔子孟軻氏蓋嘗慨嘆之漢興不尚文而詩有古風豈非風氣規模猶有朴略宏遠者哉繼漢作者於魏為盛然其風斯衰矣晉逮六朝作者益盛而風益衰其志流其政傾其俗放靡靡乎不可止也唐詩工詞宋詩談理雖代有作者而漢魏之風蔑如也國初詩人尚承元習累朝之所開漸格而上至弘治正德之間盛矣學者一二或談漢魏然非心知其意不能無疑異其間故信而好者少有及之侍御劉君博學于詩而好古不厭乃輯漢魏之作訪羅遺失彙為此編夫文之興于盛世也上倡之其興于衰世也下倡之倡于上則尚一而道行倡于下合者宗疑者沮而卒莫之齊也故志之所向勢之所至時之所趨變化響應其機神哉於戲侍御此編不獨誦說者德其功而其意遠矣

王右丞詩集序

予奉疾還值長夏索處人勸以精力未充且省讀書日又無所事野居又無人與語偶取王右丞集讀之讀且倦則卧卧起則又讀凡數日竟其編顧集中長短混列欲考體制以求作者之意實煩簡閱乃略加編定稍用己意去取之釐五七言古詩各為一卷五言律最盛為一卷七言律為一卷五七言并六言絕句共為一卷皆首標體制俾篇詩各有統敘總五卷錄為一本自備考覽不敢以示諸人竊謂右丞他詩甚長獨古作不逮蓋自漢魏後而風雅渾厚之氣罕有存者右丞以清婉峭拔之才一起而綽然名世宜乎就速而未之深造也今於古作取其稍去冗泛者不敢加多焉舊本有賦一首今亦刪去其裴迪諸人之作附見者亦惟論其詩而取之不盡去

海叟集序

景明仕宦時嘗與學士大夫論詩謂三代前不可一日無詩故其治美而不可尚三代以後言治者弗及詩無異其靡有治也然詩不傳其原有二稱學為理者比之曲藝小道而不屑為遂亡其辭其為之者率牽于時好而莫知上達遂亡其意辭意併亡而斯道廢矣故學之者苟非好古而篤信弗有成也譬之琴者古操人所不樂聞又難學新聲繁而易學人又喜之非果有自信孰不就所易學以媚人所喜者也若是將使古道復至於無聞焉而已矣景明學詩自為舉子歷宦于今十年日覺前所學者非是蓋詩雖盛稱於唐其好古者自陳子昂後莫若李杜二家然二家歌行近體誠有可法而古作尚有離去者猶未盡可法之也故景明學歌行近體有取于二家旁及唐初盛唐諸人而古作必從漢魏求之雖迄今一未有得而執以自信弗敢有奪今年罷宦歸自以有餘力得肆觀古人之言又欲取我朝諸名家集讀之然弗多得其得而讀之者又皆不稱鄙意獨海叟詩為長叟歌行近體法杜甫古作不盡是要其取法亦必自

漢魏以來者其所造就蓋具體而未大耳噫其所識亦希矣吾郡守孫公懋仁篤于好古其子繼芳者從予論學大有向往嘗索古書無刻本者以傳予謂古書自六經下先秦兩漢之文其刻而傳者亦足讀之矣海叟為國初詩人之冠人悉無有知之可見好古者之難而不可以弗傳也乃以授之而并繫以鄙言觀者亦將以是求叟之意矣叟姓袁氏名凱其集陸吉士深所編定者李戶部夢陽有序其履歷可考而知也茲不復述

四圖詩序

燕泉先生由太僕卿陟副都御史巡撫雲南朝士寵其行即以其履歷大者為四圖以贈表之頌歌四圖一職方奉使二藩省旬宣三太僕考牧四都憲巡撫先生之陟也景明來關西矣不得與于頌歌之列先生乃走使萬里俾景明文之乃嘆曰覽斯圖也知先生之學以政乎夫物弗聚則不發貨弗積則不殖故土培也而樹蕃百寶之室衆賈須焉是故君子博學而可以有事於四方矣嘗慕諸近世名臣而求其人也率以其質從政焉事功豈少哉然器有局而才有限故施未光而所就者罕無憾也先生蚤歲神穎超悟天資卓絕然於道無所不學於文無所不攷手自注書凡數十家則其從政也固聚而發積而殖不局于器不限于才者豈徒以質而已者哉夫聖人之學一而已矣一故無不備無不備故感無不通而應無不當賢人之學詳說而反約殊途而同歸要其至則一也是故語經事而知道遇變事而知權安可以宰衡而危可以制馭無往而不得焉然則先生之四政也其施諸天下者之肇乎

林泉圖序

商城王君與予父友相別於汴水上別且二十年矣今歲夏自其鄉來訪道故舊間携所繪林泉圖語予父曰人謂大隱弗居城市真隱弗識姓名若皆自逸于林泉而世弗得見且弗聞也吾迹弗能謝城市而亦弗能逃姓名於里閭奚望于若顧于若竊慕愛之而所謂林泉者常往來予懷也故吾凡值林泉雖莫吾有吾得而愛之又從而適之已有擴吾所未見者而愛之而適之由是雖天下之大凡有林泉者吾無不可愛而適之者奚必吾有也又以遊覽有時弗可常者弗可常固有弗可得而愛且適者也遂為是圖凡林泉之變不窮吾圖咸有之一披玩而向之所謂可愛而適者咸在吾目則凡林泉之在天下者固吾圖中物也吾方請諸大夫之詩各綴于圖上敢欲得公之子中書君之文焉父諾乃召景明語曰王君與予游予嘗重其人蓋尚賢樂士者也能赴人之急者也好義而忘利者也夫人之品超遠庸下固焉而不可強者也氣拘于所處志執于所見其孰能移之而君者迹在城市而有林泉之想名在里閭而有隱逸之慕其言又若非世累所得係絆者則人品不同有不可量也吾聞之好賢樂士者昌急人之難者獲報好義忘利者寡患君其有後矣是圖之序爾必毋辭所請俾觀者亦足以考志意而得其人焉景明既受命退曰斯皆至論又何所序乃併記其言君名賢字崇德

漢紀序

昔左氏依經作傳而編年紀事之例以立及馬遷著史記敘帝王之事則有本紀錄賢臣之行則有列傳明制度則有書系年世則有表自是以來歷代史家悉宗其體然不能微約其辭或

寡要實而義無指歸其極至于流綴溢簡踳雜而不可以觀余于是盖慨然有思於命世作者之意焉往在京師嘗觀荀氏漢紀其書則準諸左氏之例而取于史記之一體者也至其君臣附載事物咸彰天人并包災祥畢舉治忽參稽成敗并陳得失相明美惡互見即一時一人一事之迹雖前後散著而本末必備屬類比方名義罔紊闡幽攝顯論讚悉精可謂括倫鑒之要深墳素之情者矣豈不足以上班良史之才乎夫學者謂經以載道史以載事故凡討論藝文橫分事理而莫知反說訖無條貫安能弗畔也哉易列象器書陳政治詩采風謠禮述儀物春秋紀列國時事皆未有舍事而議于無形者也夫形理者事也宰事者理也故事順則理得事逆則理失天下皆事也而理徵焉是以經史者皆紀事之書也但聖哲之言為經爾故紀事者苟非察于性命之奧以盡事物之情者亦難與論于作者之門矣是書余得之侍讀徐子容氏徐子謂吳下世家錄此書珍藏之而愆于傳以故世無刻本云余至關中涇野子呂仲木氏移書求之乃遂請呂子校正而付高陵令翟清氏刻布焉

學約古文序

何景明曰余初入關中作學約示諸生已成材者經書子史自宜周貫不為程限其未成材者令學官量資作成以相授習茲越二歲矣子日企望夫諸生之有得也然而進退罕知其序造詣或違其方若爾優游終歸汗漫非予之咎哉今復列為程始自十六年春按季考省經書每歲一週性理史鑑而下則接年續去期三歲而卒其業正誦之餘復讀名家文字數篇要其取雖非全編而實覽大義於是究心則古人作述之意源流可窺而斯文經緯之情變化俱見矣理無形而藏密言有文而行遠由聖賢之訓以至諸家之撰皆言也殊途異門積案充棟有不可窮攬者然言宣乎理理存諸心體用顯微同源無間故反求而為已則一而有獲外馳而為人則多而益蔽此公私之辨義利之分君子小人之向也夫予既程其書矣諸生其自茲口誦其言心會其理身體其事擇善而用中知至以求止庶弗畔於孔門博文約禮之教而亦徵於孟氏詳說反約之傳矣苟以資乎口耳而棄乎身心繁其枝葉而剝其根本夫豈莫達終亦必亡已爾此豈諸生之咎哉正德辛巳正月既望識

武功縣志序

武功康子作志七篇以記載武功之故緒理要會盖燦然明備矣至其覈事顯義用昭勸鑒有可述焉夫先王之政紀其山川辨其疆域程其土宜稽其俗尚肆其采物以謹封守而察時變故書敘九邱詩陳列國採風者具其美惡董事者正其得失務在因道財化追俗為制以施于久遠已爾夫天下之勢其所由來亡不有漸苟非蚤見而力救之則其勢莫可回而患成循約而治厚生而安其始未嘗弗一致迨于風尚澆淺而德實靡貞其治不可長也戶口繁增而生利蹙薄其安不可久也可以弗慎其漸哉余覽康子之書其地畝則由狹而廣戶口則由寡而衆賦役則由省而興財費則由約而靡其業產則由富而貧地利則由饒而減民性則由強而弱風俗則由厚而漓吏治則由良而奸人才則由實而虛文教則由振而委亡弗降本流末咲正趨弊者矣嗟乎豈獨一邑然哉由此可以例諸四方矣

正蒙會稿序

易大傳曰天下何思何慮天下一致而百慮同歸而殊途夫天下事物之變至於不可窮詰固有聖人之所不及知者而其本則未有一而同焉者也苟惟極其辯智以究其所不及知而條貫統宗莫之宰屬則於道也將日支離而學焉者將日以決裂此後世異端之所由以興也孟子曰博學而詳說之將以反說約也予讀張子正蒙知其詳說之功至於西銘乃識其反約之旨正蒙書多難解學者讀之或不卒業而廢比見近山劉先生會稿明正通達不為回說隱語而理無不得者稽之先生履歷治行則平日窮理之學不有徵哉此書予欲關中諸生人置一本肄之而西安府歷城祝同知壽館陶武同知雷臨清張推官鶚共圖刻本行焉斯文由此著矣先生之書雖無俟贊說而三府寮所務尚如此盖不可以弗列故為敘諸篇首

函谷子太極圖論引

昔者聖人之作易也俯仰近遠參驗而稽合其言廣大弗貳故曰易與天地準函谷子發明太極之義撰圖著論其思精其辨哲其指一蓋玩易有得而作者也罔有繆悠背經之說其所究深矣或曰太極圖說儒先之論定矣學者尊尚之函谷子乃置異同其間何也余曰聖人之道貴相發不貴襲貴相明不貴同苟徒襲其說同其旨而靡有所發明其道終莫達也苟發明矣雖異同其間無害其為尊尚也

思親詩引

甥朝良為卷曰思親進曰甥也不幸而二尊人亡也亡而無以見甥之有立也是以銜哀而抱思有終天之恨焉舅何子曰子何以思也親終而子弗逮養者人之常也子盍圖所以思乎夫修身以成行建事以成名行成則不忝名成則不隱不忝謂之體親不隱謂之揚親則其思遂矣子盍圖之此乎朝良曰命之矣敢不承於是士大夫皆歌詩以道之

古樂府敘例

何景明曰予讀左氏古樂府自唐虞三代以來逸詩至六朝之言備矣然其錄不能無雜要之不可盡舉予乃擇其辭古訓雅者凡九十三首爾夫三百篇之外可以誦說者盡在是已不其難乎不其難乎

左氏以音調類詞夫聲音之道予莫之有考也已恐悖繆失實書曰歌永言聲依永今姑倫其辭其辭倫而音聲亦各自見矣詩釐上中下三卷三卷各釐上下取其倫類以相參附言辭高下時代變易作述源流咸自著矣

詩有不以時代序者明作者在人不係時代

詩三百皆絃歌後世樂府或立篇題詞多託諷義兼比興其隨事直陳悉曰古詩格變異矣予故取其有篇題者入古樂府若古詩十九首及他選詩別為編列或曰明良五子之歌何以不入樂府曰夫既已著之經世之訓矣

鄉射禮直節序例

古者飲畢而射射之司馬燕之司正也此禮久不行而其文具儀禮然儀禮古文難讀雖昌黎韓子且苦之今即與諸生言或弗解故復刻此使就此習之而後求之儀禮則其文辭緒理可尋也

夫器一弗備則無以即事惟樂放失久矣其器莫之有能備也今但以笙比人聲而以鼓磬節之【序器】

夫事以明賢故遴而後蒞故賓主必孚司馬以下必能其事雖役必當其才德焉【序事】

夫射之節於樂也天子以騶虞諸侯以貍首大夫以采蘋士以采芣采蘋采芣示敬也敬則可以修諸其身而施於天下矣【樂譜】

右射儀予視學漢中至金州集漢陰平利紫陽四學師生將行射焉問其禮不知也乃使學官草具其儀予稍稍為說其文辭義意略去恢復輯其節理實近可行者為之先屬范推官紳肄於東城之圃而予與呂憲使克中往觀焉憲使曰予在漢中盖修其器矣未究其禮也謂紳曰其悉布茲何景明日語曰禮失而求之野古禮亡不可見者何可勝道哉然鄉射之禮學校尚或習之予由鄆郿抵鳳漢攷之於學既已無聞而有司並其器亡之往往督使旋修舉行之斑白之老有相與環堵駭視者矣嗟夫古人揖坐旋辟之容與夫修於其鄉而一日不可缺者至使人以為曠世聞見之事風俗於古豈不邈哉【射儀】

夫爵齒德三者通乎天下者也鄉飲尚齒也飲畢而射察其德也夫然後可以爵之於朝是故古者以射擇士三射之節其於命辭見乎始射而命曰毋射獲毋獵獲知始射而獲也再射而命曰不貫不釋知再射而釋也三射而命曰不鼓不釋知三射而鼓也

始射獲而不釋試也懼弗審也再射而釋則審矣三射而鼓而禮樂備矣

始射不及賓者不敢役賓也不飲者不釋則不飲也耦射先賓不敢齒賓于耦也衆賓不先賓在賓位則不敢踰大賓也故非主則不敢與賓耦

勝者張弓不勝者弛弓勝者立不勝者飲夫何言哉賢不肖喻矣

夫物惟時事惟宜先後不踰詳略有漸其惟射乎是故高而無用美而無當欲速而求成聖人弗為也

弓矢敵器也聖人以揖讓用之天下復有可爭者乎夫射也者禁肆制躁履序蹈和一衆心貫萬事者也以此於天下也故治理而生遂

子曰君子無所爭必也射乎揖讓而升下而飲其爭也君子是故君子之於射也弗爭則其求諸已也弗力夫君子仁人之用心也亦觀諸射之道焉已矣子曰射有似乎君子失諸正鵠反求諸其身孟子曰仁者如射射者正已而後發發而不中不怨勝已者反求諸已而已矣【射義】

卷三十五

序十四篇

送郡守孫公考績詩序

予得告還處野中別業不能應州閭交際趙元澤氏者予所好者也來造予且將諸鄉大夫之命曰吾守孫公將奏功天子天子且將有顯陟也吾州不復得迓公駕矣眾咸榮其行而不忍其去我也見之歌詩焉子幸居家不得無辭以為頌首予以寡於文且病固辭元澤曰諸大夫之命也敢固請於子予辭不得命乃言曰夫考績之法次其殿最而為之黜陟者也天子執之以待天下之吏者也今之例獲考者即為良而多陟之而凡吏茲土者亦率以獲考為良而榮之然以是而知其政信其為良者吾獨於守令焉而他有職者弗可也蓋守令職叢於他官而獲考為難守位雖尊于令而親民與令同令之事又攝焉則守尤所難也守之上有府有司有監察其下則縣也府曰某州有缺事也未可考也守受令惟謹府可矣司曰某州有缺事也未可考也守受令惟謹司可矣請之監察監察曰某州有缺事也未可考也守受令惟謹州既靡有缺事守曰吾庶可以考矣又察之縣曰某縣之事缺未可考也縣無缺事而後可考於是觀之吾守之獲考也可不謂之難乎其政之善而為良也可弗信乎今諸大夫出告人曰吾守政則善是為良守也人曰子私子之守也未敢信今諸大夫告人曰吾守之欲考績也府考之曰罔有缺事司可之曰罔有缺事司請於監察監察曰是未有缺事可之又察之縣曰縣之未有缺事守之能事事也則人必曰是豈非政之善而能之也豈非良守而能之也余曷敢不信子之守也夫如是則吾守之賢不待詩歌而知之也而復以去我為不忍者又非也吾守去茲而有顯陟則其位又有大於守者矣守一州也其惠狹陟而大於守焉又豈一州之惠而已也雖然詩歌之作無加於吾守而吾士民之懷也不可缺也敢以茲言首之詩凡若干篇

贈清溪子序

清溪子嘗遊吾郡題詩山寺中去時予幼也既長子遊寺中尚見其詩今年予得告屏處郭西之別業所罕有接識吾鄉有趙元澤者長者也故常與語也他日偕客來予謂客誰也元澤曰是清溪子也予業已識之蓋二十年而再至也清溪子亦長者又能為歌詩善鼓琴性好遠遊凡遊江漢洞庭百粵之間者將三十歲也予亦好遊嘗遊燕趙遊秦楚滇蜀然悉以宦故遊也弗肆吾志與子語遊尚勃勃也吾郡先達高鐵溪者嘗仕司馬部遷楚徼又仕江南仕蜀川亦好遊者也時謝宦隱於鄉無與語遊者乃數與清溪子語懽甚也於是予與鐵溪更相延致月餘日與歌吟弄琴至夜分有不怠也夫人之晤合離散有謂偶然者清溪子始遊吾郡予固稚子而鐵溪方宦遊也二十年而再至再至而相與甚得豈偶者也清溪子歸歸而歲一至焉則與吾二人語遊向有期也時與清溪子善者皆作詩為別元澤泊馬君卿者尤數往來者也詩併附卷卷首題畫皆鐵溪作者也清溪子名昂字子高出東陽沈氏鐵溪名鑑字克明元澤名惠君卿名錄白坡何景明志

贈蕭文或號古峰序

蕭文或先生與余父兄游者數十載與余游者六七年博雅志愨凡世之詰女 侮眾方閼然文或獨漠然不知也余益愛焉語多合意嘗謂曰君其澄之不清撓之不濁者乎余第進士猥未見訪至再乃徵余言請為別號余知文或者將安辭遂號曰古峰嗚呼鑿破混沌一派世道萬偽日滋吾嘗高臥北窗之風想無懷葛天之民慨身世之既遠也及道西華玉井覽其峰高寒竦人由是又南望匡廬五老巢入空冥氣含鴻濛雪落太古乃登羅浮七十二峰於飛雲之上別來嘗夢想斯境梯石磴披蒼翠浩歌烟霞深處與華胥氏往來不知有人間也則文或之古峰亦此類也耶然文或世族西江漢唐聲華今益顯家地之古矣標支野鹿貌之古矣太美玄酒文之古矣余所謂澄之不清撓之不濁其心之古然則文或之古峰將凌太虛入廣漠而求之無何有之鄉奚俟吾言

贈左先生序

左君以大理寺副擢山西按察司僉事時師君亦以刑部員外郎擢江西安察司僉事二君者同鄉也其擢也鄉人及其同官者咸寵之或曰二君之用也以法家也語曰處山善樵處河善漁二君之於法也左君善平師君善鞠或曰匪獨二君者然也今之用官也皆然也今天下二司布政則以錢穀之吏為之而按察則選於習文之家何景明曰不然也在選才爾若論其家何官也苟執事之不察吾懼其責名而亡實拘器而遺用也舟之於水車之於陸不相通也然造舟車者弗能舍木也是故察之舟而櫓楫檣柁者曷一非木也故木良可以為舟車矣夫器完而神注則立周而用精故耳之職曰聽善聽為聰目之職曰視善視為明然聰明者匪耳目也皆神之為也故君子全其神而用之可以通天下之事矣夫左君善平師君善鞠是一君之職也廣之其才曷往弗善也二君履夷歷艱備嘗通塞是天之多其才也出為臬為藩入為臺為省為將為相咸由此矣

贈趙君士器序

余官於京十五年其閱鄉之仕郡縣者數十人或起或沮或全或壞始也不知其者而其微居可知矣諺曰地知稼小知大夫基事者莫如志鼓動者莫如氣風也盪於天雷也奮於地山石至固也松栢干之而出氣則使然也孰能遏之哉大抵吏之沮而壞者咸不知職而顧於官不憚已而忌於人不知職不憚已則慮不一而志渙顧官而忌人則多畏而氣不伸故內有得失利害以變其心外有威福毀譽以折其勢勢折於外而心變於內則業不精而行罔功惟知職而憚已則職為重官為輕已為內人為外是故務約而心暇事成而身不失夫梟翔於屋雞伏其雛吏之命職也為事者殉事為民者殉民古之吏也今也隳其職以崇位以民冒害而覆其身夫志氣者不可以無輔也是故必才以濟之識以明之德以經之義以紀之故剛不暴而勇不亂四者志氣之輔也趙君士器通判保定府有治績治上考功部績第一士器弘治辛酉舉河南省其同年選而為郡縣者十數人或沮或敗士器官獨成且起矣士器之治也剛而易勇而能遜辨達而不避其所由於志氣者遠大矣

贈許汝登序

許汝登先生為進士初令樂陵大盜之起也山東吏不守將威於門或奔樂陵完令有禽伐大盜遠之功名勃如也仍陟樂陵令為兵備僉事兵備三年赴考功部奏上考予嘗問兵備何以能禽守也曰有技乎曰弗能彎弓曰有力乎曰弗能躍馬予嘆曰是知兵計矣是以能禽守也兵備復任鄉之士大夫曰兵備奏上考甚寵請子之言加兵備也景明聞之負有為之具者篤不求之志夫能求之士匪能為者矣語曰富賈坐室貧賈遊市夫玉必生於無人之山珠必產於九仞之淵然而為重器而至國中者非珠玉之能求於人也西子不窺戶而布幣盈門求之者眾也砥砢自懸魚目屢造醜女多媒天下有為之具四藝著曰才行著曰德勞著曰功聲著曰名是故守用所以為急也蓄得以所以重也慎伐所以為嘉也保譽所以為望也夫任使爵位所以加於才德功名者也求而得不求而失勢之所必有也是故利害形而心移夫才勝使德勝任功勝爵名勝位必不求者也賤也而人貴之辱也而人榮之使勝才任勝德爵勝功位勝名必求之者也貴也而人賤之榮也而人辱之夫不恥干而羞役者眾人宜之才德功名之士可以需人之求而非可以求人者也兵備天下才德功名之士也予弗患夫求之者之不至也

贈南雄判俞君序

俞君公濟判廣東南雄府陳大理曰君起於貢為佐郡久負而深蘊厥施必大請余言贈焉余嘗聞劉大司馬之為廣東伯也順德令吳獻臣伯常引與坐論謫吏鄒汝愚伯上客之伯也善下下矣而令也謫吏也安其禮有與任之有見列之夫先王之時懼天下之塞情而隱賢恆徹其所蔽限者故崇高則略之富貴則損之使人人抒其意而盡其才是故先王之時吏也直其道不辱其身忠其職不卑其位維名與資今之所為蔽限者也名也標聲資也階勢崇虛而實或不徵升庸而超俊或格是故聲日張而勢日懸公卿廢禮士之文牧守靡察民之實是以官屈而吏以調困以此一下上而通天下是以難也夫受揖則立受跪則坐吏之自處也重其身以求而求勿浚也修其事以見而見勿皎也執已卑來陵也居太柔取藉也是故必高其節而遜出直其志而平施古者學之有術守之有力行之有方皆先守乎已者也夫定取舍也以制得失定好惡也以制毀譽定是非也以制從違定行止也以制進退是故上交不諂而下交不瀆故名也者弗能榮辱而資也者弗能崇卑也傳曰君子非其人不交故不知其人考其師友焉俞君師章司成而友大理其所從有淵源矣

贈胡君宗器序

余黨士胡君宗器性爽而敦勤而闊度詳謹而無隱情辛酉舉於鄉今年選保定府通判不治府主理邊之芻糧次於懷來七倉屬焉國家之儲北邊是重故以部司專紀而五判分受其約兼督之者有守有撫有按有監司給納之者有權門有貴家有戚里有世族有豪商有富賈聽役之者有倉吏有場吏有吏胥有兵隸有車人有攬戶有管庫之廝器有衡有量有石文有委獄有受訟判也亦難矣臨者取者伺者干者赴而白者來之沓沓畏之惴惴沾然緣然錯錯然若風雨之至也雲霧之交也矛戟之衝也機括之發也若川委而疇布也於是乎無備無宰無

識無籌無政莫之應而立也夫眾令而汎從則遺眾勢而流悅則委眾蓋而闇受則罔眾數而煩覆則眩眾辭而滯理則叢是故共者承眾令也剛者折眾勢也察者徹眾蓋也約者舉眾數也通者肆眾辭也夫致慮而圖全者患之防也任而弗卻視者事之隙也夫瓜繁必摘鵠張必射舉火者寇遁測井者投石道河求通也疾掘則壅故共而曲意則極之者至矣剛而樹標則摧之者至矣察而示明則掩之者至矣約而疏中則實之者至矣通而速成則塞之者至矣夫水之源潔也可以浮眾舟而不沉可以滅炎燎可以鑑可以一分可以決重隄之障而轉千仞之石故蒞官之要則莫要廉以修其身也廉★以修其身則心靜則氣直則視燭則計精則才達☆

贈向先生序

夷陵向子粹行敦質好學而秉禮河南何子珍其人焉向子為地官郎善於其職遷守廬郡行也謂何子曰予欲子言之也何子曰唯唯予見子之履禮也禮也者理之敘也其道也卑非知崇則莫達夫物鉅曠者弗以細扁遺淺求而浚通明罔以幽隔故曰優優大哉禮儀三百威儀三十五帝三王踐其理而示其事仲尼識其事而示其理事實而易理虛而有形者方也神者無不在也形神弗二故微著一故曰君子之道造端乎夫婦故曰禮始諸飲食夫君子之為人上也使其吏程而民矩也貴承也而弗以屈節承也貴親也而弗以回德親也直內而順於外敬立而行其恭夫然後上下則也故曰君子揖私朝輝如也登車則有光矣君子之治也設其綱紀而有其目與民守之誥朝在門夕於野功不可以躡取也分不可以踰得也故曰嘗遠食必順近食夫賤市者為售也故君子下也而人高之非求高而下也虛也而人實之非求實而虛也有功也而人德之非以功求德也是故君子之修也盡諸躬而已設地而懸望焉君子恥之故曰徒坐不盡席尺夫才盛者亢其志名高者危其身享厚者盈其量是故君子才也思抑名也思藏享也思約故曰君子之受爵也一爵而灑然二爵而言言斯禮已三爵而油油以退夫仁生之義殺之禮辨之智藏之故春生秋殺夏辨冬藏天之四時也四時之道具而安其序故歲弗變而日新是故慮善惟動也動惟其時也美而無當弗足美也故曰玉磬必擊大琴必張嘉肴必食夫幾者時之會事之發也制其幾發其事會其時則莫若斷孟賁之力罷於累試由基之巧廢於百發弗斷其幾也故曰日中乃暴操刀則割是故禮也者通於晝夜貫於天地格於人鬼者也是以君子貴履禮也向子於是再拜曰敢不承子之言何子復拜曰子之命也敢不告

贈楊靜之南歸序

靜之先生學於鄉貢於國卒業於監歷事於臺乃銓於選部而歸省以需政焉歸之日友人集送之嘆曰嗟乎予今也始見天下事矣昔之人曰不出戶知天下此為說也已使余於鄉也弗於國於監也弗於臺則於天下也何以見之哉今也予始見天下事矣向之言不可行者未必不可也其可行者未必可也情有所難徑而勢有所難格意有所難通而理有所難會耳與目異也身與心方也故曰民與士不同論匹夫諸侯不相謀此誠然也何子聞之曰靜之其有得乎夫天下有巨有細有常有變有常常有變變有巨巨有細細有巨而細有細而巨有常而變有變而常故鑿一戶者昧四方之遠專一節者失三時之利帆海者不知山駕陸者不知水飲

水而寒者不知嚮火之焦天下之事其藏也一其見也不一其趨也一其散也不一其見也散也不一也故君子多其見聞焉廣其思慮焉悉其履蹈焉其藏也趨也一也故君子約其見聞焉精其思慮焉矩其蹈履焉理貞也事情也貞者正其體情者幾於動也體非正不立幾非動不行是故學而不業者尚本也貢而歷事者達用也教以成士政以資官厚其身而周其知夫然後可以見天下而無行不之矣靜之其有得乎

送孫處州序

郡守孫先生懋仁以吏部例舉為處州府同知其視郡凡有三年也申人宜之而難其去我相與送之上其長老薦紳又言是遷迺郡吏者恆格不超歷有赫非所以尊異良吏勞動勸善也咸噫惜不能夷其意景明奉爵進曰維斯遷也迺吾所為先生慶者諸長老薦紳顧弗睹也自吾長凡吾郡之守更者幾矣不三考不得輒徙因仍玩久與民吏耳目相厭刺刺不能其繁遽其徙去固已奄然倦矣先生在郡□□三歲部始為一考其政軌民尚有不盡究習猶鼓作莫敢緩悅而志氣展布方堂堂方殷富即起而置之鉅地登之州邑之上視他昔守者不可以謂無尊異也然先生偉男子也吾嘗見為吏者矣慎者多畏不能有所震烈寬者多留不能有所辨達是曷用寬慎也先生處吾郡與武衛肩立彬比勢抗干沮衝折而卒能行其威事之瑣絮旁羅不為曲慮不為周防以才任之而莫為所變亂以失其措執是以行亦無少遇挫衄以至於今徙官噫是則偉男子也偉男子被是遷故長老薦紳憶惜弗以為尊異也然吾聞適千里者百里一息適萬里者千里一息不亟進則所至者遠也鵬之將圖南也必直上九萬里則風在下而南圖易矣府之同知視州之守位則為高事則為簡高則足以尊其身簡則足以節其力先生遠造斯乃有地也於是長老薦紳曰如子之口可以慰矣送行當有言其緝是語書之

送蕭文彥分教臨川序

制士貢入者願祿仕則以學職請禮部彙試而去取之迺復試於天官去取加詳焉然後進之大廷天子躬臨試之取其堪任者下之選部蓋獲名於禮

部試者十之六七焉獲名於天官試者十之四五焉獲名於廷試者十之二三焉予鄉蕭君文彥願就茲請歷三試俱獲名優列於是領臨川訓導抵行鄉之好於君者咸致儀為慶張祖為餞徵予以言贈予於君又厚雖不徵予言固將有所告焉夫君之是請古所謂辭尊居卑者也然師儒之義大矣非關柝之司可同也故試之屢而選之重且難如此獨悲今之任是者不知所以盡職舉其重且難者而自輕忽之其者听鼓坐堂上呼喚生揖弗來者弗詰也夕鼓反室與諸生飲酒虞然弗忌也諸生腆物來者禮之弗來者怒之業之惰勤弗察也監司視學者至入其室寥然不聞絃誦閱其士驚然揖讓不就列考其程課漫不即敘誅其弛職則自謂曰吾官卑吾齒邁苟升斗私吾妻孥爾安所為哉否則又曰吾盡職士弗率教也咸若時天下之學職廢矣夫教人者視其所自教古之所謂師儒曰以賢得民也曰以道得民也古之所謂教曰考其行也問其業也是故古之人賢著矣迺考行道立矣迺問業行則進其良糾其有弗良者已矣業則簡其修董其有弗修者已矣故自教者二曰賢曰道教人者二曰行曰業賢曰著道曰立行曰良業曰修盡是四者其教明矣君夙有聞於鄉博學明儀其量淵然其行敦然其堪

是任無疑也且其業於庠也久歷於師也眾凡所以自教及所以教人者固習見而熟聞者矣後有稱教明於臨川者必君之功也

壽閣定峯兵憲序

定峰先生以十月十七日為初度之辰諸生既請予詩壽之復各為詩以送遂成卷焉諸生又請曰必序其詩而卷斯成矣何子曰諸生何以壽先生也王錫進曰吾聞之壽祈諸天者不若徵之人也夫人之可徵者莫若功與德與言已耳今先生西寇之平是有軍旅之功也書院之建是有惠士之德也而文詞誨訓是有彝言也徵之人以為壽者曷以易茲也是則先生之壽者乎何子曰然夫功則利博也德則被深也言而文則行遠也夫博則天厚之矣深則天大之矣遠則天久之矣故謂之壽諸子曰子之言廣錫意矣可以壽先生矣可以序壽先生之詩矣

贈李仲良耆老序

凡郡縣鄉有老設之為一鄉所平者也皆以長厚有識達者為之其任在於責科僇事敦薄和爭道訓謹率而已今歲弗熟自汝以南數百里草盡死中民以下為食所窘起而竊掠昔之宿寇鉅盜相與乘發助匿熾弗可已民大動擾於是藩司下令州縣鄉各置一老使任捕詰雖非典例亦便宜所可舉者也時予鄉以李仲良舉是役其厚仲良者吳抑之氏彭寬夫氏為仲良見予曰仲良舉是役吾鄉所賴以弗擾者眾皆為賀而願子有以告之也予聞仲良之鄉矯矯弗且為惴歛能與人任事鄉人素所豪傑者也其為是役吾弗患仲良弗能也慮仲良弗慎耳攘盜本以安輯良者也苟弗慎則弗能不妄有逮也有妄逮是猶治濫而加之水救燎而附以薪其為害倍矣鷹隼韜而養之利其能搏野鳥也苟搏於家使雞犬弗得寧則必去之寧失野鳥弗及雞犬也是故仲良弗可以弗慎焉能慎則能弭害能弭害則天必賞以福是故仲良不可以不慎焉於是抑之寬夫曰斯言固仲良之所明者也書之俾仲良弗忘

卷三十六

碑文墓誌共十八篇

張公去思碑

吾州守張公以彰德府推官蒞吾州遷南京戶部員外郎適弘治甲子為吾州凡七年既去州之大夫士越考翼馳狀於京謂余曰公政吾州德我民我民德之子州人且公所舉其知公為我民文其實碑之余聞公初第丁未進士來推彰德彰德達上下州之之京師者必之焉公所以為彰德州人固已識之往來間迨遷守吾州州之人咸慶曰此其推彰德者也始抵任鳴鼓據公座列群吏胥隸其下兩翼詰土之情之俗皆莫對且欲徐伺其所為公頃屈指曰某也富某也窮曰某良曰某曲且偽曰某里某地闊狹瘠饒高卑如何嫁喪貨農及所尚敦薄如何悉中左右顧且汗莫知所出神之臨民溫然有餘度人多易近有訟者不欲速成獄久能自解不問其成案惟詳惟明故境內訟不他求伸民或中其惡不即以色姑徐治之大要務與民休息不輕震動擊搏初人以為常不甚快然卒以相安殊無多事陰受其益民知為生桑柳皆林羊牛雞狗豬靡不腓以孳故賦多先期納者工役未嘗僕僕舉其不獲已者時孔子廟久不葺棟桷缺丹白黝以陟公完之廡置像舊無者州東山曰義陽昔申伯地世沒于衛官公於御史沁水李公白之遂築書院于山之陽路橋陂池倉府署郵城隍郡治祠入祀典者每一新民不曰費暇引學官諸生講學考業然亦不數數諸生益習不怠州往年科無兩舉十人者兩舉而十人惟公之力處人上下各有禮故無怨至于小夫亦多感焉由此觀之公之政所謂平易者也所居雖不大異其去能使人有餘思原公以明經取第復以經術潤飾吏事且熟文法加之平易所以克令厥後凡刻削抉剔炫知矜能偽自增顯者視公不足取焉公名拱字朝儀蜀之內江人履歷不盡紀紀其大者耳示不忘也而州人忠厚之道存焉以是堅不可讓為之辭曰天子勅牧光播厥修輔植敦朴顛躓蟊民庸是優持威倚法刻志爬撈良者不闡益佑其偷惟民之羞公邁厥迹匪剛以柔令終如始民罔違尤南山之石蒼蒼寒秋世公之休

王母何氏墓碑

王氏母姓何氏羅山人何原女也為王翁伯全妻王翁父曰王紀為耒陽縣丞良慎無易行耒陽公為其子求配乃得何氏也何氏嘗從王翁侍耒陽公遊宦其奉舅姑君子無不有善道也性溫靜不見厲容僕婢未嘗有被叱訶者生子四人長鼎娶張氏次鼐娶夏氏又次鼐娶孫氏又次威娶張氏女五人長適許伯原次呂祿次子兄舉人何景暘次王鳳翔次劉森凡為孫男女二十一人外孫男女八人生某年月日卒某年月日壽七十六何子曰王氏母當王翁舉鄉耆時嘗入城予時少也嘗見焉其鄉人族氏卑幼者來見王氏母未嘗不與飲食也然必躬持與之又躬視之惟恐其不飲食之也其慈愛人如此宜其子孫衆多且獲壽也王氏母卒之日其鄉人族氏無不哭者予兄以王翁命求碑樹於墓予故得略叙其實且為哀辭曰嗚呼允哉坤之德厚而康兮用蕃其後裕且長兮曷其不淹遂返厥常兮朝日慘惻颶風厲兮閨堂闐寥發帷蓋兮脩塗委蛇超素驥兮悠悠天達鸞皇逝兮惟月有良兮肆辰又吉駕彼柏輻兮載此

杉榔前建文 兮迺造玄室玄室造兮寧厥域有石穹穹兮纘爾德允哉萬嗣昭女則

明故大中大夫資治少尹福建都轉運鹽使司運使李公墓誌銘

正德十年三月三日致仕大中大夫資治少尹運使李公卒子汝佐以使於京赴其友人何景明景明哭于庭讀汝佐書曰先公嘗言求子生誌今死也已矣惟子圖之嗚呼余忍誌銘公耶雖然公知我于孺子知公宜莫能若我者予忍弗誌銘公邪志曰公諱紀字朝振潞州人也中成化乙酉山西省試授故城知縣遷錦衣衛經歷臨洮府知府累遷至福建運使曾大父本大父曰初皆長者不仕父貴贈錦衣衛經歷母宋氏贈孺人公魁岸甚莊望之若神健辯說聲如鼓鐘人咸尊憚敬聽之少好讀書苦刻父母慮而禁之莫從也自言曰苟弗欲事往古天下焉已矣苟欲事焉弗讀書無能為也又善無遺忘一目過者老尚能口誦也以故稽古言當世皆秩秩有理叙可施弗直為虛誣已也始至故城縣俗昏議財多財為禮少財為恥貧家男女或壯老無以匹也公至盡召諸里耆曰夫昏也爾賣爾女邪俾爾女有家邪即賣女有大賈無用議二姓禮若俾女有家而俾多出財貧空女何以能家也即人家終窘無財爾能俾爾女終無家邪自今昏有議財者有法法弗貸于是縣中貧而匹者千人縣故有官地占于豪官莫能奪公按文責地豪畏即出之還官乃歲以地出給貧民緩其征是時河間郡縣最稱故城縣治乃擢故城令為錦衣衛經歷六年擢臨洮府知府臨洮雜番夷桀難治公曰不操法示毒人無以遠惡也乃治其豪侮法慢令者治益尚嚴明吏民人人無不惴慄無敢冒文者其後人人乃得自緩不至蹈害郡則大治守日與寮案張宴會坐花行酒吹笙竽時與衛官擁旌旄伐金鼓出城行射較獵然人人亦喜觀曰太守甚樂孔武弗擾也洮水將壞城洶洶不可渡守登城指某山石可堤某山木可梁乃築石堤水去城三里伐木為八舟梁之在郡剛方自持不能恭事上官上官多畏害之都御史有親故過府販綿葛求守令于民為倍利焉守曰此何以令民也吾為民守終不能為都御史親故販而重利漁民將執之其人懼而遁譖于都御史都御史彈守降為長蘆運司同知或勸公曰運司財利府也人無有望身名陟者公又貧獨不計子女邪公弗聽益峻自潔嘗赴京諸大商賈人張具于路遮馬留食公策馬超過之叱曰吾食汝邪于是御史嘉之上其名曰居可貪弗污者今見有李同知爾公嘗曰寧死不折寧貧不貪觀此公之言施矣然公為舉人時已能却金不為人干請蓋其方廉志性不移如此由長蘆擢福建運使一年乞致仕歸曰吾何以弗已耶世之見用者予知之矣不富勢率通滑爾方者貶廉者塞吾無用矣吾何以弗已邪別號默菴晚又號漳東主人歸而築室讀書扁曰怡老雲窩好吟咏著有默菴集既疾會其親族子弟曰吾年止今日吾平生儉人以為嗇吾無人以為有夫誰知予者遂出篋笥開使共視之惟圖書衣幘而已公生正統辛酉七月二十三日壽七十有五配原氏封孺人先卒繼毛氏亦先卒繼趙氏男子五人長汝佐郡學生次汝佑儀賓次汝仕汝价汝儒女子一人菊姬皆毛氏出孫男子一時可孫女四卜以是年四月四日葬南石曹之原初景明從先君為驛丞時公使與汝佐同學朝夕惠教即父師矣嘗謂毛夫人曰汝視景明母可以異汝佐然毛夫人視景明不啻不異汝佐也及先君致仕貧甚公饋之車馬其歸也集衛官送之郊亭揚爵酌先君曰吾老友酌景明曰吾小友夫予侍公三年也凡公所鑒識望勵予者皆德義風慕無窮之事豈有世俗庸淺之見者哉其所自負與又甚宏遠深厚予以為有將相器業而卒抑鬱不究其用何哉豈古所謂賢人困厄廉士無名者邪予識公之言行甚衆不悉誌誌其大章章者銘曰嗟嗟棟梁直木衆莽玉瓚玄珪不遇大享委珮長裾嗟嗟泥塗厥施未

光積則有餘有餘之積其施厥嗣乎

徐太母潘氏墓誌銘

徐太母潘氏卒其元孫漢當承制以刑部郎中張君狀來求銘按狀潘氏處士潘宗女徐公傑配也徐公先配李氏李氏生士方士方生漢繼配潘氏生士正士正生淮及潭潘年四十而喪徐公遺其貲鉅萬盡以任士方士正二子二子乃商吳越間遂益饒厚其家二子又喪矣乃復以貲任淮而使漢潭讀書為學生淮亦累貲鉅萬為大居第京里漢潭皆能學問也居家甚勤儉無襲衣兼食然施族仁下不有所害初潘適徐氏士方弱也恩之逾于士正士正卒其二子淮潭弱也母謂士方曰爾子爾弟之子士方子二子也逾其子漢夫潘氏有大功德於徐氏三世其不謂之賢母婦哉生正統乙丑七月十六日卒正德乙亥九月四日享年七十一女一適梅鏗錦衣百戶孫女三曾孫男二漢卜以是年十月二日葬城南七里鋪祖塋與其先大父大母並藏焉銘曰嗟嗟一婦未亡三世以享徐氏之廟百祀爾享

樊懋昭墓誌銘

樊懋昭諱亮信陽在城鄉人五世祖林洪武初自徐州從軍徐丞相麾下文皇時隨征克大寧歷鄭村塢白溝河攻圍濟南又歷夾河小河大戰有功陞正千戶死于陣其家因徙南京林傳玉玉傳清清扈從幸北京遂又家於北京正統初以林功大死事故陞清為金吾右衛指揮同知錫之誥清傳子愷戰西直門死詔陞其後為都指揮同知給恤其家子恕在襁褓夭弗嗣而懋昭父剛當嗣剛時在南京性戇赴廕未就而歸乃從其外翁家信陽樊氏由此失其官剛生二男子長曰明次即懋昭父母愛長子不甚愛懋昭朝夕笞詈懋昭曰父母非愛兄不愛我也為兄貧爾愈親愛無怨懋昭少好賈賈不欺人買綿於湖廣李氏至館閱數有羨乃密如李氏問綿數李不知也懋昭即還其羨遊鄭陽家人來言河濫溺人即惶問父母人曰無害即大喜忘問其餘館人旁聞之太息曰此人孝子也知有父母已矣懋昭行賈二十年饒積嘗買牛家繆與溢三金牛家恐其知而取也設酒跪曰昨者閱直實溢三金吾貧可遺其一還其二懋昭笑曰吾知爾貧故溢與爾甯兵備至信陽先問首惡誅死次問首善以為鄉長鄉亦強懋昭懋昭不欲為然莫能脫為鄉長民富者持千錢貧者持百錢密遺之求免役懋昭怒罵棄之地已乃竟役富者而貧者緩焉官有取嘗爭之數日必抑其半弗得則拂衣起直出不顧官亦知其直不重讓也然竟怏怏弗平致疾不起矣生天順己卯十二月十二日卒正德癸酉十二月二十一日年五十五歲配計氏生子曰鵬為郡學生好讀書慕古昔從予學甚解懋昭為人篤塞不識字然善算絲毫不爽又能記不忘先人梅溪公嘗言懋昭父母始來信陽艱窘其兄好酒不事生懋昭弱也即粥菜行市供其親長即賈賈遂矣即農乃今教其子儒矣豈可不謂自立善變化者哉傳言公侯之後必復其始樊氏之失官越三世而始儒鵬曰亡父積善不能大壽而子孫孤弱非先生誌銘蔑沒朽矣嗟乎遠大懋昭者在鵬也夫銘曰孰達弗以厄孰起弗以仆爾反爾棄本旋復爾族

明處士錢公墓誌銘

處士錢公卒遺令其子慶暨中書舍人祿還葬南京新亭鄉祖塋祿奉柩將行乃以公友人鄭君洪狀來乞銘予與祿同供事制勅不得辭按狀公諱進字景升姓錢氏別號菊菴上世蘇州府吳縣人洪武初徙南京著籍上元縣祖永扈從文皇帝北上授工部營繕所所正遂著籍大興縣父玉母唐氏有子五人而公長公少機敏恂質身若弗勝衣好讀書日誦數千言攻書法始授學吳太常既乃精思摹索晉唐諸名帖嘗曰法者迹也巧者所以神妙也吾將心致其巧終不至泥古法迹故其書成一家而士大夫珍之天順間有薦之朝者不報公乃歎曰吾讀書思進取行志今人以一藝薦而又不獲達此殆天也吾何願焉乃深自剝晦終身不仕矣家貧力貿易事其父母父母所欲有為極辦之無不稱指意友愛其弟達達舉進士為青州府推官早卒公為經營其室家無弗周至公性好施與宗族不能舉火者皆待于公冬月見無衣者輒衣之嘗自合秘方膏藥以施病者出城見枯骨蔽野心愴焉購地瘞之今上上兩宮徽號推恩耆老公以年八十詔給賜冠帶米肉絹綿公度量夷坦無崖岸與閭中高年結壽會歌酒盡日兒童婦女見者輒稱曰錢翁錢翁云公服勤儉起家嘗訓子孫曰吾見古人以艱苦立門戶而子孫或以奢縱蕩之嗟乎嗟乎汝等戒哉又自言曰行德者身安之為善者心樂之今行一德為一善而務章取復是賈販事爾夫古人恒陰施于冥冥人不知而已無所求故謂之安樂公生于宣德二年庚戌正月初九日卒正德十一年丙子五月十一日享年八十有七歲配崔孺人有內政先公十七年卒子三人長慶前習字中書侍仁智殿次壽輸粟授散官次即祿女一適陳綱孫男三人曰登譯字官曰泰曰承澤孫女三人俱幼鄭君曰錢公可謂善不近名而德不求福然名與福錢公有之矣予始知天下有不必求而莫能舍者也銘曰施之冥冥獲于昭昭匪爾之求實由爾招祖邱南鄉爾于逍遙

劉孺人廉氏墓誌銘

孺人廉氏洛川劉判潤之配也以正德十一年四月初十日卒距其生正統十二年十月十一日享年六十九歲有子三人珙玟琦有女四人適二靳氏薛氏王氏又有孫男子五人孫女子八人琦為行人于京師將赴喪深戚抵狀拜予曰母亡不孝蔑以見矣生有闕內之行一二乞列諸銘石狀云孺人父廉公景浩劉公同里人也內治嚴潔孺人為少女又慧絕持女訓故廉公甚愛之年十九往適劉公性方畏而孺人溫惠左右相如賓敬至白首室無迂言劉公初業太學母太夫人在家老而諸子皆弱又歲大饑孺人乃盡脫珙簪衣服易粟周旋窘竭使太夫人不失甘旨而家人咸無饑色太夫人病歲餘孺人日夜奉起居嘗藥太夫人乃撫手歎曰我孝婦我孝婦劉公仕凡三徙京衛經歷而孺人有錫矣至劉公徙判易州孺人勸之曰仕宦老當思還鄉土爾久在外非止計也劉公乃即解官歸歸無幾何而孺人卒孺人義訓其子琦幼嬉孺人誠曰汝兄學不成而汝復優游老婦何望也琦遂厲學舉進士嗟乎孺人于劉氏者可謂大賢婦母矣乃銘曰孰曰家興靡顛有室孰曰夫貞靡先女吉瞻彼洛野其域有馬樹其墳櫨以材大厦

王孺人墓誌銘

志曰地道豈不厚哉高山之下必有重淵孺人者武昌通判馬公瑀之配御史錄母也父王公獻世為信陽衛人孺人溫厚淑則性至孝幼亡其母哭之累日弗食長歸馬氏為叙理其家外

內弗貳家至匱缺其具食翁姑未嘗弗旨馬公緝學取仕孺人實佐之訓諸子必經于義而無間其慈里人咸稱孺人大賢云始王氏諸昆弟富豪里中居有樓臺出入騎馬衣文綺甚耀也王公則好書詩工于賦詠行義敦質而常慷慨論事甚愛孺人慧教之書故孺人通孝經論語大義孺人之來嬪也昆弟為治裝使人張牀幕導之鼓樂如俗儀王公大笑曰此何以為也且裝者充女室家陳爾非為衢觀也乃屏鼓樂盡弛其張具載之于車使人推挽之造壻門以故崇儉貶飾孺人式焉孺人生天順乙亥六月四日正德丙子七月六日卒享年六十二子三人長御史次錦次鍊皆郡學生女三人長適劉暘次適學生吳尚智次適學生辛昊御史使于外聞孺人喪乃復使于京將奔葬于城北七里岡祖塋泣告予曰子吾母里人聞吾母矣幸志銘之余拭涕曰嗟乎昔先君子之在里也有詩友會而王公宗之蓋時時道王公之風焉余之聞孺人也有本哉有本哉銘曰北城之域岡蜿蜒上有白日下黃泉刻銘于石昭後先

明故夔州府知府鐵溪先生高公墓志銘

鐵溪先生高公卒余道赴關西過家哭其喪余抵大梁之夕也夢一星搖動隕地其光上發厥明有報公疾甚者及余至公蓋亡一日矣公遺令其子遷曰必何子銘我而可遷踞而泣曰可是惟爾子之志於是遷乃狀公事實來求余銘按公上世山東人始祖濟南萬戶萬戶生成徙居河南太康縣成生智官建文時為副千戶永樂間謫戍信陽遂世居信陽矣智有孫曰瓊景泰庚午舉人為祁州司訓司訓有男子二人長鐸次即公司訓卒于官公纔二歲母李氏攜之歸年十一時與群兒戲釣于學宮池水上曰我釣鼈亦如此爾指揮劉宗異之舉于提學陳公選收儒學弟子員中成化甲午鄉試戊戌舉進士授武選主事崇王請置守備汝寧馬大司馬以信陽已置守備而汝寧重置難之集司屬議公進曰是不難移信陽守備置汝寧俾兼視信陽則事攝而官可不重置大司馬喜曰主事議便於是常引與計事稱之曰我益友也公仕宦既聞時有所憤切乃言事忤內貴人內注其名屏上卒以他事逮之調鎮遠府通判在鎮遠為錢都御史所重諒以邊務洞夷有相仇者使通判輯之不服通判乃夜徙居他山空設其供帳故所遲明往卧榻已碎通判則從容束帶出帳前議和事夷覘而神之盡服弘治改元移山東青州府明年遷鎮江府同知同知嘗委事江南諸郡著績自鎮江遷夔州府知府知府一年致仕歸與鄉人游讌觴詠自娛十八年今天子御極詔進大中大夫初人屬公以公輔之幹公亦自負旁睨一世無所下以是人又使之不得究其用故公之歸也益肆形世外嘗曰仕宦之途我固諳之矣人生苟快意何必至卿相哉公體貌脩偉而精神秀朗見者傾悅又喜談辯時出詼謔曉音律能自度曲兼善書畫皆奇健自成一家公既綜博衆藝而尤長于詩詩語豪宕自喜篇章流播時人珍之在鎮江往賓日本使臣使以詩上公和答章立使臣俛首歎服曰此中國詩人也性儻蕩好交游樂于與進門下之客率多名士其在鄉益劇岍示坦後進無長少無不與之者而好學耽詩至老不倦焉公生景泰壬申五月二日卒正德戊寅八月十有四日享年六十七歲配吳氏封安人有子八人長遷次選次遠俱郡學生次道次遂次邁次造次迅女子三人孫男子七人孫女子七人公之將卒也召八子前曰我有好子徐又曰汝亦有好父遂瞑遷治終甚慎將以某年月日葬于城南飛鳳山之陽夫吾郡雖代有顯仕而文物之開實自公作辭翰風流為鄉人宗即使公徒致位卿相何足以易此哉何足以易此哉銘曰淮山二精降神合符是生偉人大郡大夫佩劔冠玉容雅甚都驟驥脩陸大車廣衢既騁既載弭轡懸輿弗究厥至命也匪吾有男八子接躅登塗列銘公藏萬祀是圖

馮宗武墓志銘

君名洸字宗武予郡方伯馮公鎬之子也少而敏朗方伯公奇愛之挈以從宦授詩命業進士未弱冠即能進士文方伯公嘗數使揖客使客立試之其文無不稱客意者宗武既自有材質復獲隨侍多購典籍與觀名獻能自勉嗜降問無有屈難以故學益有蓄為郡學生厲志超遠不欲委瑣循格在群游中嘗稍自露翹翹靡所下同輩亦先之謂弗逮也戊辰歲方伯公以憂制居鄉里其秋宗武忽疾作疾五日竟以不起臨絕呼方伯公曰父視汝婦若孫言畢瞑矣於戲惜哉初予免官歸自都下宗武來視予坐語彌日既予謁方伯公公飲予遣宗武出揖坐之席側視其色不黝其言琅琅有音也而不數日以死何哉始人望宗武取高第如拾而屢試弗遇或有言其數奇者然弗謂夭也又聞宗武鄰居者吳英合室病疫貧不能具食藥宗武以百錢泊米往醫濟之後英及其妻病死復為買棺以瘞歲凶族人有欲轉徙者宗武止之曰人有貸予錢者俟取之以需汝矣母出也竟以死不克終其意然觀于二事豈當夭者哉宗武生成化己亥十月五日卒正德戊辰八月一日其生纔三十也娶馬氏生子格始十歲為有後矣以己巳二月二十二日歸于城東土家河之原方伯公乃泣涕遣宗武弟沂攜其子來乞銘曰兒死矣弗及矣願子使其後有稱述不蔑斯亦足矣乃銘曰爾生既促孰俾才覺既才既覺孰俾夭伐城東之邱藏焉永括我志爾穴爾後弗沒

明威將軍指揮僉事余君墓志銘

君諱文淵字子澄姓余氏余氏之先淞江奉化人也洪武間有從戎者迺徙著于京至君大父南城兵馬指揮使信益蹈善行有名稱生女淑異妃崇王遂大余氏父鐘字德聲授錦衣衛百戶以王戚隨之汝寧出入親近厚于禮義善詩歌喜賓客王任之奏為儀衛副賜世蔭其官後復奉例奏粟為指揮僉事君母吳氏生君君生於貴然且少而不靡靡為泰能自約下招致延譽無損父風始生秀敏不期月能言六歲知揖客屬對父命就師師有所難即無不釋也十三承父官後亦奏粟為指揮僉事入侍衛能夙夜不惰其身王甚奇愛之也為行崇厚尚恩外祖母喪弗克葬舅氏弗能婚君皆為破財力卒舉二大事其造人所難類此然卒之日距其生年二十五耳天使盈其年則所施者弗止是已奈何弗能有遐享也先是君父德聲公有疾君日往朝問夕弗寢即寢亦弗脫帶人或病其憂勞然不謂遽有弗起也余嘗過汝得與德聲公接識有舊愛亦尚記君之貌今君乃世矣豈不惜哉君娶治中吳應期女是生子相卜十二月十五日歸于汝城東邱德聲公與余書曰弗幸亡兒歿矣命也無若何矣其有不歿者惟子之文是畀余弗忍違公之意乃銘曰佩玉綦綦垂帶委委話言唯唯旋辟爾爾天實是美弗竟誰使廓其有藏萬億是弭我銘斯章君也弗死

誥封太淑人倪氏墓志銘

太淑人倪氏者故指揮使鮑公龍之配而汝寧守禦千戶成女也有男子三人文武韜文當世其夫官然早卒也孫威襲官至都指揮僉事始太淑人婚鮑氏當鮑氏盛太淑人篤塞循默一無所白至不識衡量較物輕重及遭夫喪子又不及官而夭孫且子然在攜抱也太淑人泣曰鮑氏三世屬是兒我當下關闔守吾年俟兒立也乃躬操門戶苦織紡懷其遺孫至罹單窘艱

閼而使外內不廢人視之猶昔鮑氏盛時也威既立益顯前緒蔚有觀望太淑人之志果今有得矣太淑人季子韜者亦先卒獨武侍養能有立有四女子長適陳璽次適王虎次適劉威皆指揮又次適百戶邱漢孫二鎮乃武之子次即威也又有孫女二人曾孫男六人曾孫女五人太淑人生於永樂十五年七月十日而正德四年十一月十六日乃卒凡享年九十二為鮑氏婦母者七十餘年其可謂大有始終于鮑氏者哉都閼君卜是年十二月十日以太淑人祔其夫葬在澗水之南來請銘銘曰奧其宅其地肆好以寧太淑人之魄

誥封淑人任氏墓志銘

予鄉都指揮僉事鮑君德明喪其正室淑人任氏將葬請曰亡妻有勤于予今逝去我我願得子之文志其葬乃志曰任氏者信陽衛中所千戶任清女也適都指揮僉事鮑君威誥封淑人淑人室有女德家有婦儀御衆媵不嫉妬待群僕不刻害蓋婦人有君子行者也鮑君為指揮時淑人甚承之整齊其內內有巨細悉不以干鮑君鮑君治于官淑人治于家以故鮑君得盡能于外無有內累也鮑君聽衛事自以循先世官不能光陟前烈碌碌無以効其才進取于時值邊垂不用績乃思有所建樹淑人力相之鮑君果以功至都指揮淑人之助不可少也鮑君凡征役在外者數年淑人益葺其家能使鮑君不有顧慮淑人有勤于鮑君甚著也然卒之日年始四十五又無男惟女一人適指揮應襲陳忠天所以享淑人者何弗厚也是年巳巳十二月十日葬于澗河之陽祖塋銘曰是為淑人之穴吁其嗟厦之構也而乃離其家實之成也而乃殞其華施報天也其虛邪懷遠將軍信陽衛指揮同知袁公合葬墓志銘

懷遠將軍信陽衛指揮同知袁公卒其子鎔者余同年舉人者也衰服來請予銘曰鎔辱好于吾子子幸而念吾子之好其勉以圖吾父余義弗得辭也乃志曰袁公勛者字世臣其先武昌江夏人也高祖曰壽從高皇帝兵有功累官副千戶壽生斌斌襲官始自南京徙信陽衛左千戶所斌生清清生俊皆相繼其官俊即公父也明于往古成敗有立志思樹奇功厭循循蹈恒轍好讀馬援傳慕之曰必如此乃男子也後果効功荆襄固原間歷加指揮同知進階懷遠將軍卒君所襲官蓋其父立者也公幼而母夫人邱氏棄養養于祖母太恭人繆氏既長事祖母能篤孝又事三繼母亦靡有弗得職者也為人長者無所欺備宣府時屬朱參將部戍獨石敵犯塞士出還奏捷公未有獲也朱參將者往與公愛欲私之乃密令功載著其功公不知也將奏以告公公愕然辭朱參將曰將軍鄣列城使某得幸備行列而敵犯將軍之塞當蒙金矢先士卒獲其渠率今縱不能而將軍又私我以功夫冒人之功以干上賞未能有厚享者也將軍則惠我矣其若我何敢以辭也於是朱參將許之嗟歎曰弗可及也已奏功同部多與得顯秩者而公益裕然終其身無有怨也公始厲志軍事數入主將白軍事冀有所建後見邊事益擾將率多不撫循士罷于求自歎所如不合有志莫可為也乃稱病歸解其職事閒居士卒至垂泣請而退益堅既謝官出則布衣弗飾乘馬嘗獨行郭門外遇負薪者弗識也爭道擠公墜于橋水濡衣公起振衣去亡有怒顏負薪者察知是公惶恐來謁門外左右請罪之公乃反酒食負薪者曰固知汝弗識我爾我曷怒汝也性夙友愛父命與昆弟分財悉推與昆弟不取有別產在確口盜夜劫積稻捕者微之皆旁舍兒也公曰釋之是窘於饑者也非不令子弟也我既弗能賑而使其溺于盜又奈何使其以盜死也於是盜悔讓亡不相率為良者也在宣府有所嘗活者歸而鬻子得貨持謝公公廉知其鬻子也不受使反其子又備有疾疫者彼親者弗敢

近公入其卧躬賜藥與食飲凡公所弗忍者有是也公少業儒所嘗讀書老尚能口誦使諸子及從者為文親考閱布其次第雖老師莫能易也及鎔魁河南省試人皆曰公以武世其家又能以文學成其子也公娶韓氏宣武衛昭信校尉百戶韓俊女也賢而能其妃然早卒公亦不再室也有男子四人長曰鎔次鎧次錡次錄鎔既為舉人不欲襲公乃以鎧代襲而大有能于官女子五人長適指揮汪洋次適監生辛嵩又次適百戶趙騰又次適千戶陳昂其一幼也又孫男子一人女子一人皆亦幼也公卒于正德己巳八月十九日有生六十又四矣以是年十一月二日合葬韓氏墓銘曰溫溫之德不爽厥恭厚積自躬厥承靡窮東門之東有邱其隆是曰公宮公降于中與其配同萬祀攸終

封孺人李氏墓誌銘

封孺人張公夫人李氏以正德五年八月十四日卒子雲為給事中聞喪于京師罹戚冒星來奔將以十二月二十五日葬乃乞余志銘夫人墓以久遠夫人雲與余世通好又同年進士也余時時得覲夫人又余有兄子者夫人孫男子妻也間得詳夫人之德故弗可辭也志曰夫人李氏者封微仕郎工科左給事中張公之配也父曰某信陽衛指揮僉事夫人生于貴而順正弗違不修簪玉之飾能親其族人族人長上卑少來者亡不有厚往也雲縣襄陵時迎夫人養出有車馬奴妾甚貴夫人益良惠亡害僕有不稱指亦亡被罵者也至雲歷近要已致錫命于夫人矣夫人見人恒惴惴慙訥弗耀也賓客至必自視酒酒饌食男孫有婦媵亦弗以委也以故內外咸曰夫人大賢始夫人歸張公時及張氏中窘夫人相張公集其家至躬勤苦事拮据鞠棘亡有怨意雲稍長能學矣又能相張公篤教弗奪其業以就顯名夫人蓋不獨可富貴也豈不謂大賢哉夫人生宣德癸丑三月二十九日壽七十八歲凡為男子二人孫男子五人女子一人曾孫男子一人女子二人夫人之所享者厚矣銘曰張氏望申奕世武冠逮夫人歸門戶稍單何有何亡夫人弗難夫人有子伯震仲雲震則弗永成志者雲嗚呼夫人內德不易茹辛獲旨食自我積雲相祖域隘弗可壙迺為夫人改卜肇土在西山下夫人康哉祀于張氏為世妣祖

壽藏銘【并序】

壽藏者今太常少卿劉公之所作也公年未期也作斯藏也預終焉故曰壽藏云可謂達矣夫生曰寄死曰歸古者之制棺也中年以歲踰中以月祭文葬志或自為之後世利生而凶死言生則慶言死則忌其達焉者亦或鮮矣公少敦敏好學能為科舉文未第也而以大父文恭公之蔭為翰林秀才屢以勞効久次轉官歷中書舍人大理寺副禮部郎中尚寶司卿又嘗為今上正字上即極乃以春官侍從遷太常寺少卿頃之迂於逆瑾罷歸瑾敗復起為太常少卿仍供事內閣制勅房其在制勅也歷事累朝自天子及后妃王公大典禮咸有事焉歲時賜資金幣寶鏹饌饌人咸榮寵之能習國家典故臨事必有稽而處人又平實易見然則公之達也非其經練之所成篤厚之所積邪壽藏在武邱山祖塋之側崇基下水袤形象阜列樹週垣一塚雙戶公曰楊恭人予配也將與合窆焉公名棨字世信號武邱山人世家蘇州府長洲縣銘曰巍焉武邱泉有瘞劒產秀生才有靈斯驗壽藏壘壘在邱之旁有封有樹有局有房百年同歸偕此齊德有安者棲無遠先域曷歸曷寄孰祥孰凶久矣公達究其始終我書銘章永而弗失

水衛山朝固此玄室

姪渭女壙磚銘

姪渭女予三兄女也兄從父宦陝西渭源女生于渭故名生十二年夭女幽秀警敏質若弗任衣且少言語日扃閣事紉繡剪縷未嘗從群女戲聘王氏子歲丁卯夏疫家婢有邁之者衆不敢視女入其卧持水飲之家人固止弗聽數日婢愈女乃疾恐憂其父母曰吾疾殊不甚父母見其弗眩困信之病旬餘忽起呼其母曰衣我我不可活有頃絕六月十日也是夕即瘞于坂西予痛惋未及銘其壙後數日乃治磚砂書誌銘命童掘土入之銘曰既以生汝慧汝又以折汝予莫究汝坂西有域惟以瘞汝

姪岳州壙誌銘

姪岳州東昌公第二子東昌公令岳之巴陵時生也生而白皙顙角稜起能言後聞人讀書即默記之誦數百字不忘對客揖讓若成人者也東昌公歿哀哭夜不寐曰爺棄我何去也遂嬰病病且死猶啼泣呼其父生四歲死于正德二年六月二十三日埋之堰東岸上銘曰岳州生申州死死丁卯生甲子魂安之魄歸此

卷三十七

行狀五篇

封徵仕郎中書舍人先考梅溪公行狀

梅溪公卒其季子景明恐逸所行事將銜哀為狀求當世學士大夫之譔越二旬母孺人又卒益隕惑不能言也又踰時乃自念曰天弗譔不延予二人予小子敢廢先人之德使學士大夫靡所論譔在我後之人靡所稱述豈非大罪哉遂涕泣為狀曰公諱信字文實父曰鑑母劉氏鑑為陰陽學典術典術公有五男公第四子也其曾大父大父皆世居信陽之梅黃鄉為農家縣徵其子弟為學生書吏輒懼而深避匿之典術公少時縣求之急其父又欲匿之典術公曰丈夫出當有用安得久匿也遂乃入城而公時亦稍露頭角鄉人識之曰何氏世厚積不發發於典術公然其四子當益大也吾黨皆下矣典術公嘗權明港巡檢有侯郎中者暮過宿亭下怒芻不具公時為童子入給芻侯郎中見其有儀試之屬對又有奇語乃釋怒謝曰予弗知汝有子也公既長典術公使任家事不使為學生公乃與同里王憲閻禎等結社澗水上日賦詩飲酒期以此自終而公舅父盧翁者有鑒識能術也嘗謂公曰汝三十當出樹德立聲後當有官然卑不顯也至汝子有顯者矣久之公亦以才謀不少試嘗念盧翁言及三十藩司辟為承差其責令嚴不可脫解公曰命也果若外翁言矣夫立身在人不在地也承差雖卑予何恥就之邪既為承差見為承差者皆富子弟縱侈弗循矜炫衣馬而已餘則又卑賤污甚乃恥之弗與群日檢修飾文雅以自獻而諸藩使亦異之也布政使吳公節者最奇公嘗引與畫計每事公一發端必擊節稱善曰吾老秀才吾不如也會陝西告災京師發粟萬石自漕河舟至衛輝而令河南陸移于潼關是時河南亦弗熟惟南陽汝寧稍熟也乃下令南陽汝寧發夫萬人驢萬頭供是役公聞之不可曰是將敝河南而緩陝西之救矣不如出省藏馳一吏使入糴關內然後下令南陽汝寧之夫使人出銀一兩而給粟一石且免其役是一吏代萬夫之勞千里活一旦之命矣此兩利之道也於是吳公卒從其議而役夫皆喜曰蠲吾役是蠲吾死也皆樂出銀與官無肯受粟者也太監汪直至河南河南都御史以下皆蒲伏進謁獨憲使陳選長揖立不伏直乃捽選下選厲聲曰太監至辱天子法司已而又使都御史移文郡縣取名馬都御史持紙筆自書然手栗不能執筆顧左右皇汗又不敢令人代公在旁曰此一書吏事耳都御史大臣不當煩都御史乃奪筆代都御史書故其後凡論仕宦必曰陳憲使男子也而高官乃污行者輒羞稱之為承差嘗董大役其建輝府也有羨金五千以詣吳公吳公駭曰何羨之多也夫汝羨出者而私之誰知者也公曰吾聞之凡私者滅公利者近害今羨出于公也五千至厚利也吾私之將無滅公乎利之將無近害乎是以不敢有也吳公曰然吾亦弗可有之也於是公乃請以賑河內饑人焉公兩為驛丞不以庠官自貶有威嚴厲氣義不少下人人亦相下之在會寧會貢獅番武官需求所過吏吏無不被筆者又為先聲使縣官以下除道郊迎公獨不出武官至則讓公公立數之曰邊臣以蕃夷貪戾恐患所過吏故以汝監之而汝反教之為患邪視其符給餼食餘無所與後武官果敗併盡逮所過吏而公獨以抗武官弗逮也會寧三年以內憂去已而復除渭源渭源有大滑李氏三衛軍圍其舍能彎弓破圍出縣令大懼公乃以計縛之歸縣令縣令駭且懼入而甲乃敢見也公故病足疾病則累月不起嘗鬱鬱思歸言曰

夫所欲於富貴者可以厚身也然敝身以求富貴於富貴厚矣於身薄也古人有忘身者以圖不朽也富貴豈不朽者也予壯而有志思少自試故不羞庠官夫善嘗酒者舖糟得之矣久于宦非予所稅駕者也在渭源又三年值御史行縣縣簿下至驛郵之吏悉徒走奉輿馬馳五六

<集部,別集類,明洪武至崇禎,大復集,卷三十七>十里公乃浩然歎曰可以去矣吾自為卑役至歷官未嘗一日屈也今不能為御史徒走遂稱足疾求罷官還矣然在官貧甚無匹馬而臨洮守李公紀者饋之車馬以還既還治居城西溪水上岸植梅樹日造吟其間號梅溪居士有詩百篇為梅溪集居常論地理卦象推時日運氣以為陰陽之大順四時之紀五行之布吉凶災祥繫之不可違也公有子四人長景韶累官東昌府通判卒次景暘舉人次景暉又次景明景明既舉進士為中書舍人三年值正德丁卯自以道不立欲修學近親乃請病歸景明歸又三年己巳夏公遘疾將卒召景暘景暉景明來曰吾昨夢予父招我我殆不起矣景暘爾即長我家仕則思有以光我汝念哉曰景暉治穡事以厚其家母外有慕又執景明手曰予之先雖無有大顯聞然世皆長者夫源不積不厚不導不流不廣不長予先祖有積矣予其導之爾輩其廣之乎勉哉修學明儒汝弗可有讓焉言已卒豈不痛也初公娶盧氏繼娶李氏盧氏者盧翁廣女也翁戍大同歸以女妻公公嘗稱曰盧翁事石將軍有功將軍欲官之翁曰願罷戍歸為農夫不願官也既歸外母嘗恨之曰始從石將軍不歸何患不貴乃自苦為農翁笑曰石將軍何能若我也及石將軍敗翁哭之顧外母曰爾謂我不從石將軍今將軍欲與我畊隴上能得乎盧氏配公有賢操然早卒李氏孺人者其父本山東人宦于南京有二女子教之誦女訓習婦事長即李氏嘗寓羅山盧家與盧翁通好兩盧氏家往來相善也會公喪盧氏盧翁為擇配曰李氏女賢吾知其命貴當有封求配無逾李氏女者李氏孺人適公大仁惠篤儉終其身不易焉景暉景明乃其出也又生女適孟洋以進士為行人而景韶景暘則盧氏所出然弱齒即見遺也皆養于李氏又有孫男六長士為學生孫女六長適張氏子餘皆幼也公生正統辛酉卒正德己巳四月三日李氏生辛酉二月十五日而己巳四月二十九日卒皆合葬盧氏墓於西山之麓公自游宦及謝歸六十五年而當正德丙寅皇上御位詔以景明官封公為徵仕郎中書舍人封李氏為孺人男景明曰何氏之先有仕羅田者元季因籍羅田高祖曰太山始避紅巾攜母至信陽高皇帝兵至建紅旗一白旗一曰為我軍立紅旗下為我民立白旗下太山乃立白旗下太山生海行曰隆二其兄隆一為力士于南京行訣于弟曰吾即是役不以遺累爾子孫遂去終不相通不知其子孫所在海生三子次子鑑即典術公始開宦端典術公子曰仁義禮者皆力田無外事第五子曰本才邁使氣為學生早死而梅溪公在諸子中最有立諸兄弟生養之卒皆為舉其喪其建事明幾薄貨利遠聲色重然諾好施與砥行厲節百折不毀雖古人不遠讓焉夫梅溪公其起家裕後之祖鄉里之憑矣而二母事之可謂合德景明不類不能廣志紹德又少不盡識所履歷謹記其所嘗聞見及鄉黨傳者著于篇俟學士大夫采之

封承德郎禮部主事李公行狀

公諱祐字宗吉別號三川曾祖明陝西鞏昌府安定縣人也洪武間舉懷才抱德為御史已坐事謫河南周府護衛經歷子曰伯仁經歷公卒于官伯仁幼且貧不能歸也因家于官所由此遂世著開封府祥符縣籍矣伯仁生孜配史氏生公正德庚午今上上兩宮徽號推恩公以子

茂元封承德郎禮部主客清吏司主事配高氏封安人公幼即端整不戲四五歲能誦詩八歲而知學善屬對十三四學趙書又善大書草書皆無弗工也長讀易習舉業思起科目父母懼其弱而致疾也強奪其志自是常鬱鬱志不悅恥事農賈乃益閉門務學誦古書求徹大義以至刑名醫卜星歷算數之學亦無不深究其說嘗手授茂元易詩讀之曰吾恨未能以儒致身惟汝力學以畢吾志初公父孜家頗饒然能任義散予不責償負以是家漸窘矣既歿貲益蕩盡公年方十七八且孤孑無依力營幹勉終大事不見其匱性忍慾不畜媵御終其身布衣蔬食不易也然延師教子暨賓客之禮則靡弗厚者有人竊公亡金一鎰知其人不發或曰曷訟諸公曰安忍訟也訟而必論以盜金亡可復積受盜名百世莫改也且彼非急困曷以至此吾安忍訟也遂終不發處家甚閑僮僕雖少者莫敢足中門犯者必斥逐之外內肅如也其奉繼母賈氏撫義弟善以孝友聞于鄉人接人甚謙恭笑語衍衍款洽而議事理談世務又侃侃無所依違常至屈人人有過必正色質之不少假鄉人不善者疾之而善者敬憚焉公生景泰丙子二月十三日卒正德乙亥十二月十三日年纔六十耳生男子四人長即茂元弘治乙丑進士今為禮部郎中志業甚著次茂魁茂先先卒次茂才為學生女子一人適同邑王金孫男三人孫女四人卜以正德十一年十一月十九日葬于汴城西鄭門外茂元曰先君子自封官以來甚優暇康強聰明壯者弗及人曰先君屯已而泰天之所以祐善人者固不爽也安知遽以微疾弗起也豈不哀哉夫先君子生也用心苦而志堅其於事物也必究思必底績造詣晚而益深明于當世之務然無位弗獲施也今也已矣豈不哀哉景明與茂元為親友茂元謂景明曰先君子非當世尊顯之選無以發揚使不朽也景明乃次叙茂元之言以俟采擇

亡兄行狀

亡兄諱景韶字仲律成化丙午舉人選巴陵知縣遷東昌府通判兄性狷介與人不易合顧能事父母必得其懽心少時家父遣之讀書曰讀某書某日為我背誦至日持書來誦之不遺一字父嘗不悅俟父已寢跪于門及父夜半偶起出門見兄驚曰為誰也兄曰兒也父曰何夜半至此也曰父不悅兒不得寢父曰兒如何有弗悅也始為舉子下帷講誦日厭蔬食諸友生患貧者多貸人貲兄曰為士而貸人貲後將必取償于官卒不貸人貲既屢試弗第家父曰女能績學卒不能進士必女命也仕以行志而已志行奚必進士既而為巴陵令人曰巴陵難稱也令巴陵者蓋未有終三年任者也比至則廨舍蕪穢不治吏不典列民不服役也曰是可以弗為已也乃版書政條懸縣門民始相顧曰令給予然亦稍來集從役以觀兄察役者悉寡弱役且重也問之皆壓居無業者也而其強富有力者則皆居數百里外負山岨叛令不復能制也故弱者役日重兄曰為令使弱者苦強者得免而何以令為也乃釋弱者於是諸富強有力者曰聞新令善吾奚可叛約也乃相率來請役凡邑中墮廢盡以興治往時監司諸使者經巴陵以乏委積輿皂常滯月不得去而令日走道路不能給又不得少坐堂上視事至是館無留節獄無滯訟民又見令時置酒召客與飲莫不服且異也居六年將考績民赴監司留之曰令茲行必遷遷則奪我父母也願以終惠我也已而果遷東昌東昌職專事簡而益有餘力嘗作書與景明曰東昌頗無事日可以讀書課子甚樂也但苦薪價太貴耳居六月疾作竟卒東昌僚屬士民咸哀哭之卒之日年始四十六也初娶鄧氏早卒繼娶夏氏亦先卒繼又娶孟氏孟氏生二子長曰岳陽次曰岳州俱幼也一女夏氏所出聘張氏子士奇家父生四子長即兄次景暘次景暉景明為最幼也皆受業于兄景暘舉鄉試景明雖庸劣無所成立然知讀書舉進

士是兄之教也嗚呼天速死吾兄也景明何敢忘吾兄也謹槩記所行事求太史論譔以章沒世哀悼之餘文不次叙明紹興府同知致仕進階朝列大夫陶公行狀

陶公諱永淳字質夫號曰樸菴上世由宋汴來徙松江華亭遂世為華亭青林人高祖嗣宗曾祖羽祖蒙皆隱不仕公六歲而失母鞠于外祖呂公少雖甚單窘然即有志氣不逐群兒戲長益嗜學嘗讀書南禪寺閉門誦習趺坐中夜闐然若有深獲已而出入默念不輟人莫得識也于是試補郡學弟子員提學御史嚴公淦者大奇異之時弱冠也名翹然起矣天順壬午舉應天府鄉試中成化丙戌進士初授魏縣知縣以制去任服闋改南和縣縣民王氏家饒于貲有利之以為功名者誣以妖言公曰夫已樹利而種人以死禍是可忍邪乃為白之竟全其家歲屢告凶能發粟活民濟者甚衆又嘗請于朝建宋廣平祠曰明揚先俊風勵後學典弗可缺也於是吏治彬彬稱于畿內然其治不近名求事之集無瑣務求弊之釐故甚近民去而民思之為刻石頌德始御史屢上南和令治行或又請更調邢臺吏部乃以勞積久次轉紹興府同知同知常攝行府事鋤治暴強植立孱弱剔蠹洗冤鄰郡事有弗能決者皆以委之無弗片言以獲其情立斷以成其獄者紹興六年以迂于暢御史暢御史嫉之乃移疾歸後暢御史敗或勸公直之公不答也都御史侶公大器之乃白于朝俾以禮致仕焉公自舉進士人見其材氣辨達謂必致大用然弗得意于時宰故兩調縣令不得內補及御史上其治績則又以為紹興同知名擢大府貳而實遠之紹興治又著矣又遇暢御史以故連蹇湮滯卒不得達故人咸曰陶公弗能自致大用要非命邪然公有子曰驥為行人公來視驥適遇今上上兩宮徽號推恩進階朝列大夫躬拜命于朝人又以為異數也公之罷宦也日與其所厚善徜徉九峰三泖間觴詠為樂賓客至門罄歡款享劇談古今琅琅傾聽或無賓客與其鄉人亦宴笑終日好蓄古書帖能作歐字晚卜葬地彭家庄山水佳勝心甚樂之乃預治棺斂具築壽藏焉正德癸酉九月九日疾卒享年七十有二配王氏有賢德先卒太常卿夏公甥也子麟臨江府檢校女適陳觀繼配李氏武功千戶安女子驥乙丑進士禮部員外郎女適相堯臣次適唐琰次聘許康孫男四長孝次友俱縣學生次嫻次睦孫女三長聘朱氏子麟出餘皆幼驥出魯孫男某元孝出公篤孝友嘗以父母未被封贈屢上疏陳乞兄永洪不能自立養之終身歲時祀祖先已必祀太常夏公及其師諭德陸公座主文和劉公其弗遺人恩義類如此驥初聞公病即乞歸省歸而公已卒弗及見也乃卜以明年某月某日葬于彭家庄驥泣謂予曰先君善事甚衆不肖弗能詳也夫親有善而人不知知之而傳弗遠皆不肖罪謹述其一二請為行狀將以求銘著不朽焉驥又稱其祖竹軒公精易學其高祖在洪武與袁陸為文字交及其先君子厚相與者皆天下名德積累從來者遠矣然驥亦尚文學能取天下士豈非其家法哉可謂善承其志矣予與驥同直內閣制勅房為寮友故得論次其先人行事俟當世名公大人采焉

甯母朱太夫人狀

太夫人姓朱氏諱忠溧水知縣甯公賢配也其先為山西稷山人父曰旺永樂間從戎定邊衛因家焉旺與甯公父剛友甚懽約為昏太夫人由此遂歸甯氏其歸也事父母曲盡孝敬門內之事一以力持之仁下篤族內外咸稱為女丈夫云甯公為士夜讀書太夫人必以女紅相之夜分甯公嘗倦思寢太夫人曰吾女紅未畢也以此辭之欲以相甯公誦讀不倦又時時蓄旨羞俟甯公夜讀供具之甯公中成化辛丑進士為溧水縣知縣既召內也而病且卒太夫人召

子河慰之曰女不能忍爾父邪踰哀莫益也汝未有立汝父不瞑也汝恢汝父遺業斯為不忍爾父矣乃為延師使執經授學而太夫人經營其家甯公有友主事楊奉春暨其弟舉人奉新二人者早死也有父老在堂甯公業心許終楊老楊老之終也甯公弗克及也太夫人謂河曰是汝父志也今弗可以已也於汝殯之甯公置有地一塋太夫人躬率力時藝麻菽瓜果蔬菜地無遺利而家致饒裕太夫人見河慷慨多交游喜之不恡所需予嘗誨之曰吾無患汝之不交也患汝不善交爾河舉弘治乙丑進士授戶部主事會逆瑾用事新例謫臨漳知縣未幾轉德州知州適大盜起能攻守保州人將臣大吏多倚之尋升河南按察司僉事兵備信陽迎養太夫人于官太夫人老疾篤河疏病歸奉太夫人還疾益篤囑河曰吾也上見汝父之成也下見汝之成也見汝子又將有成矣吾無恨矣惟汝之單嗣妻孥群小毋失恩教毋輕夜出毋縱飲毋遐遺故舊吾沒之後毋為佛事言竟乃絕生正統十四年正月二十九日卒于正德十年十二月十三日享年六十七歲子一人即河也孫男子四人曰平日中曰半曰巾孫女一曾孫男一曰憲郎河以是年二月十一日卜葬河曰嗚呼亡父之仕也未六年而逝河輾軻于途靡有定吾母也艱關振家茹辛履厄以收相夫教子之功而河也尚不能致錫命于母今已矣豈非終天之恨乎謂景明曰吾母非當世尊顯之譔無以使不朽也子雖未識河然子知予母子矣幸狀之河之兵備信陽也信陽有數桀民主寇行權于鄉者數十年矣細民安其害而大吏莫之敢廉兵備至悉芟之始廉桀民杜氏杜氏奔之京託勢者人護見之兵備見之曰是杜氏邪左右曰是即却護者出置杜氏死法又曰大盜之行無塞障也乃城數城咸鉅麗百萬之工弗踰年舉民忘其勞官不知費兵備敢任而不憚害好義而弗撓曲憂公而不慮身善察而不煩喜事而能集民曰父母吏曰鬼神其引疾歸也吏民士大夫踰數百里送之皆涕泣嗟呼不忍去去後郡縣人皆生祀之嗟哉何以獲此邪昔滂有母澄清之志行軾有母忠讜之節立若兵備者非太夫人之教邪太夫人可以不死矣予未交識兵備兵備在信陽予仕于京然以信陽人知兵備及太夫人之事及略敘述以俟作者采擇焉

卷三十八

誄祭文雜著共三十六篇

方竹先生誄【并序】

先生謝逝訃音奔告大夫篤孝幾隕幾絕於是同年生汝南何景明誄之辭意淺簡無以究蘊逖聞書之素旌聊以寫哀

嗟嗟先生含和服介志貞履順長達少成有聞厥震齊民元士三軍匹夫席珍孰聘褐壁其辜游心恬澹遺跡富貴早學晚仕方行勇退天弗憖遺弗俾以生人失其則士喪其程素車驟驥乃造玄室風悲日冥殲良萎哲有子大夫高駕修行廣志遐澤維亡弗亡譬木之蘖其發愈達嗟彼積泉其流不括嗟嗟先生何戚何憫嗟嗟先生

祭亡兄東昌公文

某月日中書舍人何景明乞病歸自京奔亡兄東昌通判君之喪致奠而告曰嗚呼吾家自始祖有籍世服畎畝耆齒不造郭童子不入市逮先祖父興乃知好儒尤通陰陽家術於是郡舉典陰陽學始有敝廬于城而吾父繼之門戶稍著父思以儒顯厥家而自以舉業未遑也屬之吾叔然吾叔又早死也當是時兄且弱冠也慨然有立志終日下帷歲不窺圃讀書過目即成誦為文操筆若宿構人望之知丹穴之雛志在千仞而渥水之駒心越萬里也及得省薦父曰儒業果有徵堂構可弗墜也既十年不得志於進士家夙乏厚儲稍見迫窘而父亦罷宦羸囊單車辛勤來歸兄乃益砥志嗜修不少貶屈左右奉父承以顏色父亦靡有弗豫者也然是時二兄學已就緒予亦從父旋兄從客試之曰小弱弟可教也遂口解經疑手授簡策朝啓夕勵不得相違弗逾載二兄洎弟同舉于鄉父謂吾門當自此興也逾年兄遂令巴陵逾三年弟仕于朝又逾三年兄遷東昌父母之慶兄弟之好方以為慰孰謂吾兄死也始在巴陵聞雞通衙執燭視事風江雨湖晨塗夕舟坐不溫席寢不緩帶予視其勞瘁竊懷憂惕然卒無恙也至徙東昌官尊而事少屬衆而職專吏有所告可以卧應予謂今之逸固以報昔日之勞也嗚呼孰謂吾兄死也死之先一日作書遣吏來京視弟弟方與客坐語得書讀之至再且以徧視坐客有頃僕進報兄死弟叱之僕頃復報兄死弟猶以為僕之誤聞也嗚呼孰謂吾兄果死也兄器度沈靜果于行義善類朋趨邪黨斂避正色近信不為矯飾兼之加志窮民秉心在公名位當不量也年未至而施未光天即奪之何也嗚呼父母俱存兄弟仰賴男未及婚女未得嫁吾兄何遽棄而去也前月嫂奉柩歸至西平復生一男弟視之眉目宛然類兄也前抱持曰哀哀遺腹兒淚下不能忍已復視吾二姪長者就外傳嗜書耽紙筆自絕羣兒幼者頭 稜起能對客讀字退而又私喜知吾兄有續也嗚呼吾家自有兄前有彰後有述所望于來者謂何而今至此也兄昔與弟書曰弟當志天下事大吾家者弟也然弟薄弱不堪世事歷官五年寡合少朋才不逮聞名不任毀且夙志幽寂不慕榮耀又多疾益踈宦志茲得告歸自甘草野上承二親下奉寡嫂至於子女之養父兄尚在必能得所無俟于弟弟惟視其成立以畢兄願也嗚呼死

生恒數兄功名垂於郡邑孝廉稱于鄉閭可謂不朽也子女雖少已有成人之漸可不憂矣兄復何恨但吾生者之情抱茲痛烈悠悠日月無窮已時而兄固弗聞也嗚呼哀哉

祭李默菴先生文

正德十年四月中書舍人何景明聞默菴先生李公之喪哭之逾旬乃束幣為文附其使還告于公之靈曰嗚呼古人言感恩易耳知己難也景明于公所以慟悼吁涕不能自己者匪徒感恩重知己之難也夫景明昔寓于公是時有毛夫人也公執詩書毛夫人執燈燭晝夜課景明誦讀居也視衣食還也饋車馬此豈不有父母恩邪是時景明幼孺非有能知也公以成人禮之又日察其言動中善者稱于人其所望見又皆可以施之天下百世者不以時世富幸榮慕也公嘗盛衣冠入召景明語毛夫人在傍公謂曰汝視予貴邪它日是子貴奚翅予邪然我所重望者匪為能貴已也嗚呼古人謂知己有若此邪白首握手終日語心而不知者何可勝道邪古人曰無德不報又曰為知己者死今公逝矣毛夫人又先亡矣景明雖欲報而死也無日矣他日縱有能施于汝佐諸子然二尊人又安能知邪矧汝佐諸子又能自大予又安能有施也雖然公所望見予者豈在報邪在望見景明之自能就立耳今雖能取一第為一官使公及見然所自就立者已弗若公所望見者也即它日又有能自就立公又安能知邪矧景明寡昧弗達所自就立欲大於往日如公所望見者又安能有也嗚呼已矣何以酬公之德而副公之知邪山川伊阻不能棄官赴公喪執紼道輒我懷之悲惟公有靈鑒之已矣嗚呼哀哉

祭董先生文

嗚呼先生學書以游藝飲酒以率真蔑俗以肆志薄仕以明有事勇退以示所止行義始終備矣夫知有所必厄而鬱有所必伸故士之直樸而弗曲飾者恒受顯棄而寡陰禍先不足而後有餘先生讎惡而摘過急難而緩利出不賄官居不貲實而艱遇靡合貴眇謝速則已厄矣然繼者有令子以廣其志以發其祥厄未極而所伸者厚矣夫娛目之寵有際而後身之享靡窮先生又何缺焉傳言天不滿山岳歸地不滿星辰見然則物之所歸而見者必其所不滿者也先生又何疑焉感茲驟驥愴焉悲泉臨風一觴敬弔先生

祭高鐵溪先生文

嗚呼惟公宏才天授大器夙成其容玉立其賦金聲江河之辨淵源之思通達古今發洩天地作我後人視此大方歸然依歸遽爾淪亡夜雨草堂淒風總帳賓酒既空人琴俱喪白雲一去明月自來楚些招魂百代同哀

祭封工科左給事中張公文

嗚呼昔公之于先考隣比莫逆公之仲子今都諫君也及先伯兄又申之以婚姻之好景明于都諫君同年進士也豈非世世契誼哉公今逝也先考之亡也八年矣先伯兄之亡也十年矣愴念生死通家同情捫涕興戚寧有已乎惟公仁厚與物慤勤起家食享于積以高年終公可

瞑矣夫都諫位業日茂而不肖亦守恬懼墜先烈公之九原見先考伯兄必相語若平生也

祭岳母文

嗚呼惟我岳母慈懿為德勤儉成家既穫既食不驚於華爾女既亡我翁既逝服艱茹辛晚也誰濟昔翁之亡我送其喪今母之亡我適來鄉臨風釃觴臨河執紼死生俯仰哀來慟哭

嗤盜文

予抵永寧吏役無郊迎者造館供具不設寂無與語始入城門視其不禁槩夜不聞鈴柝之聲虞有盜戒僅僅曰未聞城隍而盜者然予猶飭門者堅封鑰舉火周垣燭之及其室奧處命僮宿中室夜半僅忽大叫曰盜持扛去矣起視盜入處見其壁皆編竹為者飾以土灰故盜得踰鄰牆斬壁開門以入予徐思囊中無他長物惟所服衣并書六十餘卷書則予甚愛者旦有來告者曰北城之江有箱委于岍空無物獨書冊狼籍水浸其半命收視之乃予裝蓋盜發之盡取其衣服去而留其書幸而留我書盜亦仁哉夫盜欲以利大貨者也雲南人稱多異產至其地必購香木珍貝犀象齒角怪石金銀之屬以還盜豈以是貪我邪盜亦誤矣凡善為盜者望其人占其富貧相其室占其虛盈故盜無不得算無不成茲盜持吾衣服之則不稱其體賈之則敗其迹雖不利于予其利於盜也亦淺矣是豈善盜哉予既仁其留吾書復笑其不善於盜文以嗤之且告邏者蹤跡之其言曰

孟冬始魄永寧官署爰有小醜隅伏隙覷弱我寡衛出我不預越鄰穴垣以我裝去來斂其聲往滅其處晨有告者北城之隈箱委簡帙狼籍江隅持我衣服猶存其書書我甚愛焉恤其餘后皇植生小大有職農樵在野工商居國弱不見陵強不容力胡為爾盜恣乃奸慝厥初賦質化溥施公洪纖羽血均帝鑄鎔何下愚吝何聖之豐胡為爾盜自叛其同嚶嚶咷咷晨昏顯伏窺伺戶牖依傍草木鼠竄狐疑狼啖狗逐百態為妖千巧呈侮啓竊堅閉發敗深蓄一蹈法章魄褫躬戮爾之不懲其侮曷贖善於盜者搜幽索飫貧富虛盈遇之即諳爾胡弗靈乃昧所探珠犀瑋瑁溢筭充函爾不是取而胡我貪人謂爾盜我嗤爾慙嗚呼野外且不可劫而城中是虜小民且不可干而近臣是侮爾頭可截罪不勝數著之于章聊告司捕

壁盜

壁盜者一足壁善穿窬嘗夜從二盜入巨姓家登屋上翻瓦使二盜以繩下之搜賁入之櫃命二盜繫上已復下其櫃入賁上之約如是者三及其數壁盜自度曰櫃上彼無置我去乎遂自入坐櫃中二盜繫上之果私語曰賁重矣我二人分之則有餘彼出則必多取是厲我也不如置而去也遂持櫃行大野中一人曰壁盜稱善偷乃為我二人賣一人曰此時將見主人翁矣相與大笑歡喜不知壁盜乃在櫃中頃二盜倦坐道上壁盜度將曙又聞遠舍有人語笑櫃出大聲曰盜劫我二盜惶訝遁去壁盜顧乃得全賁歸

獸紀【并序】

何子曰予惡世有冒名徇利務相欺負而寡情實者焉聞客有談二獸狀者類其人作二獸紀

狐

狐善媚嘗藉虎威以懾群獸一日衆狐食絕將出野求食畏他獸凌蹂乃謀于雄曰當復從虎出也雄曰汝胡自鄙小也虎技寧過我也群狐乃自從虎出雄者即尾其後呼嘯若噬群獸者群獸見虎來皆伏不敢視衆狐得食返笑其雄曰何復從虎也雄掉尾怒視曰汝謂群獸伏者為畏虎邪

猿善援 亦猿類惟跳躁無他長技山之奧有洞洞多貨物 弗得自致也謂猿曰爾援上探出之吾下守之當其利也猿攀木蔓上取而致之 悉移置窟中猿既下 無有也迹之至窟傍曰貨安在 據窟嘯曰貨吾固有者爾何得有也呼其群相毆躪猿曳臂去

讀精華錄

偶讀山谷精華錄見和東坡西湖縱魚詩因次其韻作觀打魚詩又記後山曾有和東坡此詩大類山谷及檢其全篇即山谷者也但多一篇耳又後山集中思亭記他文選者未之詳耳然二作今亦莫辨其出誰手也山谷詩自宋以來論者皆謂似杜子美固予所未喻也精華錄任淵選者其所擇取多不愜人意而自謂上選何也

雜器銘【并序】

予讀古鐘鼎盤盂尊敦諸器銘未嘗不三復而歎也蓋道本無垠物各有理故物迹有至教末器有鴻法君子察名釋義則而象之所以益德也著之銘章以時觀省所以閑邪也古人之意將不在是哉予室雜用大小器皆質良無他珍異予以其具自存覽志氣攸寓乃私古人之遺意各著銘一章凡十章用以自儆

燈銘

汝明無太察而光無太揚蓄汝明是用嗣汝光

几銘

斬其曲修其直是憑是式惟爾之德

梳銘

夙興夜寐無顛倒我衣無頗無覆無替厥服

鏡銘

爾善爾惡胡隱胡豫已則不明人孰爾據尚鑒茲哉爾心是茹

刀銘

不貴汝之利而貴汝之裁不貴汝之剛而貴汝之斷利惟裁剛惟斷

硯銘

聃守黑雄尚玄汝兼之以永年

筆銘

畫不必工惟心之中辭不必華惟意之通

枕銘

苟無忤于日之所行寤寐爾是寧

壺銘

直爾躬發爾矢雖不中不遠矣

瓶銘

厚其入薄其出守而弗失

四箴【并序】

何子曰好惡者情之發也言行者身之章也窮達者天之命也毀譽者人之施也故情之不正身之不修而不得於天不合乎人君子之病也情正矣身修矣而猶不得于天不合乎人君子何病焉是故合情而全身樂天而知人者聖人也懲乎情無違乎天持乎身無願乎人者賢人也任情以忘身希天而望人者衆人也聖人者吾不能也衆人者吾不敢也賢人者吾願學焉於是著好惡言行窮達毀譽四箴書之座右

好惡箴

好之無實謂汝曰暱惡之無實謂汝曰嫉知人而為是汝則弗平不知人而為是汝則弗明弗明弗平是為枉其生

言行箴

能言而失其幾者不察其微也能行而失其要者不觀諸道也知人之敝而不以自治也者棄也行違其言者悖也以言掩行者盜也汝省其微以至其道邪亦甘于棄入於悖而流于盜邪

窮達箴

窮則益其志汝則是惡達則損其志汝則是慕雖則汝惡窮孰汝蠲雖則汝慕達孰汝遷毋勞思眊眊惟順汝道而俟汝天

毀譽箴

無惡而毀于汝何疚無善而譽於汝何有嗚呼汝乎毋以毀譽而喪厥守乎

雜言十首

北方水之大者惟河故北方之水通曰河南方水之大者惟江故南方之水通曰江濱海之水皆曰海濱湖之水皆曰湖

古人奉德則報以珮恩返則報以環恩絕則報以玦珮佩也環還也玦決也

鳥棲樹鴻則棲于野獸棲野猿則棲于樹

雉雞類鷹鵠類鳧鴨類雞鶩鴨可得常食雉鷹鳧弗可得常食也可得者在家弗可得者在野也

經亡而騷作騷亡而賦作賦亡而詩作秦無經漢無騷唐無賦宋無詩

器虛則貯之滿則撲之木小則培之大則伐之故虛可處滿不可處也小可處大不可處也

龍蛇之伸于霄漢者以其屈也杞柳之屈為卮匱者以其伸也故君子寧屈以求伸毋伸以致屈

諂似恭吝似儉諂則不恭恭則不諂吝則不儉儉則不吝

雪則霰風則霾陰則蟻霽則虹故霰則知雪霾則知風蟻則知陰虹則知霽

婦人之仁不仁匹夫之勇不勇仁者垂不滅之德施不報之恩勇者見義必為當幾能斷

何先生傳

何先生者信陽人也名景明字仲默號大復山人今海內稱大復先生云生有異質穎記殊絕八歲時即能賦詩為文章諸老生見者爭傳誦稱為神童年十二以父仕臨洮府驛丞乃隨侍臨洮臨洮守李紀者聞其奇召置門下甚愛重賢之為延師授春秋居頃之即善說春秋歸又受尚書長兄景韶所甫數月即以尚書魁河南省試當是時年纔十五也諸王公大人爭迎致一見候車嘗數十乘所過人觀者如堵既入京師遊太學祭酒林公又甚愛重賢之歸則詩贈焉于是名盛傳海內猶鳳鳴麟出世人驚睹也年十九登壬戌進士授中書舍人是時北地李獻吉武功康德涵鄴杜王敬夫歷下邊廷實皆好古文辭先生與論文語合乃一意誦習古文而與獻吉又駿發齊名憂憤時事尚節義而鄙榮利並有國士之風焉往學士為文自六朝以後日益靡靡敝矣國初尚襲元習宣正以來駸駸如宋矣至弘正間先生與諸君子始一變趨古其文類國策史記詩類漢魏盛唐于是明興詩文足起千載之衰而何李最為大家今學士家稱曰何李或稱曰李何屹然為一代山斗云始在中書也自館閣諸縉紳與四方學士人人願見先生又願見先生詩車馬填門巷不絕而先生德性純明言儀雍雅杯酒談笑間詩文立就作字復秀拔奇勁迥出常格一時聲傾都下然顧高潔不妄交遊錢寧欲交驩先生間持古畫求先生題先生曰此名畫無污吾題留一年終不與題是時寧賜宗姓最寵貴弄權先生顧奴視遠之會乾清宮災應詔言便事乃極言邊軍番僧義子數事義子者斥錢寧也疏留中不出師御史客死京師權倖廖鵬者賄以棺謂可結縉紳驩也先生曰御史生不苟受奚為受污地下邪乃約所知共賄金斂之竟却其棺督學關中時會鵬弟鸞鎮守關中恃勢益橫其參隨者遇藩臬官不下馬諸藩臬佯若不見者後遇先生先生執參隨答繫責數之諸參隨始人人斂避矣先是逆瑾撓吏部權則移書許太宰引正大義獻吉與姜御史詰奏又移書楊太宰直獻吉獄少師李西涯疏上乞休會有兵事又援古大臣義為書讓之三書皆非身事而抗言尊顯語涉時忌議者謂憂國憐才古人莫加也顧獨以不能干謁守中書十年不調官然志在經術世務終不言功名事後稍遷提學副使來關中而教關中士亦以經術世務如其所自志關中士氣習文藝蓋自是一大變云是時世寧侍先生正學書院先生說五經義與諸家訓詁多殊私以為諸訓詁不及也古天文地理陰陽律歷家皆能究其指意常言彼有是有不是欲取經訓與諸家書刪繁折衷成一家言顧三十九而卒志業竟不及就也豈命數然邪抑詩文盡洩神秘固造物所忌邪嗟傷乎傷乎而志狀則言先生使滇南不持滇南一物持父母喪不終禫則不酒不琴性不喜華麗不治產祿入盡散親故臨卒時餘三十金篋中此固世俗所難在先生猶其細者始先生崛起汝南人即以為班固崔駰陸雲王勃之流也夫數子皆幼慧英特才藻雄麗者故人以比先生至先生德量風節數子又安可並論哉世多言修士少文才人行劣二者蓋更相笑也乃先生則獨稱全才可不謂振古豪傑士邪所著雍大記三十卷何子十二篇詩歌千餘首書疏騷賦序記銘贊雜文數百篇盛傳當世名可萬世不朽矣次子立舉癸卯鄉試立子洛文復少俊皆能世其家學喬生曰世稱何先生詩至名傳四夷不虛也其節行人不盡傳何哉及讀何子十二篇又歎有王佐才而蚤死不遇悲夫余故述先生行事采其關國體大者令後世有可攷焉關西耀州門生喬世寧譔

創建大復何先生祠記

賜進士第嘉議大夫協理京營戎政兵部右侍郎前都察院右副都御史奉勅巡撫河南等處地方德清蔡汝楠撰

先生汝南信陽人也信陽故有祠而郡久未祠祠自前守河中王子崇古始王子祠先生也則以固始許公合饗而署曰烈文蓋兩重云業已妥神立石而嗣守者謂先生不宜與許公並祀則出其主鄉賢祠中而事遂寢蓋八年而余以撫治至大梁首詢得其事慨然思振舉之矣而是時先生孫洛文中省試第一復具言前事方亟施行會汝南守迫上計未報越歲夏新守徐子中行至復以祠事請曰何先生以文章增重昭代功德遠矣况明公亟意表章而有司不以時舉墮先賢之烈不著後世謂何然先生主已出即入恐不饗不如專祠便既與余意合遂亟允其請已復請余記余又允其請乃躍而馳歸徧卜地城中不得竟得平輿侯漆雕氏書院右隙地在天中山南確山東抱汝河西繞而城垣當面若屏翰焉蓋天地之中極而河嶽之總會也為祠前堂後寢並四楹門垣周繚率如儀經始嘉靖四十一年秋七月望日越八月二十日垂成會余以少司馬命迫發而徐子亟走吏請記云余往讀書山中詮論當代名家則獨推第李獻吉與先生若泰山北斗云然問之交游或與或否惟今守同郡徐子以余言為然則又未嘗不願一至其地瞻拜祠宇為恭敬也豈謂余與徐子同宦斯地而先生之祠竟成于今日也固數也乃卜其祠既不在他所而竟與孔門高弟並峙千古也又非數哉然余獨恠鄙人之言曰文士鮮行乃概天下賢者于是而謂文章不得與節義齒列則又未嘗不投翰興歎也嗟夫是孰知文章之關於世也固至鉅哉上之經緯兩儀彌綸三極其次恢展聖謨潤色洪業其次憫時政得失主文而譎諫著之冊而勸戒昭播之詩而美刺顯俾人紀允殖而天常不墮是則文章之為教也故比干剖心箕子不以演疇貶節季路結纓游夏不以文章損譽三仁四科其致一也豈若拘學抱咫尺之義以孤於世者邪明興百六十餘年而文章迄無定體自先生崛起汝南始與關中李獻吉發憤詞林超覽古始乃排斥群疑歸之大雅何其雄也即使來哲代興不無侵軼然其開先基始之功揆之羲和授時神禹治水同一久遠矣矧平生風節又廩廩較著者哉方先生守中書時猶散曹也而公家之事知無不言亡論抗疏忼慨如應詔極言番僧義子錢寧數事披鱗蹈鑊朝士奪色即如逆瑾撓吏部權則移書讓吏部會有兵事而執政乞休則又移書讓執政李獻吉與御史姜某訐奏也則又移書太宰直獻吉矣其感憤時事而扶義倣儻蓋素所蓄也夫其平居敢諫若此而臨事顧不能仗節如許公為乎何俗士見之晚也頃余會大梁縉紳長老又云先生自幼冲時謙抑溫退未嘗以才凌人及論國家當否則蹈厲憤發有萬人獨往之氣由少逮沒齒未嘗一問家產而人有緩急則又無不各厭其意道弗合者雖隆貴人忍不與見至道藝士即貧賤衰老尤折節下之不倦也夫以彼其才而好修又若此固蔚然醇儒也獨柰何以文藝少之哉余又嘗讀先生新論十二篇上下一古今天人之際至備矣假令托以不御之權則何遠不至乃齎志短折而竟以一學掾死有足傷心流涕者然先生功在斯文節在朝著行在鄉曲固萬世不朽矣而又何恨哉余悲世俗不察其意而猥以詞華之士同類而共訾之也故不著其文而獨詳其行誼大者俾後世得觀覽焉是年秋中丞安居胡公來代實克成厥終而臺察鳳翔李公學使歸安陳公咸右文敦節先後協謀於法得備書云先生名景明字仲默門人稱大復先生

明故提督學校陝西按察司副使信陽何先生墓碑通議大夫兵部左侍郎新都汪道昆撰

當世以作者名家必首何李何則學士所稱大復先生何仲默云往聞先生將終屬諸弟子必李獻吉銘吾墓諸弟子不果聚族而私為狀為志為銘其後數十年門人喬景叔始為何先生傳概舉其質行著者載傳中又數十年先生有孫洛文守太子中允將修闕事屬余為先生碑余從諸後死者尸祝先生顧得逮事為幸即無能為中允役其何敢辭先生家信陽世有秋菀菀母李夢赤日而娠及舉而命之曰景明始能言輒彊記六年能聲偶八年能文里師謂何氏子童而神通避席去年十二從父會寧丞信官臨洮臨洮守召授春秋奇之甚居三年而父謝去貧不能歸守帳具祖先生於郊車馬畢具既就舍受伯兄景韶尚書尋以尚書籍鄉試第三人年十五耳先生翩翩然非也業已善詩善書出入則王公大人爭迎致之幸一見越三歲舉進士授中書舍人獨憂國秉下移力請告寺人瑾悉諸在告者矯詔例免舍人于家瑾誅用大學士李文正公薦起則仍舊秩直內閣侍經筵久之進司封員外郎侍直如故守中書餘十載始以副使督學陝西無何病歸歸六日卒時年三十九先生幼清蚤貴人人且旦暮卿相之卒之年不及彊官不過二千石惜也初獻吉崛起北地倡江東歷下二三君子講業京師先生至大悅之相與道古遂駢肩而進先二三君子鳴其論世則周秦漢魏黃初開元其人則左史屈宋曹劉阮陸李杜都人士所膾炙者宜莫如彭澤宣城昌黎先生宣言古文之法亡於韓詩弱於陶亡於謝睥睨千古直與左史屈宋曹劉阮陸李杜游世儒率溺舊聞弗入也及得兩家所論著者肱箠而擬議之於周秦漢魏黃初開元之間始相顧曰誰謂何李不馴古之人也於是聞者響應莫不傾耳聽之兩家逋為桓文執旗鼓號天下矣獻吉兢兢尺寸非規矩不由先生志在運斤斲輪務底於化于時主典則者張獻吉主神解者附先生要諸至言各有所當顧其相直若繩墨而相濟若和羹即言逆耳而莫逆于心耳視者弗察也今兩家並懸書海內海內不啻戶說之浸假得終其天年先生化矣即先生以文學顯顧其義甚高初入中書輒上書許襄毅所極言嬖人用事公等務操正義撓其權乾清宮災嘗應詔上封事則又極言義子邊軍番僧諸不便狀疏留中不行聞盜起河南會文正公請老先生謂非大臣義書讓之瑾故憚獻吉名高噤獻吉先生書抵文正為獻吉地且介康德涵居其間瑾意平乃解及獻吉對江西簿獄且成先生獨上楊文襄書直獻吉幸臣錢寧冒賜姓目攝諸公卿獨以古畫求先生詩待命終歲卒不予中官廖鵬柄事嘗賻師御史棺先生醢諸客購他材力卻鵬所賻者鵬弟鸞席鵬寵填陝以西諸參隨騎遇藩臬大夫無所問先生塗遇騎者輒就馬上縛之乃若使滇不納餽遺居喪不禫不飲歷仕十餘年不問家人產死之日囊中僅三十緡即其孝廉足多蓋天性也景叔又言先生博物旁通天文地理陰陽律歷諸家末年將輟修辭務經世為用先生已矣辛巳夏六月不雨至于秋八月及先生卒其日大風雷雨作晝晦冥嗟乎歲在龍蛇泰山梁木阨矣先生言行載名臣錄鄉譽載中州人物志其學政載陝西通志其家世則已詳墓志中碑不及詳碑其大者如此汪道昆曰儒者言皇帝王伯其相推若四時秦終歸餘漢履端矣由唐宋而迄元季迭相竭而歲終焉大明開天乃復更始漢文以清靜致刑措熙熙然春乎洛陽少年為漢作始未駕而稅其如通達國體何孝武表章穴經兩司馬並起即盛矣美矣伊誰始邪明在孝宗春之府也漢承挾書而得賈董明承十世之敝而得李何先生與賈為徒而中道並天其有不同者幾希顧漢沿周而去道近漢之後無文矣唐之中無詩矣兩家興廢繼絕其為力難即末流誰能不波疇敢登諸千載之上要其功則李何茂矣嘉靖以往何論建元元封禪而祖之其為司馬者非兩也而中允起當戶其斯為奉冢祀者邪中允有當于不佞之言遂屬吳

人周天球勒之石

皇明名臣言行錄

何景明字仲默河南信陽州人八歲能屬文十五舉鄉試第三明年會試以文多奇字不第入大學北歸祭酒林瀚賦詩贈之弘治壬戌舉進士授中書舍人乙丑奉敬皇帝哀詔下雲南遠方君長及中貴人咸贈遺犀象珍貝謝弗受後逆瑾用事上書諸大臣言宜自振立以抑瑾權不用謝病歸踰年免官瑾敗大學士李東陽薦復授中書舍人直內閣制勅房經筵官其友李夢陽遭江西之訟衆多媒蘖其短莫肯為直者景明獨上書爭之訟得辨乾清宮災上書陳時政言人事不修天變將復作且詆義子不當蓄宦官不當寵疏留中不下人為之寒心時四方學士咸願知景明車馬填門巷錢寧欲交驩景明持古畫求題謝曰此名畫不可點污卒不許師御史客死京邸中人廖鵬贈之棺景明叱却之曰吾友生不苟受豈以死受之哉遂自出金賻之進吏部驗封司員外郎仍直內閣陞陝西提學副使政尚嚴務在崇本起弊士初稍不堪久而安之正德辛巳棄官歸以疾卒于家所著有何氏集十二論及雍大記常曰文靡于隋韓力振之而古文亡于韓詩弱于陶謝力振之而古詩亡於謝人以為知言弘治初北地李夢陽首為古文以變宋元之習文稱左遷賦尚屈宋詩古體宗漢魏近律法李杜學士大夫翕焉從之其時濟南邊貢姑蘇徐禎卿及景明最有名世稱四傑四人才各有所長李天才雄健徐陶冶精融而景明藻思秀逸皆藝苑之鴻匠也

陝西通志

何景明字仲默河南信陽人弘治戊午舉人壬戌進士少以奇童名中年以詩名世時人方之唐李杜焉由中書舍人陞提學副使莊重和粹嚴毅高明教人以德行道誼為先以秦漢文為法條約精密以教化為守令首務時知府有不受約束者語之曰君子不以作人為事但與俗吏伍邪其人頓服有同知臨盤屋加刑于生員之父生員救之坐以擅入公門罪乃檄而數之曰子救父死且不避乃以不應罪之夫人豈無父邪生員獲免究當大比方伯移檄減舊額以節費報之曰國家求賢本意似不如是此胥吏見耳竟不從取生員于書院日與論說六經旨意不拘拘於傳釋嘗曰緣泥枝葉而忘尋本根此末學之弊失益遠矣在關中所著有雍大記既去僚友刊其遺稿曰何仲默集

河南通志

何景明字仲默信陽人生有異質弘治中舉進士授中書舍人崇古學抑陋習文體為之一變正德初逆瑾用事景明謝病歸瑾敗復職直內閣制勅房會乾清宮災應詔陳時政語頗激切不報久之補副使督學關中會疾作棄官歸卒年三十九所著有雍大記三十卷何氏集二十六卷行於世

中州人物志

何景明字仲默信陽人也生有異質八歲即能詩年十二以父任臨洮驛丞乃隨侍臨洮臨洮守李紀者聞其奇召至門下甚器重為延師授春秋亡何即善說春秋歸又受尚書於兄景韶所甫數月即以尚書舉鄉試第三時年十五也諸王公大人以其少而雋爭迎致一見候車日數十乘所過觀者如堵明年會試以文多奇字不第入太學卒業歸則祭酒林瀚賦詩贈之踰歲為弘治十五年舉進士授中書舍人與邊李輩工古文辭皆相振勵而且尚節義鄙榮利並有國士之風焉夢陽又駿發與景明齊名海內操觚之士皆宗尚之稱李何云十八年五月景明奉敬皇哀詔下雲南雲南君長及中貴人咸請題咏比還饋遺犀象珍貝悉謝不受是時逆瑾用事景明移書許進言宜自振立以抑瑾權瑾聞而銜之景明乃謝病歸後竟坐免官正德四年瑾誅李東陽薦復授中書舍人直內閣制勅房經筵官夢陽遭江西之訟衆多媒孽其短勢洶洶欲擠陷重辟景明又移書楊一清爭之始得白五年東陽引疾乞休會有兵事景明又援古大臣義為書讓之三書義咸高語多不錄九年正月乾清宮災景明應詔陳時政乃言人事不修天變將復作且詆義子宦官語頗激切不報是時四方學士咸願識景明車馬填門巷錢寧亦欲交驩景明持古畫求題謝曰此名畫不可點污屢請卒不許師御史客死京邸權倖廖鵬者贈之以棺景明叱之曰吾友生不苟受豈以死污之邪遂自出金賻之十二年進吏部驗封司員外郎仍直內閣明年遷陝西提學副使以經術世務教諸士其規約尚嚴志在崇本起弊士初稍不堪久之幡然興起自是士習文體為之一變云十六年病歸卒于家所著雍大記三十卷何子十二篇詩樂府書疏騷賦序記銘贊雜文二十六卷傳于世子立德安府同知孫洛文翰林庶吉士有雋才能世其家學論曰何公有經世之才所歷皆散地未獲一展厥蘊嘗著十二論以見志於戲古之才士詞臣如虞卿王符之類不能致用於時而恒託之論述亦可悲矣

中順大夫陝西提學副使何大復先生行狀

何先生諱景明字仲默號大復山人先世湖廣羅田縣人四世祖太山紅巾亂時徙信陽遂世為信陽人太山生四子隆一隆二隆三隆四隆二一名海先生曾祖也生祖鑑為典術有陰德稱於鄉里鑑生父信驛丞後封中書舍人博學能詩號梅溪公生四子先娶盧夫人二子長景韶成化丙子舉河南歷官東昌府判先卒次景暘弘治戊午與先生同中河南鄉舉見官安慶府通判後娶李夫人子二人長景暉不仕次即先生者也先生生六歲能對句出奇字日記數百言知敬諸兄至撻之不敢詬見羣兒逐戲即不同群八歲能文十二歲隨父宦之陝西會寧驛時臨洮守李公聞其奇召置門下甚愛重為延師授春秋其師間出他長兒皆謔笑履師座先生獨安坐說春秋李公覲歎曰何兒麟鳳也嘗盛衣冠束金呼入謂其夫人曰汝視予貴邪他日是子貴奚啻予邪居三年父致仕貧不能還李公饋之車馬集諸官相送郊亭上揚爵酌先生曰吾小友既歸改治書治書纔九月沁水李御史瀚時按汝寧調試信陽諸生先生從其兄往試御史讀其文曰奇才奇才吾未見山川何盛生此人也遂復如信陽觀之已而中經魁報者至先生卧應之人曰汝何不喜曰吾固知己何喜為也是時年纔十五形貌又小且秃笄也諸王公大人爭負視至轉相負匿府不出所居過人遮蔽弗得進草書日數百張應諸求者

一時盡呼為神童次年春試以文多奇字覆省卷見除不第入太學匝月歸林祭酒作詩贈之祭酒贈詩諸生前未嘗有也未冠中弘治壬戌進士授中書舍人奉敬皇帝哀書南下遠方君長貴使者咸贈遺犀象珍寶有熊太監者獨復重贈遺先生平却不目太監大發悟於心曰彼年少能爾吾獨不醜哉遂去職踰年還惟衣書一篋而已後值逆瑾用事知以小臣不能奪諸大臣又多自顧即謝病歸居頃之梅溪公與李夫人同時卒先生哀毀骨立禪祭未成不飲酒不彈琴服除而逆瑾敗當是時諸名節士多為瑾污者不即被大禍而先生獨超然遠舉天下皆曰見幾而作何子豈不高哉已用大學士李公薦復授中書直內閣制勅房經筵官其友北地李獻吉遭江西之訟衆多媒蘖其短莫肯為直者先生獨上書爭之且責楊冢宰訟遂得辨乾清宮災上書陳時政言人事不修天變將復作至詆曰義子某不當畜也某宦官不當寵也因留中不出人為之寒心是時錢寧舞權指使百職一日持古畫造門求題先生曰好畫勿汙吾題爾留一年不與一字師御史客死京邸幸臣廖氏者贈之棺先生叱却曰吾友平生不苟受也豈以死汙之哉遂自出金賻之其勇於為義類如此先是京官非有罪無九年不遷者先生特以危行連蹇湮滯中書凡十餘年始轉吏部員外乃陞陝西提學副使陝西邊絕外地緣邊數縣路出外舊時提學難之皆調試其縣諸生先生曰即如此是棄之矣竟往試如他縣藍田大旱其山上有泉先生至則登山投祭文泉中須臾大雨商州學地狹旁有王母祠大官家廟州人神其祠先生顧謂守官曰何祠廟為也俱輒毀已大官家亦不敢怨陝西屬所試諸生奇者悉取正學書院親自督教間出俸錢贍所不給關中得人于時為盛今年四月竟以學政勤勞得心疾六月告歸行李蕭然至家甫六日而卒聖明初服先生乃不永焉豈不命耶先生生而神明德量純粹志大行堅學精意遠博物洽聞會理守約究其所造可謂渾然成矣家庭間怡怡如也交接雍雍如也取與進退斷斷如也自鵬侍側未嘗見喜怒顏富貴功名不齒諸口平生手不持一錢讀書必至夜分以為常與人講論終日不倦安貧樂道不念家產居官勤事以祿自守復絲毫弗苟受然又好予卒後閱諸囊中餘金三十而已豈可不謂清白君子者哉初國朝去古益遠詩文至弘治間極矣先生首與北地李子一變而之古三代而下文取諸左馬詩許曹劉賦賞屈宋書稱顏柳天下翕然從風盛矣哉千載一時也嘗曰詩文有不易之法辭斷而意屬聯類而比物殊途百慮而一致同歸文靡于隋韓力振之而古文亡於韓詩弱于陶謝力振之而古詩亡於謝繇此觀之先生之所著述可見矣先生通五經尤好易詩其陰陽醫卜天文地理律呂歷數諸家各造其妙所著有何氏集十二論定古樂府選漢魏詩三秦志皆行於世先生生成化十九年八月六日卒正德十六年八月五日年三十有九初配張氏先卒贈孺人繼配王氏封孺人後先生十六日亦卒孺人隨先生周旋甚相愛又能敬每奉飲食必自為無不甘嘗夜分先生不寢孺人不寢也及先生卒日夜痛哭環柩走曰吾欲死飯漿不吞口竟不病而絕嗚呼夫婦同歸孺人之貞志畢矣孺人少先生二年生子男三人長夫讀書能文聘郟縣王氏參政公女也次立次登長女聘袁氏子次聘馮氏子次聘張氏子皆幼今年十月七日將合葬釣魚臺之北山兄景暉謂鵬曰亡弟素愛子子狀之鵬自幼與先生同里長而從學先生嘗謂梅溪公曰是子甚解吾有望也及後先生官京師六年至是又五年餘始從事詩文望先生歸一講焉及歸而竟不起傷如何耶方先生病篤鵬與其姪何士門人張詩入執其手泣先生曰死生常理無足悲但吾生多辛苦耳聲尚琅琅然鵬聞之先人云李夫人方娠時夢大紅日墮懷中已而生先生今六月至八月早卒之日甫歛大風雷雨白晝晦冥先生生死大異豈非其有關天地不偶然者哉正德十六年八月二十五日門人樊鵬謹狀

中順大夫陝西按察司提學副使何君墓誌銘

孟洋曰余讀伯夷傳其稱天道不與善人謂其不然今觀何子修學立行而夭死又何戾也余哭仲默之明日其孤以門人樊鵬狀謁銘慟乎慟乎君知我我獨不知君已乎仲默茲為汝誌矣何君諱景明字仲默號大復山人高祖太山由羅田徙居信陽生海海生鑑鑑以陰陽家縣辟為典術五子曰信者封徵仕郎中書舍人讀書善吟號梅溪梅溪公四子長景韶東昌通判卒次景暘安慶通判次景暉最幼何君何君秀而癯性沉敏有度八歲能屬文十二從梅溪公宦遊陝西之渭源臨洮守聞其奇召置館下甚愛重令師授春秋數月即說春秋其師乃辭避弗教也梅溪公既歸乃又從其兄受尚書受尚書才九月弘治戊午即以尚書魁河南鄉試己未試禮部不第遊太學祭酒林公又甚愛重何君贈詩美之壬戌舉進士進士例改庶吉士何君獨以不喜私謁弗與進士請歸娶張氏二年卒當是時關中李君獻吉濟南邊君廷實以文章雄視都邑何君往造語合三子乃變之古自是操觚之士往往趨風秦漢矣甲子授中書舍人明年奉使南方還過里閭再娶唐縣王氏是歲正德元年也劉瑾時君度惟大臣可與抗節乃上書諸尊貴言宜自振立撓瑾權諸尊貴惡顧嫌何君丁卯何君恐禍及謝病歸郊居著述一年瑾盡舉免諸在告者戊辰何君免己巳梅溪公及李太孺人相繼卒何君哀毀危絕辛未冬何君用閣老李公薦復授中書舍人直內閣經筵官時四方學士咸願知何君車馬填門巷即元老鉅卿無不欲出門下錢寧欲交驩何君間持古畫謁何君題君謝曰此名畫不可點毀弗許乾清宮災君應詔言時事詞義剴切疏留不下丁丑陞吏部驗封司員外郎仍直內閣戊寅陞陝西按察司提學副使提學政尚嚴務在崇本起弊士初稍不堪漸久而安風習亦振初何君獨以文學著聞既提學人又服其能政若是辛巳二月何君以形勞慮深卒然嘔血損六月棄官歸會道暑益亟抵家六日為八月五日而何君卒嗚呼傷哉王孺人故有內疾號痛莫支越十六日亦暴蹙而卒孺人幼喪父相者貴之人求婚母輒不許年二十二始歸何君以賢稱會毅皇帝上尊兩宮及李太孺人張氏同封贈云何君事兄恭能順承父母之志其父母諸兄亦獨甚愛何君何君一切不好華靡復不治產業居官所入祿則又常分所親故既歸餘白金不滿三十兩所在不齎方物疾且亟王孺人泣曰官貧諸兒女幼君即有不諱奈何君曰若無多患第不昧天理足矣何君友與人訟者故嘗寡交與及訟衆莫為之地何君乃獨上書力諍直友之屈師御史者客死京邸莫能斂錦衣官廖鵬錢寧之黨也賻之棺因結懽士大夫君曰奚為汙吾友地下乃出金賻之諸所知皆賻之斂成禮旋卻所賻棺其見義勇為如此何君天資穎異好學常若不及讀書率過夜半即盛暑蟲蟲汗洽背不廢邇年略去詞章嘗稱以為天下自有實用之學竭精力猶弗逮何暇文詞無益也蓋其用世之志至遠今中沮矣惜哉及王孺人以哀絕亡他顧慮亦貞固矣何君生成化癸卯八月丙寅卒年三十九歲王孺人少二歲生成化乙巳二月甲寅子三人長夫聘郟縣王氏參政君女次立次登女三人長聘袁氏子次馮氏子次張氏子皆王出是年十月七日合葬典術公墓側何君有文集詩集詞賦集合若干卷行刻傳於世云銘曰噫歸哉何君孰奪爾壽也雖奪爾壽爾名不朽有女媿媿爰儷君子如琴如瑟樂爾偕死樂爾偕死未畢爾婚嫁豈無巨源靡孤叔夜淒淒雲旂霧駕遲遲鳳凰啾啾和鳴相隨瞻彼崇岡載陰載陽靈魄攸藏用萬祀無彊有涯孟洋撰